

**NINTH MIZORAM LEGISLATIVE ASSEMBLY
(FOURTH SESSION CUM BUDGET SESSION)**

LIST OF BUSINESS

FOR ELEVENTH SITTING ON MONDAY, THE 17th MARCH, 2025
(Time 10:30 A.M to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

LEGISLATIVE BUSINESS

Bill for introduction, consideration and passing

2. **PU VANLALHLANA**, Minister to beg leave of the House to introduce The Mizoram Salaries, Allowances and Pension of Members of the Legislative Assembly (Amendment) Bill, 2025.

ALSO

to introduce the Bill

to move that the Bill be taken into consideration

AND

to move that the Bill be passed.

FINANCIAL BUSINESS

Discussion and Voting on Demands

3. **PU C. LALSAWIVUNGA**, Minister to submit the following to the Vote of the House on 17.03.2025 (Monday).

Demand No.	Purpose	Amount	<i>Demands for Grants page No.</i>
19	Local Administration	2,25,15,82,000.00	217-224
23	Art & Culture	14,83,89,000.00	268-276
27	District Council & Minority Affairs	6,51,14,13,000.00	324-328
34	Animal Husbandry & Veterinary	86,31,13,000.00	404-419
TOTAL		9,77,44,97,000.00	

4. **PU LALNGHINGLOVA HMAR**, Minister to submit the following to the Vote of the House on 17.03.2025 (Monday).

Demand No.	Purpose	Amount	<i>Demands for Grants page No.</i>
7	Excise & Narcotics	57,08,65,000.00	60-64
22	Sports & Youth Services	27,38,35,000.00	258-267
28	Labour, Employment, Skill Development & Entrepreneurship	29,48,75,000.00	329-336
TOTAL		1,13,95,75,000.00	

VANLALTHANTLINGI
Commissioner & Secretary

Day-11, 17th March, 2025 (Monday)

SPEAKER : “Hunte leh hun bite a tidanglam a; Lalte a sawn bo va, lalte a tungding a. Mi fíng hnénah finna a pe a, Hre thiamtu hnenah hriatna a pe a.”

- Daniela 2:21

Kan hriat theuh angin kan thenawmah Venghlui Bazar kangmei a chhuak hlauh mai a, vanduaithlak takin electric line te, cable te a kang chhe deuh vek a. Tunah hian Electric leh PWD lama kan official ten theihtawp an chhuah a, tun dinhmunah pawh hian an han tichhin a ni a. AC line te hi a in cut leh palh chuan kan chawlh leh hlek te pawh a ngai maithei a, a ngailo turah te pawh beisei ila. Kan tan phawt ang a.

Vawiinah kan House Leader Pu Lalduhoma a awm lova, Union Home Minister rawn zin khan Guwahati thlenga tawiawm turin a sawm a. Vawiin hian a rawn thlawk hawng ang a, chawhnu lam session chu rawn tel hman turah beisei ila.

Tin, Pu PC Vanlalruata hi eng emaw thilah Delhi a kal a ngai a, Nilai thleng a cham a tul dawn a. Chuvang chuan, member pahnihte kan zingah an awm lo tih kha House kan hriattir a ni.

Hei kan Rule No. 35 in a sawi ang in darkar hmasa ber Zawhna & Chhanna hunah hman tur tih a ni a; kan tan tlai deuh hlek nachungin darkar khat chu kan hman tho a ngai dawn a. Chulai chu memberte'n kan hrethiam tlang ang a; kan duh vang a ni lova, kangmei chhuak te hi. Hun erawh chu hman thiam deuh hlek tum tlang ila a tha ang e.

QUESTION & ANSWERS

Starred Question No. 161: District Information & Public Relations Department Office building chungchang.

Zawhna Neitu: Pu H. Ginzalala, Champhai North Bialtu.

PU H. GINZALALA : Pu Speaker, ka lawm e. Hon. Minister, Information & Public Relations Department changtu min chhan atan ka zawhna chu –

- a) Champhai-ah hian Information & Public Relations Department hi kum 50 an lo inbun ve tawh a, Pu Speaker, ka zawhna chu: -
- b) Champhai-ah District Information & Public Relations Office building sak tan tumna a awm em?
- c) A awm loh chuan, a rang lamin Sorkar-in min ngaihtuhsak thei em? Ka lawm e.

SPEAKER : Chhang turin Information & Public Relations Department changtu Minister Dr. Vanlalhlana i lo sawm ang.

DR. VANLALHLANA, MINISTER: Pu Speaker, he House zahawm taka kan Member Pu H. Ginzalala, Champhai North bialtu zawhna chhanna chu –

- a) Champhai District Information & Public Relations Department Office sakna tur hmun kan nei a, a sakna tur concept paper pawh kum hlui lamah khan peihfel tawh niin, fund source kan zawng mek a ni.
- b) Champhai District Information & Public Relations Department Office sak tum a ni a, amaherawhchu, sakna tur sum a awm loh avangin SASCI-ah concept paper thehluh a ni.

SPEAKER : Zawhbelhna heng memberte hnen atang hian kan la ang:

1. Pu H. Ginzalala (Zawhna neitu),
2. Pu Lalchhuanthanga,
3. Pu T. Lalhlimpua.

PU H. GINZALALA: Pu Speaker, ka zawhbelhna chu - Printing & Stationery Department leh Information & Public Relations Department te hi amalgamate tumna a awm em? A awm chuan, engnge a thlen chin? Ka lawm e.

PU LALCHHUANTHANGA: Pu Speaker, Information & Public Relations Minister zahawm tak chhan atana ka zawhbelhna chu - Information & Public Relations hian kum tinin calendar leh diary an siam thin a. A then an hralh a, a then a thlawnin an sem bawk thin a. Heta tan hian sum engzah nge sen ral anih? An hralhchhuah hian sum engzat nge hmuh let leh a nih?

PU T. LALHLIMPUA: Pu Speaker, ka lawm e. I&PR Minister zahawm takin a min chhan tura ka zawhbelhna chu - Journalist pension-te hi engzat nge kan neih? Pension dil te hi dan ang hian Sorkarin a pe thei em? Ka lawm e.

SPEAKER : A theih ang anga chhang turin I&PR changtu Minister Dr. Vanlalhlana ilo sawm ang.

DR. VANLALHLANA, MINISTER: Pu Speaker, zawhna neitu Champhai North bialtu Pu H. Ginzalala zawhna chhanna chu - Printing & Stationery hi I&PR amalgamate chungchang hi Council of Ministers meeting in a a pass tawh a ni a. Amaherawhchu, thil tihfel ngai leh ruahmannate la tihfel a ni lova, bawhzui mek a ni e.

Tin, Pu Lalchhuanthanga, Aizawl South-II bialtu zawhna kha, I&PR Deptt-in calendar leh diary siamnaa nikum 2024-a sum senral zat chu ₹54 lakh vel a ni a, a chiah chiah ka hre thei tawh lova. Kumina kan sen hi ₹56 lakh bawr vel a ni a. Tin, calender hi nikum khan copy 74000 kan print a, kuminah hian copy 90000 kan print a ni. Nikum khan Diary hi a lian leh a te copy 3150 ve ve kan print a, kuminah hian copy 6000 ve ve kan print bawk a ni. Sum hmuh let zat hi Chiang chiahin ka hrethei lova, a chhanna ziaka in pek kan lo tum ang a. A sum hmuhlet zat hi ka sawisual palh ka hlau a, a chiah chiahin a hriat theih lova. Kan hriat atan ka sawi duh chu, diary hi official ho hman tura tih a nih angin MLA te'n kan dawng a, office lama branch leh department hrang hrangah semchhuah a ni bawk a. Chuvangin, diary lam atanga sum hmuh-let a awm chiah lova. Calendar ah hian hmuh-let eng emaw zat a awm ang a, tam lutuk erawh a ni chiah lova. Department officer-te hnenah an mamawh dan angin a thlawna kan sem thin a ni.

Pu Speaker, calendar hi commercialize kan rilruk a, nikumah kan meeting tawh a. Amaherawhchu, zirchian leh ngaihtuah belh ngai a awm avangin nikum khan kan ti ngam ta chiah lova. Kuminah hian tihdan a awm ang em tiin ngaihtuahna kan seng chho leh a. Mipui tam tak lei turin an intlar a, a department lama lo buaipuitu tur kan indah leh a ngai si a. Hengah hian vendor hmanga tihdan te awm sela sorkar tan pawh a awlsam zawk ang a, tiin ngaihtuahna kan seng a ni.

Pu T. Lalhlimpua, Lunglei west bialtu zawhna Journalist pension chungchang kha, tunah

hian pension mi 8 kan nei mek a, fund kan neih ang atangin pek zel an ni e.

Starred Question No. 162: Museum leh Mizo History chungchang.
Zawhna Neitu: Pu VL. Zaithanzama.

PU VL. ZAITHANZAMA: Pu Speaker, ka lawm e. Art & Culture Department changtu Minister zahawm tak chhan atana ka zawhna te chu –

- a) Mizoram Sorkar hnuaiah hian Museum eng zat nge kan neih?
- b) Museum tih hmasaw kawngah engtia hmalak nge kan tum?
- c) Mizo history leh pi leh pute thlang tlak dan chhuichianna kawngah Art & Culture/Tribal Affairs Department hmalakna min hrilh thei em? Ka lawm e.

SPEAKER : Art & Culture Department changtu Minister Pu C. Lalsawivunga chhang turin ilo sawm ang.

PU C. LALSAWIVUNGA, MINISTER: Pu Speaker, Ka chhanna chu -

- a) Mizoram Sorkar hnuaiah hian Museum pahnih kan nei a, chungte chu: -
 - i) Mizoram State Museum, McDonald Hill, Zarkawt;
 - ii) District Museum, Sazaikâwn, Lunglei.
- b) Museum tih hmasawn kawngah chuan heti ang hi kan dinhmun a ni -
 - i) Mizoram State Museum building thar tur hi MINECO-ah luah theih mai turin buatsaih mek a ni a. Peih fel a nih hunah chuan McDonald Hill, Zarkawt-a mi hi sawn phei tura buatsaih leh buaipui mek a ni.
 - ii) District Museum, Saizaikâwn, Lunglei hi sak thar niin, 19th July, 2024 khan hawn a ni a. Gallery changtlung tak tak awmin thawktu erawh kn indaih lo hle a ni.
- c) Aw, hrilh thei e. Mizo history leh pi leh pute thlang tlâk dân chhuichianna kawngah Art & Culture/Tribal Affairs Department hmalaknate chu: -

Pi leh pu te thlang tlak dân ah hian Art & Culture Department hian hma nasa takin a lo la tawh thin a, Tribal Research Institute hian pi leh pu hnam hrang hrangte thlang tlâk dan leh an lo khawsakna hmun hluite chhinchhiahin lehkhabyte, research leh seminar-te a buatsaih tawh thin a, chungte chu: -

Mizo Tobul chhuina (Seminar) chu July ni 25 leh 26, 2024 khan Department of History leh Department of Mizo & Cultural Studies, ICFAI University, Mizoram nen tangkawpin ICFAI University, Durtlang North-ah neih a ni.

Zofate thlang tlâk dan zirchianna (Seminar) pawh ni 29.10.2024 khan Mizo Academy of Letters, Aizawl nen tangkawpin Govt. Champhai College-ah neih a ni.

Art & Culture Department hnuaia Archaeological Wing atangin hmun hrang hranga Exploration & Excavation neih thin a ni a. Kum kal ta November 2024 - January 2025 chung khan Dungtlâng khaw hmun hluih Archaeological Excavation neih a ni a. He hmunah hian pi leh pute hmun hlui leh hmanraw hluite phawrh a ni a, thlan hlui atanga ruhro laihchhuah chu carbon dating atan a sample hi Florida, USA -ah thawn a ni. He lai hmuna kan pi leh pu ruhrote hi engtik kum vêla phum nge tih a hriat theih ang a. Chu chuan kan pipute Dungtlâng ram leh henglai bawra an khawsak hun hi eng emaw chen a rawn hrilhfiah thei dân a ni.

Hemi baka hmachhawp kan neih chu Seminar kan neih tawha paper-te hi lakhawmin a bu

a chhuah turin Tribal Research Institute-in a buaipui mêk a ni.

SPEAKER : Zawhbelhna zawt turin -

1. Pu V. Malsawmtluanga,
2. Pu RM Chakma,
3. Pu Lalramliana Papuaia.

PU V. MALSÂWMTLUANGA: Pu Speaker, Art & Culture Department changtu Minister duhawm tak, Pu C. Lalsawivunga min chhana tan ka zawhbelhna chu – Lunglei West bial Sazaikâwna District Museum 29th July 2024-a hawn tawh kha Lunglei mipui kan lawm hle a, Lunglei mipui leh zirlaite'n an tlawh nasa hle a ni. A bul vêl leh a entrance-te thuum a la ùl hle a. Tihchangtlun tumna, hmachhawp te a awm em?

PU RASIK MOHAN CHAKMA: Pu Speaker, ka zawhbelhna chu -Nikum hmasa leh nikum ah te khan Art & Culture hnuai ah khan Rural library sakna khawi hmunah te nge sanctioned anih? Kha library sakna tur kha Art & Culture department aṅanga sanction a ni si kha engvângin nge Rural Development department-in a implement daih? Eng nge a chhan? A bik takin Chawngte, Kamalanagar-ah library sakna tur detailed plan and estimate min pe thei em? Tunah a chhanna min pek theih loh pawhin nakinah ziakin min pek theih chuan.

PU LALRAMLIANA PAPIA: Pu Speaker, kan bial hi hnam chi hrang hrang awmkhâwm kan ni a. Ka zawhna chu: Bru, Chakma leh Mizo-te joint cultural festival ang hi organize theih dân a awm em? Chutiang tur chuan, keini bial ang hnam inchênpawlhna hmun, cultural background hrang hrang neite tan a huhua cultural festival hi buatsaih sak dân min ngaihtuah pui thei ang em?

SPEAKER : Chhang turin Art & Culture changtu Minister, Pu C. Lalsawivunga ilo sawm ang.

PU C. LALSAWIVUNGA, MINISTER: Pu Speaker, Pu V. Malsawmtluanga zawhna kha - Sazaikâwn Museum, nikuma kan hawn kha a chhehvêl thuum ṭhat ngai, tihchangtlun ngai a ni a; a building hlui pawh ṭhiaha sak ṭhat ngai a ni a. Heng atan hian hma lak mêk a ni e.

Tin, Pu RM Chakma zawhna - Rural Library sakna tur chungchang kha, hei hi SASCI aṅanga pawisa lo kal a ni a, Art & Culture Deptt-in a take-up lova. SASCI sum a nih avângin, keini chuan han chhan ngaihna kan hre lo ni se. Tin, ‘Chawngte ah library sak’ tih kha, Art & Culture hi chuan Raja Ram Mohan Roy Library Foundation-ah hian YMA te nen (**Pu RM Chakma:** Pu Speaker, a chhang tawh a. A thara sak ni lovin, MCSC Office kha chei ṭhat a ni. Chuvângin, sak tharna tur planned estimate kha ka duh chu a ni e.) Kha kha chu kan department kut ken a ni lova, keini chuan kan hriatpui lo a ni. RRLF aṅanga sanction kan neih theih chuan library-te hi YMA-te nen ṭang tânga sak ṭhin a ni. Kan larawn ngaihven ang chu, a rem chuan.

Tin, Pu Lalramliana zawhna kha a pawimawh khawp mai a. Hnam hrang hrangte hian tih dân phung kan nei vek a, hei hi kan inzah sak te pawh a ùl a; chu chu hnam-inpumkhatna atân pawha thil pawimawh a ni a. Engpawh ni sela, heng hnam hrang hrang inawmpawlhna khuahte hian hun remchângah cultural festival buatsaih hi thil tih awm tak leh tih atâna ṭha tak chu a ni awm e, tih hi ka chhan theih dân a ni e.

SPEAKER : A lawmawm e. Zawnha dangah kan kal ang a.

Starred Question No. 163: Boundary Commission din chungchang.

Zawnha Neitu: Pu H. Ginzalala, Champhai North Bialtu

PU H. GINZALALA: Pu Speaker, ka lawm e. Hon. Minister GAD changtu min chhan atâna ka zawnha chu -

Kan ramah boundary hrang hrang kan ngah khawp a, a inkaltheh nasa tawh em em a. Ka zawnha chu:

- a) Administrative boundary hrang hrang, heng - district te, block te, works department te leh jurisdiction boundary te siamrem chungchangah Sorkar anga hmalâkna a awm em?
- b) A awm loh chuan, Boundary Commission emaw, a tlukpui dang emaw din tura hmalak theih a ni ang em? Pu Speaker, ka lawm e.

SPEAKER : Kan hriat angin, GAD changtu kan Chief Minister kan zîngah a awm lova, a aiawha chhang turin Pu K. Sapdanga, Member zahawm tak authorized a ni a. Hetiang zawnha, ziaka awm sa an chhan sakah hi chuan zawnbelhna lak belh a ni lo thin tih kha kan hre dawn nia. Tunah chhang turin Pu K. Sapdanga ilo sawm ang.

PU K. SAPDANGA, MINISTER: Pu Speaker, Champhai North Bialtu Member zahawm tak Pu H. Ginzalala zawnha chhanna chu -

- a) Administrative boundary hrang hrang, heng - District leh Sub-Division emaw, Block leh Works Department emawte boundary siam rem chungchangah chuan Sorkarin hmalakna thar a nei rih lo.
- b) A tul anga ngaihtuah theih a ni ang.

Starred Question No.164: CSR chungchang.

Zawnha Neitu: Pu K. Laldawngliana, Tuirial Bialtu.

PU K. LALDAWNGLIANA: Pu Speaker, ka lawm e. General Administration Department changtu Minister chhan atana ka zawnha chu -

- a) Corporate Social Responsibility (CSR) hi MLA emaw, mi tute emaw pawhin an buaipuiin, hma a lak ve theih em?
- b) Theih loh se, tu phalna nge lak ngai?

SPEAKER : Chhang turin GAD changtu Chief Minister Pu Lalduhoma aiawhin Pu K. Sapdanga ilo sawm ang.

PU K. SAPDANGA, MINISTER: Pu Speaker, Tuirial bialtu member zahawm tak Pu K. Laldawngliana zawnha chhanna chu -

- a) Hma lak theih a ni e.
- b) Chhan ngailo -

Starred Question No. 165: Central Jail chungchang.

Zawnha Neitu: Pu H. Ginzalala, Champhai North Bialtu.

PU H. GINZALALA: Pu Speaker, ka lawm e. Home Minister zahawm tak min chhan

atan ka zawhna chu -

Central Jail-in mamawh tul tak tak a nei nual mai a - Tui connection tha zawk te, Prision Van tha zawk te, Zun-in leh Ek-in te, Street Light tha zawk te, thawktu tam zawkte ngaihtuah sak theih an ni ang em? Pu Speaker, ka lawm e.

SPEAKER : Chhang turin Home Department changtu Minister Pu K. Sapdanga ilo sawm ang.

PU K. SAPDANGA, MINISTER: Pu Speaker, Member zahawm tak Pu H. Ginzalala zawhna chhanna -

Central Jail-in mamawh tul tak ta a neih tui connection tha zawk te, prision van tha zawk te, zun-in leh ek-in te, street light tha zawk te, thawktu tam zawkte ngaihtuah sak te hi Sorkar-in a hria a. Heng mamawh hrang hrang puhru tur hian hma lak mek zel a ni e.

SPEAKER : Zawhbelhna –
Pu H. Ginzalala (Zawhna neitu),
Pu Robert Romawia Royte;
Lt. Col. Clement Lalhmingthanga.

PU H. GINZALALA: Pu Speaker, Subject Committee 4-in Central Jail khu kan zuk tlawh a, an mamawh hrang hrangte pawh kan zuk zir a. Hei, naktuk lawkah Subject Committee 4 hian C-Ward tan bik tv pek kan tum a, chu chu he House-ah hian ka sawi duh a ni.

He Central Jail kan zuk tlawha ka ngaihtuahna a lo lut ta chu, tuna ka zawh tuma hi chhan chu a har viauin ka ring a, Amaherawhchu, suggestion ang deuh te pawh a ni a. Hmun zimte ah mi tam tak an zu in-ek-beng a ni a, an khawngaihthlakawm khawp mai. Concept thar deuh hlek, ram zau zawk deuh te nakin hun lo kal zel tur atan Sorkarin ngaihtuhsak thei ila. Boundary wall-fencing tha taka kan tih theih chuan agriculture sector ah hian activities neih theih se an duhsakawm khawp mai a.

Tunah phei chuan tih tur a awm silo, an mu ngawih-ngawih mai a; zunthlum te, thisen sang te, stroke te pawh an awm nuaih mai a ni. Kha kha a nih avangin, activities an neih theihna tura kan ngaihtuah chuan agriculture sector ah thlaite ching ta se, antam te, maian te, anmahni an intodelh bakah sum tam tak an lakluh theihna a ni dawnin ka hria a. Tuna an tih hi chu industry - furniture lam te a ni a, a market lamah a limit em em mai a; leh expertise ngai chi te an lo ni bawk nen a limited ka ti a. Chuvangin, agriculture activities ah hian hma la thei se a tha ang em? Chhan erawh chu a harsa deuh maithei e.

PU ROBERT ROMAWIA ROYTE: Pu ka zawhbelhna chu – SASCI Part – I, 2024-25 hnuaijah Jail eng emaw zat Sorkar-in a sa dawn niin ka hria a (A lo sa tawh zawk nge ni.) Heng Jail sakna tur sum 1st Instalment dawn atan khan Utilization Certificate Mizoram Sorkain Central Sorkarah a pe tawh em? La tender pawh anih hma khan Utilization Certificate a pe em?

LT. COL. CLEMENT LALHMINGTHANGA: Pu Speaker, tuna Central Jail leh District Jail hmun hrang hranga awm atan fund allocate thahnem tak a awm tawh nia hriat a ni a. He fund allocate sa ah hian tuna an asset neih sa repair leh siamthat mai nilo sak belh

tu hi, jail tangte an accommodation an indaihlo em em phuhrukna tur hian a awmsa mai piah lamah sak belhna tur hi he fund allocate sa ah hian a tel ve em?

SPEAKER : Zawhbelhna 3 kan la ta a, kan duhtawk mai ang a. Hei a dawt chiah hi Home a ni a. Hei, kan senior Pu Ngunlianchunga pawh hian senior te tan a zialo deuh e a ti a. Mahse, a phara hmahruai kha chu inthlahrung lo se. A chhan chu, zawhna kan lak turah rang taka phar kha an awm ve a, a next-ah hian a awm tho a. Kan ko tawh lo ang a.

Tin, vawiinah hian member-te hnenah appeal tur ka nei a. Hei kan tawngkam ah hian ‘senior-junior’ tiin kan in address a. ‘Anni senior; keini junior’ tih angreng hi a ri nawk nawk reng mai a; tun 9th Assembly ah hian a ri nasa bik riau a. Tun term ah na na-na chuan senior emaw, junior emaw kan awm lo a ni tih kha ka sawi duh a. Engpawh nise, mipui thlan-lal, aiawha an thlante vek kan ni a. Chuvang chuan, kan dimhmun kha a inang tlang vek a. Amaherawhchu le, lo senior deuh tawh zawk kha chuan thil kalphung an lo hre tawh nge nge a, anni atang khan zirtur tam tak chu junior zawk te chuan kan nei tak meuh meuh e.

Tunah a theih ang anga chhang turin Home Minister changtu Pu K. Sapdanga ilo sawm ang.

PU K. SAPDANGA, MINISTER: Pu Speaker, zawhna neitu Pu H. Ginzalala rawn sawi kha zawhbelhna nge rawtna nge tih kha han sawichiang hrim hrim ila. ‘Central Jail-ah tv pek tum’ tih kha lawmthu a ni phawt a; ‘central jail chang lo jail dangah pawh hian lo pe zel thei ta sela a lawmawm awm mang e’ tih kha chu ngenna a ni a. Tin, district hrang hrang jail kan neihna hmunah te hi chuan a tawt em em vek mai a, tang thei tura ruat let deuh thaw hi an awm vek mai a. Chu chu a sakna tur lam sum harsatna leh a tang tur lam kan indaih chak bawk si vang a ni ber mai a. A pawl khawp mai a. Tunah hian chumi han solve dan tur Sorkarin remchang a hmu dawn ni tein a lang a ni. Tin, ‘hmun zau zawk, agriculture activities awm theihna neih ni thei se’, tih zawhna kha chu, ‘tha tehlul ang’ tih kha a chhanna a ni mai a.

Tin, han sawibelh hlek ta ila. Kan hriat angin Armed Veng mawng lamah khuan Aizawl District Jail a awm thin a, hei hi Central Jail thlang lama ram zau takah sawn tumna a awm mek a, a, tehchhuah vek tawh a ni a. Tunah hian DPR buatsaih mek a ni a. Hei hi tum dan anga a kal theih hlauha District Jail sawn hunah chuan, tuna Central Jail-a awm mekte pawh an thawl halhna tur a ni thei dawn a, a phurawm hle a. Amaherawhchu, hei hi ruahmanna a la ni chauh a, eng emaw sum sanction a la awm hranpa lo tih kan sawi tel duh a ni.

Tin, Hachhek bialtu member zahawm tak Pu Robert Romawia zawhna kha - UC hi Central atanga fund sanction tute nena inbiakin, tul an tih ang zelin pek thin a ni e.

Tin, Champhai South bialtu member zahawm tak Pu Clement-a zawhna kha ka chhan fuh lo palh ka hlau a, khawngaih takin Pu Speaker, han repeat leh turin ka ngen e.

LT. COL. CLEMENT LALHMINGTHANGA: Pu Speaker, ka zawhna awmzia kha chu - tuna existing jail - District Jail te, Central Jail te sak thatna tur atana fund allocate awmsa tam tak awm nia hriat hovah khan tuna jail awmsa sak thatn mai nge? Indaihlohna a na si a. Hmanni lawka Central Jail kan tlawh te pawh kha desired capacity aia let deuhthaw tang kha an lo awm a. Khang te han ngaihtuah khan, tuna fund allocate sa hian a sak that mai piah lamah, extension (additional accommodation) lampang kha a telh dawn em?

SPEAKER : Aw le, Pu K. Sapdanga.

PU K. SAPDANGA, MINISTER: Pu Speaker, a chiang ta e. Tuna jail hrang hrangte sak thatna (thuamna a ni tel bawk ang a) atana Central atanga kan dawn SASCI Part -I hi crore 55 a ni a. Hei hi district jail 8-ah sem sawm a ni a. Jail hrang hrangte hi a hmunah tlawhtu tur kan insiam tawh a. Tin, jail siam that ngai lai emaw, thiah veka sak that ngai emaw te kan enchhuak vek tawh a, heta tang hian DPR pawh siam a ni a. Chutah chuan hemi crore 55-in a daih tawh vel tura siam-remim, a ngaihdam theih laite ngaihdam, thuam that ngai te chu thuam that a ni bawk ang a, replace tawp ngai chu replace a ni bawk ang.

PU ROBERT ROMAWIA ROYTE: Pu Speaker, khawngaih takin, UC lai hi a pawimawh riauin ka hria a, kan House Leader hi a awm lova, a sawi fo thin kha a ni a. Cheng khat mah la hman loh leh a sum pawh implementing department la thleng lo emaw, a drawing leh estimate tender pawh la awm miah lova first instalment dawn tawh hmang zo anga central sorkar atangin UC hi rawn pe mai tura a tih anih chuan, a titude hming kha chu a sawi chi loh ang a; mahse, ‘an ti tak tak ngei em’ tih laia hi Pu Speaker, hriat chian a va chakawm ve; ziaka tih te a awm em?

SPEAKER : Khalai kha chu, kan GAD Minister a awm lova, ama chhan tur chi a ni a. Kan Home Minister-in a chhan theih chin chu a chhhangah ngai ang aw.

Starred Question No. 166: Raltlan bio-metric chungchang.

Zawhna Neitu: Pu C. Ngunlianbunga, Lawngtlai West Bialtu.

PU C. NGUNLIANCHUNGA: Pu Speaker, ka lawm e. Home Department changtu Minister chhan atana ka zawhna Starred 166 chu –

- a) Sorkar hian raltlante biometric-a chhinchhiah tumna a nei em?
- b) Lo nei ta se, engtik atangin nge kalpui a tum?
- c) Engtin nge hma lak a tum dan kimchang takin min hrih thei em?

SPEAKER : Chhang turin Home Department changtu Minister Pu K. Sapdanga ilo sawm ang.

PU K. SAPDANGA, MINISTER: Pu Speaker, Lawngtlai West bialtu zahawm tak Pu C. Ngunlianbunga zawhna chhanna chu -

- a) Raltlante biometric data lak chungchang hi Central Sorkar thuchhuak a ni a. Hemi chungchangah hian Ministry of Home Affairs (MHA) nena indawr mek a ni.
- b) Ministry of Home Affairs (MHA) nena indawr tawn mek anih avangin, ‘engtikah nge’ tih hi sawi theih a ni rih lo.
- c) Ministry of Home Affairs (MJHA) nena indawr tawn mek anih avangin, tum dan kimchang pawh sawi mai theih a ni rih lo.

SPEAKER : Zawhbelhna kan la ang a –

1. Pu C. Ngunlianbunga (Zawhna neitu),
2. Pu TBC Lalvenchunga,
3. Pi Baryl Vanneihsang,
4. Pu T. Lalhlipua.

PU C. NGUNLIANCHUNGA: Pu Speaker, ka zawhbelhna chu –

i) Tunhnai maiah khan jail-tang tlan chhuak an awm leh ta em? Hei, Lunglei VDP thuchhuahah hian an awm niin a lang a. Jail chhungah hian jail-tang leh jail-tangte an inveng mai thin niawmin a lang a. Hei hi engnge a chhan? A thawktu force lam kan indaih loh vang nge?

ii) Tin, DDK News Ni 24.6.2024 chhuakah khan Home Deptt. hian raltlante biometric enrollment kalpuina turah hian, ‘Central sorkarin a tih hun hunah kan inpeih e’ tih a ni a. Central sorkar atang hian biometric ti tura tihna engmah a la awm lo em ni?

iii) Tin, Myanmar leh Bangladesh ram buai avanga kan unau raltlan Mizoram chhunga lo lut tun dinhmunah hian engzatnge awm? Identity card (ID) mi engzat hnenah nge pek anih tawh? Central sorkar atangin raltlan-tanpuina cheng engzatnge hmuh anih tawh? Kan unau Myanmar leh Bangladesh atanga raltlan sahimna zawnga Mizoram-a lo lut thawn kir an awm em?

iv) Sorkar-laipuiin Mizoram sorkarah Mizoram-a raltlan awm mekte tan a thlawna sem tur buhfai a rawn pek kha eng chenge sem anih tawh? Engtiangin nge sem dan kha kalpui a nih?

PU TBC LALVENCHHUNGA: Pu Speker, raltlan chungchanga zawhbelhna ka neih duh chu - Tunlaiin kan ramah loh theih lohna avangin thenawm ram atangin kan unaute chuan min rawn bel a, kum eng emaw zat hei, kan cheng ho chu a ni a. Amaherawhchu, kan inenkawl dan hrim hrimah hian ngaihtuahna thar neih a hun tawh hlein a lang a. Kan bialah pheih chuan raltlante’n school te hial an din a, sorkar sikula lut lovin an awm a. Hei hi a reality ngaihtuah kan ngaiin ka hria a.

Champhai khua ka ni a, Champhai-pa ka ni a. Kohhran leh sakhua thleng pawhin nakin lama min la nghawng tur thui tak a awm thei niin ka hria a. Heng hi tuna kan address vat loh chuan, kan resources neih te a limit si a, nakin zelah kan inchuh na tial tial dawn a. Eizawna dap kawngah leh ei leh bar kawngah keini aiin an tough zawk a. Tunah hian kan thlah-zalen em em mai a, veng tinah buaina te pawh kan tawk ta zeuh zeuh bawk nen. Dan leh hrai enkawlina hnuai a awm mumal lo zawk an nihnaah te, survival instinct neih tha zawk an nihnaah te; tun dinhmunah hian la ngawi rih mah ila, keimahni tualchhung inenkawlina danah hian harsatna la tawk mai thei dinhmunah kan ding niin ka hria a.

Hemi kawngah hian Pu Speaker, Home Minister changtu hnena ka zawhbelhna chu –

Heng raltlante enkawlina turah biometric enrolment piahlahmah an chenna leh an awm hmun te, an thiltih dan turah te, khawtlanga an chetna vel leh, tun dinhmunah chuan hmun hrang hrangah te pemin an zinkual a, an duh hun hunah Burma-ah an tlan let a, raltlan pawh an ni chiah lo a ni, a tam zawk hi chu; sumdawnnan min hmang a ni ber mai a. Heng mite hi khuahkhirha, khauh zawka enkawlina tur ruahmanna mumal tak Sorkar hian a nei em? Ka lawm e.

PI BARYL VANNEIHSANGI: Pu Speaker, ka zawhna hi central atanga tanpuina chungchang a ni a. Kan Home Minister zahawm tak hnena ka zawhbelhna chu - Sorkarin raltlante chhawmdawlina-tanpuina kan pe thin a. Chungah chuan Mizoram sorkar angin tanpuina eng angte nge kan peka, eng chen nge kan pek? Ka lawm e.

PU T. LALHLIMPUA: Pu Speaker, ka zawhbelhna chu –

- i) Open-jail nei turin Mizoram sorkarin hma a la deuh ni awmin a lang a, a zir-chianna te neiin, hmalak dan tur ruahmanna awma hriat a ni a. Open Jail hi kalpui tumna a awm em; engnge a thatna tur leh han ruahmanna deuh te a awm em?
- ii) Armed Veng Jail hi tihdanglam leh hunsawn tumna deuh a awm niin a lang a. Hei hi thu chiang zawk min hrilh thei em? Tuna a dinhmun engnge? Sawn tumna te, tha zawka siam tumna te sorkar hian hmalakna a nei em? Ka lawm e.

SPEAKER : A lawmawm e. Kan Minister kan sawm hmam, vawiinah kan Member Dr. Lorraine Lalpekliana kan zingah rokhawhna avangin a tel thei lova; a tirah khan information ka neih loh avangin kan sawi tel lova. Dy. Speaker hnenah a lo in report a, House hriat atan kan sawi leh lawk a ni e.

Zawhnate a karki ang reng khawp a. A theih ang anga chhang turin Home Department changtu Pu K. Sapdanga ilo sawm ang.

PU K. SAPDANGA, MINISTER: Pu Speaker, ka lawm e. Zawhna neitu Member zahawm tak Pu C. Ngunlianchungza zawhna kha –

Tun hnaiteah jail tang tlan chhuak an awm a, man leh tawh anni e.

Biometric chungchanga hmalakna turah Ministry of Home Affairs hi a la inpeih lo a ni. A tira min hman tir tum portal kha innawr kirna tur lam hawi anih avangin, Mizoram Sorkarin objection a siam a. Hei hi chu criminal case neite chhinchhiahna tur portal a nih vangin, ‘raltlan mi mangangte chhinchhiahna atan hman a remchang lo’ tiin rawtna kan thehluat a. Khatiang displaced-people ho kha refugee pawh an ni lova, displaced people ho chhinchhiahna atan chuan; chhinchhiah an duh anih pawhin a hman tur portal rawtna te kan zuk siam a, chu chu an la rawn chhang lova. Centralin a rawn chhan hunah Sorkarin a pawm theih tur chi anih chuan, bul a tan theih. A pawnga puiin biometric identification tih hi hnial a ni lova; a tih danah erawh chuan tha lo nia hriat anih chuan, State Sorkarin tanna bik/chin a nei a ni.

Tun dinhmunah raltlante hi engzat chiah nge annih chhiar hi a har khawp mai a; nitin mai ni lovin, darkar tin hian a inang thei lova. A chhan chu, ramri kan nei ve teh meuh va, ram thenawm sorkar kan nei tlat lo mai a; chu chu a buaithlakna lai a ni a. Khawi khawiah emaw gate-ah chuan kan han duty ve bawk a, gate lo pakai theihna hi a tam em em mai si a. Chuvangin, ‘tuna kan dinhmun’ kan tih pawh hi, kan chhiar laia kan dinhmun kha a ni mai a. Chhiar hnunung berah chuan Bangladesh atangin 2,217, Manipur atangin 2,633 leh Myanmar atangin 33,505 an awm bawk a, an vaiin 41,355 kawl mek angah kan ngai a ni. Amaherawhchu, han chhiar leh thut ta ila, a figure chu a dang leh duai mai thei a. Kan ngaihthlak tak ang khan, raltlan nge an nih sumdawng tih hriat lovin an inpawlh nasa em em mai si a. Chuvangin, tuna kan figure neih chu khatiang kha a ni e.

Buhfai pek chungchang hi chu a langsar a. Sorkar laipui atanga raltlante tana buhfai an rawn pek ang hi chu a hmun a thleng kim tawhin kan hria a ni.

Tin, ID pek tawh zat kha, Pu Speaker, min hrethiam se la, he figure hi a dik lo a chhan a awl dawn em mai a, ka chhang thei lo ni mai rawh se.

PU C. NGUNLIANCHUNGA: Pu Speaker, khawngaih takin nakinah ziaik talin min chhang se la. Tun session chhung pawh hian ziaikin a inchhan theih tho a. A figure sawi mai kha a har thei a, ka hrethiam em em tho a. Nakinah ziaikin min pe thei se; heilaiah hian nikum lam record kha chu ka nei tho a.

PU K. SAPDANGA, MINISTER: Aw le, Pu Speaker, ziaikin chhan kan tum dawn nia.

Tin, raltlan tanpuina engzat nge hmuh tawh membrete'n hriat kan duh thin a, a zahawm hle mai a. Sorkar laipui atang raltlan puihna hi hi (Zawhna a ni miau sia, chhan loh theih a ni si lova), Secret Fund a ni, receipt awm miah lo a ni. A hmanna erawh chu invenna atan chipchiar taka vawn a ni. District tina DC te through-in hman thin a ni a, a inang lo zing a. Secret fund hmanna a chipchiara han sawi chiam pawh chu membrete'n tha in tih ka ring bik lova. Chuvangin, hei hi chu politics nena inkaihnhawih, tunlaia Burma chungchanga India sorkar hawi her te, China sorkar hawiher te kan hretlang vek a. Kan rilrua kan hriatchian kha House-ah hi chuan sawi lem lo ila a tha tlang zawk awmin a lang e.

Tichuan, thawn kir an awm leh awmluh zawhna kha, tunhnai teah Bangladesh buaina a chhuah hnu hian India sorkar hi Bangladesh atanga lo lutte lakah hian a fimkhur zual ta deuh a. Chuvangin, ramri velah (zep thu a cheng lo) BSF-te nen a ruk tak chuan State-sorkar tanpuinain NGO-te nen; kan raltlan mangangte kan inchuh nasa thei khawp mai; lem chan deuh te pawh a ngai a ni. Lem chan dan chipchiar kha chu House-ah sawi lem lo ila. Theihpatawpin Mizoram sorkar chuan kan unau rawn raltlante han hnawhchhuah der te pawh an nei a ni. Khati chin kha sawichian theih chin ni se a tha awm e.

Aizawl West-I bialtu zahawm tak Pu TBC Lalvenchunga zawhna – raltlante enkawl dan chungchang kha, a zawhnaah khan a chhanna fiah takin a awm sa deuhin ka hria a. Kan hriat tlan angin, mi-khawngaihthlak tak tak, in leh lo chan tak zeta hak lai nena lo tlan thla thahnem tak an awm a, chumi phenah chuan harsatna siam tam tak an lo inzep ve bawk a. A raltlan lo chhuka te pawh hian chutiang harsatna siam hote chu hnawk an ti em em a, an tana harsatna thlentun annih an hre ve tho a. Chuvangin, engtiang taka khuahkhirha enkawl tur nge tih a wholesale chuan siam a har viau a ni. Amaherawhchu, 'eng emaw tih a ngai' tih hi chu sorkarin a hria a, fimkhur taka ngaihtuah mek a ni. High Level Committee on Indigenous Displaced People din a ni a, wawi-hnih an thukhawm tawh a. Tin, a hnuaiyah committee peng - chiang taka englai pawha chhuitu tur, an daily problem hre tur siam a ni a. Chung chuan theihtawpin an thawk reng a, district tina harsatnate an lakhawm thin a, kan district authority te hengah hian an tangkai hle a. Chutiang chuan, tunah hian fimkhur takin enkawl dan sorkarin a ngaihtuah chhunzawm zel ang chu.

Tin, Aizawl South III bialtu zahawm tak Pi Baryl Vanneihsang zawhna – chhawmdawlna kan pek dan chungchang kha, tuna kan sawi tak ang khan high level committee ah hian district hrang hranga DC leh SP-te member an ni vek a, mahni area theuha harsatna an tawh te sawikhawm a ni a. Tin, District tinah emergency-a pek mai tur fund dah a ni bawk a, chungah chuan harsatna tawkte chuan an lo lam mai thin a ni. Chuvangin, a chipchiar a hre tur chuan a khat tawka district administration hrang hrangte hnen atanga han lakhawm leh phawt te a ngaih avangin, a zat emaw, a figure emaw chawp leh chilha han chhan mai a harsa a. Amaherawhchu, District tina DC te leh SP-te entrust anni a, Anmahni kaltlangin chhawmdawlna hi chu pek thin a ni e.

Tin, Lunglei West bialtu zahawm tak Pu T. Lalhlimpuia zawhna – Open Jail chungchangah kha, Open Jail hi state thenkhatah chuan an lo practice tawh a. Convict tawhte an harsatna leh an suahsualna te, an jail tan chhan ber sim tawhte an awmna tur siam sak a ni a. Jail ang deuh thova hung anni a, chuta tang chuan jail pawnah te hna an va thawk thin a ni. Hei hi tunah hian (**Speaker:** Khawngaihin; question hour a tawp a, Minister hi chhang zo law law rawh se aw. Le, chhunzawm rawh le.)

Ka lawm e, Pu Speaker. Open jail chungchang hi state thenkhatah chuan an hmang hlawhtling em em mai a. Chuvangin, tih ve theih a ni em tih zir turin mithiam kan inruat a, tunah hian zir mek a ni.

Tin, Armed Veng-a District Jail sawn tum chungchang zawhna kha, sawn tumna a awm a, tunah hian DPR siam mek a ni a. A hmun tur pawh nichina kan sawi ang khan, han hual deuh tawh nghe nghe a, tunah hian kan inbuatsaih mek e. Pu Speaker, ka lawm e.

SPEAKER : A lawmawm e. Kan tablet kha a rawn tha tawh em han check ila. A that tawh chuan, (E, a la chiang lo a ni maw?) NeVA lamin nakin remchangah lo enpui se. On kha a ngai ve deuh a. Present tawhah chuan - Pu B. Lalchhanzova, Pi Baryl Vanneihsang, Pu Jeje Lalpekhlua, Pu Lalnghinglova Hmar, Pu Lalnilawma, Pu Lalramliana Papua, Pu T. Lalhlimpuia te an ni a. Tikhan han check ila, a that chuan i present tlang teh ang u.

LEGISLATIVE BUSINESS

Tunah chuan, Legislative Business-ah kan kal ang a, Government Bill sawiho tur pakhat kan nei a. A Bill copy hi memberte hnenah sem tawh a ni a. “The Mizoram Salaries, Allowances and pension of Members of the Legislative Assembly (Amendment) Bill, 2025” chu a Bill neitu Pu Vanlalhlana, Minister zahawm takin House-ah introduce phalna rawn dil turin ilo sawm ang u.

PU VANLALHLANA, MINISTER: Pu Speaker, i phalna leh he House zahawm tak remtihain, “The Mizoram Salaries, Allowances and Pension of the Members of the Legislative Assembly (Amendment) Bill, 2025” hi introduce ka rawn dil e.

SPEAKER : Bill neitu Minister zahawm takin House-ah introduce phal na a rawn dil a. kan phalsak em? (House-in a phalsak a..) Aw le, kan phalsak chuan, tunah rawn introduce se la; sawiho turin rawn move nghal bawh turin ilo sawm nghal ang u.

PU VANLALHLANA, MINISTER: Pu Speaker, i phalna leh he House zahawm tak remtihain, “The Mizoram Salaries, Allowances and Pension of members of the Legislative Assembly (Amendment) Bill, 2025” hi ka rawn introduce a; sawiho nghala min pass-pui turin ka ngen nghal bawh dawn che u a ni. Tuna kan Bill hi Amendment Bill a ni a, a original bill hi 1999 khan pass a ni a. Chu chu kum 26 vel kal ta kha a ni a, a rei ta vang vang hle mai a. Hemi kan pass hian MLA ka nih ve lai a ni a, a pass tu zingah pawh hian ka tel ve a. Vawiina Amendment Bill kan han pulut leh hi lung te pawh a leng ang reng khawp mai a.

Pu Speaker, he Bill-ah hian MLA te hlawh leh ex-MLA pension hlawh chungchang pawh a lang a. Medical facilities - medical board refer-a phai pan pawhin sorkar recognised damdawi-

inah te chuan ‘free-treatment an nei ang’ tih te a ni a. Ex-MLA ten medical facilities an avail- a an vah velna travel provision kha a awm ve ta lova, a tir atang hian hei hi an helh em em a. Former Legislators Association of Mizoram (FLAM), ex-MLA te pawh hian an vein, lehkha te pawh an thelut thin a, mahse kan pass mai thei thin lo a ni. A chang chuan an vui deuh thin a, ‘medical reimbursement engkim kan ti thei a, a kal man han bill tel loh hi a kimlo a ni’ an ti a, kum-upa deuh te an lo ni a.

Tunah hian GPC thu-in chu facilities chu phalsak a ni ta a, kan dan hman chu amendment siam a lo ngai ta a. Hetiang hian, The Mizoram Salaries, Allowances and Pension of Members of the Legislative Assembly Act, 1999, section 18A-a sentence pahnihna zawm chiahah hian, ‘however travelling expenses will not be provided in connection with such medical treatment’ tih a awm a, hetah hian an travelling expense kha ‘an hmu let ve theilo’ tih kha a tarlang a; hemi sentence pah chiah hian an enjoy ve thei tihna a lo ni ta a. GPC chuan he ‘travelling expenses will not be provided in connection with such medical treatment’ tih lai hi pah a remti a, he House-ah hian member-ten min pawmpuia min pass-pui turin ka rawn chhawp chhuak a ni e. Ka lawm e, Pu Speaker.

SPEAKER : Minister zahawm takin a Bill chungchang leh a putlulh chhan te min hrilh tawh a. Amendment Bill a ni a, GPC-in hei hi chaia a lo rel tawh bawhzuina zel a ni a. Hetiang GPC thutluk tawhna hi chu sawiho vak a lo ngai lem lo a. Member ten sawiho hrim hrim kan ti nge? Minister-in wind up se, pass rawn dil mai sela a tha mai lo em ni? (House-in sawiho lova pass a remti a.) Anih chuan, Minister zahawm takin a bill te wind up-a House pass-pui dil turin ilo sawm ang.

PU VANLALHLANA, MINISTER: Pu Speaker, ka lawm e. Kan Bill hi kan sawi ang khan a Chiang viau a, han sawinawn leh chuang ngai pawhin ka hre lo a; House hian min pass-pui mai turin ka ngen e.

SPEAKER : Kan Minister zahawm takin ‘The Mizoram Salaries, Allowances and Pension of Members of the Legislative Assembly (Amendment) Bill, 2025’ chu House pass-pui turin a rawn dil a. Tunah kan buk ang a, pass remti apiangin, ‘remti’ ti ula, remti lo kan awm chuan, ‘remti lo’ ti ula. (House-in pass a remti a.) A lawmawm e.

“The Mizoram Salaries, Allowances and Pension of Members of the Legislative Assembly (Amendment) Bill, 2025” chu he House hian lungual takin a pass ta a ni (**Pu Vanlalhlana, Minister:** Pu Speaker, ka lawm e.)

FINANCIAL BUISINESS

SPEAKER : Tunah chuan financial business-ah kan kal tawh ang a. Vawiin hian Minister zahawm tak tak pahnih - Pu C. Lalsawivunga leh Pu Lalnghinglova Hmar te demand kan sawiho ang a, pass nghal kan tum dawn a ni. Hun kal taa kan lo tih thin angin, Minister pahnihTE demand hi a rualin kan la ang a.

Tunah, Minister zahawm tak Pu C. Lalsawivunga’n a demand te: -

- 1) Demand No. 19 - Local administration Department;
- 2) Demand No. 23 - Art & Culture Department;
- 3) Demand No. 27 - District Council & Minority Affairs Department;

4) Demand No. 34 - Animal Husbandry & Veterinary Department
te submit-in, sawiho tura rawn move nghal turin ilo sawm ang u.

PU C. LALSAWIVUNGA, MINISTER: Pu Speaker, Governor of Mizoram
recommendation leh i phalnain, heng –

<i>Demand No.</i>	<i>Department</i>	<i>Amount in ₹</i>
19	Local Administration	2,25,15,82,000.00
23	Art & Culture	4,83,89,000.00
27	District Council & Minority Affairs	6,51,14,13,000.00
34	Animal Husbandry & Veterinary	86,31,13,000.00
TOTAL		9,77,44,97,000.00

te hi kum 2025-2026 chhunga heng ka department chante inrelbawlna tura hman atan he House zahawm takah ka rawn submit a, sawiho turin ka rawn move e. Pu Speaker, ka lawm e.

SPEAKER : Tunah chuan Minister zahawm tak Pu Lalnghinglova Hmar,
House-ah heng a demand-te: -

- 1) Demand No. 7 - Excise & Narcotics Department;
- 2) Demand No. 22 - Sports & Youth Services Department;
- 3) Demand No. 28 - Labour, Employment, Skill Development & Entrepreneurship
Department

submit-a, sawiho tura rawn move nghal turin ilo sawm ang u.

PU LALNGHINGLOVA HMAR, MINISTER: Pu Speaker, Governor of Mizoram
recommendation leh i phalnain heng –

<i>Demand No.</i>	<i>Department</i>	<i>Amount in ₹</i>
7	Excise & Narcotics	57,08,65,000.00
22	Sports & Youth Services	27,38,35,000.00
28	Labour, Employment, Skill Development & Entrepreneurship	29,48,75,000.00
TOTAL		1,13,95,75,000.00

kum 2025-2026 chhunga heng ka department inrelbawlnaa hman atan he House zahawm takah hian ka rawn submit a, sawiho turin ka rawn move nghal e. Pu Speaker, ka lawm e.

SPEAKER : Khawngaih takin Demand No. 28 kha han sawi nawn leh teh.

PU LALNGHINGLOVA HMAR, MINISTER: Pu Speaker, Labour, Employment, Skill
Development & Entrepreneurship Department - ₹29,48,75,000.00/-.

SPEAKER : A lawmawm e. Kan Minister zahawm takte'n an Demand-te an
rawn submit ta a, sawihona kan nei tan tawh ang a. Member te hi minute 10 kan inpek kha a
tha tawk mai em? (House-in minute 10 a remti a.) Minute 10 kan ti ang a, minute 8-ah helmet
atangin warning bell kan rawn tiri leh ang. Tunge sawi hmasa ang le?

PU LALNGHINGLOVA HMAR, MINISTER: Pu Speaker, thil ka lo dil lawk mai

che. (**Speaker:** Aw le.) Ka tablet hi power supply a awm loh avangin a thi zel a, inbuatsaihna a tan ka duh si a; thusawi chhinchhiahna atan min siamsak theih chuan? Ka lawm e.

SPEAKER : Kan NeVA lam khan a fel lo ang ang te rawn check sela NeVA; kan official-te hian lo hriattir ni se. Tunge han sawi hmasa ang le? Member zahawm tak Pu Jeje Lalpekhlua ilo sawm ang.

PU JEJE LALPEKHLUA: Pu Speaker, ka lawm e. Vawiin chu a hawngtuah ka awm thei hlauh mai a, a lawmawm hle mai. Vawiinah kan Minister chhuanawm tak tak pahnih - Pu C. Lalsawivunga leh Pu Lalnghinglova Hmar te demand kan sawiho dawn a. Hun a tam loh avangin kan sawi nghal zung zung mai ang a; mahni ngaih pawimawh zawng, mahni lo kal tawh thinna te pawh a awm a, thenkhat mahni experience te pawh han share ve te ka duh a.

Demand No. 7 - Excise & Narcotics Department:

A changtu Minister chhuanawm tak Pu Lalnghinglova Hmar hi a tang khawp mai a, a fakawm ka ti a. Tun Budget Session-ah hian bill 3 ngawt a rawn pulut thei te kha a ropui ka ti a. Minister a nih hnu a hmalakna chi hrang hrang hi sawi vek sen pawh a ni lo ang a. A bik takin, tun Budget Session-a kut hnathawktute tan “The Mizoram Liquor Total Prohibition (Amendment) Bill, 2025” he House-a a rawn pulut kha a chhuanawm ka ti takzet a.

Kawng engkimah Mizote kan intodelh chho zel a, rilruah ‘Support the Local’ tih te a lo lang a. Kan Mizo thilsiam leh tharchhuah kan inngaihhlutsak zel pawh hi a lawmawm ka ti hle a. Kan Minister hmalaknain nikum kum tawp lam khan district pathuma Excise Department hawn a ni te kha lawmawm ka ti hle a. Sorkar hnathawk bakah zirtirtu leh zirlai pawl aiawhte nen awmze nei zawka ruihhlo do kawngah district hrang hrangah Excise Minister hova meeting neih a ni thin te kha a lawmawm ka ti a. Kan bial chhungah ngei pawh NGO hrang hrangte nen ruihhlo do kawnga thawhhona tha kan nei zel pawh a lawmawm ka ti a.

Tin, kan Minister hmalaknain district hrang hrangah middle school leh high school naupangte tan ruihhlo that lohzia inzirtirna - Awareness campaign leh Seminar neih a ni thin te hi a lawmawm hlein ka hria a. Ruihhlo do kawngah hian mimal tinten tih theih kan nei ve a, theih tawp chhuaha tang hova kan tih chuan, hma kan sawn zel thei a ni.

Pu Speaker, mahni bial lam han sawi ila Ruihhlo do kawngah hian Hnathial Sub-Headquarter YMA te sawn theitawp an chhuah a. Hemi kawnga hma an lak nen MLA Fund atangin Rs.1,00,000/- Hnathial Sub. Headquarters YMA te kutah kan hlan a.

Demand No.22 - Sports and Youth Services Department:

Sports chungchangah hian mahni experience tlem han sawi ila. Mahni kalna lam te a lo nih thin avangin vei tam tak kan nei ve a. Kan Minister hian a tuipui bawk a, theih tawp a chhuah a, hma pawh kan sawn a.

Kan hriat angin Vision - 2036 Olympic atana hma thlir nei chungin Empower Mizoram Sports (EMS) under the Mizoram Hand-holding (Bana kaih) scheme chu kan Chief Minister Pu Lalduhoma'n Ni 14th January, 2024 khan a tlangzarh a. Hei hi a ropui ka ti hle a; Public Private Partnership (PPP) hmangin Mizoram pum tuam chhuak sports-coaching

leh talent development liantham kalpui tum a ni a. Hmun kilkhawr thingtlang, sports coaching nei pha ve lote zawn chhuahna kawngah hma an rawn la dawn a ni a. Mizoram leh India ram aiawh thei tur khawpa chherchhuah tum a ni a. Hemi zingah hian Mizo thalai, a bik takin sports lama tui mite'n nasa takin kan chhawr dawn niin ka hria.

Pu Speaker, ti hian han sawilang ila - Kei hi Hnathial khua atanga football rawn khel chho ka ni a, naupang deuh kan nih lai khan professional footballer nih ve ka duh avangin Aizawl-ah ka rawn pheih ve a, academy-ah te ka rawn awm a. Thingtlang atang chuan district capital kal tur ringawt pawh hian sum leh pai tamtak sen a ngai a. Chu mai piah lamah chhung leh khat, thenrual tha neih loh pheih chuan thlenna ringawtah pawh kan buai nghal em em thin a. Hemi chungchangah hian a changtu minister ngei bulah pawh hian ka sawi tawh a, hemi ka ngaih pawimawh chungchang te pawh hi. Hetianga tih hlawhtlin a ni ta hi a lawmawm ka ti a. A bikin Thingtlang naupang, mahni thiamna leh theihna pawh phochhuak ve theilo ten an thiamna an pho chhuah theihna turin hetiang a changtu minister-in ruahmanna a rawn siam hi a lawm ber zingah ka awmin ka hria a. A bikin Thingtlang naupang zawn zawn aiawhin lawm thu ka sawi nghal a ni.

Tin, mahni bial lam sawilan ka duh a. Tun dinhmunah Hnahthial District hian hockey-ah hmabak kan nei eng hlein kan inhria a. Tun hnaiah Zoliana Royte Memorial Indoor Tournament-ah pawh khan Mizoram Champion kan ni a, kan minister hma laknain hockey ground thar kan neih theihna turin hma min lakpui zel a. Kan neih ngeina tur pawhin chak taka hma min lakpui zel turin ka ngen duh bawka a ni. Tin, Hnahthial District-ah hian hockey player chhuanawm tak tak kan nei nual a. Mizo zingah Olympian hmasa ber, H. Lalruatfeli te, Junior International PC Lalrinpuii leh Lalrindiki te, COE, Delhi tana khel mek, Lalneihpuii leh Merebhi Lalruatfeli te kan nei a. Tin, NCO Bangalore-a awm mek Tv. F. Zoremsanga kan nei bawka a; ani hi income tax-ah tunah hian hna pek a ni tawh a. Ka hriat sual loh chuan tunah hian Mizo-mipa zingah hockey lama thleng sang ber niin ka hria a. Hockey ground kan neih hunah chuan hei aia tha, Mizo fa-chuam Lalremsiami thlaktu tur te pawh Hnahthial District atang hian kan lo chhawp chhuak ngei ang tih kha, a changtu minister pawh ka hrih nghal duh bawka a ni.

Demand No. 28 - Labour, Employment, Skill Development & Entrepreneurship Department:

Kan Minister zahawm tak hian Mizoram pawn leh chhung bakah sorkar leh private thlenga hnathawh dan mumal taka inkaihhraina a awm theih nan tiin, 'The Mizoram Private Agencies Regulation Bill, 2025' leh, MYC ah mumal tak leh awmze nei zawka hma lak anih theih nana, 'The Mizoram Youth Commission Bill, 2025' a rawn pulut kha a ropui ka ti tak zet a.

Pu Speaker, kan hriat angin TOYOTA Kirloskar Motor (TKM Private Ltd) leh LESDE te thawhhona tur MoU an ziaik thei te kha hmasawna nasa tak niin ka hria a. Tin, TKM leh ITI zirlaite hnenah mechanic leh a kaihhnawih training an pe thei tur te hi a ropui a. A biakin ka thalaipuite'n hlawkna an chang thei dawn niin ka hria a, a lawmawm hle mai. Tin, Mizo thalai, ram danga hna thawk tur leh thawk mekte'n harsatna an tawh thin sukiang tur leh, dan anga awlsam zawka recruitment kalpui a nih theih nan LESDE Department-in, 'The Mizoram Immigration Act' hnuaiyah Protection General of Immigration atangin, registration certificate neia recruiting agency pakhat kan nih theihna turin hma an la mek hi a lawmawm ka ti hle a. Hei hi Mizo thalai tam tak ram pawna hna thawk theite tan pawh

kawng awlsam zawk a siam theih ngei ka beisei a ni.

Tin, Hnahthial District-ah hian LESDE dah tumna te a awm a, a kal mek a ni tih te kan han hria a. Thalai tam takte'n thiamna hrang hranga eizawna tlak an neih theihna tura kawng hawnsaktu a nih ngei pawh ka beisei a ni.

Demand No.19 - Local Administration Department:

Pu Speaker, a changtu Minister hi a tang bawk a, minister anih hnua a hma lakna sawi vek sen pawh a ni lova. Tun tuma, "The Mizoram Village Council Bill, 2025" House-ah hneh tak maia a rawn pulut te kha a chhuanawm ka ti tak zet a. LAD enkawlna tura sum ruahman hi a vaiin ₹2,25,15,82,000/- niin, kum kal ta 2024-2025 aiin tun kum thar 2025-2026-a sum ruahman a punna hi ₹1684.42 lakhs lai a ni a, a lawmawm tak zet a.

Hei, Finance Commission Grant kan VC ten an mahni khua theuha hmasawna hnathawh nana an hman tur crore 74 an neih tur te, kan chief minister leh a changtu minister hma lakna-a 15th Finance Commission Grant kum khat emaw lek chhunga installment 3 hmuh a ni te hi a lawmawm hlein ka hria a. Tin, Mizoram hmun hrang hrangah VC te hman turin computer sem a ni te kan lawm a; ka bial chhungah ngei pawh computer set ruk kan dawng a, a changtu minister chungah he House zahawm tak kal tlangin lawmthu ka sawi a. Tin, VC House leh computer la neilo zawng zawngte tan tun dinhmunah hma an la mek zel tih pawh a changtu minister khan a rawn sawilang a, kha pawh kha a lawmawm hlein ka hria a. Ka bial lam pawh min lo duhsak hmasa turin, he House zahawm tak kal tlang hian ka ngen duh bawk a ni.

Demand No. 23 - Art and Culture Department:

He department hi kan pi-pute nun dan leh chin dan mawi te a ral mai loh na tur leh thangtharte'n an chhawm zel theih nana department hma lakna ropui tak niin ka hria a. Art & Culture Department hian youtube channel an nei a, he channel-ah hian Chapchar Kut kan hman dan te, Mizo lam chi hrang hrangte documentary thenkhat hmuh tur a awm a. He an youtube channelah hian 41.7k subscribers a nei a, Mizo-mipuite'n hei hi kan ngaihluh leh zual a thain ka hria.

Tin, youtube channel hrang hrangah Mizo naupang tan kan hnam thuam leh nunphung tilang thei tura mizo-nursery rhymes an siam thin te hi a tha ka ti a. Kan mizo nun dan tha leh ze-mawi kan pi-pute nun dan tha hrang hrangte thangtharte'n kan theihngihl lohna tura chawinun zelna tur program hrang hrang duan a ni thin hi a lawmawm ka ti hle a. Kan bial khi kan vannei a, kan pi-pute sulhnu hrang hrang hmuh tur a awm a, Denlung khua-a Lalnu Ropuiliani thlan te, Thingsai-ah hla phuah thiam hmingthang Saikuti thlan te a awm a. Tin, kumin kum tir khan Khawri khua-ah Fanai Lal huaisen Zakapa lim hawna te kan nei a. Pu Speaker, I rem tihnain college zirlai, a bik takin Mizo leh History subject zirlaite tan kan bial chhunga pi-pute sulhnu te hi zir chianga, a hmunah ngei min lo hmuhpui turin ka ngen duh bawk a. Tin, a changtu minister pawh kan pi leh pute sulhnu humhalh kawnga hma min lakpui zel turin ka ngen duh bawk a ni.

Demand No. 34 - Animal Husbandry & Veterinary Department:

Kan hriat theuh angin kan ramah vawk hri (ASF) avangin kan buai nasa em em a. ASF hnuaia vawk suat te chauh compensation pek theih a nih avangin Mizoram-ah ASF avanga vawk thi tam takte compensation pek theih loh chungchangah Pu Speaker, sorkarin hma a

la a. A changtu Minister zahawm takin a tawpah hemi chungchang hi min pholan sak turin ka ngen nghal baw k a.

Ka bial chhungah Darzo South, Lungleng - Darzo khuaah te khian ram kan nei tha a. Khingah te khian National Life-stock Mission (NLM) kaltlanga sial vulh introduce dan a awm em tih te ka hre duh a, a theih chuan kan bial tan a hlu hle dawn a ni.

Tin, Hnahthial District Vety Hospital hawn mai theiha peih fel a ni hi a lawmawm ka ti hle a, district-mipuite pawhin tangkai taka kan hman ngei te pawh ka beisei a ni.

A tawp berah chuan, Pu Speaker, kan Minister pahnih - Pu C. Lalsawivunga leh Pu Lalnghinglova Hmar te demand hi ka pawmpui a, he House-ah hian pass ngei ni se ka ti e. Ka lawm e.

SPEAKER : Tunah chuan, Member zahawm tak Pu R. Rohmingliana ilo sawm ang.

PU R. ROHMINGLIANA: Pu Speaker, dik taka hun hman hi chu ka la tum ziah a, amaerawhchu a har em mai a.

No.19 - Local Administration Department:

He thu ka sawi lai hian kan RD minister kha awm se ka duh khawp mai a; lo chhinchhiah baw k se a tha awm mang e.

VC te hi VC awmna area ah chuan an pawimawh em em mai a. VC te an khaw develop-na tur thila an va kalin officer-te an va address lo thei lo a, chutah chuan sum leh pai senso te a lo ngai thin a. Thingtlangah chuan sum nei tak takte kha VC atan an thlang bik chuang lo a. Hemi chungchang hi LAD lam te pawhin kan hriat a pawimawh viauin ka hria a. Tin, Sub-village inthlan te kum tin mai hian a awm a; sub-village inthlan hi a hautak ve viau mai a. Heng hi kum tin lo deuh, a aia thui deuh kum hnih ang te emaw zawnga kalpui dan awm thei se, tih te ka sawi duh a.

Tin, VC kan han inthlanga, party te kan inep viau mai a. Kan han inthlang zo a, an han form a. Chutah VC member tho party dang sorkar lo lamte sitting tur han hriattir ve loh te a awm fo mai a. Chuvang chuan, sitting kohna te hi ziak ngeia koha, anmahniin ‘an hmu ngei a ni’ tih hriatna tur signature lakna tlangauin a ken te a tha em tih te ka rilru ah a awm deuh a.

Pu Speaker, sawi tak ang khan, Ni 12.12.2024 Council of Ministers meeting khan Local Administration Department hi nuai bo a tum niin ka lo hria a. Chuvang chu a ni a, RD minister kha han awm se ka’n tih deuh chhan pawh kha. Pu Speaker, Mizoram Gazette, Wednesday Ni 22.1.2025, Issue No. 41 ah hian Chiang takin a rawn ziak tawh a Short title commencement (Pu Speaker, i phalnain) a pahnihna ah hian, ‘they shall come into force with effect from the 1st April, 2025’ tih a ni a. Chuti anih chuan, kar hnih hnu lawkah chuan he LAD Department hi a awm tawh lovin, RD-in an chang dawn niin a lang a. Chuvang chuan, wawiina LAD demand kan sawite hi a dik chiah em aw ka ti a. Thla pawh liam lovah RD hian a lak sak dawn em tih kha kan Minister zahawm tak hian min sawifiah sak sela.

Tichuan, Pu Speaker, i phalna thovin, he Gazette tho, 11-na, Amendment of 25th Schedule

ah hian, 'In the 25th Scheduled of Principle Rule, the heading Local Administration Department and the entire therein shall be omitted' a ti a; omit a ni tawh dawn a ni. Chuvangin, LAD Department awm tawh lo tur demand kha kan sawi lawi si a, helai hi hriatthiam har ka ti deuh hlek a. Tichuan, Pu Speaker, i phalnain, helai te hi ka han chhiar leh lawk teh ang, 15-na, Amendment of 34th Schedule ah hian 'In the 34th Scheduled of the Principle Rule for the heading Rural Development Department, the headline shall be substituted namely, Rural Development & Administration Department' tih a ni ta a ni. Chu chu RD leh LAD hi hmun khata dah kawp tur niin a lang ta tlat mai a; Gazette ah meuh chhuah a ni tawh a. Chuvang chuan, April Ni 1 atang chuan tuna RD Department kan tih mek pawh Rural Development & Administration Department tia thlak a ni dawn nge, Local Administration Department a awm tawh si loh chuan, tih lai hi ka zawhna a ni a; hei hian min tibuai riau mai a.

Chuvang chuan, helai kan Demand sawi pawh hi, kan sawi tur a ni chiah em tih te ka rilru ah a awm a. Chutiang anih si chuan, DLAO hnathawh thinte kha BDO in an thawk dawn ta tihna em ni, tih te kha ka zawhna ni ta sela.

Tichuan, Pu Speaker, helai tawite pakhat hi ka'n sawi leh duh a. Kan VCP te hian tun dinhmunah hian ₹1,000/- an hlawh niin ka hria a, Vice hian ₹800/-, VC member-in ₹600/-, Tlangau ten ₹450/- leh Secretary-in ₹600/- niin ka hria a. Hengte hi a tlem tham lutuk deuh em aw; khaw khat enkawltu mipui thlan-lalte hlawh atan chuan. Tin, kan society-ah hian mipui thlan-lalte hi kawng engkim – chhiatni, thatni leh disaster thilah pawh thil thawh turin kan beisei vek mai bawk si a, an tan hian phurrit a ni dawn lutuk a. Chuvang chuan, heng an hlawh ang te pawh tihtam deuh dan te a awm em tih te kha LAD bikah ka sawi theih ni sela.

Demand No. 23 - Art & Culture Department:

Library chungchangah hian tunlai thalaite hian lehkhabu kan keu dun dun peih tawh lo chu a nih deuh hi a! smart phone hi computer te chi a ni mai a, he mi hmanh hian e-Library te tha deuh hlekin thingtlangah te pawh hawna, internet access theih tura hmalak that a van tul tawh em, ka ti a ni.

Tin, Pu Speaker, tukin lama Zawhna & Chhanna ah pawh khan hnam puan chungchang te kha Mizoram-a hnam hrang hrang awmte joint-cultural program siam te pawh kha sawilan a awm a. Pu Speaker, Chakma te, Bru te, Lai, Mara te hian mahni-hnam puan kan lo nei theuh mai a. Heng te hi, hmanna question lo awm ang khan, 70% discount ang tea leitir ve dan te awm sela a van tha dawn em!

Demand No. 27 - District Council & Minority Affairs:

Kumin 2024-2025 ah hian District Council pathum kan neihte RE pek loh tur ang deuhin thawm ri ka hria a. Hei hi, pek an ni dawn em? Finance lam chan a ni deuh e kan ti a nih pawhin, a concerned minister te chuan hriat awm tak ni turah ka ngai deuh a. Pu Speaker, District Council pathumte an CCB Rules inang lo vek, 6th Schedule hnuai a awm kan nei a. Heng te hi Governor lam atang hian inang-tlang deuha siam dan te a awm em aw, tih te kha ka rilru ah a awm bawk a ni.

Demand No. 34 - Animal Husbandry & Veterinary Department:

Pu Speaker, Vety Department hmalakna hi Mizo-te mil a ni a; mizote hi kan pi-pute

atangin ran vulh chi kan ni a. Vety Department hian ran chungchang pawh hma nasa takin a la niin ka hria a. Amaherawhchu, Pu Speaker, vanduaithlak deuhin tun Session tan tirha kan Governor Adress-ah Vety Department chungchang pakhat mah a lang lo kha ka mind khawp mai a. Kha kha engnge a chhan ni ang aw; hma an la lo em maw ni le, tih te ka rilruah zawhna lian tak a awm a.

Tin, Pu Speaker, Zoram thil sawi bakah mahni bial sawi tel ve ka'n duh chu - Ka bial chhungah hian vawk-vulh an tam em em mai a, Bangladesh ramri kan nih pawh kan hria a. Vawk-hri te pawh Bangladesh atanga lo leng lut nia sawite pawh kha a awm a ni. Tun Vawk hri leng hnuhnung ber phei chu 'Lungsen atangin a rawn intan e' tih a nih kha, Sorkar liam ta-ah khan. Amaherawhchu, vety doctor post hnih kan neih pawh a hmun hnihah kan nei reng reng lo mai a; indaihlohna vangin VFA te pawh an awm chuang lo a. Bungmun doctor leh VFA te chu loh theih loh in Lunglei lamah attached anni a, Lunglei hi district-headquarters anih avangin a tul baw si a. Tin, Lungsen-ah vety doctor kan neih lohna a rei tawh em em a. ka bial chhunga kan dah hian Mizoram tana pawimawh tho a ni a, tih kha Pu Speaker, kan sawi leh duh a. Chuvang chuan, vawiin Demand sawiah hian khawngaih takin vety doctor leh VFA te kan nei lo min ngaihtuhsak turin ka ngen baw a.

Demand No. 7 - Excise & Narcotics Department:

Tin, Pu Speaker, Excise & Narcotics-hi chu ka sawi vak dawn lo. Hmanni ah Bill-ah kan sawi teuh tawh a, thil tha leh tha lo chu kan hre vek e.

Demand 22 - Sports & Youth Services Department:

Pu Speaker, sorkar liam ta-ina a lo tih fo thin incentive cash award a kal chho meka hi a lawmawm ka ti tak zet a, tun sorkar paw hian a kal chhoh pui zel a. Hei hi nasa deuh deuha kal-chhohpui tulin ka hria a. Tin, Mizoram hi Sports-ah kan duai vak lovin ka hria a, ka lawm khawp mai a. Hei football-ah te pawh vawiinah kan Minister zahawm tak hi Mizoram football promote tute zinga mi a nih angin, vawiinah hian ka fak duh a. Tin, Pu Speaker, term liam taa kan Sport minister vawiin nia opposition bench-a thu ta Pu Robert Romawia te pawh Mizoram-a football promote-tu tak tak, Mizo naupangte football-a chherchhuaktute an ni a. Vawiinah hian he House kaltlang hian Pu Speaker, anni pahnih hi kan fak a ni e.

Tichuan, Pu Speaker, hmanniin he House-ah ngei hian Mizoram - Olympic Vision Sports-in a neih thu kan ngaitla a. Helaiyah hian, 'Mizoram Amateur Taekwondo Association chuan Mizoram sorkarin Olympic vision a neih hma khan Olympic vision kan lo nei daih tawh a ni' kan ti ve teh ang; Pu Speaker, a hruaitu ka nih vena atangin. Chutiang chuan, theihtawpin hma a lo la ve a. Tunah hian Mizoram Sports Discipline atang hian 'MATA' kan tih mai hian National Games - India ram inelna sangah medal 18 a rawn hawn tawh a, discipline zawng zawng zinga hawn tam ber a niin ka hria. Hei hi mizote mil niin ka hria a. Hei, kan House Leader pawh honorary black-belt pek a nih kha, he House ami ngei pawh. Chuvang chuan, he Olympic vision-ah hian (**Speaker:** Minute 2 i pel ta a. I zo thei dawn tawh em?) Aw le, Pu Speaker, ka zo dawn e. He Olympic vision-ah pawh hian Taekwondo lam hi kan pumraw mil size, weight lak a ni a. Chuvang chuan, hei hi kan kal theihna tur niin ka hria. Tin, district hrang hrangah pawh Sports office awm sela tih ka duhthu Pu Speaker, kan thlen ve a ni e.

Pu Speaker, hun hman dik kan tum viau laiin ka hman pelh leh thin a, paw ka ti hle mai.

Tichuan, he Demand pahnihte hi pass ka remti e. Ka lawm e.

SPEAKER : Member zahawm tak Pu T. Lalhlimpuia ilo sawm ang.

PU T. LALHLIMPUA: Pu Speaker, ka lawm e.

Vawiin ah kan Minister zahawm tak tak pahnih - Pu C. Lalsawivunga leh Pu Lalnghinglova Hmar te demand kan sawi a. Hun a reiloh avangin kan sawi mawp mawp nghal mai ang a.

Demand No. 22 - Sports & Youth Services Department:

Kan hriat angin Empowering Mizoram Sports launch a ni a. Peter Nivio Zarlenga chuan, ‘Sports-a hlawhtlinna chang tur chuan, tan tur chu, tan nghal mai tur - To begin, begin,’ a ti a ni. Tun tumah hian kan Sports Minister hian Olympic vision a nei a. A vision tihlawhtling tur chuan, tan tur kha, a tan nghal mai a. Bana kaih (Hand-holding) scheme EMS kan CM hova bul tan a ni hi thil an thlir thui ka ti a. Minister chhuanawm tak kan nei a, Mizoram hian hma a sawnpui ngei ka beisei a ni. Tin, Mizoram Sports Conclave, 2024 a hova kan han ti mai thei te kha a lawmawm ka ti a, conclave buatsaih hmasa ber kan ni nghe nghein ka hria a. Vawiinah hian Olympic, 2036 focus chungah hetiang kan ti te hi a lawmawm ka ti.

Kan sawi deuh fur tawh a, incentive cash award scheme-a pawh kha hei peihfel a ni a. Chutah chuan infiammi 418 hnenah ₹110,6400/- lakh pekchhuah a ni hi a ropui hle a ni.

Tichuan, 2024-25 chhungin kan infiammite hnen atangin medal 101 an hawn thu te pawh kan hria a. Heng hlawhtlinna te pawh hi a chhungril lamah turtu awm avanga kan infiammite hi an hlawhtling ni ah ka ngai a. Chumi chhunglama turtu pe tur erawh chuan sorkar lamin hma kan lak a ngai niin ka hria a. Chutiang minister hlawhtling kan nei hi a lawmawm hlein ka hria a ni. Pu Speaker, chutih lai chuan hei, Khelo India hnuai - SASCI te, PMJVK leh CSR atangtein hmun eng emaw zatah sorkarin hna thawk mekin, ruahmanna eng emaw zat a awm bawk a. Chumi zingah chuan hei, kan bial, a bikin chhim lam hi kawng engkimah educate kan mamawh em em a, sports a ni emaw, education lam a ni emaw.

A chhan nia ka hriat, wawiina han sawi ka duh chu, Assam (leh hmun dang) ah pawh illegal migrant reng reng hi district hnufual area atangin a rawn intan tlangpui a. Khung Assam - Dubri, Kolpara, Nowgong, Cachar, Karimganj leh Hailakandi tih vel atangin an rawn lut tam a ni. Chutah chuan, chhim lam hi illegal immigrant tan remchang tak mai a ni a. Chungah chuan sports lam atang pawhin kan in educate a ngai a ni; henga min vengtu tur hian kan indah theih ka ring a. Sports lamah hma kan sawnna hian heng te pawh hi tam takin min puih theih ka ring a ni.

Tin, ka bial Lunglei-ina mual kan neih ve chhun Thuamluaia Mual a awm a. Heta light kan mamawh dan leh light chungchanga sorkar hmalaknate pawh kha kan hre tawh a. Vawiinah hian, 1st installment chungchangah khan Champhai lam kha kan thik a ni hran lo a. Amaherawhchu, kan Sports Minister-in, “2nd installment lo kal hunah chuan ruahmanna awmsa angin Lunglei Thuamluaia Mual-ah kan dah ang” tia min sawihmuha kha wawiinah hian kan nghakhlel hle a ni.

Tin, NEP-2020 a kan hmang a, hmanni ah Mizoram University bill kan pass tawh a. Chumi tangkawp chuan hei Thuamluaia mual bulah hian Lunglei Government College-ten an ram hi Public car parking atan leh Research room emaw engemaw class room emaw Auditorium atan emaw nikawp thei tur hi ram min pe thei a. Chu chu stake holder meeting-te kan nei a, DPR te pawh ka hovin kan han buatsaih a. Hei hi vawiin ah hian min hriatpui sela, Lunglei Thuamluaia mual hi thil tihpui apianga kan buaina chu car parking a ni. Lunglei Gov't. College kan tibuai nasa thei em em a. Anni lah tunlai khawvel ah chuan 2wheller leh 4wheller-in an kawt a khat tlat tawh a, hei hi min hriatpui sela ka duh em em a ni.

Tin, Rahsi Veng ka bialah sawn Mini Sports Complex kha sorkar hmasa atangin tan a ni a, Ttunah hian eng emaw chen chu a kal ve tawh a. Nimahsela, hna a muang khawp mai a. Chutih rual chuan a bula inhlawhfa te harsatna House-a han tarlan ka duh chu – inhlawhfate hlawh hi kum eng emaw zat bat a ni tawh a, mi harsa te te an ni a. Hei hi department anga hma min lakpui a tul ka ti a. Sorkar hmasa lam thiltih a nih avangin keini tan inrawlh viau pawh a hreawm deuh thin a. Chutah chuan, kan theih ang chuan hma kan lakpui ve a. Sorkar hmasa thiltih ka rawn zualko ve a ni e.

Tin, District Sports Committee chungchangah nikumah khan ka lo au tawh a, hetah hian. District Sports Committee setup hrim hrim hi, Chairman ah DC dah te hi thil tha ber a ni em tih te ka rilruah chuan a awm a. Hengah te hian hma kan la thei em? Lunglei pawhin hmeichhia-DC kan nei a, Sports lamah chuan a ngaihna a awm loh ve hmel si a. Chung te pawh chu rilruah a awm a. A setup te pawh hi tih that a hun tawh em, tih kha.

Demand No. 7 - Excise & Narcotic Department:

Ruihhlo do kan tum tak tak a ni tih a lo lang ta a. Motor thar LMV 14 leh two-wheeler 4 kan lei a, tiang chuan kan tlan vet vet tawh mai a. Tin, ruihhlo do meeting chi hrang hrang - kohhran pawl huap te, sorkar pawl huap te kan nei a, kan nei zel dawn bawk a. Tin, damdawi man tihchhiat han ngaihtuah hian, man ni ta lo se heng zawng zawng kan thalaite thisena lut tur kan ngaihtuah hian vawiinah hian department hmalakna a lawmawm ka ti a. Tin, ka sawi fo chu, VDP hi department tanpuitu tak zet an ni a. Vawiinah he House leh kan Minster hmaa ka han sawi duh chu, torch emaw, search-light te emawa thuam chak ve ni sela tih hi. Tin, safety equipment ang te pawh an mamawh em em a, ka hnenah te pawh an rawn sawi thin a ni.

Tichuan, MLP Act, 2025 pass thar a ni ta a. Sorkar chuan he department kaltlang hian hma nasa zawk, inkhapna pawh nasa zawk, a hman dan pawh nasa zawkin a kalpui dawn a. Hengah hian hmeithai leh miretheite an eizawna tihbo sak chungchangah hian sorkarin kan umzui a tul hlein ka hria a ni.

Demand No. 34 - Animal Husbandry & Veterinary Department:

Nichina kan member zahawmtakte sawi ang khan, ASF hri a len avanga tanpuina kan hmuh tur hi kan nghakhlel hlawm hle mai a, zawhna pawh kan bengah hian a ri cham chi a ni. Ka bial, a bikin Buarpui, Kawlhawk bawr, Sazaikawn - Buarpui, West Bungtlang thlengin vawk vulh, ran vulhte'n vanduaina nasa tak an tawk a. Chutihrual chuan, ka hmaa member khan a sawi ang khan Buarpui Dispensary hi 2023-a sak zawh tawh a ni a, indaihlohna avangin doctor dah a ni chuang si lova; a building neih ringawt hian awmzia a nei lo a ni. Chuvang chuan, a thawktu kan mamawhn ka han tarlang bawk a ni se. Ran-vulh tui em em, hma la mekte pawh tunah hian doctor awm loh vangin an hlawhchham a.

Tun Inrinni khan ka han kal kual a, an vawk-inah te thingfak an tiang er-ur ringawt tawh mai a. Chutiang chu an dinhmun a ni tih Pu Speaker, ka han tarlang a.

Tin, RAHC, heng centre ho - Sertlangpui te, Lunglei Bazaar Veng te, Lunglei Rahsi Veng te, Hauruang te thawm-that a ngai em em mai a, chungah chuan thawktute kan indaihlo em em a. Lunglei kan office hmun puia staff tlemte kan intawm a ni a, AH & Vety-ah hi chuan hmasawn ngaihna Lunglei District-ah chuan hmuh a harsa viau a ni. Hengah hian theihtawp min chhuahpui turin he House hi ka ngen a ni.

Tichuan, vawiina minister zawhawm tak tak pahnihte demand hi ka thlawp a, House zahawmtakah hian pass ngei turin ka rawn dinchhuahpui a ni e. Ka lawm e.

SPEAKER : Tunah Member zahawmtak Pu K. Hrahmo ilo sawm ang.

PU K. HRAHMO : Pu Speaker, ka lawm e. Hei Minister zahawmtak pahnihte demand, a vaiin 8 lai mai sawi ho tur a ni a; hun a tlem avangin ka duhna lai lai hi han sawi mai ila.

Ahmasain kan House Leader zahawmtak hi a awm lova. Kan hnung kar a windup-na a thusawi, “ZPM Sorkar aia tha zawk sorkar piantir (din) tum rawh u; in-el ang u, Zoram tan” a tiha kha, tha ka ti a, a challenging ka ti a ni. Amah awm lo mahse, tu emaw khan min lo hrilh sak mai ula; BJP hian ZPM-sorkar aia tha zawk piantir kan tum a ni tih ka sawi duh a. Leiba awm lohna state, Central sum duh tawka hman theihna Sorkar tha zawk din kan tum a ni, tih kha ka han sawi duh a ni e.

Demand No. 27 - District Council and Minority Affairs Department:

Pu Speaker, tun hma kha chuan ‘District Council Department’ tih a ni thin a ni. Mizoram-a constitutionally recognized minority-te chu Autonomous District Councils pathumte hi an ni a, chu department enkawltu biktu chu a ni thin a ni. Mahse, a hming kha ‘District Council Department’ tih anih avangin helaiah hian a tawp mai thin a. ‘Central lama zawmpui ministry a nei lo hi a dik lo e’ tih avangin, District Council Department tih ni thin kha, ‘District Council and Minority Affairs’ tih a lo ni ta a ni. Heta tang hi chuan Central scheme-te pawh dawng ve thei turah kan inbeisei a ni. Kan beisei ang ngeiin PMJVK te pawh an lo khawih ve a. Anihna takah chuan, Social Welfare & Minority Affairs atanga hamthatna lokalte pawh anmahni khawih zawk awm tak a ni a. Chutiangan minority scholarship te pawh District Council & Minority Affairs hnuaiiah hian Board awm mai tur a ni. Chutiang ni lova Social Welfare lam daiha kan dah hi thalo ka ti a.

Tichuan, Minority Affairs atanga hamthatna awm ang ang District Council & Minority Affairs lamah kal tura ka beisei laiin, an neih chhun PMJVK pawh laksakin, Planning lamah dah a ni leh tawh a, hei hi pawh ka ti a. Kan CM zahawmtak khan, ‘ka room-ah tv lianpui ka nei a, khata tang khan ka monitor zel’ a tih si chuan, engatinge khang te kha a tv atangin a monitor theilo em maw ni le; engatinge Planning lamah daih a dah? tih kha ka zawhna a ni e.

Tin, LAD-ah hian, Disrict Council-te hian Village Council Acts te, Village Council Rules te, ‘A Lesson to Village Council Rules’ tih te a hranin an nei ve a; helaia State Dan hi an hmang ve lo a. Vawikhatmah an rawn hmang mai lo. An Dan - Village Council Act-ah chuan, ‘loh

theihlohna avanga village council dissolve anih chuan, district council-in caretaker thla-ruk tan a ruat thei ang' tih a ni a. Caretakers thla ruk atana ruat ho khan VC full-power an nei a, Dan-in thuneihna a pe a ni. Mahse, eng emaw avanga dissolve anih khan helam atangin RD Department lo inrawlhin, order an chhuah a.

Village Council pakhat dissolve anih chuan, 'job-card' kan tin mai hi an khawi tur a ni lo ve; job-card sum hi kan kutah lo dah lut rawh u' tiin, Rural Bank Manager-ah te lehkha an pe a, anmahniin an sem thin a ni. A awmzia chu, District Council Act kan nei kha, District Council, anmahniin duh tawka caretaker te an insiam State Sorkarin a pawmpui tlat lo hi a buaithlak ka ti a ni. Hmanni lawk khan State Sorkar - Village Council Act te kha kan sawiho a. "Helai State rules-a provision-ah hian, village council a lo dissolved emaw hian a caretaker dah theihin i siam ang u" tiin ka rawt a, State-ah chuan in duh lo a nih kha. Village Council loh theih loha dissolve a nih chuan, a take-care tur officer pakhat leh amah puitu tur a khuua mi pahnih-pathum ruat turin sorkar-phalna a la tur a ni, tih kha kan hmuh a ni thung a. Heti lam atanga village council a va take-care pawh kha a awm reng, district council-ah chuan; khatiang provision kha kan nei lo. Amaherawhchu, District Council hian care-taker ruat theihna provision a neih avangin, village council pakhat alo dissolve anih pawhin VC care-taker thla 6 tan an ruat mai a, khang khan full-power an nei vek. Engpawhnise, dan leh dun ah hian kan House hi lo inrawlh lo turin he ka ngen tak meuh meuh a ni.

Hei hi RD Department demand-a sawi chi nge ni ka hrethiam lo a; RD demand-a sawi leh tur a nih chuan, a detail deuh zawka sawi leh ka tum zawk ang a. Khang thil pahnihte kha Pu Lalsawivunga chan demand-a ka sawi theih ni se.

Demand No. 7 - Excise & Nartcotic Deaprtment:

Kan minister zahawmtak hian demand pathum - Nos. 7, 22 leh 28 te a nei a. Hemi demand te ka sawi hma-in thil pakhat sawifiah ngai nia ka hriat tlem han sawi zawk ka duh a.

Kar hmasa "The Mizoram Liquor Prohibition Amendment Bill, 2025" chungchang kan sawiho laiin, helai District Council atanga kan MLA thenkhatte khan hmai-hnih neiin thu an sawi a. Helama zu khap an duh laiin, sawlamah an duh lo a; chanchinbu leh social media-ah pawh post a tam khawp mai a. Kha thil kha 'in hre sual a ni' tih ka sawi duh a. Zu khap kan duh; mahse sawlam chu dan leh dun hran nei an ni a, kan state dan hi chuan va cover lo mai rawh se; an duh leh anmahni House-ah pass-in rel ve mai sela, in khap ve mai rawh se kan ti a ni. Kan Dan siam hian sawlam chu cover ve lo se kan ti a ni. A chhan chu, Section 2-a para 10 (sub-para-ii) ah khan, dawr kaia dawr siam tur chuan district council-ah trade license dil leh tho tho a ngai a. An duh lo chung a va barh-luiha license pek anih pawhin, Zu kha an zuar thei lo hrim hrim; permit nei chung pawhin an zuar thei lo hrim hrim a ni.

Damdawi zawrhah pawh a ni. State-sorkarin license a rawn peka khan, sawlamah thuneihna state sorkarin a rawn pe tihna a ni. Chuvangin, damdawi a zuar ngawt theilo hrim hrim. Zuar tur chuan District Council-ah trade license dil a ngai; an dil a, an pe mai; damdawi kan mamawh si a. A tha alawm, license in rawn pek te kha; trade license sawtah an dil a, an pe mai zel. Mahse, Zu kher hi chu Pu Speaker; mipuiin an duh nge duh lo pawh dawn lova district council area-a va khap ve ang kha chu; an duh chuan anmahniin an inseam ve mai tur a ni. Rules para 3, sub-para (i) leh (j))-ah khan, sawlamah minority custom-ah dan kan siam thei lo a ni tih kan sawi a. Chuvangin, helam dan hi chu helamah

ni sela, sawlama khap tur anih chuan, district council-in inkhap ve mai rawh se, tih kan sawina a ni e.

Demand No. 22 - Sport & Youth Services Department:

Kan minister hi ka fak duh a. Ani hi minister fel leh tuan tha tak, vision tha tak nei thin a ni a. Sap hovin ‘The right person, at the right time’ an tih ang niin ka hria a. He ‘the right post’ kan tih a chelh angin, kum 2036 Olympic India-in a thlen turah kan thalaite inbuatsaihna training a pek dan te hi ropui ka tiin, tha ka ti a. Mahse, ka beisei loh takin a chanah hian pawisa a tlem ber tlat mai hi pawu ka ti a; a fel felah pawisa tam zawk pek tur anih laiin, a ni hi minister zingah pawisa chang tlem ber a ni tlat mai a. A chan hi ka lo total ve a, a percent phei chu tlemte a ni a. Hei hi a pawu ka ti takzet a, amah hi mifel tak a ni si a.

Hun a tlem tawh si a. Tichuan, Pu Speaker, kan minister pahnihte demand (demand an rawn siam ang ang hian) hi lawm takin ka pawmsak hlawm e. Ka lawm e.

SPEAKER : A lawmawm e. Thingpui-in-chawlh hun a ni a. Tukin zing Venghlui Bazar kangmei chhuakin kan electric line a sawisa nasa ang reng a; kan chawlh chhungin kan PWD leh Electric lam ten shut down laka line check deuh hlek an duh avangin dar 2-ah chiah kan lutkhawm lo palh thei a. Luhkhawm hun chu kan inhriattir leh dawn nia. Tunah thingpui-in-chawlh ilo nei ang u.

(Recess at 12:59 PM)

2:00 PM

SPEAKER : Discussion kan nei kha a ni a. Information inpek zung zung a har ang reng a, update kan inngaichang reng a. Dar 2-ah kan tan thei tih kha tun deuh mai minute 2-3 kal taah khan an rawn confirm a. Information kan la dawn kim loh avangin member-te kan la lut kim lo pawh a ni mai thei e. Tichuan, kan Excise minister tablet kha an restore tawh maw? A tha e.

Tu nge han sawi leh ang le? Pu Lalramliana Papuaia, Member zahawm tak ilo sawm ang.

PU LALRAMLIANA PAPUIA: Pu Speaker, ka lawm e. Vawiina kan sawiho tur hi minister pahnih demand a ni a, a hmasa zawk kan Minister zahawm tak Pu C. Lalsawivunga department atang hian han tan ta i la.

Demand No. 19 – Local Administration Department:

Tun kan budget-ah hian hnathawhna tur pawisa eng emaw zat dah a ni hi a lawmawm ka ti a, ₹22,515 lakh chuang dah sak a ni a. Nikum lama kan budget BE nena khaikhin pawhin he department bik atana kumina hnathawhna tur pawisa dah hi ₹1,600 lakh chuangin a sang zawk a ni tih kan hmu a, beiseina pawh a sang viau a. Hetianga sum ruahmanna hnuaiah hian hnathawh pawh tam tak rawn lang turah ngai i la.

LAD hi kan hriat leh han ngaihzawn deuh ang pawhin ‘VC-enkawltu’ tih hi kan rilrua a lan dan a ni deuh ber tawh a. LMC bakah AMC te khawpui chhungah kan nei a, tlema thingtlang lampangah VC enkawltu a ni a. Heng kawngah hian han sawi thui dan pawh thiam a har a, kan hmakhua zel tur eng nge ni ang tih kan la hre lo a.

Eng pawh ni se, tun dinhmunah chuan VC-te hi thingtlang lama khawtlang enkawl leh kaihraina kawngah hian hmun pawimawh tak luahtu an lo ni a. Khawtlang an enkawlina kawngah inenpui vek a har avangin, inelna thianghlim te pawh siamsak a tulin ka hria a. Ti ve ngial i la, VC-a kan awm ve lai te pawhin VC hnathawk thate district level-ah lawmman siamsak thin anni a, inelna thianghlim avangin tan a na em em a. Khatiang zawng te pawh khan local level-a kan sorkar ve, kan VC-te hi hnathawh thata inel thei tura ruahmanna siam sak pawh a tha hlein ka hria. Tunlaih phei chuan NREG hi thingtlang leh hmun thenkhatah pawh VC-te hun zawng zawng min eihektu a ni ringawt mai a. Kan hna 80% hi NREG buaipui hian kan buai a ni ringawt mai a, VC a nihna anga a duties leh function khawih mumal hman lo pawh an awm a. Heng kawngah te pawh hian VC-te mawhphurna, an duties leh obligations-te pawh inhrilh thar leha, tha taka khawtlang enkawlinaah mawhphurhna an lak theihna tura kaihrui thar an mamawh hle niin ka hria a.

Tin, thingtlang VC-te khawpuiah department leh officers-te dawr turin an lo kal a. Dawr tur hmu remchang lo, an dawr duhate hmun danga an lo zin lai te a nih phei chuan an buai em em thin a. Hetiang nikhuaah hian a bik takin Lunglei khawpuiah hian VC-te pualin Resthouse ang reng deuh, Guest-house neih te hi a tul hle a. Sum tam tak senga ni hnih-thum chung hotel-a han thlena cham a ngaih changte pawh a lo awm thin a. Mipuiin kan aiawha kan thlan dinhmun pawimawh tak luahtute annih avangin, ngaihpawimawh hi a tul hlein ka hria a. Hetiang nikhuaa an thlenna tur ruahmansak te pawh hi a tha hle mai tih te hi VC chungchanga ka han tarlang duh a ni.

Demand No. 23 - Art & Culture Department:

Tun budget thara kan hmuh angin, nikum lampang budget nena khaikhin pawhin hmasawna tur te pawh hmu thei turah inngai ila, sum ruahman te pawh an pung chho a. Hei, chhim lamah Art & Culture Department hnuaiah hian Southern Region office changtlung deuh hlek, southern region enkawl thei tura kan tihchangtlun a tha hle mai a. Ka theih ang tawk tawkin kan zirchiang a, tunah pawh Art & Culture Department-a kan thawktute pawh thahnemngai leh theih ang tawka an thawh avangin kan kal thei a ni mai a; an indaih lo ve em em a ni, thawktute. Pahnih khat chauh tak tak an awm a, tiang chuan, department kalphung bakah Sazaikawn - multipurpose-cultural complex te, District Museum leh Auditorium-te anmahni enkawlina hnuaiah a lo awm ve baw a, staff-te an indaih lo ve khawp mai a. Heng Lunglei vela souther region headquarters tur anga a thawktute pawh tihchangtlun a tul hle a; a department hotute leh kan Minister pawhin min hriatsak se.

Demand No. 27 - District Council & Minority Affairs Department:

Tun tumah hian district council pathumte enkawlina tur sum ruahman hi kum hmasa lam ai khan ₹3896.9 lakh vel zetin dah tam a ni hi a lawmawm ka ti a, ngaih pawimawh awm pawh ka ti a. Khawthlang lam leh chhim lama kan unaute represent-tu helaiia lo awmte pawh thahnem an ngai a. He sorkarin anni enkawlina tur budget-ah duhsakna lantira, heti zat the meuh sum ruahman a ni hi a lawmawm ka ti a. Chuvangin, kan Minister chungah pawh lawmthu ka sawi baw a ni.

Demand No. 34 - Animal Husbandry & Veterinary Department:

AH & Vety budget han thlir hian hma thar lakna tur kawng hrang hrang a awm thei turah ka beisei a. Thingtlang lam bial neitute kan ni a, bial fan changa kuthnathawktute leh ran vulhtute pawhin kan hnena an lo thlen ve thin leh an sawi fo thin chu, ran damlo an neih nikhuaa an entirna tur dispensary-a thawktu leh thuhchilhtu an mamawh thin zia te a ni fo

thin a. Hemi kawngah hian staff indaihlohna a awm pawh a ni mai thei a, mumal taka staff ten an vila an ven theih tura thawktute pawh kan tihchangtluna, damdawi leh thurawn an lakna tur bakah rawn theiha kan awm a tul hle a. A theih pheih chuan, office hmun nghaka thutchilh theitu tur; khaw tinah chuan a theih loh ang a, entirnan: Tawipui ni se, Tawi-tlangdung vel te, khawthlang lam tlangdung tan hmun khat-hmun hnihah emaw; bial dangah te pawh a ni ang chu, a tlangdung mil deuh, pan awlsam tura kan neih hi a tul hlein ka hria a ni.

Tin, Vety lama kuthnathawktute, ranvulhtute chhawmdawl leh tanpui a tul em em a. Ka rilrua awm ve pakhat chu, a department ang pawh hian hmalakna kalpui tak taka, artui chungchangah pawh (state danga kan ram sum tam tak thla tin maia liam hum hum ang te) thil tih ve theih nia lang si engah nge kan la intodelh ve theih loh le, tih te ka rilruah a awm fo thin a ni. Ranvulhtute atang chuana a mimala tih tak tak a har a, sorkar hmalaknaa bul tanin, lian tham taka thil tiha kan intodelh ve theihna tur chi, hetiang tlema khirh lutuk lo ang chi ah te pheih chuan hmalakna lian tham deuh tak neih intodelh ve hi a chakawm tawh ka ti a. Chung kawngah te pawh chuan kan department lam pawhin hma an la zel turah ngai ta ila.

Kan Minister zahawmtak Pu Lalnghinglova Hmar chanah hian tlem han sawilan duh ka neih chu - kan minister hi a fakawm ka ti a. Minister-te kan lo teh ve thinna pakhat chu - a department chanah dan felfai lo ennawn tur an nei em; dan thar engnge an siam tih te a ni fo thin a. Legislator kan nih ang pawhin State Legislature-ah pawh kan dan changtlunglo te tihhmasawn a ni a. Chutiang kawngah chuan a department chan pathumah tun tumah hian bill a rawn pulut thap thei mai hi, minister active tak mai a nihna a tarlangin ka hria a ni.

Demand No. 7 - Excise & Narcotics Department:

Excise & Narcotics chungchangah pawh hian a hmalakna tha tak tak sawitur tam tak a awm a, member dangte khan khalam kha chu tam tak an sawi tawh a, kei chuan sawi tam tawh lo mai ila. District hrang hranga excise office hawn thar a ni te hi lawmawm ka ti a, motor te pawh lei thar a ni a. Hemi chungchanga kan sawi tel ve duh chu, Lunglei Excise hi a tla bal ve khawp mai a. An gypsy neih pawh chhawrtlak a ni tawh lova, eco-van motor pakhat kha an neih ni maiin ka hria a. Ruihhlo dona kawnga thil pawimawh tak a ni si a, lo ngaihtuah deuh an ngai a ni tih te he House ah hian kan sawi duh a ni.

Demand Nos. 22 - Sports & Youth Services Department:

Sport & Youth Services ah hian hmalakna tam tak kan ngaithla tawh a. Olympic Vision, 2036 te, Non-Olympic discipline thlenga incentive cash award pek tura telh an ni te hi a lawmawm em em a. Tin, ka bial chhungah te hian a theih ang angin hma kan han la ve a, infiamna lama hmasawna a thlen theihna turin tiin sport goods - training kits te, shooting rifles te, pistol te kan lei a; chutiang chuan discipline hrang hrangah sports hmasawna turin hma kan la chho ve a ni.

Demand No. 28 - Labour, Employment, Skill Development & Entrepreneurship Department:

LESDE ah pawh hian sawi tur chu a awm nual ang a, amaherawhchu hun a tawp dawn avangin pakhat chauh ka sawi ang a. Tuna Bana-kaih policy-a kaih remchang tura insiamna hun pawimawh ber pakhat niin ka hria a. Chuvang chuan, tih tak zeta he LESDE hmalakna tur hrang hrang, a bik takin ITI te pawh kalpuia kan thalaite chherchhuah hi thil

pawimawh nia ka hriat a vangin, hei hi tihtak zeta sorkar pawhin a kalpui leh, kan policy Bana-kaih tih hlawhtlingtu pawimawh tak pakhat a nih ngei pawh ka beisei tak zet a ni.

Awle, vawiina kan Minister pahnihte - Pu C. Lalsawivunga chan Demand Nos. 19, 23, 27 leh 34 te leh Pu Lalnghinglova Hmar chan Demand - Nos. 7, 22 leh 28 te hi, he House hian pawmpuia a pass sak ka remti e. Ka lawm e.

SPEAKER : Tunah Member zahawm tak RM Chakma ilo sawm ang.

PU R.M. CHAKMA: Pu Speaker, vawiina kan Minister zahawm takte pahnih demand sawi theia ka awm ve hi a lawmawm ka ti a. A hmasa berah chuan –

Demand No. 19 - Local Administration Department:

LAD minister hian District Council & Minority Affairs Department-te a kawp hi remchang ka ti a. Hmanni lawka Village Council Act kan pass taka a lan danah chuan, 11th Schedule-a power neih zawng zawng kha Village Council ah kan pe ta a. Khatiang a nih chuan, kan hriat theuh angin tunhma atang khan Central sorkarin Panchayati Raj introduce turin min phut thin a ni a. Tunah 11th Schedule ah power kan pek takah chuan vai rama Panchayati Raj an treat angin min treat dawn em ni ang, tih kha ka zawt a.

Tin, chumi rural chuan, kha Bill kha The Village Council Act, 2025 gazette-a notified anih ve leh khan Mizoram-ah hian Village Council dan chi-hnih kan nei dawn a ni. Mizoram chhungah Village Council-in power sang tak an nei dawn a. Chutih laiin, a lehlamah Village Council hnuai ah District Council a awm bawk si a, an function dan kha a inang vek tho si a, khang power and function te kha an nei thei dawn lova. A chhan chu, District Council-in dan a siam theih chu 6th Schedule huamchhungah chauh khan a ni si a.

Khatah khan, District Council Affairs nena an inkawp hi rem ka tihna em em chu, kan District Council Affairs minister hian kha kha kan Governor-ah hian min thlen sak sela, 6th Schedule, para 6 hnuai ah ‘entrustment of power’ tih kha a awm a ni. State sorkar leh Governor-in rem an tih chuan, District Council te hi power entrust theih anni tih kha a awm a ni. Tichuan, tuna Mizoram-a Village Council hnena power kan pek zawng zawngte kha entrustment order siamin min pe thei sela, kan District Council pathumte pawh khan khatiang dan kha an siam thei dawn a ni. Chutiang anih loh chuan, dan kha kan siam thei dawn lova, kan District Councils te hi power nei tlem bik angin an awm dawn a ni. Kha kha, state pakahat a awm, same local body, same rural local body ni si, power inneih tam hleih kha a tha dawn lova, he thilah hian hma min laksak ngei se ka duh a ni.

Tin, District Councils te salary indaih lohna RE-a min pek theih loh chhan kan House Leader-in eng eng emaw a sawi kha a dik a. District Council pawh khan thiam lohna an nei; keipawhin ka enkawl tawh a, ka hria a ni. Han khuakhirh deuh pawh khan politics avangin eng emaw chinah chuan a harsa thin a. Mahse, khatia kan dah ringawta an salary tur min pek thei siloh avangin, District Council CEM pathumte pawh khan rawtna pawh an siam a ni. Pu Speaker, District Councils pathumte staffing patterns hi inang se chuan, khata tang khan hmalak theih dan a awm a. Hmanni lawkah kan Governor pawhin order pawh a chhuahin ka hria a, 6th Schedule hnuai ah khan. Uniform staffing pattern hi tunhma pawh khan kan propose thin a, mahse min ngihsak ngai lova. Gazette ah notification chhuah sela, staffing pattern mumal deuh awm sela chu, duh duhin appointment a pek theih

tawh dawn lo a ni. Khang kha kan ngaihsak loh avangin hetiang thil hi a lo thleng thin a ni a. Keini District Council-te pawh eng emaw chenah kan dik lo a ni tih chu a lang reng. Mahse, State sorkar pawh hian mawh a phur ve thovin ka hria.

Chuvangin, 6th Schedule chungchangah chairman hnuaiia committee dina, a rang lama staffing pattern mumal siama; khami piah lama appointment pek te a awm chuan, 6th schedule CCV Rules ah khan state sorkarin eng hma nge khangah khan a lak theih tih te pawh a awm vek a ni. Chuvangin, stipend pattern mumal a awm loh avang khan duh zah zah an la thei a, a tawpah chuan hlawh indaihlohna ah kan lut leh mai thin a ni. Chutiang chuan hma mumal deuha min laksak turin ka ngen duh a ni.

Demand No. 23 - Art & Culture Department:

Pu Speaker, Art & Culture ah hian eng eng emaw hamthatna awm a, hmannah ka sawi tawh a; traditional dress chungchang te. Heng hi chi-bil leh inlakhranna a ni lova. Chakma leh Bru te chuah lo pawh, chakma-in kan piang a, kan hnam a awm a, Bru an awm bawk a, kha kha Pathian min siam dan pawh a ni a. Khatianga mahni nihna, custom & tradition humhalh (preserve and promote) tura hamthatna te a awm anih chuan, chu chu kan phu ve a ni. Chakma leh Bru chauh kan ni lova, Tang te, Bawm te pawh an awm a; Lushai te ang lo tho kha kan ni ve a ni. Zo-hnahthlak ah pawh tlema hran deuh chu an ni a, khang te pawh khan hamthatna an dawng lo a ni. Mizo culture tihausa tur chuan, an culture tlema hrang deuh te pawh ni se, preserve sak leh promote sak kha kan tih tur tho a ni a, khatianga zawnga ngaihtuahna te pawh nei ila.

Tin, member thenkhat khan Bru te, Chakma te nena joint-cultural festival neih an rawtna kha a tha ka ti lutuk a; kan inpawh tlanna te, mahni culture promote leh preserve theihna kawng chi khat te a ni a. Khami rual rual khan, central-ah hian sponsor scheme art & culture ah te, tribal affairs te, tourism thleng pawhin a awm a ni. Project kan siam thin a, mahse kan hmuh thei lo thin a. Khangah khan State sorkar hian tihtak zetin hma la sela, State sorkar sum pakhat mah hmang lovin khang te kha kan ti thei a. Khanga te pawh kha a concern minister, a bik takin Art & Culture minister hian project te siamin hma a la turah ngai ila. Kha kha min ngaihpawimawh sak turin kan ngen duh bawk a ni.

Demand No. 7 - Excise & Narcotic Department:

Tin, Pu Lalnginglova Hmar, Minister demand Excise & Narcotics-ah hian kan hriat theuh angin, 'The Mizoram Liquor Prohibition Amendment Bill' kan pass a. Kan pass takah chuan rule kan siam ang a, kha kha a effective dawn a ni. Mahse, he Bill hi ka ngaih dan chuan, morally wrong a ni. Kut-hnathawktute hamthatna tur kan ti a, kut-hnathawktute hamthatna chu kan duhsak vek. Mizoram hi 100% kristian State tih thei kan ni a, min thlangtute pawh kohhran-upa te, pastor te an ni. Chutiang chuan, kristiante kan inzirtirna ah zu zawrh hi phal a nih loh avangin, hei hi min thlangtute duh dan pawh a ni lo tih a hriat a. Chuvang chuan, hei hi morally wrong ka ti a ni.

Entirnan: Thil tha lova kan ngaih drug zawrh te, rukruk te pawh a hlawk a ni. Kan control theihloha, kan tirem thei lo kan ti anih chuan, engatinge kan zawrh law law mai loh? Engatinge a zawrh phalna te kan pek mai loh? Engatinge rukrute pawh an ruk theih chin kan siamsak mai loh? Zu khuahkhirhna Prohibition Act kan siam hlawhtlin loh avanga thlah dul a ngai tih zawnga kan kal dawn anih chuan, Pu Speaker, i dinglama thute khan drug pawh hi thlah dul deuh ila an ti mai dawn tihna em ni? Chuvangin, hei hi chu majority-in kan pass

tawh a, in ti dawn a; hei hi zu zawrhna dan diktak a ni. Excise & Narcotics zu-khuahkhirhna department ni thin kha, tunah chuan zu-zawrhna department-ah kan chantir tawh niin ka hria a, a paw ka ti tak zet a.

Chuvangin, kut-hnathawktute hamthatna kan duh a nih chuan, a kawng dangah duhsak ila; hetiang morally wrong thil hi chu tih loh dan awm sela a tha ka ti a. Engpawh ni sela, kan Minister zahawm tak pahnihte demand hi a tha ka ti a, mipuite tan tangkai taka hman a nih theih nan duhsakna nen pass-pui ka remti e. Ka lawm e.

SPEAKER : Tunah chuan Pu VL Zaithanzama ilo sawm ang.

PU VL ZAITHANZAMA: Pu Speaker, vawiinah kan minister zahawm tak tak pahnihte demand kan sawiho mek hi a tha ka tih thu ka sawi hmasa a ni. A hmasa berah chuan -

Demand No. 22 - Sports & Youth Services Department:

Ka mitthlaah ka bial chhunga Sport Authority of India hnuai training center a lo lang a. Tun hma chuan, SAI hi Mizoram tana medal min hawnsaktu lian ber a ni thin a, tunah erawh chuan an dinhmun tlemin a lo tlahniam a. Hetah hian tun hma chuan discipline 7 a awm thin a, tunah chuan 4 chauh a awm tawh a. Kan Minister hian hei hi discipline 7 anih leh theihna tura hma min lakpui theih chuan kan lawm hle ang tih kan sawi hmasa duh a ni. ‘Hmunhma ropui aiin infiammi ropui chherchhuah a ropui zawk’ tih hi vawiinah ka rilru-ah a awm a. Kan Minister zahawm tak pawh hian hetiang rilru pu chungin hma a la a, Vision Olympic, 2036 nei chungin grass-root level atanga bul a han tan ngam hi ropui ka ti a. Hei hi 10 years plan a nih avangin, vawiina hnathawh rah hi nakinah a lo lang chauh dawn a ni.

‘Empowering Mizoram Sport’ tih hi Mizoram Bana-kaih (Hand-holding) Scheme hnuai hmalakna tur a ni a, a ropui hle a. Sports Association leh mipui tangkawp (Public-Private Partnership) hmanga ram pum tuam chhuak Sports coaching leh talent development lian tham kalpui tum a ni a. Sport talent nei tha hmun kilkhawr thlenga Mizoram leh India aiawh thei tur zawnchhuah hemi hmang hian tum a ni.

Mizoram Sports Conclave, 2024 hmannia neih zawh tak kha India ram Olympic 2036 focus chung a conclave buatsaih hmasak ber a ni a, Mizoram National Level Sports Conclave hmasa ber a ni bawka; a-ber nihna pahnihta nei a ni. Mizoram atangin Olympic levela infiammi chherchhuah dan tur sawihona tha tak neih a ni a, sports journalist leh infiam mi langsar tak takte, sport industry-a langsar tak tak te an lo kal a, kan hlawhtling hle ah ka ngai a ni.

Ka lawmna em em han sawihmaih palh ka hlauh chu, Incentive Cash Awards Scheme, 2025 duan thar hi a ni a. Ni 13th February, 2023 khan Council of Ministers meeting chuan a pawmpui a, non-olympic discipline-te tel belh an lo ni ta a ni. Inthliarna bang sah thlak a ni a, sports association zawng zawngte’n incentive cash award la vek thei tura ruahman a lo ni ta hi a lawmawm tak zet a ni. Tun hma in Inthliarna a awm thin a, olympic discipline chauha incentive cash award lak thin kha non-olympic discipline hnuai awmte tan a hrilhhai thlak hle mai a, kha inthliarna-bang sah teh a lo ni ta hi lawmawm ka ti em em a ni.

Demand No. 28 - Labour, Employment, Skill Development & Entrepreneurship Department:

Mizoram Building & Other Construction Workers Welfare Board hnuai welfare board member-te hamthatna tihpun a nih hi lawmawm ka ti a. Member hmeichhiate tan nau neih lawmpuina ₹5,000/- thin kha ₹10,000/-a tihpun a lo ni ta a, a lawmawm tham viau dawnin ka hria a ni. Tin, member kum 60 tlin hmaa hliam tuar leh natna khirh bik avanga hnathawk thei lova awmte tan tanpuina ₹50,000/- ni thin kha, ₹1,00,000/-a tihpun a lo ni ta te lawmawm ka ti bawk a. Member fa pahnih chin tan lehkha zirna tihpun te hi tha ka ti hle bawk a, kan sawi lo phal lo a ni e.

Demand 34 - Animal Husbandry & Veterinary Department:

Kan minister hi a inthlahrung thin em aw ka ti a, department hmalakna lian pui-pui a neih laiin a sawi ri khat viau hian ka hria a. Arpui nuai khat vulhna tur Thenzawl-ah buaipui a ni te hi a ropuun ka hria. Arpui nuai khat chu a tam in ka hre khawp a; hri an kai ang tih erawh chu ka lo hlau ve deuh khawp a. Hengah hian awmhmun atangin nitin artui pawh sing 8 chuang tui thei tura ngaih a ni a.

Chutih lai chuan, ram pum huapa hmasawna lian pui-pui a awm a - Sial chi tha la chhuak tura hmalak an han tum hi tha ka ti hle a. Kan sial vulh laite hi an lo te ta riau a ni awm e, sial lian tha chi la chhuak turin hma an la mek a ni. Lungkawlh Sial-vulh Co-operative Society Ltd. chuan sial chi tha 180 in bul an tan dawn a ni. He project hmang hian sialsa ah kan intodelhna turin thui tak hma a sial dawn a, Sialsa matric tonne 159.35 lai thar thei tura beisei a ni. Sial tho hi Thenzawl-ah sial 100 thleng scientific tak leh hlauh zawka vulhna tur (hei hi zo-sial humhalhna tura duan a ni nghe nghe awm e.) hmalakna lian kalpui a ni a, saa kan intodelh theih hi ka ring tlat a ni.

Vawk-pul hri nasa takin kan ramah ran vulhtute harsatna min siam sak a, chuti chung chuan vawiin thlengin bazaar-ah vawksa kan mamawh tawk a la awm reng thei te hi ropui ka ti a. Vawk-hri khan min tibuai lo se chu, vawk-ah pawh kan intodelh hle tawh dawn niin a lang a. He hmalakna atang hian Ar leh Sial-ah te pawh hian reiloteah kan intodelh thei mai ka beiseiin, kan theih ka ring nghet tlat a ni.

Demand No. 7 - Excise & Narcotic Department:

Pu Speaker, ruihhlo in min run nasat zia sawi tur kan ngah hlawmin ka ring a. Ruihhlo laka kan thalaite chhanchhuak tura kan sorkar a kal zelna kawngah thutlukna harsa kan hmachhawn hun a la thlen ka ring a ni. Chutih hunah chuan huaisen taka thutlukna siam thin turin kan minister zahawm tak hi ka ngen a, a bulah kan ding zel ang; chu chu kan sorkar, ram tan, tha ber turah ka ngai a ni. Thutlukna mumal siam lawk theih loh hi sual anih avangin, kan ram-kan hnam ruihhlo-in heti khawpa min chim buaina hi a rei tawh a, thutlukna siam hleithei lo leh hma la hleithei lova awm hi a pawh a. Engpawh lo thleng se thutlukna mumal tak siam zung zung thei turin kan rilru inbuatsaih ang.

Pu Speaker, vawiina kan minister zahawm tak takte pahnihte demand hi tha ka ti e. Ka lawm e.

SPEAKER : Member zahawm tak Pu Robert Romawia ilo sawm ang.

PU ROBERT ROMAWIA ROYTE: Pu Speaker, ka lawm e. Vawiinah hian Minister

zahawm tak tak Pu C. Lalsawivunga leh Pu Lalnginglova Hmar te demand kan sawiho mek a ni a, sawi pawh a phurawmin ka hria a ni.

Demand No. 23 - Art & Culture Department:

Pu Speaker, Starred Question No. 167 - Art & Culture Department-ah khan, tukin zinga ka zawhna tho hi mipui hriat pawh a thain ka hria a; tin, comment hlek pawh ka duh a -

Starred Question No. 167, Art & Culture Minister chhan atân ka zawhna: -

“Music leh Music Festival hi Mizoram Allocation of Business Rules ding lai angin Art & Culture Department chanvo/thuneihna a ni em?” tih ka zawhna Art & Culture Minister zahawm takin min chhanna ah chuan “Mizoram Allocation of Business Rules ding laiah chuan Music & Fine Arts and related subjects chu Art & Culture department chanvo/thuneihna a ni”, a ti a, a chiang khawp mai.

“Leitlângpui Music Festival, 2024 kha Art & Culture Department buatsaih a ni em?” tih ka zawhnaa Art & Culture Minister zahawm tak, a thuneitu chhanna chu – “Leitlângpui Music Festival, 2024 kha Art & Culture Department buatsaih a ni lo”, tih a ni leh daih thung a ni.

Helaiah hian ka sawi duh chu, Leitlângpui Music Festival hi tha ka ti a, ka support em em a, sorkar tharin a ruahman pawh hi tha ka ti. Chutih mêk laiin, Anthurium Festival hlu tak mai lo awm tawh cancel-in Leitlângpui Music Festival hi tih a ni a, pakhatna. Pahnihnaah chuan, Art & Culture Department hriatpui loha tih a ni, Leitlângpui Music Festival kha. Sorkar thar hlim lam kha a ni a. Sawi leh sawi hnu, opposition tarmit kan vuah lai te pawh kha a ni mai thei a, kan ti thuai thuai thin a. Tin, “ZMC Central Sorkar ah kan pe dawn”, kan ti a, kan rel pawp a; “Lengpui Airport kan hralh dawn”, tih te a awm bawk a. Hla tak chu a thleng lova, kan thu kan sût leh te a awm thin a.

Vawiinah hian Pu Speaker, Leitlângpui Music Festival hi changtlung zâwkin, ngûn zawkin kal zel se ka duh a. Chutih lai mêk chuan, Art & Culture, a department neitute hi tel ve sela tun ai hian a zia ang a, tih hi ka sawi duh a. A dik tak chuan, Leitlângpui Music Festival kha beisei a pha lo nasa em em a ni tih official atang ngei pawhin ka dawng a.

Tin, Tourism emaw, Horticulture emaw sawi hun a ni lo na a, Horticulture subject, ‘Anthurium’ a ni a; tourism atâna festival organize chu Tourism Deptt. chan a ni. Department pahnihin lungrual taka an lo tih thin, Anthurium Festival hi chu ‘tihnun leh ni lul rawh se’ tih hi, a kaihnawih tho niin ka hria a. Chu chu pu Speaker, ka sawi duh a ni.

Tin, ‘Art & Culture Department-ah Tribal Affairs a tel dawn’ tih sawi te a awm a, a lawmawm thovin ka hria a. Chutih lai mek erawh chuan, Art & Culture leh Toursim Department te hi a inhne-hnai khawp mai a. A hminga Tourism ka lo enkawl ve tawh avângin thawh ho thiam a ngai a ni; keima lo tawnhriat ve tawh atang pawhin. Kan hotute an thawk ho thiam turah ngai ila.

Leitlângpui Music Festival chungchangah a nodal department rawn lova kan lo kal ang kha chu awm tawh lo sela, tha takin thawk ho sela tih hi ka duh dan a ni a. Chu chu he House zahawm takah hian Pu Speaker, ka’n sawi lang ve duh bawk a ni.

Demand No. 22 - Sports & Youth Services Department:

Pu Lalnghinglova Hmar (Pu Tetea) enkawl Sports Department chungchang hi tawi tein. Sports hi a pawimawh a. Mizote'n India ram pum huapa kan lan vena leh Mizote min hriat vena pawh Sports hi a ni ve tlat a ni. Ram a changkang zel a, India pawh kan changkang zel a. India ramin kan tum pawh a sang ve tawh khawp mai a, kan thlen chin pawh a sang tawh a.

Chutiang a nih lai chuan, Sports changchanga Pu Modi-a thusawi pawh ka hre thin a. "Small aim is a crime", (Tum têt lutuk, Tum hniam lutuk hi Sual a ni) tih hi Sorkarin kan ngaihtuahna awm thin se ka duh khawp mai a. Kan MNF hun laiin PMJVK, CSR leh scheme dang atangte pawh a ni a. Kan Ministry kaltlang ni lem lovin Sports an ngaihpawimawh avângin project-te kan siam a, sum te kan han hmu a; ti-lutuk lek lek te khan sawi kan ni thinin ka hria a. State dangte'n Sports-a hma an lâk dan kan hriat thui loh vang em maw ni aw, tih te rilruah a awm thin a.

Chuvâng chuan, kan Sports Minister hi na takin ka support duh a. Sports hi ngaihpawimawh a ngai a ni. Kan ngaih pawimawh dawn chuan, budgetary support a ngai tih te ka sawi duh a. Tun hnaiah kan lo hmu ve em ka hre lova. Meghalaya Sorkar chuan National Games leh pek tur hi a thleng dawn a; crore 720 hmangin stadium pakhat sak an tum tih kan hmuin ka ring a. Chung te chu kan thenawm state-te ngaihtuahna kal dan a ni mek tawh a. Chuvâng chuan, Sports-ah hian kan Sorkarin ngaihtuahna tak tak hmang sela. Hei, ruihlo te kan han sawi thin a. Tin, chin thalo ching tam tak, social media lama mite huat zawng tur ringawta thil ti veltu te pawh hi an awm zel; kan House Leader pawh a hre Chiangtu a nih kha.

Chuvâng chuan, heng zawng zawng damdawi chu Sports hi a ni nasa a; 'Sports is the best medicine' tih hi kan hriat reng pawh a pawimawh a. "Savun ro uma tlan mai mai" han tih ringawt chi ang kha Sports hi a ni lo.

Tin, MNF hun laiin 'hna ruaka permanent recruitment reng rengah 5% reservation sports persons te tan reservation dah tur a ni' tiin DP&AR -in a tichhuak a. Heng te hi Police Department chuan an zâwm chho mek a, department dangte pawhin zâwm ve zel sela tih hi vawiinah hian ka sawi duh bawk a.

Tin, Lunglei lam MLA-te sawi awm tak an ni a, an ngawi tlat mai a, tuna ka sawi tur subject-ah hian. C. Thuamluaia Mual, Lunglei-a floodlight vuahna tur 1st installment 66% pawh a lo thleng thlap tawh; C. Thuamluaia Mual atana lo chhuak tawh kha kan han ti lova; tuna tih loha a awm reng hi. Lunglei lam MLA kan nei tha a; 100% Lunglei atangin ZPM MLA-te an tling a, an sawi lo tlat mai a. Sawi an phal lo nge ka hre lova, an aiawhin Pu Speaker, ka han sawi sak ang a.

C. Thuamluaia Mual, Lunglei (**Pi Lalrinpuui, Minister:** An sawi reng si a.) An sawi a ni maw? Engpawh ni se, ka sawi nawn leh hrim hrim ang a; An lo sawi tawh a nih chuan ka'n support ang a.

Tunah hian kha sum, 2nd instalment kha a lo lapse tawh anih pawhin, sum thar tam tak SASCI-ah kan puk belh nghek nghek bawk a. Khang hmang khan Lunglei C. Thuamluaia Mual hian a phu a ni. Lunglei hi 'football factory' tih a tling a, footballers tha an chhuahna hmun a ni a. Tihsak ngei a va tha em?

Tin, Sports Policy kan nei a. hian kan (**Speaker:** Khawngaihlin, Chair kan han inthlak lawk ange aw.)

(Drputy Speaker at the Chair.)

Pu Dy. Speaker, i chairman-na hnuaia ka ding fuh thin hi ka lawm hle mai. Hun pawh min pe rei deuh turah te beisei ila.

Tin, Sports Policy (Sorkar hmasaah lungrual takin he House-ah kan pass tak kha) kan en chuan, 'District tinah District Sports Office awm sela' tih policy te pawh kha zam tel niin ka hria a. Department thar tam tak hian district-ah establishment an nei zel a.

Pu Speaker, kan House Leader zahawm tak hi CM chak tak a ni tih kan hria a. Sports Minister mal tân hi chuan thil tih hi a har mai thei; mahse tan chhan tur tha tak te, Govt. of India Policy te pawh a awm a. Tin, Youth Policy nen pawh a in-coincide tho bawk a. District-ah hian a hming (a lem-lem) a district office han awm; district office tur ni si sanctioned post awm mang si lo deuh tea lo function nawk-nawk kan nei a. "Nang pawh kum 5 lai i minister a, engmah i ti si lo", min ti mai thei a. Mahse kan hunlai kha a harsa em mai a, kan ti thei lo a ni; tlang deuhin sawi ila. A chhan chu, COVID leh khang vel khan post-creation te kha banned vek anih avangin.

Tunah chuan hun tha ah kan chuang kai tawh bawk a. District-ah hian Sports Office hi Lunglei ah deuh chauh hian mumalin a awm a; Champai leh Kolasib hi awm ang reng, awm lo ang rengin a awm a. A la awmlohna hmun zawng zawngah hian Sports Office hi awm sela a duhawm ngawt mai.

Demand No. 7: Excise & Narcotic Department:

Ruihhlo hi kan hnam issue, 'kan hnam hmelma' tih hi chu, hlaah pawh kan sa a, a nihna a rei tawh a; tunah hi chuan Mizo anga kan issue lian a ni tlat a ni, ruihhlo hi. A manganthlak khawp mai. Tukinah pawh kan lo kal phei pahin ka driver leh ka chuanpui dangte nen pawh ruihhlo a manganthlak zia te kan sawi a; kan hre ve vek lo zawk ang a. Hemi chungchâng ah hian opposition le ruling lam pawh kan tanrualna tur chi niin ka hria a. Ruihhlo hi i do tlang ang u. Kohhran leh Speaker te do tur ringawta dah lovin, kan zavai hian do a ngai a ni. Chutiang taka kan hnam hmelma ruihhlo a nih laia zu zuar zawnga kan sorkar a kal thar hi paw ka ti khawp mai a. Hei hian nasa takin a encourage a ni. Lammuala zu kan han khiat khiah-khiah mai te khan thalaite nasa takin a encourage a, hei hi paw ka ti khawp mai a.

Ruihhlo hi kan hnam hmelma a ni a. State dang pawhin Mizoram minrawn hmuh thatlohna tak chu, ruihhlo nasa hi a ni a. Hei hi do tlang ila. "Ruihhlo zawrhna dan kan siam hlei nem; thlai atanga zu siamna tur alawm" te kan ti a. Mahse, hmanna kan dan pass tak kha, (kei chuan ka pass ve lova ka lawm khawp mai a; a chhuak zingah khan ka tang ve a.) kha Dan-ah khan 'Excise Department hian ruihhlo hi a zuar dawn a ni' tih kha chiang takin a inziak a. Tin, kan thlai leh theitui te, jelly siamna tur atan te, powder siamna tur atan te leh ei leh in, thil tangkai tak tak siamna tur kha ruihhlo lamah hian a kal duak ang tih kha a hlauhawm a, kan dan siam thar ah khan.

Demand No. 28 - Labour, Employment, Skill Development & Entrepreneurship Department:

Tichuan, LESDE chungchang hi sawi ve a tulin ka hria a. Entrepreneur promote kan tum dan te hi a tha reng mai. Mahse Mizo zingah leh Mizo nilo zingah pawh entrepreneur-te sorkarin kan kaih nasat lutuk chuan, a nilo lamah kan kai liam ang tih te a hlauhawm a, sorkar kan inzawrh dan pawh hi fimkhur a pawimawhin ka hria a. Sorkar tello pawha dingthei tur ang chi hi sorkar hian kan tino zo ang a, entrepreneur hlawhtling tak tak tur hi ti hlawhtling lovin, sum awlsam zawng te an zawng palh ang tih hi a hlauhawmin ka hria a. Mizoram-a entrepreneur hlawhtlingte hi sorkarin a thlawna a tanpui lem loh te an ni thin a. Sorkarin a tanpui theih kha chu a tha ka ti em em. Chutihlai erawh chuan, tanpui dan chin tawh kan thiam, inzawrh dan te pawh kan thiam a tulin ka hria a.

Kan LAD Minister zahawm tak Pu C. Lalsawivunga department chan demand pali leh Pu Lalnghinglova Hmar demand pathumte hi ka support a, ka thlawp e. Ka lawm e.

DEPUTY SPEAKER: Tunah Champhai North bialtu zahawm tak Pu H. Ginzalal ilo sawm ang.

PU H. GINZALALA: Pu Dy. Speaker, ka lawm e. Kha i veilama mite'n, "The Mizoram Liquor Prohibition Bill" kan pass tak, 'Act' lo ni mai tur chungchang kha a rawn sawi leh nual a, sawi-sawi chi pawh a ni tawh lo asin maw le ka ti a ni. An pass duh lova, an chhuak kha a ni a. Hei hi chu an tan chuan sawi chi ah ka ngai tawh lova. Amaherhawchu, thil hriatsual hi chu an neiin, an pass ve lo kha chu an inchhir khawpin ka ring a ni. Fruit beer te kan han telh a, alcohol percentage hniam lutuk, 5% te chauh kha a ni dawn a. Hengte hi chu nakinah anni pawhin an duh ve thovin ka ring a. Engpawh ni se, an pass ta lo kha chu an inchhir ram ram maithei a ni. Fruit beer te phei hi chuan employment a generate nasa dawn lutuk a thalaite tan. Tin, kan farmer, kut-hnathawktute tan pawh a ni ngei ngei dawn a; kan economy siamtu tur ber a ni dawn Chiang Lutuk a, a lawmawm khawp mai a. Hei hi chu kan tifuh dawn hian ka hria a, kei ve thung chuan. Kha, Pu RM Chakma leh Pu Robert-an an rawn sawi kha a ni a, a duhlo zawngin. Theih phei chu ni se Pu RM Chakma khan chang hnih- thum daih tur thu rawn phuah belh se, Pu Robert khan a thluk han siam se, he House-ah hian han sa ila; Minister khan solfa han vai nghe nghe se a tha awm mang e aw, ka ti hial a ni kei chuan.

Demand No. 23 - Art & Culture Department:

Hei hi pawimawh ka ti khawp mai a. Tunlai context-ah zo-hnahthlakte kan inpumkhat chhohna zelah Mizo-nationalism hian hma a sawn zel a ni, tunah hian. Hmuhtheih si loh, khawih theih si loh, a lang lo phenah hian Mizo-nationalism hi tihian a kal ruak ruak tawh a ni. Chuvangin, an role hi a pawimawh khawpin ka hria a. Art & Culture lam hian zo-hnahthlakte zau zawk leh chak zawka kan inpumkhat theihna turin ngaihtuahna thui tak in rawn neih hi ka beisei a. Kan culture leh zohnahthlak hnam hrang hrangte culture humhalh chungchangah theihtawp in rawn chhuah chhoh zel a pawimawh khawp mai.

A bik takin literature phei chu a pawimawh lehzuah a. Mizo-nationalism hian hma a sawn kan duh chuan scope zau lutuk a inhawng a ni, literature-ah hian. Lusei tawng ringawt hi a tawh lo reng reng; Zo-hnahthlak tawng chi hrang hrang a tam thei ang ber kan lahluh poh leh Mizo tawng hian hma a sawn ang a, a zarzotu tur chu kan sakhuana hi a ni daih mai a ni. Hei, Latin tawng te, Greek tawng te hi literature a san avangin Pathian hian hmanruah a hmang a nih hi; Hebrai tawng te pawh. Chuvangin, Mizo-Christianity

hmasawn tur chuan kan literature hi a pawimawh; ‘God reveals through literature’ tih a ni. Pathian hi literature-ah a inpuang ziah a ni. Chuvangin, thui taka inngaihtuaha inrawn pen chhoh zel hi kan duhsak a. Aizawl khawpui Zo-Jerusalem ni tura inbuatsaih pawh hi a pawimawh khawpin ka ring a ni. Museum chungchangah te pawh zo-hnahthlakte costume leh culture engkim mai inrawn phochhuah chur chur hun tur hi a nghahhlelhwam tak zetin ka hria a ni.

Demand No. 27 - District Council & Minority Affairs Department:

DC & MA chungchang member zahawm tak Pu RM Chakma khan a rawn sawi tawh a. DC & MA chungchang, a bik takin ADC ho hian administrative reforms an ngai khawpin ka hria, zep lovah chuan. An budget zawng zawng 90% hi administrative cost-ah a kal em aw, a tih theih a ni. Heti khawpa inefficiency administration lamah a awm hi pawh ka ti khawp mai. A bul kan tan danah diklo lai awmin ka ring a. Chuvangin, tunah kan hmaa challenge lian tak awm chu administrative reform hi a ni hrim hrim a ni. Hei vang hian development atan pawisa a kal hman lo a ni. Administrative-ah te, salary-ah te a kal nasa em em a ni.

Hmanni lawk khan Chapchar Kut kan hmang a, keimah ngei pawh Champhai-ah Kut-pa ah min hmang ve a ni. Ka sawi duh lai chu, Pu Dy. Speaker, kan budget dawn hi a tlem lutuk a ni. Tunah hian nuai 3-4 emaw chauh kan dawng a. Kan hotute’n nakum lam atangin budget-ah kan dah ang an ti bawh a, budget tam zawk kan beisei a ni. Chung te pawh chu kan hotute’n min hriatpui sela.

Tin, Vety sector-ah hian hma kan la nasa ve khawp mai a, kan phak tawkin. Champhai-zawl leh Laili-phai kan ti a, Hnahlan leh Tiau-phai inkawp a ni a, a zau khawp mai a. Champhai-zawl, Laili-phai leh Tiau-zawl inkawp hi an intiat deuh thuak avangin, potential kan nei tha khawp mai a. Amaherawhchu, a buaithlakna lai chu, thlasikah hian vur a tla a ni. Tunah hian thlasik ngam chi ran chaw-in i enchhin teh ang u kan ti a, oats kan ching tan a. Oats kan chin khan thlasik vur pawh a ngam khawp mai a, hma kan sawnin ka hria a, a lawmawm ka ti.

Chuti a nih chuan tunah hian ‘Super Napier’ kan ti a, ka PS hmasa Pu Mapuia te nen hma kan la a; phai atangin a chi tur pawh kan chahchhuak a ni. Super Napier cprotein content hi Pu Dy. Speaker, a sang khawp mai a; ka hriatsual loh chuan 14% vel hi chu a ni an ti a ni. Khatianga protein content sang tak nei super-napier hi grass chi khat a ni mai a. Heng hi kan han enchhin a khing lai khaw vawt ramah pawh. Tunah hian kum khat a ni dawn tawh a, fur a paltlang a, thal a paltlang leh a, vur a paltlang leh a. A ngeih khawpin kan hria a, a phurawm kan ti a ni. Chuvangin, a tam thei ang ber he hnim hi khing lai leilet kamah te khian china, thil dang dang nena han tih chhoha Vety sector-a hmasawn hi kan tum a ni.

Ran-chawa kan intodelh hmasak phawt loh chuan, Vety sector ah hma a sawn theihloh hrim hrim a ni. Chuvangin, Champhai Milk Union Limited, ‘CHAMUL’ kan ti a, chu chu a thihna a rei tawh mai. Kan Hon. Minister pawn min hriatpui se, he CHAMUL hi kaihthawh kan duh a ni; tihnun leh kan duh a ni. Amaherawhchu, chutiang ti tur erawh chuan ran chaw kan chin hmasak a ngai kan ti a, kan phak ang tawkin theihtawp kan lo chhuah a. Amaherawhchu, sorkar hian min backup lo a nih chuan tihngaihna a awm lo. Chu chu he House zahawm takah hian ka rawn sawichhuak a; Sorkar hian min back-up ngei ngei a ngai. CHAMUL kan tih nun dawn chuan SASCI emaw, eng maw ah hian

budget kan dah a ngai a ni. Thil dang chu kan lo ti ve ang, kan tih theih tawk chu. Kan tih theih loh chinah sorkar a inawlh ve a ngai a ni. Tichuan, ranchaw hrang hrangte a lo tipung ang. Khatia kan tih theih chuan Champhai-zawl khi Green Revolution te-nau ah kan chhuah dawn niin ka hria a, a phurawm khawpin ka hria a. Sorkar pawhrawn phur se ka duh khawp mai.

Chutiang chuan, grazing ground pawh develop kan duh a ni. Ka zawhna UQ No. 111 a changtu Minister zahawm takin min chhanna chu, 'ram in neih chuan, kan ti thei ang' tih a ni a, a lawmawm khawp mai. Ram chu kan nei a, kan pe thei ngei a ni tih ka sawi duh a ni.

Hei, issue lian lutuk mai kan society, a bikin Hnahlan-ah te, Tualcheng-ah te, Selam-ah te kan society ah hian group hnih an lo awm reng a ni tih hi ka research leh findings a ni ve tlat mai a. Ran-vulhtu pawl leh thali-ching pawl te hi an in clash buai thin a, hengah hian Sorkar hian attention an pek loh chuan social problem a hring thei tlat a ni. Technical problem a awm a, technical deuha kan solve erawh chu a ngai dawn a ni. Rawtna tha deuh grazing ground chungchangah pawh ka siam tawh a, department lam te pawh ka sawipui tawh a ni. Chu chu enchhin kan duh khawp mai tih lai kha ka sawi duh chu a ni.

Demand No. 28 - Labour, Employment, Skill Development & Entrepreneurship Department:

He department hnuaia skill-training center chungchang hi, Aizawl khawpui chhungah hian an in-ek-beng ni hian ka hria a, kei chuan. Aizawl-ah hian ka han en thin a, training center hi a tam em em mai a ni. 'Engatinge district capital ah te kan tih ve loh?' ti tawk te chu kan nei; mahse a beitham a ni. Chuvangin, thingtlang lam hian an access phak lo reng reng a, ngaihtuahna thar kan neih a ngai, heng chungchangah pawh hian. Chuvangin, District Capital lamah pawh hian a tam thei ang berin skill development lam te, entrepreneurship lam te hi kan kalpui nasat a ngai hle a ni.

Demand No. 19 - Local Administration Department:

Ka bial chhungah hian VC House nei miah lo khua 11 kan awm a ni. Hmanni khan ka zawt tawh a, min chhang tha khawp mai a. Amaherawhchu, khaw thenkhat ka sawi tel loh avangin han sawi leh puat puat ka duh a - Murlen, Khuangphah North, Diltlang, Lungphunlian, Pamchung, Vapar, Vaikhawtlang, Ngaizawl, North Khawbung, Neihdawn leh Ngur te VC House nei lo khuate kan nei a ni.

Tichuan, Pu Dy. Speaker, VC hlawh tihpun hi a tha ka ti a. A beitham lutuk; heti ringawt tur niin ka hre lova. Chuvangin, VC hlawh hi tun aia thahnem deuh hlekin pe ila, a driver chhawra inchhawr ringawt mai kha chu a tha lo deuhin ka hria. Hlawh tlemte ringawt hi chu a diklo a ni. Hna tam thei ang berin kan pek belh chur chur a, development scheme tam tak a pung zel a, mawhphurhna sang zawk leh engkima tihchak chhoh zel a nih laiin, an nupui-fanaute eitur eng emaw tal hi chu ngaihtuah saka, an welfare kan ngaihtuah hi a pawimawh hle a ni. Chu chu ka sawi theih tawk ni sela.

Pu Dy. Speaker, Minister zahawm takte - Pu C. Lalsawivunga Demand ₹9,77,44,97,000 leh Pu Lalnginglova Hmar Demand ₹1,13,95,75,000 te hi ka pawm a, he House hian pawm ila, pass sak ila tih hi ka duhdan a ni e. Pu Dy. Speaker, ka lawm e.

DEPUTY SPEAKER: Tunah Serlui bialtu zahawm tak Pu Lalrinsanga Ralte ilo sawm ang.

PU LALRINSANGA RALTE: Pu Dy. Speaker, Kolasib district changtu, kan hotupa ber i ni bawk a, mi duhsakna i tilang a, ka lawm hle mai. Ka bula thu Mamit lampang hian sawi hmasak a inbeisei a. Amaherawhchu, district chu hetia induhsak zel hi a theih theihah a tha hlein ka hria a, ka lawm takzet a ni, Pu Dy. Speaker.

Vawiin niah hian Minister pahnihte demand kan han sawi a ni a. Minister Pu C. Lalsawivunga leh Pu Lalnghinglova Hmar te, hei ka rilru ah chuan, a lunglenthlak kan ti dawn nge; Pu C. Lalsawivunga department han siksawi kual hi a awm nual dawnin a lang a. Tin, kan Minister hi thu a awih a, a fel viau a; duh duhin kan ti thei deuh nge ni, a department hi kan khawisak nasa viau niin ka hria a, chung te chu thuhmaah ka'n sawi mai mai duh a.

Demand No. 19 - Local Administration Department:

He department hi budget lo kal leh turah chuan 'Rural Development & Administration Department' tih hian a awm kan ring tawh a. Khatianga kalpui kan tumna gazette kha chhuah nia ka hriat avangin, 'LAD' tia kan sawi hnuhnun ber tur a nih kan ring deuh a. Pu Dy. Speaker, helai kan sawi duh chu, 'Rural Development & Administration Department' tia kalkawp hi a fuh hlein ka hria a. Kan VC-te inrelbawlna hrang hrang an han nei a, a enkawltu tam zawka chu, a tak takah chuan LAD hnuaiyah an awm kan tih rualin, RD-NREGS te ah hian hna 70% chuang deuhthaw hi a ni deuh tak tak a. Chuvang chuan, hetia han khaikawp mai hi a fuhin ka hria.

Amaherawhchu, kan Minister thlavang ka'n hauhsak ang a, ka duhsakna ka'n tilang ang a. Rural Development nena kai-kawp anih hunah chuan hei hi chang tel ngei se, 'Rural Development & Administration Department' tih hi chang tel ngei se a thain ka hria a. A nilo a nih chuan, a department chan hi khawih danglam sak deuh vek a nih dawn avangin, a tan a fuh lovin ka'n ring deuh a. Tiang chuan kan Minister kha duhsakna kan hlan a ni.

Tin, VC dan thar kha kan pass tawh a, thuneihna sang zawk VC -h te kan pe a, an tihur tam tak kan tuk belh bawk a. Hengte avang hian an power and function te kan VC-te khan an hriatchian lehzual hi a tulin ka hria a, khaw tinah training kan pek that a tul hle dawnin ka hria. Tuna kan dan thar pass kan hman theih hunah an hnathawh tur, an power and function te hrilh-hriat a, theihtawp chhuaha training kan pek a tul hle dawnin kan hria a ni.

Demand No. 23 - Art & Culture Department:

Pu Dy. Speaker, helaiyah pawh hian 'Tribal Affairs & Cultural Department' tih hian an rawn dah a, a inhmeh veng vawng hlein ka hria a, Pu C. Lalsawivunga chan department thar anga han siam turah hian. Amaherawhchu, hei pawh hi Tribal Affairs hnuai - Article 275 ah khan kan ram development khawihna tur sum leh pai tam tak hnuhchhuah theih a awm dawn vang nge, Planning Department-in Tribal Affairs hi lak leh a tum ni anga sawi thawm te kha a awm a. Hei hi tak tak a ni em tih kha hriatchian kan duh a. Tak tak anih chuan kan Minister hi a khawngaih thlak hle dawnin ka hria a ni.

Demand No. 27 - District Council and Minority Affairs Department:

Hei pawh hi 'Art & Culture' tih ringawt ni tawh lova 'Tribal Affairs & Cultural Department' tih laia hi thil inhmeh tak, kal-kawp ngei ngei tur a ni a. Kan Cabinet Minister, kan Minister-ah pawh senior ber zinga mi hian hei hi chang chhunzawm ngei se tiin, a pianna khua te, a pian leh murna tlangdung lampang pawh Mizoram-in hmun-hlui tha tak tak kan vawnthat hmun tam tak a awm a. Mizoram tana kan la humhalh chhoh zelna turah pawh tan a lak

thiam ka ring a. Hei pawh hi ani kutah hian awm tel ngei se thain ka ring a ni.

Tin, DC & MA bik pawh hi han sawi ka duh a. Kan Minister hi (sawi leh ta ila) a khawngaihthlak hlein ka hria a. Department-ah hian DC & MA hi a hming chauh mai hian a chang dawn niin a lang a. DC & MA hnuai a ram hmasawna khawihna thin PMJVK, tunhma chuan Lawngtlai leh Mamit District-ah chauh hman theih thina kha, tunah hian Zoram pumpuia hman theih an ni ve dawn ta a; hetah hian sum tam tak ram development-na tur khawih theih a rawn ni chho dawn a. Mahse, hei pawh hi Planning Department hian PMJVK bika hi chu khawih a tum ni deuha sawi a awm baw a, a paw ka ti khawp mai a. Nge ni, a tha zawk turah sorkar lain kan ngai a nih chuan, pawilo turah ka ngai a. Ka sawi duha chu, kan Minister, senior Minister chan department siksawi nasat em em, a sum khawihna tur ve ber, ram development a khawih ve theihna tur ber erawh Planning lama laksak a ni leh zel tur erawh hi chu ka khawngaih deuh a ni.

Demand No. 34 - Animal Husbandry & Veterinary Department:

AH & Vety hi an fakawm khawpin ka hria a, kan minister te. Vawinah department tharchhuah ngei mai artui te helaiah MLA te min han sem den-den a, kan lawm hle a ni. Tin, sa-a kan intodelh hi a tul hle a, kan ramah sa-a kan intodelh loh zia kan hria a. Chuvang chuan, department hian nasa zawka tan han laka, ar-ah a ni emaw, vawk-ah a ni emaw, bawng-ah pawh ni se, hei aia nasa zawka intodelh tura tan kan lak leh zual a tulin ka hria a ni. Ram pawn atanga lakluh a tam em em mai a, hengah hian ASF leh hri tha lo tak takte rawn ken luhna remchang a tam si a. Department hian hei aia tam pawh vulh se, an mamawh sum leh paiah pawh thahnem han ngaihpui deuh se a thain kan hria a ni.

Tin, ka bial, Serlui Bial hi ranvulhna hmunpui deuh a ni a. Leilet hmun anih rualin bawng, ar, kel te a tam khawp mai a. Amaherawhchu, VFA kan kan indaihlo khawp mai a. Hei hi a theih hram chuan kan Minister-in VFA te indaih theih dan a awm anih chuan North Hlimen-ah te min dahsak ka duh a. Tin, VFA vawk chhul leh a til la thiam chiah lo, mipui pawhin an laktir duh vak loh kan nei nual a. Tin, Vairengte hmuna Vety doctor hi transfer-in a chhuak a, a thlaktu tur sorkar hian min pek vat a tul hle mai a, a, ka'n ngen baw a ni.

Demand No. 7 - Excise & Narcotics Department:

Hei, zu thlah-zalenna bill kha kan han pass ta a ni a. Tunah chuan beer leh wine kan in sup sup tawh dawn niin a lang a; kan thalai zu-in zir thar tur hi kan pung nasa dawn a ni. Tin, a department ngei pawh zu kan zawrh dawn avangin tunah chuan Excise Department zu leh ruihlo chi hrang hrang tirem tura din hian zu kan zawrh dawn tak avangin, finkhur leh zuala kan kal a tulin ka hria. Tin, Excise Force kan indaih lo nasa a, tunah pawh kan zawrh hmain hetiang khawp hian zu a tam a; ruihlo-tite, zu-in mite, zu sakna te kan check a, kan indaih lo kan ti a. Tunah phei chuan thalaiin beer leh wine atangin zu-in an rawn zir chho tan ang a. Phalna hnuai a red card-zu in theihna kan siam hmangin, Excise-in zu a zawrh te chu an rawn lei dawn baw si a.

Chuvang chuan, Pu Dy. Speaker, hetiang hian i dinglama mite'n Zu-bill, zu-zawrh phalna an rawn pass tak si ah chuan tan la deuh hlek thei turin Excise Department hi kan thumchak a tulin ka hria a ni. Excise force te indaihlohna te pawh hnawh-khah saka, a tul angin Finance Department lam pawhin Excise Department hi an vulh deuh a tul dawn a ni, kan ram kal zel turah hian.

Demand No. 22 - Sports & Youth Services Department:

Pu Dy. Speaker, a changtu Minister hi ka ring tawkhawp mai a, hemi department-ah hi chuan; a ngaihna a hre tawkin ka ring a ni. Tin, MNF hunlai khan Sports Minister chak tak mai kan nei a. Department budget ringawta innghat lovin, pawnlam leh chhunglam SASCI a ni emaw, PMJVK emaw atangte khan sum tam tak a pawt lut thin a. Khatiang khan tuna kan Sports Minister hian a budget ringawta innghat lovin. Hei, SASCI tam tak kan hotute'n an rawn hawn kan sawi cham chi a. Tin, PMJVK-ah te pawh nasa zualin tan han la sela. He department hi Mizo-thalaita tan a ni a, a pawimawh si a. Sorkar pawh kan inhawn deuh a tul hlein kan hria a ni. Chutiang tur chuan kan Sports & Youth Services changtu Minister, ka mi duh leh ka rin ber maiin a chang hi tha ka ti a.

Amaherawhchu, hma kan lak theihna tura infiammite'n an chanvo, an chan tur dik tak an chan ngei theih rualin, infiamna hmunhna changtlung leh zual kan neih leh zel theihna tur nen kaikawp thiam takin tan han la sela. Tin, kan Sports Minister hian min hriatsak ve hram se, Pi Baryl-i nen hian kan tlai deuh a, Pu Muanpuia'n min lo tihkhalth deuh vek mai a. Vairengte-ah futsal ground sorkar hmasa khan kan siam a, engkim kan peih tawh a. Mahse, artificial turf kan phah hlei thei lova, sum a hautak deuh avangin. A chuang eng emaw kan la dah tha hlauh anih chuan min han hre ve se.

Awle, Pu Dy. Speaker, heng kan Minister pahnihte demand hi tha ka ti a, ka pawmpui thu ka rawn sawi a ni e. Ka lawm e.

DEPUTY SPEAKER: Kolasib lam chu hun in vawng dik hle mai. Tunah MLA zahawm tak South-III bialtu, Pi Baryl Vanneihsangi ilo sawm ang u.

PI BARYL VANNEIHSANGI: Pu Dy. Speaker, ka lawm e. Chapchar Kut tuk atang khan hritlang khawsikin min man a, aw a fiah hlei thei lova. Thahnemngaih a na bawk si a kan lo ti leh bawrh bawrh a nih pawhin ngaihthlak dan min thiamsak turin kan ngen hmasa che u a. Vawiinah Demand tha tak mai kan sawi leh dawn a, Minister zahawm tak Pu C. Lalsawivunga atang hian ka tan ang a. Amaherawhchu, a dawt den den tih ka tum hi ka ti lo zawk mai ang a, ngaih pawimawh dan atang te hian ti ila a thain ka hria a.

Demand No. 23 - Art & Culture Department:

Nichinah member zahawm tak South Tuipui bialtu khan a sawi tawh a; Youtube chungchang kha tlema zawng han sawibelh ka duh a.

Kan hnam hi Anganwadi kan kal atangin mahni hnam tawng a-aw-b aia a- b-c zir hmasa deuh vek kan ni a. Chuvang chuan, engtikah emaw chuan hei hian kan ram leh hnamah hian nghawng tha lo tak a nei ang a. Kan tawng thiam kawngah te, hman dik kawngah te, a grammar dik zawk hman kawngah te hian nakinah harsatna min siam hi ka lo ring ve thin a. Chu hun chu tunah hian (heng technology advancement avang te pawh hian a ni ang a) kan thleng chiahin ka hria a. Pu Dy. Speaker, hei hi a ram leh hnam angin tan kan lak a tul hle mai.

Cinderella te, Snow-white sawi thei vek, hre vekin Mizo thawnthu kan hre hlei thei lo a, kan sawi hlei thei lo a. Chutiang kan nih zel chuan nakinah hnam-boral tur zia kan pu leh mai dawn a, kan ni leh mai dawn a. Chuvang chuan, a hunlai a ni a, a lin lai hian thir den a tha a. Ram-rorelna In-a thute leh mipui hrim hrim pawhin kan hnam tawng humhalh

kawngah te, hman dik kawngah te hian tan lak a tha hlein ka hria a. He House zahawm takah pawh hian kan member chhuanawm tak takte zingah 'nachin' la ti tlat, 'nichin' aia 'nachin' la ti tlat te; (mizo-tawng dik lo zawk hman zeuh zeuh hi ka lo hre thei khawp mai a, kan thikthu te pawh kan lo tichhe ve a) khangah khan a dik zawk hmang hram hram ila thain ka hria a ni.

Tichuan, Art & Culture-a sawibelh ka duh chu - IMFA kan hria a, (Institute of Music & Fine Arts) a ni a. Music instructor te, dance instructor te kan indaihloh kan hria a. Kan indaihlohna hi department indaihlohna mai a ni lo a, mipui nghawng, mipui thleng anih avangin, a bik takin kum tina kan kalpui certificate course training phei hi chu kum tin khel lovin a thleng a, kan zir dawn a ni bawk si a. Chuvang chuan, a zirtu tur pawh indaihlo chung chung, thiam bel mang lova zir chhuak an awm a hlauhawm hlein ka hria a. Department-in hengah hian nasa takin tan an la ang tih ka ring a. A rang lamin heng kan indaihlohna te hi hmalak ni se a duhawm hlein ka hria a, ka'n tarlang ve a ni.

Tin, Art & Culture hi kan ram leh hnam tana department pawimawh tak, a department malkhai ang pawha mizote min thuikhawmtu a ni a, nichin lama kan ngaihthlak ang khan. Chuvang chuan, Aizawl chauh ni lo, District hrang hrang heng - Serchhip te, Mamit te, Khawzawl, Saitual, Hnahthial-ah te hian thawktu kan indaihlohna nichin lama an sawi bakah, han sawibelh ka duh a. Hengah hian department te pawh tan leh zual a thain ka hria a ni.

Tichuan, keini bial lamah hian Sibuta Lung a awm a, Tachhip-ah sawn a ni a. Kan ram rohlute, kan hnam thilhlute ngaihsanna chang kan hria a, kan intihhmuh thar hle mai a, a tha a. Chutih rual chuan, mihring pung zel, thang zelah heng hmunhma te hi lo nek duh mai, fencing tih ngai khawpa min siam hi an awm leh thin a; chutiang chu tunah pawh hian kan dinhmun a ni a. Hengah hian fencing kan tih thuai loh chuan sawlaia kan hmun hlute pawh saw nek-tal leh dip-dal theih anih dawn avangin Minister hriatah kan sawi lang duh a ni.

Demand No. 34 - Animal Husbandry & Veterinary Department:

AH & Vety ah hian nichinah kan sawi a, artui te pawh kan ramah hetiang hian kan han ti ve a, kan han nei ve a; amaherawhchu, duhthu hi a la sam lo em em a. Nichin kan chawlh lai pawh khan a changtu minister nen chuan kan sawi a. A chhan chu - a feed, ran-chaw to em em hi a ni a. Pu Speaker, duhthusamah phei chuan kan lakluh ah hian sorkar intervention te pawh hi han sawm thei sela, a subsidy zawng tein han thei phei sela; a chaw hi man man zawka kan lakluh hma chuan a production cost hi a hniam ngai dawn lo a ni. Nasa takin an zir a, an bei a; keipawhin ka theih chen chenah ka back up ve a, phone kaltlang tein kan ngaihven ve a. Ar vulhtu tamna bial kan ni a, an harsatna sutkian tumin kan awmtirh atangin kan bei ve a, mahse a harsa hle mai a. Chuvang chuan, sorkarin min pui a ngai a.

Tin, a Vety ang pawhin hemi a chaw kan tih vaimim te, bekang te pawh hi chin theih ni sela, chutiang hcuan an mahni hian kut-ken law law se engnge a an ang aw, tih te pawh rilru ah a awm a. Chumi a nih loh chuan a chaw man a to chhung chuan kan duh lo chung chungin ram dang, state dang atanga kan lakluh, kan lei a ngai dawn a, kan sum deh chhuah ve hi a luangral dawn tho tho a ni, tih lai kha kan sawi lang leh duh a.

Tin, quarters te kha kan sawi a, keini lam pawhin kan mamawh khawp mai a. Samlukhai te, Hlimen ah te pawh a ni a, 'a thawktu awm mumal lo' tih kha a ni deuh vek mai a, sawi

nawn sawi nawn te pawh a zahthlak lek lek dawnin ka hria a, khalaiah khan ka duh tawh mai ang a.

Tin, hei ASF kan sawi kan sawi a, Bird flu lam hi sawi ka duh a. Bird flu hi a leng tan leh tawh a, hetiang anih avang hian department ten uluk takin min lo ngaihven sak sela. Kan ramah arsa himlo, sa him lo kan lakluh hma hian dan chah mai te a tul ang em; engtik hunah nge ni ang tih te pawh kha min lo ngaihven pui sela. Kan ram chhunga kan ar vulhte an him loh palh kan hlau a, chulai te chu kan han sawilang ni sela.

Demand No. 19 - Local Administration Department:

Local Administration chungchangah khan hei, VC House te hi an sawi a, keini pawh kan tang khawp mai a. Nikum lamah VC House pali min phalsak a, pakhat sak lai mek a awm bawk a, kan lawm hle mai a; a changtu Minister chungah pawh lawmthu kan sawi a. Tin, kan hmuh ang khan Panchayati Bhavan hi 313 phalsak kan ni leh a, tun financial year chhungin; khatiangah te pawh khan kan bial lama la mamawhte leh hmun hrang hranga VC house mamawh tak tak kan sawite kha duhsak hmasakah leh, a theih phei chuan a pawimawh dan indawt leh a tah-tawl deuha ngaih pawimawh ni sela tih kha kan sawi tel ve duh a.

Tin, Hlimen-a Lalsavunga Park hi kan tlawh tlang tawhin ka ring a. Hei hi tender chhuaha a enkawltu thlan thin a ni a. Amaherawhchu, mipuiin kan tlawh tam na na na hi chu bawhlawh te a siam a. Tin, a chhungah repair ngai neuh neuhte alo awm thin a, helaia authority te hi a inthuah deuh em aw ka chiang chiah lo a; department kut nge, hemi tender chhangtute kut tih kha min chhan theih chuan ka lawm hle ang a. Hemi zulzui hian hmalakna tur tam tak kan nei a, Hmuifang kan hria a. Hmuifang park-a a building te a awngrawpin a chhe em em a, khing te pawh khi ziakin kan thlen tawhin ka hria a. Kan Minister te hian a tul leh tha an tih hunah min rawn bawhzui sak sela. Kan reserve tanky te a chhia a, tui pawh kan dah khawl hleithei lo a, a hmangtu a guest te awm mahse, tui a awm loh chuan tihngaihna a awm lo a. Tin a rest-house te (mawi lo a ni lo ang chu) a thing em em mai a, hngeng te pawh hi tan lak nan hmang sela a tha awm e.

Demand No. 7 - Excise & Narcotic Department:

Kan Minister zahawm tak Pu Lalnghinglova Hmar Demand ah hian ruihlo chungchang kha kan sawi nasa a. Hei hi Pu Dy. Speaker, hmanni khan kan han chai viau a, a nihna takah chuan kut-hnathawktute tana a tangkaina tur kha kan sawi chhuak ang a, kan inzawt chhuak dawn emaw ka lo ti a. Tum loh deuh maiin thil kha political ball ah a chang zo ta a; hmeichhe tan phei chuan sawi ve ngam loh tur khawp boruak kha kan siam chho deuh a, inthlahrun ana khawp mai a. A lan danah hian nichina ‘morally wrong’ a tih kha, kei pawh ‘wrong interpretation’ niin ka hria a. Kan siam ang a, tichuan keimahni leh keimahni hian kan in zo vek tura ngaihna leh, kan in sup sup tura ngaihna hi a awm a. Thalaite hi hei, kan lo sawi khawm ve thin a, zuk leh hmuam, ruih theih thil tilo tam tak kan awm a ni. Heng ang te pawh hi kut-hnathawktute’n an lo siam chhuak anih pawhin, in reng reng lo tur tam tak kan awm a.

Tin, kan member zahawm tak takte in hunlai, in tlangval chhuah hlima inti-pa deuha ruihtheih thil tih talh in tum lai ang era kha kan pel tawh a ni. Tunah chuan K-pop in min influence a, zuk leh hmuam tilo mipa fresh tak, ka fai tak nih kan duh a. Wine leh beer siam phal avang rui sup sup tura Mizo thalaite min ngai hi chu kan thinlung a na ve deuh a ni tih kha, thalaite aiawhin ka’n sawi lang duh a. Kan tum zawk ni tura ka lo ngaih chu,

Indian wine market te ka lo en a, USD 292 (ka sawi soal loh chuan) Pu Dy. Speaker, kum 2024 chhungin hmuhchhuah a ni a. Tin, kum 2033 chhung hian target an nei a, USD 892 te pawh hmuh chhuah tum a ni. Khatiang zawngah khan a state-wise, a national-wise in kut-hnathawktute kan kawh hmuh ang a, an ei leh bar zawngna kan tihausa dawn emaw ka ti a, chumi atana sulsu turte chu keini, wawiina mipui rawngbawl tura thlan chhuah te hi kan ni a.

Mahse, ‘zu in zuar; zu kan zuar lo’ tih reng ringawta he Bill kan sawi te kha ka lo ui tak zet zet a ni. A theih pheichuan a hriate hi media lam pawhin kawm sela. Tichuan, engtin nge he wine market, beer market te hi a lo thanlen theih anga, hnamdang ten engtin nge an hmana, achievement engtin nge an neih, tiha kha kan sawi hi a hun tawh takzet a ni. Chuvang chuan, hemi thu leh hla, political thila inpuh inpuh lo hian, hma kan lak ngaihna turah te pawh hian a thu mai nilo hian, a takin che chhuak sung sung ila a thain ka hria a.

Demand No. 22 - Sports & Youth Services Department:

Hei, infrastructure-ah te kan hria a, hma kan la nasa a. Chutih rual chuan Sports-person development lam kan hawi tan a, a lawmawm hle mai a. Kan infiam mite hi tawng mawi lo ni lo sela, neining tak tak, kalchhuahna tur leh zinna tur sum nei reng te an ni bik lo a, chung atana incentives cash award kan han pe te hi a lawmawm hle mai a.

Tin, AMKA lamah hian a hmingin Advisor-a ka awm ve vang hian, karate lam khan incentive cash award kan dawng dawn lo emaw ni ka ti a, a changtu minister hi ka lo chhuah chhal dawn deuh ngawt nain, ruahmanna tha zawk a lo neih a, thlamuang takin, lawm takin kan awm leh ta zawk a. Chutiang chuan, infrastructure lama hmalakna turah te pawh rual khai takin kan ram chhung bakah a dangah pawh theih tawp chhuah zel ni sela, keini pawhin kan back up zel ang tih kha ka sawi theih tawk ni sela.

Heng Demand tha tak takte hi kan ram leh hnamin hma kan sawn theihna tur atan tangkai taka hman tur a ni tih kha ka’n sawi leh a. Tichuan duhsakna sang ber hlan chungin ‘ka support a ni’ tih ka sawi e. Ka lawm e.

DEPUTY SPEAKER: Tunah chuan, MLA zahawmtak East Tuipui bialtu Pu Ramthanmawia ilo sawm ang.

PU RAMTHANMAWIA: Pu Dy. Speaker, ka lawm e. Wawiin hi kan Minister zahawm tak tak Pu C. Lalsawivunga leh Pu Lalnghinglova Hmar te Demand kan han sawi ho a ni a. A chhung ka luh hmain, a hmasain ka thlawp nghal ang e.

Demand No. 22 - Sports & Youth Services Department:

Kan Minister hi Sports lamah chuan tawn-hriat nei tha leh he lama tui mi a ni a, a mahah hian beiseina sang tak kan nei a. Infiamna hi thalaite nun kawng tha zawh tirna tura pawimawh tak mai a ni a. Thalai tam tak ruihlo leh thil danga buaite chhanchhuak tur chuan infiamna kan thalaite talent neih te, an tui zawng te pho chhuah tira hma kan lak hi a pawimawh em em a. Chumi atan chuan kan Minister hian hma a rawn la zel turah kan ngai a. Playground tha te hi kan mamawh em em a, thingtlang lamah pheichuan playground te hi kan nei tha lo a. Kan bial chhungah ngei pawh playground la nei tha lo khaw thum-li vel kan la nei a, chungah te chuan a theih chin chinah hma kan han la a, term hmasa khan. Tunah khian Vangchhia te, Hruaikawn te, New Hruaikawn te an playground te tunhma anga mi 9 inkhelh theihna chauh kha a la ni a, hei hi kan Minister zahawm tak hian min hriat pui sela.

(Pu Robert Romawia Royte at the Chair.)

Pu Chairman, Ka bialah hian Mizoram tournament zinga upa ber Tuipuiral Annual Sports Meet hi kum tin kan nei thin a; a kum 50-na Golden Jubilee pawh 2023 khan kan lawm tawh nghe nghe a. Hei, football ah hi chuan Tuipuiral leh Tuichangral lam hian infiamna hi kan uar em em a, kan hming pawh hi a tha thin a ni. Helaiiah hian Pu Chairman, ka sawi duh chu, he Tuipuiral Annual Sport Meet kan neihna chhan hi anmahni, an talent pho chhuahna leh khatianga hmasawna zel tur anih piah lamah khaw hrang hrang thalai infiam mi lokalte inunauna leh inpumkhatna a keng tel a, chu chu he tournament-ina a rahchhuah duhawm tak a ni.

Hei, kan Sports Minister zahawm tak hian kumin Tuipuiral Annual Sport Meet, 2025 Samthang-a kan neihah khan sports item thar boxing leh archery min rawn telh thar sak a, sum leh paite pawh a rawn tum a, a lawmawm khawp mai a. Heng te hi Vision 2036 Olympic inbuatsaihaa a hmathlir niin a lang a, a lawmawm a takzet a ni.

Tin, Pu Chairman, Sports Department hnuaiiah hian Sports discipline hrang hrang, a bikin football leh volleyball ah te hian kan sport association-te tan coach hi a thlawna rawih theih dan a awm em aw kan ti a. A a chhan chu, tournament lian thlen dawn chuan coach rawih nan sum tam tak sen a ngai thin a. VC-te bakah mi dang dang tibuaiin, thawhlawm te mi-inphalte hnenah an khawn thin a. Heng hi sum tam tak kal ralna anih avangin, sorkar atangin puih theihna a awm chuan, kan Minister zahawm tak hian ruahmanna te min siam sak thei se.

Demand No. 7 - Excise & Narcotics Department:

He department budget hi nikum aia a tamna kha crore 2,51,71,000/- a ni a. Kan hriat angin, kan ram hi ruihhloin min run a ni ber a. Kan chhakah Myanmar ram buai avangin sorkar a mumal lova, chumi denchhen chuan ruihhlo hi nasa takin a lo lut a ni tih kan hria a. Heng sum lo pung te hi Excise force-te tihchak nana hman a tul hle dawn a. Tin, kan member zahawm tak te'n a an sawi tak ang khan, hmanni lawka The Mizoram Liquor Prohibition Amendment, 2025 kan han pass takah chuan Excise Department hi nasa leh zuala thuam chak a ngai a dawn a. Kan sawi thin a, 'beer chu engmah a ni lo' te kan ti mai thin a; kan thalaite hi beer in atangin zu ah kan kai chho thin a ni. Pu Chairman, chu chu a pawina em em leh kan hlauhthawn chu a ni.

Tin, kan kut-hnathawktute thlai thar atangin kan siam dawn kan ti a, a lawmawm a. Amah erawh chu, kut-hnathawktu kan tih te hian tu leh fate an nei ve vek tho a, a chhe lama nghawng tur kha a awm ve tho a ni. Helamah, an thlai tharte tangkai takin kan hmang ang kan tih rual khan Pu Chairman, an tu leh fa tena he kan thil siam tur hmanga zu-bawih, ruihhlo-bawih ah te an kal ve thei a ni tih te hi kan ngaihtuah tel lovin ka hria a, hei taka hi pawika ti a.

Demand No. 28 - Labour, Employment, Skill Development & Entrepreneurship Department:

Labour, Employment, Skill Development & Entrepreneurship Department hi Pu Chairman, budget hmasaa kan Minister zahawm takin a sawi State project, special project hmangin mi 10,220-te tana hna training theihna crore 31 hu zet mai Central atanga sanction a zuk sawichhuah thu kha kan hria a. Kha kha jail tangte thlenga huam tura kalpui mek a ni em? He project thlen chin kha kan Minister zahawm tak hian min han sawi sak thei se.

Nge, an lo training tawh reng zawka, khata sum hmuh te kha tangkai takin kan hmang, tih te kha hriat a chakawm khawp mai, Pu Chairman.

Demand No. 27 - District Council & Minority Affairs Department:

Pu Sawivunga, Minister zahawm tak demand ah hian, tunah hian kan hriat tak angin PMJVK-a nodal department ni thin kha Planning ah a awm dawn ta tih kha a ni a. PMJVK hi kan thenawm State Nagaland chuan tum 2 a hmu tawh a, Arunachal-in tum 3; keini Mizoram hian hmuh kan la nei ve lo tih kha a ni a. Hei hi engnge a chhan; kan bawhzui that tawk loh vang nge? Nge, kan lo hmu reng zawk, tih kha kan Minister hian a hriat vek tho ka ring a, min han hrilfiah thei se.

Demand No. 23 - Art & Culture Department:

He Department-a budget hi nikum aiin 24,69,000/- lakh-in a tam zawk a. Art & Culture te chu kan hria a, Mizo, kan hnam rohlu, keimahni nihphung leh kan culture min vawngtu; Art & Culture hi awm lo ta se, mizo kan nihna kan tradition zawng zawng hi kan hlauh thei mai awm mang e, tih tur khawpa department pawimawh a ni a. Amaherawhchu, sum leh paiah erawh hi chuan kan dah tam lo mang e aw ka ti a.

Kan Minister zahawm takin, ‘darkhuang te pawh inhmu tawh ang; in chang tawh ang’ a tih kha, sum leh pai tam loh vang te pawh anih ka ring ta hial a. Khangah khan kan MUP leh MHIP te rilrua lian ber chu, Art & Culture ah hian Mizo-puanchei leh thum thil hrang hrang emaw te min dil sak rawh an ti thin a, mahse, wawi khatmah ka la dil ngai lo a ni. Darkhuang kha ka vawikhat dilna a ni a, mahse, kan hmu ta lo a. Bazar atangin 35,000/-in ka lei a, ka thawn chho a ni. Pu Chairman, heta ka’n hriat duh chu, NGO hrang hrangte hnena mizo hnam puan - Puanchei, Kawrchei, Ngotekherh etc. hi Art & Culture Department atangin lei theih a ni tih an hria a, hengte hi a hmuh theih dan leh a criteria te a awm em? Kan bialte khan rawn dil ta se, a pek theih dan kha seniority-in nge, tih te kha ka’n hre duh a ni.

Demand No. 34 - Animal Husbandry & Veterinary Department:

Hetah hian nikum budget aiin crore 16,20,35,000/-in a tam zawk a, lawmawm ka ti khawp mai a. Vety hi kan mizote, thingtlang ah phei chuan ran vulha eizawng tam tak an awm a. Chutah chuan Pu Chairman, ka bial chhunga Khuangleng leh Vaphai Dispensary ah hian hun rei tak doctor nei lovin kan awm tawh a, sial leh vawk te an vulh nasat avangin ran-doctor hi kan mamawh em em a. Hei hi Minister hian min ngaih pawimawh saka, remchang hmasa berah Khuangleng leh Vaphai dispensary-ah hian doctor min dahsak turin ka ngen a. Tin, Farkawn-ah hian ran-doctor chu sawi loh VFA pawh kan nei lo a, VFA hi min pe turin kan ngen bawka a ni.

Demand No. 19 - Local Administration Department:

RGSA hnuuaia Panchayat Bhawan sakna tur chungchang kha kan ngaithla a, sum eng emaw zat a lo lut a. Ka bial chhunga khaw 10 chuanin VC House kan la nei lova, hengte hi kan Minister zahawm tak hian min ngaih pawimawh sak sela. Kan bial chhung thoa khaw engnge maw zatah chuan an sa mek a; a la neilo khaw 10-te hi min ngaihtuah sak turin ka’n ngen a ni. Ka lawm e.

CHAIRMAN : A dawt leha sawi turin, Lt. Col. Clement Lalhmingthanga ilo sawm ang.

LT. COL. CLEMENT LALHMINGTHANGA: Pu Chairman, Pu Lalnghinglova Hmar demand atang hian kan tan mai ang a.

Demand No. 20 - Sports & Youth Services Department:

‘Empowering of Mizoram Sports, 2025’ tih hi kan Minister - a ngaihna hria, vision nei thui tak, thalaite tana hma ngai em emtu, kan mizo-thalaite ngeiin Olympic 2036 lo awm tura kan inhlan kai ve theihna tur vision ropui deuh mai a rawn chhawp chhuah hi a hi a fakawm ka ti a. Empowering of Mizoram Sports, 2025 chu 14th January, 2025 khan kan Chief Minister zahawm tak Pu Lalduhoma’n a tlangzarh a. Chu chu tuna kan sorkar flagship pawimawh em em mai ‘Bana-kaih’ tih kaltlang hian promote tum a ni a. PPP Mode (Public Private Partnership Mode) in Zoram pum chhunga Sports lampanga talent nei tak tak, chance an neih loh avanga la recognize lohte, ram pum chhunga coach te nena hrut chhuaha va recognize tura hmalaknaah a step pawimawh deuh mai a ni a. Chu chu, tuna kan flagship programme “Bana-kaih’ tih hmangin, a bul tan nan crore 2.5 allocate a ni. Chumi tihlawhtling turin nikum atanga kan Sports Minister rem hre tak maiina hma a lo lakna, Mizoram Sports Conclave, 2024 chu Ni 13-14 June, 2024 khan neih tan a ni a.

Chutah chuan Sports lampang tanga chal-lang tak tak, tin, Assam leh Meghalaya atangte pawhin an Sports minister te pawh an rawn tel a. Tin, India ram chhung leh pawna infiamna lama chal-lang tak takte, Sports Federation hrang hranga hruaitute, Sports industry lian - Reliance te, TATA Trust te, TATA Steel te, JSW te leh journalist chal-lang tak takte an rawn tel nghe nghe a ni. Tin, chuta tan chuan Ministry of Youth Affairs & Sports chuan ‘Scheme of Human Resource Development in Sports’ tih hnuai atangin lakh ₹68.8 a rawn hlan nghe nghe a ni.

Sports infrastructure lamah chuan Ministry of Minority Affairs hnuai Pradhan Mantri Jan Vikas Karyakram (PMJVK) atangin project 84 kalpui mek a ni a, heng project zinga 38 chu tih fel tawh a ni a. Project dang 40 te hi kumin chhung ngeia tihlawhtlin tura beisei a ni bawk a ni.

Tichuan, SASCI hnuai hian heng: Mamit - Multi Purpose Indoor Stadium, Lengpui - Motor Sports Complex, Improvement of Darlawn Playground, Muallungthu - Sports Hostel Boys & Girls, Mizoram chhunga playground 20 zet siamna ah te hmalak a ni a. Tin, Lengpui - Improvement of MSSC, REC, Motor Sports Restract Sports Complex pawh hmalak mek a ni. Hengte avang hian kan Zoram thalaite tana India ram chhung mai nilo, khawvel tukverhah te an zuk dah ve theihna tura hmalakna vision thui tak leh ambitious tak mai kan Minister-in a nei hi fakawm ka ti hle a.

Demand No. 7 - Excise & Narcotics Department:

A changtu Minister zahawm tak kaihhraina hnuai a zu leh ruihhlo do kawngah chak leh zuala hmalak anih theihna turin Excise & Narcotics Station, tuna district dingthar pathum - Saitual, Khawzawl leh Hnahthial ah te December, 2024 chhung khan din a lo ni tawh a.

Tin, ‘The Mizoram Liquor Prohibition Amendment Bill, 2025’ kha hmanni lawk, Ni 10th March, 2025 khan lungrual takin he House zahawm takah hian pass a lo ni tawh a. Kha Bill kan pass ka lawm em em chhan chu, ka bial a kawk nasa bik a; kan bialah sorkar hmasa atang khan grape chin te introduced a ni a, a lo tha duh em em mai a, Champhai

lam an hlawhtling chho a, grape-wine siam phalna 2008-ah pek anni a. An wine siam a hlawhtling chho dawn chauh tihah khap a ni ta thut mai a. Sum tam tham tak lo invest tute leh kut-hnathawktu tam takin an chan phah a. An eizawna, an lo inngahna bulpui bera an lo neih hman tawh leh an sum lakluhna hnar tihtawp a lo ni thut kha mi tam takin an tawrh phah a; vanduaithlak tak maiin mi pakhat pheih chuan nunna hial a lo chan phah a nih kha. Kha Bill kha tunah mumal zawka rawn siam that a ni ta hi lawmawm ka ti a.

Ka bialah hian grapes chang a ni lova; sapthei, theite leh Mizoram hmundanga awm lo apple leh kiwi te pawh a awm a ni. Thlai leh theirah chi hrang hrang atanga sum a man man zawka deh chhuah theihna tur Bill siam a ni hi a lawmawm ka ti a. Tin, sapthei sawrna factory te pawh khilalah din mek a ni a, heng te pawh hi awmze nei zawkin he Amendment Bill atang hian chhawr theih a ni dawn ta hi a lawmawm ka ti a ni. Tin, Kum khat chhunga thlai thar leh thei thar reng reng a hringa ei sen loh leh hralh sen loh in a tawih-chhe mai mai dawn tawh lova, hemi hmang hian awmze nei takin kan kut-hnathawktuten sum an lo haichhuak thei tawh dawn a ni.

Pu Chairman, a hmaa bill pass lai khan, nichina Member zahawm tak Pi Baryli rawn sawi ang khan, fruit beer leh wine te a awm avanga helaia KTP memberte a zu in zir tur anga han chhuah mai kha chu; kan Member zingah khan rawn sawi kha an awm a, kan thalaite hi a dah hniam mah mah hian ka hria a. KTP leh kan thalai tha tak takte hian zu an inloh chhan chu, a awm loh avang ni lovin, an hmuh loh vang pawh ni lovin, an in duh lo mai a ni. A aia thil tha zawk zir tur an hre em em a ni; khawvel tukverhah an dak pha tawh a.

Tin, kan bill pass lai khan Member zahawm tak Pu Lalrintluanga Sailo khan, ‘Zu ka la in lo reng reng’ a ti a, thudik a sawiin ka hria; thudik a sawi ngei ngei ang a. A in loh chhan kha, a awmluh vang a ni lo ang a, zu in tur a hmuh loh vang pawh a ni lo ang; zu tha ber ber khawi hmun atang pawhin a lei pha a ni. Zan khuain a khum bulah zu tha ber ber dah ta ila, a rukin a va in kher dawn em maw ni le? Chuvangin, a awm loh vanga zu in lo ni lovin, a duh loh avanga in lo mai a ni.

Demand No. 28 - Labour, Employment, Skill Development & Entrepreneurship Department:

The Mizoram Private Placement Agencies Regulation Bill, 2025 hian kan thalaite tana hamthatna tur a rawn hril chhuak dawn a. Tunah dan ang takin kan mi leh sate phai ram mai nilo, foreign-ah inthawnchhuah theihna dan mumal tak kan han nei ta te, Immigration Act, 1983 tlawhchhana kan thalaite an kal thei tawh tur hi a lawmawm ka ti bawka a ni.

Demand No. 34 - Animal Husbandry & Veterinary Department:

Mizoram ah hian khaw chhak lam atanga eitur rawn lut heng – ngapih, nihawichi kan tih maite piah lamah sa a rawn lut nasa bawka a; sa rawn lut ho zingah bawngsa, vawksa (vawk leh bawng) lak luh hi a thahnem em em a, Aizawl market thlenga rawn chawmtu a ni. Pawnlam atanga rawn lut anih avangin Mizoram mipuite consumption atan a him tawka em tih leh, ranvullhte tana hri rawn kenglut anih leh nih loh check-na tur Zokhawthar leh Ruantlang-ah Animal quarantine centre buatsaih mek a ni a. Heng te hi a hlawhtlin hun leh fully-functional anih hun hi kan nghakhlel em em tih hi a changtu Minister zahawm tak hian min lo hriatsak se ka duh a. Ka bial chhung tan chauh a ni lo a, a awmna hi ka bial chhung chu a ni naa. Amaherawhchu, hengte hian a rawn kungkaih chu Zoram pum anih avangin, a pawimawh em em mai a.

Chutih rualin, Veterinary Surveillance check-gate pawh Mualkawi, Khuangleng leh Vaphai ah a awm mek a. Tunah hian staff indaihlohna leh duh tawka finish a la nih loh avangin, functional anih tur angin a la thawk thei lo a; mumal taka a thawh theih hun kan nghakhlel em em bawk a ni. Tin, Champhai ah Veterinary District Hospital din a ni a, function turin staff an la indaih lo a, a nih dan tur angin a la function lo a. Hengah hian a changtu Minister zahawm tak hi hma min lo lak sak turin ka duh bawk a. Tin, slaughter-house hi ka bial chhung Zotlang-ah sorkar hmasaah khan crore tel teh meuh maiin sak kha vawikhatmah hman lohin tunah hian a rawih a, a ral a ni der mai a. Hetiang anih chhan hi hriat danah chuan a sakna hmun hi vantlang tui tlanna hnara awm a nih avangin an duh lo anih hmel a. A awmzia chu, an sak hma khan survey te an ti tawk lo nge, khang kha lo ngaihtuah lawk anih loh avangin vaibelchhe tel teh meuh mai sen ni si kha hman miah lohin a awm a ni. Tuna temporary shelter, Champhai Vengthar-a awm an hman runpui ber leh an ran talhna hmunpui ber hi mumala siam anih si loh avangin blood pit te, a vun leh an sa duh loh te paihna tur mumal taka dispose-off theih a ni lova, a bul vel a rimchhe thei em em mai a (**Chairman:** Kan duh tawk thei dawn tawh em?) Pu Chairman, khawngaih takin; minute 10 a tawi zia hretu hre bertu zinga mi i niin ka hria a, min lo hrethiam ve hram turin ka ngen che a.

Slaughter-house Vengthar-a awm siamthatna hi kan lo thlen ve tawh thin a, a changtu Minister hnenah hian. Khawngaihin slaughter-house puitlinga min chhuah sak turin leh hma min laksak turin ka bial mite ai awhin ka ngen nghal bawk a ni.

Demand No. 23 - Art & Culture Department:

Pu Chairman, sorkarin library tha deuh mai Champhai-ah min din sak a. A thawktu hi Group-B staff pakhat chiah a. Hei hi anih dan tura a function loh avangin a hlutna a phur chhuak zo lo deuh hlekin a hriat a. Chuvangin, he librarian hi functional tura theihtawp min chhuahsak turin ka ngen bawk a ni.

Demand No. 34 - Animal Husbandry & Veterinary Department::

Pu Chairman, East Tuipui lama Vaphai, Sazep, Vangchhia, Sentlang-ah te sial vulha eizawngte an la awm a. Ka bial chhungah pawh Ruantlang hi Sial vulhna hmun tha deuh mai a ni a. Sial-vulh hi Mizoram-ah chuan kan pi-pute rohlu, kan hnam identity chhinchhiahna ropui tak, kan hnam zia chhawm nung hram hramtu anih avangin, kan Minister zahawm tak hian min lo hriatsak tura ka duh chu - Sial hi bawng ang an ni ve lo a, an nghalin, an hro-hrang a na em em mai a, a vultute pawhin problem an nei nasa thin a. Association an awm a, chhungkaw 10 an in register a. An hotupa Pu Roseia phei chuan amah ringawtin Sial 30 vel a vulh a, an hautak zia a rawn thlen thin a. A enkawlnaa an tlatna hmun hungna emaw, eng emaw sorkar lampang atangin puihna an beisei thin a ni.

Tichuan, Pu Chairman, kan Minister zahawm takte pahnih demand hi ka thlawp a, House zahawm tak hian min thlawp pui se tiin ka rawn ngen nghal bawk a ni e. Ka lawm e.

CHAIRMAN : Khawvel pawnlam bawk kha kan sawi leh a. Ka dinglama thute hian khawvel pawnlam hi an huam tel thin a, hun kan han pe rei deuh hret a nih kha; a huam thui bawk a. Tunah chuan West Tuipui bialtu zahawm tak Pi Prova Chakma sawi turin i lo sawm ang.

PI PROVA CHAKMA: Pu Charman, ka lawm e. Vawiinah hian kan Minister zahawm

tak tak pahnih - Pu C. Lalsawivunga leh Pu Lalnghinglova Hmar te demand an rawn dah hi a tha ka ti a.

Demand No. 22 - Sports & Youth Services Department:

Kan Minister zahawm tak Sports & Youth Services changtu hnenah khan nikum budget session-ah pawh vawi khat chu ka dil tawh a; khelhmual tun thlengin kan la nei lo a. “Kan peih tep tawh’ a ti a, tep kha a la hun lo nge; ka rawn remind leh duh a. Bial thenkhatin ‘chuti zah chu kan nei tawh’ an tih lain, ka bial mite chuan khelhmual an nei lo reng a. A neilo lamah hian pakhatna kan niin ka hria. Chuvang chuan, kan bialah khelhmual hi a hma thei ang berin min dah sak se, tun demand-ah hi chuan tel ve ngei ka inbeisei a ni, ka bial bik tan.

Pu Chairman, PMJVK hnuaia water sports kan hmu te hi lawmthu ka sawi duh a. National games water-sports khel turin kan biala mi kha Dehradun-ah Mizoram aiawhin a kal nghe nghe a; water-sports kan hmuh takah chuan lawmthu ka sawi a, sorkar chungah pawh. Tunah hian sports coaching centre leh talent identification training chu Bana-kaih (hand holding) scheme Empowering Mizoram Sports hnuaiah hian Tlabung bialah hian kalpui tumna a awm ve em aw, ka ti a. Keini zingah hian naupangte stamina nei tha tak tak an tam a, chance an neih loh vangin state level-ah te an thleng pha ve lo a. Mahse, tun hand-holding scheme hmang EMRS scheme kalpui anih takah chuan, next Olympic games-ah te kan tling thei mahna tiin beiseina sang tak kan nei a, chutiang tur chuan hma min lak sak se.

Demand No. 28 - Labour, Employment, Skill Development & Entrepreneurship Department:

Labour, Employment, Skill Development & Entrepreneurship hi kan bialah chuan kan hre lar lo a, kan thalaite pawh in register nachang an hre lo a. Mahse, LESDE minister sawi atang khan, campaign leh eng emaw program kan neihah te pawh LESDE hnuaia in register turin kan ti thin a. Ka sawi hnu atang khan department lam atang pawhin Ni 26th September, 2024 ah khan Awareness cum Registration Camp nei turin notification kan hmu a. Kha lehkha kan hmuhah khan, a schedule kha Tlabung, Dinthar leh Tuichawng - Ni 10th to 17th October, 2024 tih a ni a, tawiawm tura ngenna pawh ka lo hmu a. Mahse, tun thlengin an la thleng lo a; a la thleng lo anih pawhin, phone emaw tal pawhin information inpek a tha a. A chhan chu, kan lo nghakhlel ve a, kan bialah tunhma a la awm ngai lo thil te a ni a. Chuvangin, department lamah pawh ka ngen duh a; Minister zahawm takin min chhinchhiah sak atan ka duh chu - a hunah kan kal thei lo a nih pawhin, an kal theih lohna chhan emaw min hrilh se ka duh a.

Tin, Labour, Employment, Skill Development & Entrepreneurship Office hi Lunglei-ah chauh hian a awm a, Tlabung-ah hian kan nei ve lo a. Register turin Tlabung atanga Lunglei va kal kha a senso te a hautak ve a. Tin, RD Block te kan han neih ve takah chuan, kan RD Block-ah hian eng emaw te min han duhsak ve se tiin ka ngen bawk a ni.

Demand No. 7 - Excise & Narcotics Department:

Ka bialah hian Excise & Narcotics hi a lar vak lo a, zu a tam avang te pawh in ti mai thei a; Member thenkhatte pawhin Chakma ramah chuan in tina zu awm ang tein an sawi thin a; an lo sawi palh pawh a ni mai thei a. Mahse, khatiang kha a ni lem lo a. Culture ah hian Zu te hi chu a awm ve tho a, mahse, kan zalen tihna a ni lem lo. Keini pawh NGO-a kan awm lai chuan zu te chu kan man reng tho. Amaherawhchu, beer emaw, rice-beer emaw

khatieng vel anih chuan a hun bik entiran: Biju festival te, cultural festival-ah te chuan in tinah hmuh tur a awm thei ang a; nitina in tur erawh a awm lem lo a ni. He Zu chungchang hi Chakma bikah hian in hriat sual ka hlauh deuh avangin ka han sawifiah lawk duh a. Ka bialah hian ruihhlo vanga thi tih vel hi an awm vak lem lo a, zu avanga thite pawh kan mizo-thalaita an ni tlangpui a. Kha kha engnge a chhan kan tih chuan, an vawikhat in hian an in tawk thin a; zu in kha ngaiyah an neih avanga thi an ni lem lo a ni. Chuvangin, Excise & Narcotics lama harsatna em em kan nei loh avangin, helamah hi chuan ka sawi thui lo ang a.

Demand No. 19 - Local Administration Department:

Local Administration ah hian sawi duh ka neih chu, RGSA scheme hnuaiah khaw 29 lai ah VC House an lo sa tawh a, khangah khan kan bial lam an lan ve loh chhan hi ka hre duh a. Ka bialah hian repair tur tam tak a awm a; information kan dawng kim loh vang nge, hei hi department lam hian kan hre lo zawk tih kha. Minister zahawm takin nakinah min chhan atan ka duh chu, kan biala Village Council House-te hi thuum that dan a awm em, tih hi a ni a.

CHAIRMAN : Pi Prova, min lo hrethiam lawk teh. Dar 4:00 PM a ri dawn a, kan chawh a hun a, a laklawh khawp mai a. Engnge kan ngaihlan? (House-in sawi-chhunzawm a remti a.) Sawi zawm rawh se aw, a nih leh. Pi Prova-i.

PI PROVA CHAKMA: Pu Chairman, ka lawm e. Village Council House thuumthat leh including furniture kha a theih hram chuan a tha khawp ang. Hmanni khan Village Council te hian khaw tinah hian computer set an nei tih te pawh kha ka lo hria a. Ka bialah te pawh hian computer set hi a tahtawlin min pek ve theih chuan a lawmawm ngawt ang a. Tunlai khawvel hi digital/computer era a nih tawh avangin computer hi a pawimawh riau.

Pu Chairman, ka bialah hian Sub-village 10 lai kan nei a; nichinah pawh MLA zahawm tak Pu Rohminga khan a sawi tawh a. Sub-village election hi kum tin a awm thin a. Hei hi at least after 2 years emawa neih nise; sum renchem-sorkar kan nei bawk a, sum te pawh kan save deuh mahna. Tin, Sub-village election-a electoral roll te pawh hi update ni se.

A hma bill kan pass dawn pawh khan ka sawi tawh a, VC-te hlauh chungchang hi. VC member-te an khawngaihthlak khawp mai a, mikhualte'na an pan ber anni thin si a. Chuti chungin VCP te hlauh 1000/- chauh a ni hi chu a ngaihtuahawm khawp mai a.

Demand No. 23 - Art & Culture Department:

Biju hi keimahni Chakma ah hian religious festival ni lovin, kan cultural festival a ni a. Kan religious festival ah hi chuan zu lampang a awm lo a. Buddhist chuan Biju festival hi November thla velah hian kan hmang thin a. Biju hi religious festival angah thenkahtin an ngaih avangin, an hriatsuala kha tlemin ka rawn sawifiah duh a. Kumin hi State-level ah Biju festival vawi-3 kan hmanna tur a ni a, he festival kan hmanna tur hi Art & Culture hian pawisa tlema zawng te min han pe ve se ka ti a. Keimahni Chakma chauh ni lovin Bru te pawh an ni a. Amaherawhchu, Bru-te chuan Central lam atangin fund an dawng thei a, keini lam hian kan la ti ve chiah lo a. Chuvang chuan, State fund atang hian min ngaihtuah sak theih chuan a lawmawm ngawt ang.

Demand No. 34 - Animal Husbandry & Veterinary Department:

A hmasain, he department changtu kan Minister chungah lawmthu ka sawi duh a. Kan minister atangin vawiinah khan artui plate khat theuh kan dawng a, a chungah lawmthu ka

sawi bawk a ni e. Ka bialah hian ran vulh hi an tam hle a. Vawk hri venna awareness campaign te hi neih ni se, a hri kai loh nan engtin nge kan inven ang; advance in engnge kan tih theih ang tih te department lam hian min ngaihtuah sak se.

(Hon. Speaker-in Chair a la a.)

Pu Speaker, vawk a pulh hian tu hnena report tur nge aw? Tunah chuan village council-in power an nei tawh a, veterinary tax te pawh an khawn dawn a. Chu chu, village council-a in report tur nge; khang te kha a hun bi a awm em, tih te ka hre duh bawk a.

Tichuan, kan Minister zahawm tak tak ten demand an rawn put luh hi a tha ka ti a, a constituency-wise in emaw, semzai taka hman ni se ka duh a, chutianga hman thei tur chuan duhsakna pawh ka hlan e. Ka lawm e.

SPEAKER : Tunah hian dar 4:00 pm a ni a. Kan chairman khan a sawi zawh tir kha a ni a, sawi tur kan la awm nual mai a. Opposition lamah hian 4 an la awm hmel a; ka dinglamah hian 3 bakah leader-te an la ni a; Minister-te pawhin an la wind-up dawn a. Kan chhonzawm zel rih phawt dawn em ni ang; engnge kan ngaih dan le? Kan thenawm kangmei avang khan cable leh thildang a buai deuh ta a. AC line hi 25% chauh a hmu a, hun a chep bawk si a. Chuvang chuan a lum deuh ta a ni a. Anih chhonzawm phawt mai ang aw; 5:00 pm ah kan chawl dawn nia.

Aw le; sawi leh turin Member zahawm tak Pu Lalchhuanthanga ilo sawm ang.

PU LALCHHUANTHANGA: Pu Speaker, ka lawm e. AH & Vety ah hian ka han lut nghal mai ang a.

Demand No. 34 - AH & Veterinary Department:

AH & Vety ah hian, ran-vulh hi kan mizo-society ah hian a kal kawp tlat mai a, kan economic dinhmunah pawh hian hmun pawimawh tak a luah niin ka hria a. Amaherawhchu, heti chung hian sa-ah kan la intodelh lo em em mai a. Thenawm atangin sa tam tak kan chawlut mek a ni a, tanlakna tur kan ngah hlein ka hria a.

Sa-a intodelh tur hi chuan a chaw a pawimawh a. Tin, ar te pawh a note siamna hmun chungchangah hian engnge kan dinhmun chiah ka hre lova, nakinah kan Minister hian min rawn react thei sela. Ramrikawn-ah a siamna hmun a awmin ka hria a, heng te hi a function tha em; kan mamawh zat atang hian engzat nge a rawn thawh chhuah ve thei tih te min rawn hrilhfiah bawk se. Tin, ar note awpkeuna hmun hi khawi hmunahte nge kan neih tih pawh hriat a chakawm a.

Ka bial Mualpui-ah ran-talhna (slaughter-house) a awm a, hei hi a lun ve khawp mai a, nikhatah hian a za chuang bawng an talh thin a. Chutih lai chuan, a panna kawng a chhe khawp mai a, hemi chungchangah hian kan Vety minister zahawm tak Pu Sawia hi ka sawipui a, a ni pawhin zuk enin, a pawimawhzia te a zuk hmu a; ‘sum awm ang anga thawh nghal chi a nih hi’ tiin, hma lak nghal a tum thu te ka hria a. Kan Minister chungah hian lawmthu ka sawi a ni.

Hetih lai hian Pu Speaker, kan ran talhna hmuna ran thisen leh ek vel khu a ngaih mawh

awm khawp mai a. A vela chengte tan a rim chhiain, phurrit a tling a ni. Hei hi kan Minister hian min lo hriatpui sela, hri thalo leh hriselna atana thil thalo tak tak a hring chhuak ang tih te pawh a hlauhawm khawp mai.

Demand No. 28 - Labour, Employment, Skill Development & Entrepreneurship Department:

He department hi lian lo tak, mahse tangkai zet mai a ni a. Kan sorkar policy hand-holding nen pawh hian an kal kawp tha viau dawnin a lang a. Ka bialah hian Mizoram chhunga ITI kan neih lian ber pawh a awm a, hetah hian trade 20 kan nei a ni. Term kal ta ah te khan ITI hian ngaihsak a hlauh lo hle mai a, a building leh thil dangte pawh a tlabal em em mai a. An auditorium te, administrative building te leh staff-quarters te pawh a tlabal em em a ni. Hemi chungchangah hian kan LESDE Minister Pu Lalnghinglova Hmar hi ka hrilh a, a hmunah tum 2-3 lai a tlakbal zia te, chhawmdawl a tul zia te a hmunah kan zuk en a. Tunah hian SASCI hnuaiyah crore ₹25 lai mai a bul tanna tur sum kan hmu a, tunah hian tender call mek a ni a, a lawmawm tak meuh meuh a. Term hmasa khan demand sawi hun apiangah ka sawi chhuak thin a, amaherawhchu, ngaihsak a hlauh ngai lova. Tuna kan Minister thar hian rang taka hma min lakpui hi a lawmawm ka ti a. Kan thalaite tana thil chhenfakawm tak tur hi tunah chuan hmasawn zawngin a kal chho dawn niin a lang a, a lawmawm hlein ka hria.

Tin, ITI hian Industrial partner a nei nual a, chungte chu - Motor ah hian TATA, Hyundai leh Toyota te a nei a. Hetiang hian trade dang tan pawh industrial partner hi zawn sak ve ila a lawmawm khawp ang. Hei, tunah chuan electric motor te, kan lo hmang chho leh tan ta a, hengah hian electric motor trade te pawh hawn theih anih chuan a lawmawm khawp ang a. LESDE hnuaiyah hian ITI function tha pangngai hi pathum chauh kan nei niin a lang a. Heng hi a a ngaih pawimawhawm khawpin ka hria a. District tinah hian ITI din theih ila, kan thalaite tan eizawna lama intuaihriam nan, skill development atan a tangkai hle dawn a. Chuvang chuan, ITI hi tihchak tul hlein ka hria a ni.

Demand No. 22 - Sports & Youth Services Department:

Ka bial chhungah hian Sports hmun hma tha tak tak Rajiv Gandhi Stadium te, R. Dengthuama Hall te a awm a. A lunin, kan hmang-tangkai khawp mai a. Hetah hian thil hote, pawimawh tak ni si chu, a panna kawng a te lutuk a, thil tikhawm nikhua reng rengin traffic jam problem a tling thin a ni. Hei hi kan PWD lam hotute pawh khan min lo hriatpui sela, khulai stadium pahnih panna kawng khu tih-len a duhawm khawp mai.

Tin, ITI Veng-ah hian Aquatic lampang swimming pool te, diving tihna hmun te pawh a awm a. Hei hi Congress sorkar laia pawisa tam tak senga siam kha niin ka hria a. Hei hi term kal ta ah khan enkawl a ni ta lo reng mai a. A tui te han tihthianghlina, a tui han calculate turin a khawl tihnun anih ngai loh avangin a lo tuiek ber bur mai a. Swimming pool sum tam tak sen tawhna si, hman tangkai loha a awm hi a uiawm ka ti a. Pu Speaker, mizote thalaite hi swimming lamah hian kan hniam hle mai a, helamah hian hma lak chak deuh hlek tulin kan hria a. Tin, swimming leh diving ah pheih chuan north-east level a ni emaw, national levela ni emaw, Olympic level emaw thlengin medal tamna a ni a. Hengah hian mizote hi kan inpho-chhuah ve deuh hlek te pawh a tulin ka hria.

Chuvang chuan, kan aquatic hmun hi kan Minister hian chak leh zualin hma min laksak sela. Sum tam tak sen tawhna project ni si, hman tangkai loha awm ringawt mai hi a pawiin, a

uiawm ka ti a. Tin, hei bak hi Mizoram hmun dangah kan neih ka hre lova. Chuvangin, kan neih chhun anihna angin duat tak leh tha taka enkawl theih ni se a lawmawm khawp ang.

Demand No. 7 - Excise & Narcotic Department:

Mizoram chu kan hriat angin border area-a awm kan nih avangin, ruihhlo tawlhrukna a hluar em em mai a; kumtin mai hian a hluar chho zel ni te pawhin a lang a. Kan excise force te an indaihlo hle mai a. Chuvangin, manpower indaihlohna Excise Force hi tichaka, a thar lak belh te pawh a tul hlein kan hria a. Tin, Pu Speaker, a force lam bakah lirtheiah te pawh harsatna an tawk a ni. Lirthei an neih that loh avangin duh angin hna pawh an thawk chak thei lo tih a chiang em em a. Hei, tunah MLP Act sorkar hmasa ina a lo siam tawh bill chu amend-a, heng dan awmsa te chak leh zuala kalpui kan han tum a ni a. Chuvang chuan, manpower kan mamawhna hi a lian hle dawn a ni.

Tichuan, kan Minister pahnite - Pu C. Lalsawivunga leh Pu Lalnghinglova Hmar te demand hi lawm takin ka support e. Ka lawm e.

(Speaker at the Chair)

SPEAKER : Aw le, tunah chuan member zahawm tak Pu H. Lalzirliana ilo sawm ang.

PU H. LALZIRLIANA: Pu Speaker, ka lawm e. Vawiinah hian kan Minister zahawm tak tak pahnihte demand sawina hun kan han nei leh a, a lawmawm hle a. A hmasain kan Minister, Pu Lalnghinglova Hmar demand hi kan sawi duh a. A chhan chu, ani hi ka lainat khawp mai a. A Demand-a sum zat pie-chart percentage hi 1% pawh a tling lova, .83% hi a share ve a ni a. Ani hi Mizoram dung leh vanga mi-hriat, kan thalaite icon, kan motivational speaker ni bawk; kan minister-te zingah chuan mi bright leh chhuanawm berte zinga mi nia ka lo ngaih te pawh a ni a. Tun ministry-ah hian a chanvo 1% em pawh a tlinglo hi ka lainat avangin a demand ka'n sawi hmasak sak nghe nghe ang e.

Demand No. 22: Sports & Youth Services Department:

Kan mizo nula leh tlangvalte Sports lamah kan thangharh hle a. Sorkar a inrawlh nasat lohna apiangah hian hma kan sawn a ni tih hi ka principle neih ve deuh a ni a. Football ani emaw, sports dang a ni emaw, business ani emaw, education a ni emaw, entrepreneurship-ah te pawh a ni a; sorkar a inrawlh thuk lohna apiangah hian kan che tha ni te hian ka hre thin a. Amaherawhchu, loh theih loha han inrawlhna tur chin te chu a awm ang a. Vawiinna kan thalaite ISL I-league-a khel zawng zawngte hi sorkar support hmu lo deuh vek an ni; tunhmaa khang department - Power, PHE, Police tih velin football players an ponsor hunlai khan kan thleng sang tak tak thei lo; vawiinna chuan khitah kan thleng tawh a ni. Chuvangin, mizote hian scope tha tak kan nei a, chung atana pawimawh em em mai 'infrastructure first' a nih a ngai a ni.

Hei, Summer Olympic 2036 te India-in a urlawk hle a. Tin, national games te pawh kan state thenawmin a thleng dawn a. Helam hawi zawnga kan sports personal-te han train-up leh facilities, infrastructure kan pek a pawimawh em em a ni. A bik takin, kan naupan laia kan intlansiakna chu hmawlh-te-pek a ni a, goal ban lehlam-lehlama tlanin kan inpe ringawt thin. Amaherawhchu, racing track-a tlan leh khatianga tlan kha tlan chak rau rau-ah pawh a inang lo em em a ni; miin a second-in an lo chhiar tawh si a. Chuvang chuan, pick-up

tura train ngai tam tak a awm a; khatah a tlan zir a ngai a. Khangah khan infrastructure kan neih that a pawimawh em em a ni.

Vawiin niah hian ka bialah lawmthu sawina tur tam tak kan nei a, a bik takin sports department-ah hian district sports complex crore 40 man dawn te kan han nei a, sports school crore 35 man bawr vel Mamit khawpui ah kan nei bawk a, tin, racing track te pawh kan nei chho dawn a. Tin, Lengpui hi ka bialah chuan football thiam khua an ni a, astro-turf kan nei dawn bawk a. Tin, SASCI project kan thawh hman tak lohah khan kan bialchhunga hmun hrang hrangah field te, futsal ground te a siamna tur kha kan dah nual a. Amaherawhchu, a lapse zingah khan a tel a, kan ti thei ta lo a; Hmunpui, Rawpuichhip, Dapchhuah, Serzawl, Lengte, Nghalchawm leh Dampui te nen. Tin, Lengpui khuaah racing track kan nei dawn a, tunah construction tih mek a ni a. Hengte hi sorkar hmasaa PMJVK kha kan chhawr tangkai em em a ni. Sorkar hmasa PMJVK-ah khan crore 400 bawr vel ngawt mai sports infrastructure atan hian kan hmu a ni. Hei kumin ah hian chianguang taka hmuh kan la nei lo a ni.

Hei, PMJVK hnuaiah MZU hian crore 68 ngawt mai an hmu thar niawm tak a ni a, MZU te ka congratulate a. Chutih lai chuan, kan state thenawm Arunachal Pradesh, Nagaland leh Meghalaya te chuan he PMJVK hi an hmang tangkai khawp mai a, State thenkhatah phei chuan an hmuh ang ang hi sports infrastructure din nan an lo hmang a ni. Chuvangin, keini pawh hian tam zawk hmu thei tura inruahman a that ka ring a, chutiang tur chuan kan sorkar pawhin tan la leh zual se a tha awm e.

Demand No. 28 - Labour, Employment, Skill Development & Entrepreneurship Department:

Labour, Employment, Skill Development & Entrepreneurship hi ka hmaa Champhai North bialtu sawi ang khan, district tina hetiang lama kan kal-nat hi a ngai em em a. Ka sawi fo thin - Aizawl khawpui nuam tur chuan kan district capital-te hi thuam chak ve ila, basic infrastructure tha tak mipui tena kan han avail theih basic facilities, education facilities pawimawh zual chin (nghamit zai tur thlenga civil hospital pan a ngaih chuan a tawt lo thei lo) hi chu awm thei se. District capital te nuam deuh zawka siamin leh kan ramchhung tihchangan nan kan district capital-te hi kawng hrang hranga thawm that ve hi a ngai a ni, tih te ka sawi ve thin a. Heng atan te hian nasa taka skill development leh entrepreneurship te hi district-a inzar-pharh leh zual a thain ka hria a ni. Tunah hian coaching centre pawh Mamit Officers' Club te, MZP leh MYC-te tang kawpin Mamit College-ah an hawng thar ve a. Mahse, MYC atang hian facility tlem tih loh chu faculty pawh pek a ni lova, Mamit Officers' Club ten an la pe a. Heng coaching centre-te hi min tihchangtlun sak se tiin kan minister zahawm tak hi ka han ngen a ni.

Demand No. 7 - Excise & Narcotic Department:

Hmanniah bill kan pass a, beer, wine siam theihna te. Mizoram hi thei ei tur hnianghnar lohna ber state a niin ka hria a. Vai rama awm nuam ka tihna chhan chu, thei eitur a tam a ni. A variety a, a tlawm a, Mizoram-a thei ei char char thei tur chuan well-to-do ve deuh nih a ngai a. Hei, dragon fruit te pawh, 'a tam; kan hnianghnar' kan ti a, a a tamlai pawhin ₹200/kg aiin a tlem thei mang lo a. A tam chuan kg-ah ₹50 - ₹60 - ₹100- te ni se, a rethei zawkte pawhin hnianghnarin han ei ta sela. A la hniam theih meuh loh avangin, "E, kan la thar tam tawk lo a nih hi" tiin ngaihdan ka lo siam ve thin a ni. Kan hnianghnar a nih chuan, mi rethei thleng pawhin kan thei hmuhloh theite hi ei tam ve ila kan hriselna te

pawh nasa takin a improve dawn a ni. Chuvang chuan, thei lamah kan la hnianghnar loh em em lain, a zu lampang, a wine leh beer lampangah kan in concentrate dawn a nih hmel a. Engpawh ni sela, a tha vekah ngai ila, a tuiril zawngin kan ei dawn a ni mai a.

Hei, Ethanol hi sugar-cane juice a ni a, petrol a pawlh hian a efficiency a ti sang a, a air te a clean a, Brazil leh ramdangah chuan an hman nasa viau a ni. India ramah pawh bio-diesel, bio-fuel kan tih hian ethanol leh bio-diesel hi a awm a. Ethanol siamna atana pawimawh ber chu sugarcane juice hi a ni. India ramah hian sugarcane factory tam tak a awm a, ethanol atana an product theh chhuah theih Sorkarin quota siam mah sela, an hreh ngar ngar thin hle a ni. A chhan chu, khatiang zat khan zu a siam hnem thei lutuk a, zu bottle-ah cheng 1000-2000/- te a lo ni a, ethanol hi litre 1- 2 te kha ₹5 - ₹6/- te a lo ni a. Chuvang chuan, sugar factory hian ethanol siamna tur an pephal mang lo a ni. Chutiang chuan, kan fruit tharchhuah te pawh a lehlamah a man a lo to zawk pheh chuan eitur nei mang lo hian lehlam atan kan sawrbing lutuk ang tih thil thuah ka han sawi lang ve ni sela.

Demand No. 27 - District Council & Minority Affairs Department:

Minority Affairs-ah hian a pawisa zawng pheh chuan ₹3,897 lakh ngawtin a pung a, a lawmawm ka ti a. Chhim lam hian District Council neiin fund-te pawh an nei a ni. Kan Bial chhungah hian minorities kan tam khawp mai a, Bru te, Chakma te. Bru te hi a bika council nei ve lo an ni a. Khulai Damparengpui te, Tuipuibari te khu Bru khaw lian tak, in 700 vel ve ve awmna chuang a ni a. Khatiang khan, Bru community an lian em em a ni. Tichuan, anmahnia funding hranpa an neih ve si loh hian Mizoram-ah hian an buai em em mai a. Thlen-in chungchangah Aizawl-ah lo kal se, thlenna tur House an nei lova; Chakma te Lai te leh Mara te chuan anmahni pualin House an nei vek a, Bru erawh chuan an nei ve lo.

Chutiang chuan, Sorkar hmasa tawp lamah khan SASCI atanga tih turin nasa takin kan han bei a, hmunhma te pawh kan han en a. Amaherawhchu, kan ti hlawhtling hman ta lova. Vawiin niah hian Pu Spekaer, kan Bru unaute, khawthlang lama minority awm, anmahnia funding nei ve si lote khuan Aizawl tlangah khawilaiah emaw hian House neih ve hi an phu hliah hliah a; chu chu kan Minister zahawmtak hian min lo hriatsak sela. Nichina Pi Prova-i sawi ang khan, khungho khuan Biju te, Buisu te, Hawdaigiri festival te an nei a, khang atan te pawh khan theih ang tawkin kan Sorkar hian ruahmanna han siam se ka duh a.

Demand No. 19 - Local Administration Department:

LAD chanah hian thil pakhat request ka duh chu, 2028-ah Mamit khawpui ah hian KTP - General Conference kan thleng dawn a. LAD park khu mikhualte tlawh ve theih tura kan vauchher ve theih chhun a ni a; khu khu han tih len emaw, engtin emawa han revamp a ngai khawp mai a; kan Minister-in khawngaihin min lo hriat sak se.

Demand No. 34 - Animal Husbandry & Veterinary Department:

AH & Vety ah hian han sawi hram ka duh chu, kan bial hi vawkvulh cluster area-ah puan a ni a, Lengte leh Nghalchawm te. ASF kan tuar khawp mai a, vawk 1000 chuang chuang neite kha an thi zawih zawih mai a ni. A hnu ah a then chu kahhlum, a then chu mahnia thi an ni a. Sorkar hian zangnadawmna kan tih te kha a pe fel tawh em? Pek tur a la awm em? DM & AR hnuai ah ASF tuarte tana zangnadawmna sum hmuh te kha a awm niin kan hria a, khang te kha la chhunzawm zel a ni em, tih te kha ka hre duh ni.

Chutih mek lai chuan, department ropui tak, mizo-mipuite eizawn thiamna awm chhun si hi

Governor Speech-ah khan a hmaih pawlah a tang hlah mai a, ka tuarpui hle a ni. Engpawh ni sela, vawiin hian Pu Speaker, heng kan Minister zahawmtak takte Demand hi a lawmawm ka tiin, ka pawmpui a; pass ngei turin ka thlawp a ni e. Ka lawm e.

SPEAKER : A lawmawm e. Dar 5 pm kha kan han ti nangin, kan Dampa bialtu member thu zawm ila a thain ka hre leh deuh a. Tuna kan recess chhung hian kan technical official ten AC line check leh an duh a, an tih that hman chuan luh leh hunah chuan a nuam zawk dawn turah te pawh ngai ila. Tunah dar 4:30 pm vel a ni a, dar 5:00 pm-ah luh khawm kan tum ang a. Amaherawhchu, kan technical official lam te an inpeih hman loh thei a, update kan lo la reng ang a. Dar 5:00 pm a thutkhawm leh chu tum rih phawt ila.

(Recess at 4:31 PM)

5:00 PM

SPEAKER : Tunah chuan member zahawmtak Pu W. Chhuanawma ilo sawm ang.

PU W. CHHUANAWMA: Pu Speaker, ka lawm e. Vawiinah demand pawimawh tak tak pahnihte hi han sawi ve loh chu ni theiin ka hre lo a ni. I veilama mite khan kan thil sawi zawh tawh ‘The Mizoram Liquor Prohibition Amendment Bill’ kha an rawn sawi leh nasa viau mai a, khalaiah khan han bung leh chawt mai ila.

Kan sorkar tirh khan kan leader hian, ‘sorkar kal tawhte thil tih a tha chu kan chhunzawm ang a, a tha lo erawh chu kan ti tawp ang’ a ti kha a ni a, chutiang tak chuan kan kal niin ka hria a. MSSSB kha tha kan tih loh avangin nikum khan kan ti tawp a, hnam incheina uar tih te kha tha kan ti a, kan chhunzawm a. Tin, grape wine siam in phal te kha tha kan ti em em a; amaherawhchu Champhai leh Hnahlan chauh hian a hamthatna hi chu dawng bik lo sela, lakhuihthei te, dragon fruit te, passion fruit te chingtute pawh hian a hamthatna dawng ve se la tih ngaihtuahna a seng ta a, lakhuihthei ngat phei hi chu a hmin tawh chuan seng thuai thuai a ngai a. A kunga awm rei theilo a ni a, seng hnuah pawh a dah rei theih loh a, a tawih hma a ni. Hetianga wine ah te siam a ni tur hi a lawmawm em em a.

Pu Speaker, i veilama mite ngaihtuahna leh an rilru hi hriat harsa ka ti a, thil tha lo kan tih kan paih khan an tang nasa em em a; MSSSB kan paih khan a tha kan tihpuiin, wine leh beer siam pawh kan han zawm a, an teu leh hler si a; engnge an rilru ni ang aw ka ti a. Ka tehkhin ber chu zawhte-thinglawn hi angin ka hria a. Zawhte thing lawn hi a mawngah han dawm ila, a tang tek mai a; han pawt thla dawn ila, a tang teu mai bawk si a. An duhzawng an lo tih tawh kan han zawmpui a, an tang teu mai si a; an duhlo zawng kan tih lahin, an sa hlur bawk si a. Chuvangin, an lo duh lo tak tak anih chuan an hun lai kha engatinge an lo paih loh, tih te ka ngaihtuah a. An hmanraw hman lar em em Covid avangin kan paih hman lo an ti nge maw ni.

Demand No. 7 - Excise & Narcotic Department:

Excise Station thar hawn te leh ruihhlo chungchanga kan minister hmalakna te hi a lawmawmin, a ropui ka ti a, kan sorkar a fakawm hlein ka hria a. Saitual, Khawzawl leh Hnahthial-ah te station thar hawn a ni a. A thawktu lam indaih lohna a nasat avangin, thawktu dang 33 lakna tur a kal mek bawk a. Heng district thar pathumte tan hian an la

rawn tih leh zel ka ring a ni. Ruihhlo-do meeting neih an han buatsaih a, Hnahthial, Khawzawl, Saitual, Champhai, Mamit District bakah Aizawl District-ah te pawh an nei thin a, a lawmawm khawp mai a. Tihtak zeta ruihhlo do beihpui thlakna neih hi a lawmawm ka ti a. Zirna-in middle school leh high school-ah te tum 29 ngawt mai awareness campaign neih a ni a, ruihhlo that loh zia leh hlauhawm zia campaign chhimtu school naupang pawh mi 4000 ngawt an ni.

Pu Speaker, ka duh dan phei chuan, zirna-inah hian subject pakhata telh dan te a awm se; anih loh pawhin, kar khatah vawi khat tal, Friday emaw ah hian hetiang lam inzirtir thin ni sela, tih te ka ngaihtuah a ni. Tiang chuan, khawtlang thenfai hna hi an thawk nasa em em mai a; Excise Department, a changtu minister viak tha tak ho hian an fakawm a ni. 'A sen-chi lane' kan tih mai hi Aizawl hmai tibal tu ber a ni a. Lengpui atanga hnamdang an lo kalte hmuh atan chuan khulai bawr khu a tawp em em mai thin a ni. Vaivakawn Veng leh department tangkawpin theihtawpa tan lain, nitin-zantin an duty-a an han do tak tak chuan, an thianfai a ni; tute pawh duty turin an inpe vek a ni. Kanna te ngei pawh duty-in a chhuak ve a ni a. Chutianga tih tak zeta han tih chuan a hlawhtling mai zel a ni.

Demand No. 28 - Labour, Employment, Skill Development & Entrepreneurship Department:

Skill development-ah hian sawi duh ka nei bawk a. Ni 29th June, 2018-a din tawh chu Ni 9th January, 2025 khan kan Chief Minister zahawm tak kaihhruaina hnuaiyah governing council meeting hmasa ber neih a ni a. He policy hnuaiyah hian policy hrang hrangte pawh Ni 6th January, 2025 khan hnathawk thei tura siam that a lo ni ta te hi a lawmawm tak zet a ni. Mizoram Building Other Construction Welfare Board hi (a hming bakah a lamtawi pawh a sei hle mai a, 'Workers Welfare Board' tiin sawi mai ila) Ni 18th November, 2024 chhung khan awareness-cum-registration campaign te neih a ni a, a lawmawm ka ti a. Khawtin rampumah chak taka hmalak ni zel se ka duh a.

Ka bialah khian hei hi an lo la hre lo nge ni; kum 2022 nge 2023 khan hmeithai a fapa nen chauha awm, eizawngtu a fapa insakna a inhlawhna ah a chesual a, ramtui-lei-lo in an awm a ni. Member registration neite hamthatna - member hmeichhiate tan nau neih lawmpuina ₹5,000/- pek thin ₹10,000/- a pun te, hliam vang leh eng emaw chetsualna vanga kum 60 tlin hmaa lo thi tawh emaw, ram-tui-leilote chhawmdawlina ₹50,000/- ni thin ₹1,00,000/-a pun a ni te hi a ropui a. Khangah te khan campaign-na lo nei ila, lo in-register hman ni sela chuan aw, tih vawng vawngna tur a ni a. Chuvangin, heng an ti te hi a lawmawm hlein ka hria a ni.

Demand No. 22 - Sports & Youth Services Department:

Khawzawl hi district kan nihna kum 5 vel awrh ni mahse, sport lamah hian kan changkang em em a. Khawzawl hi tuna Sikkim State invitation ah Khawzawl Vengthar Football Club an tir thla thin a, kum hnih chhung a zawnin Sikkim-ah an zu champion tawh a ni. Chutiang chu anih avangin, kan Khawzawl-ah hian football academy min han siamsak thei se a duhawm dawn mang e. Tin, inter-village football tournament neih apianga a boruak ti hot-tu leh ti hmuhdawmtu chu Sialhawk leh Khawhai te hi an ni thin a ni.

Demand No. 34 - Animal Husbandry & Veterinary Department:

Eng pawh ni se, Pu C. Lalsawivunga chanpual hi han sawi ve loh theih loh niin ka hria a. Khawzawl district-ah hian vawk, bawng, sial leh ar vulha eizawng chu an tam a, sial phei chu an vulh nasa em em a ni. Riangtlei leh Vangtlang chheh velah khian sial vulh an tam

em em mai a. Hengah te hian processing unit din theih ni se chuan ziawm tur a ni a. Sial hi a sa sera zuar hi an vang em em mai a, krismas dawn leh hunpuiah te hian an hralh deuh chauh mai thin a. Chuvangin, a hralh zung zung a har a, chinghniate'n an lo bei nasa thin bawk nen. Chuvangin, a processing unit min dinsak thei se a lawmawm ngawt ang.

Demand No. 23 - Art & Culture Department:

Khawhai leh Sialhawk ram chungah hian lung-van-do ang chi hi hmun hrang hrangah a awm hlawm a. Hengte hi Art & Culture Deaprtment hian belchiangin humhalh vek se, kan history leh pipute sulhnu humhalhna a ni a, a tul khawp mai.

Aw le; vawiin a kan demand sawite hi a tha ka tiin, pass ngei turin ka rawn thlawp a ni e. Ka lawm e.

SPEAKER : Tunah chuan, Pu K. Laldawngliana ilo sawm ang.

PU K. LALDAWNGLIANA: Pu Speaker, ka lawm e. Kan Minister zahawm tak tak Pu C. Lalsawivunga leh Pu Lalnghinglova Hmar te demand sawina hun tha kan nei hi lawmawm ka ti hle a. A hmasa berah chuan –

Demand No. 19 - Local Administration Department:

Nikum budget kha kumin aia a tamna hi ₹1684.42 lakh ngawt mai a ni a, a lawmawm hle mai. A zar kan zo hle a; sorkar hmasa atanga ruahmanna lo awm tawh tidanglam miah lovin VC House 'Panchayati Bhawan' kan tih RGSA hnuai ami kha ka bial heng - Kawnpui, Thingdawl, Khamrang, Nisapui leh North Chaltlang ah te min sak-sak avangin kan Minister chungah a hmasain lawmthu ka sawi a. Tin, untied fund atang hian ka bial chhunga khaw 13 ah ₹70 lakh chuang man hnathawh a awm avangin, a chungah lawmthu ka sawi bawk a. Tin, 2025-2026 ah pawh hian untied fund atangin ₹69 lakh chuang dah leh ani te pawh a lawmawm hle mai a.

Min lo chhinchhiahsak atan - tuna VC thar inthlan felna Hortoki, ZPM VC neihna hmunah hian VC House kan la nei lo a, a hma lama min pek kan beisei a ni. RD & Administration Department lo ni tur hi (kan sorkar tharin an lo sawi ang khan) 'thil tha tur hi chu kan ti pawp dawn; kan kalpui pawp dawn' an tih avangin, a tha turah kan ngai ringawt mai a. RD & Administration Deaprtment thar lo awm tur pawh hi duhsakna ka hlan nghal a ni.

Demand No. 23 - Art & Culture Department:

Nikum a budget aia kumin a tamna hi ₹24.69 lakh a ni a. 'Art & Culture, Tribal Affairs Department' tih ni mai tura order awm tawh kha, Art & Culture Department pangngai a ni leh dawn niin ka hria a; hei pawh hi a tha turah ngaiin in lawmpui zel phawt mai i la a thain ka hria a. RRLF matching scheme atang khan YMA library sakna tur Hortoki leh Bukpui Branch YMA-te min tihsak dawn bawk avangin lawmthu ka sawi bawk a.

Art & Cultur Department hi a pawimawh em em mai a. Mizo nun-zemawi kan zirna tur te, kan hnam zia leh engkim zirna hmun, a bik takin Chapchar Kut hun kan han hmang thin a. Kuminah pawh Zo-nun zemawi hawihawmna thu tha tak kan ngaithla a, hlim takin kan hmang thei kha a lawmawm a; a ai nasaa kal zel pawh kan beisei a ni. Amaherawhchu, district dang budget hi a tlem deuh hlek a, dah belh theih ni se a tha awm mang e. Tin, zirlaiten research an neih theihna turin Mizoram-State Archive-ah pipute history hrang

hrang an dahkhawmte hi a tha em em tih ka sawi lang duh bawk a. Tin, music & fine art lamah te pawh a ni a; chutiang chuan thil pawimawh tak tak Art & Culture Department-ah hian a awm a ni.

Demand No. 34 - Animal Husbandry & Veterinary Department:

Nikum aia kumina a budget tamna hi ₹1620.35 lakh a ni a. Kan hriat angin thingtlang bial tan hi chuan ran-vulha eizawn hi kan thiam zawng a ni a. Tunhma Congress sorkar lai leh MNF sorkar lai pawhin department pawimawh ber an ni thin a. Tun tumah erawh hi chuan he department hi a nih tur angin kan hmang lo deuh niin ka hria a. Amaherawhchu, ran vulh te hi kan thiam zawng a nih avangin, hand-holding policy Chief Minister's package-ah khan `cheng nuai khat thleng dah theih anih avang khan, AH & Veterinary-ah hian a dilna ringawt pawh 13,000 vel a lut tawhin ka hria a. Hengah hian a aia tam pawh dahin he department tihchangtlun hi a pawimawh hle a ni.

Kan sawi ang khan, NEC kaltlanga sial-vulh te kha a tha dawn hle mai a. Tin, vawk-vulh chungchang pawh National Livestock Mission (NLM) atangin vawkpui 50 vulh chhawmdawl na dil theihin a awm a, a dilna pawh a awm teuh tawh niin ka hria a. Hei hi hlawhtling thei tura hmalak a pawimawh hlein ka hria a. Tin, NABARD kaltlanga ranchaw siamna tur Lengpui-a siam mek a ni te pawh hi ranvultute tan chhenfakawm tak tur a ni a, a tha hlein ka hria a. Tin, kan leader bial Thenzawl-ah fodder, 'hay-making' an tih mai, ranchaw hnim atanga a roa siamna, tunlai media-ah pawh kan hmuh ang kha tunhnaiah siamchhuah a ni a, a lawmawm khawp mai a.

Chutih rual chuan, tihmasawn tur erawh chuan staff an indaih lo em em a, vety doctor lakbelh te a tul a. Tin, VFA post pawh hi an nei tlem hle mai a. Kan bialah pawh Kawnpui leh Lungdai bakin doctor kan nei lova, hei hi min lo chhinchhiah sak turin ka ngen bawk a ni.

Tin, hei vawk chungchang kan sawi fo mai a. ASF avanga tanpuina kha engzat nge kan hmuha, engzat nge kan pek tak tih kha windup hunah emaw min hrih thei se. Mipui hian tanpuina engzat nge kan hmuh theih tih te an hre chak hle a ni.

Demand No. 22 - Sport & Youth Services Department:

Kumin he depts. budget tamna hi cheng ₹167.15 lakh a ni a. Hetah hian kan minister kal ta chungchang pawh kha sawilan ka duh ve hrim hrim a. Zoram-a thil thleng ngai lo, infrastructure hrang hrang - football, volleyball, basketball bakah futsal thleng a tam em em kha, khawi atangin nge maw a hmuh em em ni, kan ti mai a. Khang ram tana thil ropui tak a thawh avang khan, ka chawimawi ve duh hrim hrim a. Tin, kan minister ni lai pawh hi technical lam bakah engkima thiam em em, hre em em leh sawifiah thiam a ni bawk a; ani hian a han enkawl chhonzawm leh ta chat mai a. Sorkar hmasa hmalaknate pawh tha takin a kal zel ka beisei a ni.

Sports Department hi sorkar hmasaah khan Aizawl leh Lunglei bak a awm si lova; Kolosib leh Champhai ah hian a awm ve a, chu chu a ni mai a. Hei hi felfai leh tha taka a kal chhoh zel theihna turin hmalak ni sela. Kolosib-ah hian a hmingin staff pariat an awm ve a; Lunglei ah pheih chuan an nei tlem khawp mai a. Hetih lai hian ka bial chung sawikai ka duh khawp mai a. Kan hriat angin Mizoram pum huap ah India ramin an ngaih pawimawh em em hockey academy Kawnpui ah kan nei a. Hetah hian kan hriat reng tur chu, Thenzawl Girls nen hian kan sawi kawp thin a. Thenzawl ami hi chu SAI hnuaia awm a ni a, training

lai pawh 40 ngawt mai an awm a. Kawnpui-ah hi chuan training lai 22 chauh awmin, Under-14-te tan bik a ni a. Hei hi ka bial chhung anih avangin min lo ngaihtuah sak deuh sela, facility leh engkimah a quality a inthlau hle mai a. Hei hi min lo chhinchhiah sak atan ka'n sawilang tel duh bawk a.

Tin, infiam mite cash award pawh hi tam zawk kan pek zel theihna turin ke kan penzel thei turah ngai ila. La pekloh tam tak an la awm a, tunah hian pek chhonzawm zel thei turin ka beisei a ni. Tin, Mizoram-ah hian sports academy hi engzat nge awm; tunah hian kalpui zel a ni em tih pawh nakin a windup hunah min han sawi sak bawk sela.

Kan sawi tawh ang khan Olympic, 2036 vision chungchang pawh hi, a sawi piah lamah tha zawka kalpui a nih ka beisei a ni. Tin, tun term ah hian sports infrastructure lama hmasawna tur lam heng - football ground te, volley ball te, futsal te, hetiang kawngah hian hmalak tumna a awm em, tih te pawh kan hre duh bawk a.

Demand No. 28 - Labour, Employment, Skill Development & Entrepreneurship Department:

A budget nikum aia a tlemna hi ₹2,00,226.7/- lai a ni a. LESDE hnuai MYC chung chang kan sawi hrep tawh a; coaching centre 5 a awm tih kan hria a, a thawktu kha 11 chauh an awm bawk si a. Hei hi changtlung taka kalpui tura hmalak theih ni sela thain ka hria a. Tin, labour cess ah hian pawisa kan hmu teuh mai a, hei hi a hmanna kan hre thin lova. Nakinah a hmanna mipui hriat atan min puanzar sak sela. Tin, LESDE office hi khawi khawi district-ah te nge a awm min hrilh thei bawk sela.

Central Ministry guideline-a trade hrang hrang role anga a kalpui takah hian training institute ho hian harsatna tam tak an tawk tih hi min lo hriatpui sela. Hei hi kan ram dinhmun mila herrem theih ni sela a thain ka ring a. Training centre hrang hrangah hian training fee te hi pek loh anih avangin harsatna an nei ni te pawhin a hriat a, heng te pawh hi min lo chhinchhiah sak sela a thain ka hria. Tin, thil pawimawh em em mai chu, college hrang hrangah skills training course neih vek tur tih kha a ni a. Hei hi kan thalaite tana hmasawna tur a nih angin budget-ah dah tumna te a awm em tih te pawh kan hre duh a.

Demand No. 7 - Excise & Narcotics Department:

A budget nikum aiin kumina a tamna hi ₹251.72 lakh a ni a, hmalak kan tum viau niin a lang a. Hei salary ah hian ₹281.51 lakh-in kum hmasa aiin a tam avangin hmalak kan tum viau a nih ka ring a. Hnathawktute lakna tur te anih ka ring a, hetah hian uluk leh zuala hmalak a pawimawh hle mai a. Kan CM kaihhruaina hnuai 'State Level Committee on Ruihhlo-Do' committee kha a awm a; state-level, local-level tih te kha a ni a. Hengte hi chhonzawm zel tur ni ah ka ngai a. 'Mizoram Liquor Act' hi kan tel lovin (MNF te, INC te, BJP te, kohhran hrang hrang leh pawl hrang hrangte) an lo pass tawh bawk si a, hei hi strict taka kalpui a ngaiin ka hria a. Fruits hrang hrang hmanga beer leh wine nasa leh zuala kalpui kan tum kher hi kei a thain ka hre lo a ni.

Pu Speaker, kum 2024 - 2025 chhung, February Ni 13 ah khan ruih hlo avanga thi mi 46 kan nei a; tichuan, ruihhlo avanga case nei 548 a awm bawk a. Khang bakah khan case siam sak loh, man si loh tam dan tur zia kha ka ngaihtuah a. 'Zu khap' kan tih hi a nihna takah chuan, kan phal rai zawk a ni. Kei chuan engti kawng zawng mahin kan that phanna tur ka hre lova. Pu Speaker, beer and wine (Zu) zawrh avanga Isua tana kan rinawmna tur leh kan

damreina tur hi ka Bible leh hmun hrang hrang kan chhiar hian ka hre thlawt lo a ni.

Tichuan Pu Speaker, kan Minister pahnihte chanpual demand te hi tha ka ti a, ka pawmpui e. Ka lawm e.

SPEAKER : Tunah chuan, member zahawm tak Pu Lalmuanpuia Punte ilo sawm ang.

PU LALMUANPUIA PUNTE: Pu Speaker, vawiin a department pahnih demand kan sawi turte hi ka hriat tlem pawl takte an ni mai a; ka zep lova.

Demand No. 27 - District Councils & Minority Affairs Department:

DC & MA hi, nichina Pu K. Hrahmo rawn sawi zawk kha han sawifiah pahin, DC & MA te hi chu schedule tribe recognition ta bik kan ni a; ‘hemi kan nei thei te hi...’ kha a ti a; vawiinni thleng hian Lai Autonomous Dist. Council leh Mara Autonomous Dist. Council te hi schedule tribe-a recognize an la ni miah lova, Lakher leh Pawi an la ni reng mai a. Hei hi a ranglama siam that a thain ka hria a ni. 2012 khan Amendment bill helai Mizoram Assembly House ah hian put luh a ni tawh a, ‘siamthat ni rawh se’ tih kha. Mahse, tun thlengin siam that a la ni lova. Tin, kan schedule tribe list hrim hrim a hi Assam hnuai scheduled tribe-a kan awmlaia kan scheduled tribe copy kha kan copy chhuak tawp a; Assam leh Meghalaya chuan an amend nasa tawh a. Tunah hian 1 to 14 hi Assam leh Meghalaya hi an inang thlap a ni. Kan indan hma ami kha a ni a, Assam chuan an amend nasa tawh a.

Chutah chuan, ‘engvangin nge Chakma te hi schedule tribe ah hian no. 1 an nih’ te kan han ti ringawt a. Alphabetical order-a dah a ni a; ‘C’ aia hma kha an awm loh avangin Chakma kha an hmasa ber a ni, Assam hun lai atang khan. Chu chu an han amend belh khan, kha Assam hnuai kan awmlai alphabetical order 1 to 14 kha tidanglam tawh chuang lovin 15, 16 ti khan a kal chho mawp mawp a. Mizoram hian pakhat chiah kan belh a, Paihte a ni a, chu pawh chu number 15 ah a lut mai a.

Kan sawi duh zawka chu, Mizoram-a cheng reng reng tawh lo scheduled tribe kan ngah tlat a ni. Garo te an awm tawh lova, Khasi te chu khunglai Vairengte leh khawi emaw velah an la awm a. Dimasa an awm miah lova, Tai-speaking tih te an awm miah lo; chutih laiin Zo-hnahthlak tak tak pawh an la awm miah lova. Sawi tak ang khan, ‘Mara tia thlak ni se’ tia 2012 kuma helaia pass ni daih tawh tun thlenga hman a la ni lo hi chu tihfel vat a thain ka hria a ni. Awm tawh miah lo, Mizoram-a awm reng reng lo recognize ni site hi a ngaimawhawm hlein ka hria a.

Demand No. 34 - Animal Husbandry & Veterinary Department:

A dawt leha chuan, nichin khan sa eitur vawksa ah kan intodelh loh zia kan sawi nasa a; State dang atanga kan lakluh, a then phe chu Myanmar lam atang te a lo ni a; hei laiah hian tan lak kan ngai viauin ka hria a. Chutih mek laiin, tan han la viau dawn ila, vawk natna hri a lo len leh khan tih vak ngaihna awm lova, mi tam takin sum nasa tak tak an hloh a, chutiang te chu a ni a. Chuvang chuan, a hri lam vaccine te hi a awm thei em? Khawchhak lam Cambodia velah chuan vaccine hian ASF hi chu a dang tha an ti deuh tlatin ka hria a; a hmute ti ti ah chuan. Khang vaccine kha kan lak luh theih chuan kan vawk vulh ringawtah pawh hian vawksa lam hi chu kan intodelh a ni.

Vawksa hi a mak khawp mai a. Mizo hian vawksa hi kan lo duh ber ni tur a ni; sa dang hi chu a rate an han tihpun pawhin mipui kan ngawi mai mai a; vawksa rate a pun tawh hi chuan sorkar nen kan ri luh zel. A rate siam tur pawhin DC hova meeting te a ngai a. Vawksa tluka Mizote min khawih vak hi a awm lo a ni awm e ka ti a. Ar te pawh a ni ang a.

Nichina kan ngaihthlak, South III Bialtu Pi Baryl-i sawi kha, a bial hi ar vulh tamna a ni a, khangah te pawh khan hri a lo len chuan han tih vak ngaihna kan hre lova. Chuvang chuan, vaccine lam hi ngaihtuah theih ni se la, a bikin sial hi vulh uar zel a thain ka hria a. Amaherawhchu, BJP, central sorkar lamin bawng talh khap an uar zel dawn chuan, sial sa lama kan kal a ngaiin ka hria a. Chu chu kan hnam rohlu, hmanlai pi-pu hunlai atanga hausa leh mi awmtheite tehnaa kan hman te a lo ni a. Kan minister hian hei department pahnih a chang kawp bawk a. Chuvang chuan, sial vulh hi uar ni se. Ka biala Sailulak-ah sial an vulh tha angreng a.

Amaherawhchu, in lam side zawnga kha fencing tih tawh a ni a, Tuipui lam leh Tiau lam khi an la ti thei lova, a do te pawh an awm zeuh zeuh ni awm tak a ni, anmahni khaw chhung mi ni lo. A lehlamah chuan, sial vulh hian ram a tibua ang reng a, khawtlang inlungual loh mai pawh a thlen thei a ni. , Ka biala Leng-ah te pawh sial tih rem duh pawl leh vulh duh pawl an awm a, chutiang vel chu a ni a, khawtlang inlungual that hi chu a ngai a. Pu Zira biala Hmunpui te chuan ram an nei zau em em a, khungah te khuan uar tha se. Pu Rintluanga Bial West Lungdar te pawh ram ngah an ni a, hengah te hian ti thei se; kan hnam culture-ah sial hi hmanlai atanga kan lo ngaihhlut a ni bawk si a. Tin, bawng talh khap a lo ni bawk nen sial hi uar ila, a sa pawh a tui a; mi thenkhat pheih chuan bawngsa aiin a tui an ti zawk a. Heng te hi a uar theih chuan tha ka ti a. Amaherawhchu, Vety Department hrim hrimah hian thawktu an indaihlo em em a, heng te hi thuan that ni sela.

Demand No. 23 - Art and Culture Department:

Mizoram chhunga hnam hrang hrang kut entirman: Paite-in kum tawpah (eng kut nge ni kha Pu Lalte?) Aw, khang te; Hmar-in Sikpui-ruai te Lai-in hmanni lawkah ‘Hlukhla’ an nei a; Mara-in ‘Lyuva Khutla’ an nei bawk a. Khangho zawng zawng kha sorkar hian Chapchar kut kan tih ang tho hian a senso te tum sak ve thin sela.

Tin, Chapchar Kut kan hman dan hi tlem tlemin kan hman thiam chho zel a, a kum teline; kan develop tulh tulh a. Kuminah pheih chuan a kar tluanin kan bei thei a, a ropui a. Amaherawhchu, a main event kan chief minister hoa kan tih thina hi district hrang hrangah hian tih kual theih ni se ka duh khawp mai. He lai Aizawl-ah an lo ti lo ang tihna ni lovin, Aizawl-ah a Kut-pa hova kan tih luh luh laia Lunglei-ah an lo hman ve tho ang khan, Nakumah Lunglei-ah, a kum lelah Champhai-ah, Kolasib-ah, khatiang khan a main event kha tih kual thin ni se a tha hlein ka ring a. Manipur-ah zo-hnahthlak ho khian ‘Kut’ an ti mai a, Sorkar Holiday a ni a, sorkarin a expenditure a tum sak vek bawk a. Chutah chuan a changin Kangpokpi-ah, a changin Imphal-ah, a changin Moreh-ah, a changin Churachandpur Lamka-ah an ti thin a ni. Khatiang khan ti kual ve thin ila a tha hlein ka hria.

Tin, ‘hnam chhui chian’ tih hi. Ni e, kan hnam kan lo chhuahna hi China kan han ti deuh tawp a ni mai a, a bang-bo ang reng a. ‘History’ hi kan han ti kan ti a; hnam chanchin ziaka record awm hi ‘history’ kan kan ti a. Amaherawhchu, Mizo History kan tih zawng hi chu pre-history - a, aw, b kan neih hma chanchin tawngkama inhrilh chhawn kha an han zia leh chhawng a, chu chu ‘history’ kan tih ber chu a ni mai a; a bul ang reng khawp mai a.

Kan history hi chhui chian viau a ngaiin ka hria.

Tin, VC House leh computer tih te ka bialah khian a then then dawng an awm a, a dawng lo pawh an la awm nual a. Kum lo kal leh turah chuan kan bial te pawhin kan chan ve ngei ka ring a.

Demand No. 7 - Excise & Narcotic Department:

Tin, Pu Lalnghinglova Hmar Demand ah hian, zu leh ruihhlo kha an han sawipawlh lui a. Hmanni ah pawh khan, ‘in zu zawrhna tur a ni’ an ti kuk kuk a, a tawp lamah huai deuhin, ‘zuar law law ula’ chu an han ti lawi a. Chuvang chuan, an thu leh ui beng kha hlin tur a awm lo reng reng a. Vawiinah pawh hian an han sawi ve leh hrim hrimah ngai mai ila. Kha vang khan mipui pawhin an tan phah chuang pawhin ka hre lova, an hun an khawh ral peih mai mai hian ka hre deuh a.

Hemi chungchangah hian Excise Department hi a pachhe ang reng a, tuna a thawktu zawng zawng hian police motor pawh an zat lo a; thuam chak an ngai viau a ni. District thar pathumah tuna station an hawng te hi a lawmawm em em a. Post thar heng - Inspector, SI, Head Constable leh group D, a vaiin 12 an han la thar te, motor 18 lai mai, lmv 14 leh two-wheeler 4 te han tih chhoha upgrade hret hret hi a ngai a.

Demand No. 22 - Sports & Youth Services Department:

Kan minister hi a rem-hre mang e aw, ka ti a. Bana-kaih policy ah sports a khung thei hi a mak ka ti khawp mai a; fak tlak a niin ka hria. Tin, Samagra nena MoU ziah ani te hi a lawmawm a. Sports hi ka hriat loh lam deuh mai a ni a. World Cup ah te hian a opening ceremony lai hi hmuhnawm ka ti zawk a, opening ceremony hnu ah hian ka mu daih zel a. Chutiang khawpa sports lam hre lo ka ni a; carom-board bak hi ka khel vak lo a. Chuvang chuan, sports hi chu sawi tur ka hre vak lo. Amaherawhchu, kan minister hi a remhria ka tiin, hma a lakna turah hian a hlawhtlin chhoh zel pawh ka ring a ni.

Demand No. 28 - Labour, Employment, Skill Development & Entrepreneurship Department:

Kan minister hi LESDE ah hian a thawk ropui hlein ka hria a. Nichinah khan Pu W. Chhuanawma khan a sawi thwak tawh na a; welfare board membership raise chungchangah khan an ti tha em ema ka hriatna chu -constituency-wise in an kal a, kan constituency leh midang pawh an ni ve thovin ka ring a. Ka constituency-a an kal dawn pawh khan, “hei, i bialah kan kal dawn a, engtin nge a kal dan te; engnge i duhdan” minrawn ti thlap a ni. Khatiang khan member pawh an hmu hnem hle tawh mai a. Chuvang chuan, a thawk tha hlein ka hria a.

Demand No. 7 - Excise & Narcotic Department:

Tin zu lam thil pakhat - Excise ah bawh hian zu sample chungchang hi, Rangvamual leh Phunchawng vela zu siam khu eng tiang chiaha hlauhawm nge anih tih a sample test turin hei an thawn mek a. ‘A chhia’ kan han ti leh ngawt a, engtingge a chhiat dan chiaha; mihring a effect danengtin nge, tih zirchianna te hi a ti tha hlein ka hria a.

Tichuan, Pu Speaker, vawiinah kan minister pahnihte demand hi ka thlawp, a pass ni ngei ni se ka duh e. Ka lawm e.

SPEAKER : Member zahawma tak Pu TBC Lalvenchunga ilo sawm ang.

PU TBC LALVENCHHUNGA: Pu Speaker. vawiina kan minister pahnih te demand a ngaihnaawm a, ka tuina zawng deuh vek a ni thung a. A hmasa berah chuan, kan Minister Pu C. Lalsawivunga chan atangin ka tan ang a.

Demand No. 27 - District Council & Minority Affairs Department:

Kan administration hi a la rei lo em em a, sum leh pai, a bialtute lam atang pawhin indaih lohna rawn sawi te pawh kha kan hre awm e. Thil chi hnih lang thei a awm a - a hma chuan GIA General leh Salary ang khan a kal deuh a. Khatianga kan inpek khan kum tawpah crore eng emaw zat kan inpek belh thin a. Chu chu nikum kum thar budget kha (ka hriat sual loh chuan) kum hmasa budget estimate aia a tamna kha crore 120 dawn a ni a, jump nasa tak a ni. DC&MA budget 1%-in nikum khan a pung a, kum hmasa aiin; a bik takin ADC-te pathumte budget punna kha 20% aiin a sang thung a ni. Amaherawhchu, kum a lo tawp a; kan sawi tawh ang khan kan dil belha kan mamawhte kan thlen leh zel si kha chuan, thil diklo lianpui a awm tih chu a hriat a. Nikum hmasa actual expenditure pawh kha ₹570 crore vel a ni a, nikum BE pawh a la pha lo hle a ni crore 50 chuangin.

Chutiang anih laia mamawh sang ta tual tual leh, sawlai district council area pawh 10%, population-a han ngaihtuah pawha Major Administrative Unit, District Administration te, Law & Order tea a lian tam zawk he lama enkawl a nih tawh hnu leh, Higher Education te helam atanga enkawl vek a nih tawh hnu pawha anmahni rau rau ah 92-96% dawn salary a kal ral theia kan inenkawl na kha, saw lam Tuichawng bialtu MLA sawi tawh ang khan, State sorkar enkawl a ngai a ni tiin, a tawpah autonomous kan nihna te kan chhuanlam thin a. Vawiina kan budget pharh hi DC&MA-ah hian crore 651 chuang a ni a. Hei hi 2000 kuma Mizoram budget revenue expenditure zat a ni tawh a ni. Kum 20 chuang liam taah khan heti zat hian Mizoram pumpui hi enkawl a la ni. Chuti chungka kan indaihlohna te, kan hmasawn lohna te engkim kan sawi lang thin a. Tun kum 4 kal ta ah phei kha chuan Central scheme tam zawk kan hailuh te nena ngaihtuah phei chuan lian tak a ni, kan sum sen ral a hi.

Amaherawhchu, hmasawnaah kan la hnufum em em a, a bikin education-leh higher education phei chu helam atanga tih a la ngai bawk a. Hei hi chu inrelbawl na dik lovin a hrin chhuah niin a lang a. Helam sorkar intlawn siakna boruak kal thin te, sawlama sorkar siam duhna boruak avangte in an budget kan cut sak ngam lova, an demand kan tihtawp sak ngam lova, chu chuan corruption lianpui a hring tih a lang reng a, saw lamah. Hei hi chu uluk zawka kan inenkawl a nih loh chuan, MADC-ah te pawh a hma pawhin ka sawi ve thin a, PM-JVK hi minority concentration area tan chauha tih a nih lai khan, Mara Autonomous District Council chu minority concentration area pawnah rin a ni a. Chutih laiin Lunglei District Capital chu minority concentration area chhungah kan dah leh tho bawk a, MLA leh a minister ngei te pawhin kan sawisel chuang lem hlei lova. A mihring te, a district level leh population te en chuan, tlem tak a ni a, sum luanglut erawh chu lian tak a ni.

Tunah hian 3rd Finance Commission Mizoram pawh ding leh ta sela, kan devolution formula thleng hian en uluk viau a ngai ang a. vertical devolution atanga horizontal devolution kan pek hi 90% of State-own tax share a ni a, a lian em em mai a ni. Saw lam atanga revenue kan hmuh miah loh laiin, tuna kan sawi ang chiaha India sorkar puhmawhna rilru hi a thleng lovang tih a sawi theih loh a. Chuvang chuan, vawiinnia helai

Aizawl tlang atanga rorelte hian mi tih lawm tum vang mai mai te leh sorkarna siam duh vanga sawlai rorelna saw kan en kan dawn a nih chuan, rorelna felfai chu sawiloh, a ti buar-chuar tawlh tawlh dawn niin ka hria a. Hei hi ngaihtuahna thar nen kumin kan budget pawh hi a tir atanga discipline fel-fai taka kan inenpui anih loh chuan, hmasawna aiin sum leh pai tih chingpen te, State normative allocation, State atanga kan pek bak piah lamah hian ADC ah, a bikin nikumah te pawh ADC thenkhat chuan loan te hial State-Guarantor atangin crore eng emaw zat an la bawka a ni.

Chumi piah lamah, audit report-a a lan dan chuan crore 30 chuang teh meuh mai UC pek theih loh la tangkhang te a la awm bawka a. Kan sum leh pai vawn dan leh hman dan en uluk a ngai a; chu chu rorelna felfai kan duh a nih chuan, he lai Aizawl tlanga thute hian vote bank's politics ni tawh lovin leh, sawlai tlanga mite tihlawm kual nana hman tawh lova, a nihna dik taka an hman theihna tura enkawl zui atan ka it hle a, chu chu ka han sawizau duh a.

Demand No. 34 - Animal Husbandry & Veterinary Department:

Animal Husbandry bikah hian kan GSVA, kan State sum dehchhuah hi a puitham lo khawp mai a, 1.2% pawh a kai hlei thei lova. A bik takin kum 6 chhung pheih chu a hniam lam kan la pan deuh char char a ni, kan meat production te, kan egg production te. A thar han chhuak sela engnge hma kan sawn dawn em ka hre lova. Hei hi engnge a chhan? Kum 5 liam taa Mizoram Economic Survey Report kan en chuan, chutih mek lai erawh chuan milk leh egg production, artui leh bawngnhute mamawh (demand) gap a la sang em em a. Amaherawhchu, kan mamawh lo ber nia kan hriat sa (meat) a kan intodelh lohzia kan sawi vak a. A chhan chu, sa hi tui kan ti a, hriselna nen pawh a inzawm a. A tak takah chuan ICMR recommendation ang level-ah chuan, saa kan demand gap hi chu a tam lo hle a ni, a minimal a ni. Chutihlaiin bawngnhute leh artui ah erawh chuan kan mamawhna a la sang em em mai a, demand gap a la lian a, helam ti tura tan kan lak deuh deuh pawh hi a duhawm hlein ka hria a.

Demand No. 28 - Labour, Employment, Skill Development & Entrepreneurship Department:

Thalaite pual a ni bawka a, a changtu minister-in a zir bawka a; a viak a tha a, hma pawh kan sawn a. Bill pathum kan hmuh tharte kan han sawi zinga pakhat chu, Private Placement Agency Regulatin Bill kan pass tak kha a ni a. A mimal tak pawh a ka lo vei ve em em, 2015 chhoa kan sawi, a bill sawi ni khan ka sawi ve hman ta lova. Tawitea han thlir kan duh chu –

Kha Bill, 'Act' lo ni ta ina a thlir thui zia, thil dang Mizoram thalaite hmasawna tur atana sulsutu anih zia hi hmu vein ka inhria a. A chhan chu, hriselna te kan sawi a, zirna te kan sawi a, youth development hrang hrang thalaite leh ruihhlo chungchang te kha kan sawi a. A tawpah rehabilitation-ah te, ruihhlo ngaite enkawl kawngah te engtiang pawhin tan la mah ila, kan ramah hian primary healthcare kan ngaihthah chung leh, primary education kan ngaihthah chung chuan crore sing tel pawh chung lamah invest mah ila, zir tur kan hmu dawn lova, a thawk tur kan hmu dawn bawka hek lova, enkawl tur pawh an thleng zo hman hek lovang. Chu chu ka rilrua awm lian em em a ni a.

Demand No. 22 - Sports & Youth Services Department:

A bik takin Sports & Youth Services-ah term hmasa lamah te infrastructural development lian pui pui kan hmu a, a lawmawm khawp mai. Amaherawhchu, khang infrastructural

development kha hmasawna anga ngaihna kan la nei lian hle chuan a hriat a. Hei hi mal kal chi a ni lova. Kan rilru leh ngaihtuahna zawng zawng hi converge-a hmun khata kan luan luhtir loh chuan; kan education system Samagra hnuaiyah sports grant eng emaw zat a awm a. Chutiang bawkw chuan thil dangah pawh Sports & Youth kaihnhawih lama a sports activity a te, kan education system hrim hrim-ah hian kan sorkar sikul hmun nei that, student environment neih ve theihna awm chhun chu kan hralh a, kohhran kan pe a; ka bialah pawh kohhran te nen an lo inthleng a, hmun hnihah.

Sikul ram te khatiang zel anih avang khan; school naupangin environment tha an neih chuan lova, kan education system leh policy te nen kan khai khâwm chuan si loh chuan, eizawn nan ringawta hmang tur chuan eng sector leh industry mah hian mipui-nawlpui eizawna hi khawiah mah a pe ngai lo. Chu sector chu kan luan luhtirna tur a nih chuan, kan zirna atanga bul kan tan tur a ni a, kan education policy te nen a inhne rem tur a ni a. Chumi nena kan kal loh chuan, nakin lawka kan kal chhoh leh zelna turah leh ruihhlo kan dona kawngah te hian a tawpaw hmawr kan bawkw leh thin a. Naupangin ruihhlo that loh zia a hriat theihna tur chuan zirna-in atang bawka bul kan tan a ngai a. Vawiina mite hi MLA term hnihah chuan puitling an lo ni hman tawh dawn a ni; vawiina pawl 1 zirlai hian matric a pass hman dawn a ni, MLA term hnihah chuan. Chumi term hnih chhunga kan policy kal tawh khan engnge min thlen tih hi khaikhin ngai a ni a.

Demand No. 7 - Excise & Narcotic Dpartment:

Excise department achievement report hi kan en chuan nikumah khan zu vanga man ringawt mi 5,587 an ni a; vawiin ni a kan khel luai luai - wine an man ringawt tling khawm hi litre 55,181 a ni. Kumin January thla chung khan zu vangin mi 463 kan man a, chung zinga 501-te chu case siam sak an ni bawkw a. Chutiang dinhmuna kan din hre reng chung sia kan prison capacity kan hria; kan jail-a tang thei zat chu 1300 awrh an nih laiin, vawiinniah mi 1700 chuang an tang. Heng Dân, MLTP Act hnuaiyah man, mi 5,500 chuang te hi khawng kan dah chuan ang? Engzat nge kan senso dawn? Eng zat nge misual hi kan inchhuah dawn? Jail hi engtia lian nge kan mamawh dawn? Heng zawng zawng a tobul hmasa chu, primary education atanga he system, kan Sports & Youth Policy te, Labour Skill Development Policy kan neih zawng zawngte, heng Building and Other Construction Workers Welfare Board kan neih leh sum hman tur thleng pawha mipuiina ualau taka kan khel ve ngam tawh loh chuan; vawiin niah pawh crore 100 chuang kan la nei a ni. Workers Welfare Board-ah pawh hian, eng atan nge kan hman, kum 10 kal taah khan? (**Speaker:** Minute 2-in a pel ta a; I zo thei dawn tawh em?) Zo thei tawh mai ang.

Kan zirna atanga kan ngaihtuah loh chuan heng, vawiin nia department kan ngaihpawimawh te hi ngaihpawimawh tak tak phu an ni a. Kan rilrua lo lang hmasa ber chu, infrastructural development-in a hma a khawn ziah, amaherawhchu, manpower zawkah a mihringa va chher chhuahna tur leh a department mission leh vision tihhlawhtling tur hawi zawng hian budget hi kan demand ngai lo a, kan insawipui ngai lo thung a ni. A mihring chher ngai laia kha kan ngaihtuahnaah hian lian hle se ka duh a.

Vawiin nia heti zat mai kum 5 liam ta a Sports-a kan budget ai te chuan vawiin niah chuan crore 27 zet te kan kai ve tawh a. Chutiang bawkin, Excise & Narcotics-ah ruihhlo do te pawh awmze nei tura crore 57 chuang, nikum nena a san lam te ngaihtuah phei chuan sang tak a ni a, a percentage-ah chuan.

Chutiang bawkin district level-ah heng kanrawn sawi zawng zawng, vawiin ni a kan demand, kan ngaih pawimawh ka tih te hi district level-a office nei pha lo vek, Aizawl atanga enkawl kan ni thung si a ni. Kan mamawh leh mamawh loh hi policy atang kan thliar hran a ngai tih lai te kha ka sawi tawpna ni sela. Chuti chung chung chuan vawiin ni a kan Minister pahnih demand-te hi ka pawm a. House member-te pawh thlawp vek turin ka han ngen nghal a ni. Ka lawm e.

SPEAKER : Member zahawm tak, Pu V. Malsawmtluanga ilo sawm ang.

PU V. MALSAWMTLUANGA: Pu Speaker, Pu C. Lalsawivunga leh Pu Lalnghinglova Hmar, kan Minister duhawm tak tak te demand sawi thei tura hun tha min pek avangin lawmthu ka sawi hmasa a ni.

Demand No. 19 - Local Administration Department:

Kan Minister hmalaknate a taka hmuh tur kum khatnaah pawh a awm nial a. RGSS scheme 2nd installment crore 2 tum khatna atana pek kan ni te hi, Minister hmalakna Pathianin mal a sawm hle niin ka hria a, Minister chungah pawh lawmthu kan sawi bawka ni.

Tin, LAD hnuai ah hian kan hriat angin Village Council 544 a awm a. A bik takin heng VC-te kaltlang hian thingtlang mipuite chuan development hrang hrang kan dawn ve theihna lian ber pakhat kha a ni a. Chu chang a ni lo a, mipuite ngheng tlat administration keng kawh tu te an ni. Kan member pui te khan an lo sawi nial tawh na a, Pu Speaker, ka'n sawi nawn duh chu, an hlawh te hi a beitham em em a, 'hlawh' han tih tur ni te pawhin a lang lo a. An lawman te hi tihpun sak dan awm ta se tih te he House zahawm takah hian ka han sawi duh a.

Kan hriat angin Village Council House hi a pawimawh em em a, thingtlangah te chuan mipuiin kan hmang tangkai em em a ni. Tin, Village Council member-te tan pawha neih mak mawh a ni. Hengte hi Pu Speaker, Mizoram khaw hrang hranga la awmlhnaah te hian a awm theih dan te hi ngaihtuah ni ta se.

Hei ka bial chung - Lungmawi, Bualpui 'V', Zotuitlang, Mualthuam North, Mausen, Hmuntlang, Chengpui leh Thiltlang-ah te kan la nei lo a. Chutih rual chuan Mualthuam North leh Mausen hi kan hmu dawn ni te pawhin a lang a, minister chungah lawmthu ka sawi a. Heng kan la neih lohna te pawh hi min lo hriat sak turin he House kaltlangin ka ngen bawka ni.

Demand No. 23 - Art & Culture Department:

Kan hriat angin, Art & Culture department hnuai ah hian library 511 lai mai department enkawl lai mek a awm a, heng a awmna khuaa mipuite'n kan hmang tangkai em em a ni. Chutih rual chuan, kawng hrang hrangin thuam chak ngai, thuam that ngai te an la ni a, a thawk tu staff chungchang ah te. Tin, Lunglei district-a kan library neih saw Saikuti Hall thlazar hnuai ah, top floor-ah a awm ve teng teng a ni a; a chung a phui tawh loh avangin fur ah hian harsatna kan tawh nasa thei em em a. Hengte hi kan minister-in min lo hriat sak ta se.

Tin, High-Powered Committee Vice Chairman ka nihna ang te pawhin, High Power Committee-in a hmunhma lo ngaihtuah theih ni ta se District Library hi min sak sak thei ang em tih hi, he demand kaltlang hian ka zawt bawka ni.

Demand No. 34 - Animal Husbandry & Veterinary Department:

Pu Speaker, hei hi department pawimawh tak a ni a. Kan ram hi khawizu leh hnute tui luanna ram, Kannan ram ah siam dawn ta ila eng department nge pawimawh ber ang tih thlang chhuak dawn ta ila, he department hi a langsar ber hialin ka ring a ni.

A hmasa berah chuan, Minister chungah lawmthu ka sawi a. Ka bial chhung Pukupui ah Vety Dispensary changlung tak min sak sak dawn a ni a; a chungah lawmthu ka sawi a. Tin, Buarpuh-ah pawh tunah sak zawh a ni a. Tin, Vety Dispensary & VFA quarters Bungmun ah sak mek a ni bawk a. Chu chang a ni lo a, PMJVK hnuaiia Upgradation of Integrated Husbandry & Veterinary Training Institution, Lungpuizawl ah crore 32 chuang lai mai tunah a kal mek a. Heng te pawh hi Lunglei-pa ka nihna ang te pawhin lawmthu ka sawi bawk a ni.

Kan hriat angin, ran vulhtute tan ranchaw kan mamawhna san zia te kan hria a; departement hian tunah kawng hrang hrangin hma a la a. Chu chang a ni lo a, sa, artui leh bawnghnute tea intodelhna turin hma lak mek a ni a. Sorkar leh department hma laknate a chhuanawm hle a ni.

Kan hriat angin, tun Mizoram dinhmunah diary sector lamah hian kan tlahniam hle a ni. Kumin chhung ringawt pawh hian bawngpui ah 76% -in a tlahniam a. Heng harstna kan tawh te hi a chhan lian ber nia lang chu, ranchaw lama kan intodelh tawh loh vang a ni. Kan Minister hmalaknain Thenzawl-ah ram acre 57-a zau ranchaw chinna hmun kha, acre 70 lai maia tih belh a ni a. Tin, kumin 2025 chhung ngeia hmalakna thar, ranchaw chinna tur acre 20 lai mai kalpui a ni tih te hi ran vulhtute tan a lawmawm hle a. An aiawhin lawmthu ka han sawi bawk a ni. Tin, ranchaw lamah drying-house sakna tur leh a phurhna truck te kan mamawh hle mai a, hengte pawh hi kan Sorkar hian min lo ngaihpawimawh sak ta se.

Tin, tun dinhmunah kan bawng vulhtute bawnghnute hralhna ber Lunglei ah chuan Milk Union Limited te, Champhai ah CHAMUL te, Kolasib ah KOMUL te a function tur angin a function tawh lova, heng avang hian bawng vulhtute'n an bawng an tihral nasat phah hle niin a lang a. Hetiang kawngah hian kan Minister chak tak leh fel tak hian theihtawp han chhuah chho zel se. Tin, hetiang kawngah hian bawngpui chi tha chah-luhna kawngah te pawh tun aia tn lak a ngai ni te pawhin a lang a, milk plant mumal zawk, systematic zawka kalpui te a tul hle a ni. Tuna a landan ah chuan, kum 1 chhung hian bawnghnute Its 76,00,000 hi state pawn atangin kan lalut a ni. Chu chuan Mizoram chhunga sum leng vak tur tam tak kha phailamah kan thawn thla tih a chiang reng a. Hma kan sawn zel theihna turin kan Minister ka han request bawk a ni.

Nichin khan Pu Lalmuanpuia khan a sawi tawh a; sial hi, tunah hian Lungkawlh-ah Mithun Multiplication Center kalpui mek a ni a, Sial 180 dah mek a ni. Hengte hi kan hnam rohlu chawisan zelna a ni a, hetiang zawng hian hma te pawh lak chhoh zel ni se a thain ka ring a. Tin, National Livestock Mission hnuaiiah hian kel vulhna tur scheme tha tak a awm a, hemi kaltlang hian mipuite pawh inbengvar tawn zel ila, kelsaa intodelna tur te pawhin hma han la chho zel ila.

Tin, tun hnai ah district pathum - Saitual, Hnahthial leh Khawzawl-ah Vety Hospital thar sak a ni a. Chutih rual chuan, thawktu, staff leh doctor te an la indaih tawh lova. Mumal taka a function theihna turin hengte pawh hi ngaihpawimawhah nei ta ila.

Tin, he department hnuaiah hian, kan hriat angin doctor post 115 ah post 45 a ruak mek a, VFA post 226 ah post 142 a ruak mek bawk a. Chutiang chuan ka bial chhunga Haulawng-ah Vety doctor kan nei lo a, Mualthuam North-ah VFA kan nei lo bawk a. Hei hi kan minister pawhin min lo chhinchhiah sak ta se.

Tin, a tawp lama ka han sawi duh chu, Sorkarin a flagship programme – a Hand-holding ah a kalpui mek a ni a. He portal kaltlang hian dilna mi 3642 lai mai a lut a ni. Chu chang a ni lova, CM's - Special Package ah hian mi 13019 laiin dilna an thehluat bawk a. Hei hian Mizote hi ran vulhah kan tui a, ran vulha eizawn kan phur em em tih a tichiang a, kan House Leader, kan CM, kan Finance Minister ni bawkin he department hi ran vulhute tan lo duat leh zual deuh se, finance lamah te pawh lo tanpui nasa zual turin ka request bawk a ni.

Demand No. 22 - Sports & Youth Services Department:

Thalaite hi kan vannei hle mai a. Mithiam te chuan, 'khawvela classroom tha ber chu khemual hi a ni' te an lo ti hial a. Ruihhlo dona kawngah pawh hian infiamna hi a pawimawh hle a, role pawimawh tak a chang a ni. Thalaite kan vanneihna em em chu, Sorkar hmasa ah khan Minister bawh chak tak kan nei a, tunah, A ngaihna hria Minister kan nei leh a, kawng hrang hrangin hma kan sawn chho zel a. A bik takin Pu Tetea chungah pawh thalaite aiawha lawmthu ka'n sawi duh a. Ani ngaihna hriat leh experience kaltlangin kawng hrang hrangin hmalakna a kal chho mek a.

Kan hriat angin Vision 2036 Olympic nei chungin Empowering Mizoram Sports – 'Bana-kaih' hnuaiah January Ni 14, 2025 khan kan CM Pu Lalduhoma'n a hawng nghe nghe kha a ni a. Heng PPP mode kaltlanga association hrang hrang leh mipuite nena thawk hova coaching mumal tak kalpui a ni tur te hi a hlu hle mai a. Tin, ka member-puite'n an sawi, ka han sawi nawn leh duh chu, a bul tan nan ₹250 lakh lai mai dah a ni nghal te hi, hei hi thalai infiam-mi, thangthar leh zualte leh la naupang zawkte tan a hlu hle dawn a ni.

Chu chang a ni lova, kan Minister hian a-ngaihna a hre hle mai a, State Bank of India (Guwahati Circle) atangin nuai 25 lai mai equipment leina tur te a han dil chhuak hi a lawmawm hle a ni. SASCI sum nuai 445.76 senga Chhangphut Field, Champhai ah floodlight kan dah te a lawmawm hle bawk a. Chutih rual chuan, Thuamluaia Mual-ah pawh mamawh a ni a, heng 2nd Installment lo kal turah te pawh hian chak zawkin kan Minister hiann min nawr sak turin ka ngen bawk a ni.

Tin, Incentive Cash Scheme, 2025 duan thar a ni te hi a lawmawm hle a, Olympic discipline a medal dawngte piah lamah discipline danga dawngte tan pawha hetiang incentive a awm hi thil thar, infiam mite tan thil hlu tak a ni a. Kan hriat angin November Ni 9, 2024 khan Incentive Cash Award 2023-2024 chu infiam-mi mi 418 lai hnenah nuai ₹1,06,400/- lai mai sem chhuah a ni te hi a lawmawm hlein ka hria a ni.

Awle Pu Speaker, a tawplam ka han hnaih dawn tawh ang a. Heng PMJVK hnuaiah project 84 kalpui a ni te, heng zinga 38 kan han zawh fel tawh te hi, kan Minister-in a-ngaihna a hriat bakah a chak hle a ni tih a hriat a. Chu chang a ni lova, kumin chhunga project dang 40 zawh leh tura beisei a ni te hi a lawmawm hle bawk a. Ka bial chhung lamah pawh ama kan minister ho hian kan kal tawh nghe nghe a. Lena Sports Stadium hi anih tur ang a ni tawk lova, a tling tawk lo deuh a. hei hi min lo hriatsak leh ta se, field-putling, size-putlingah min siamsak turin ka ngen nawn leh a.

Tin, Pi Lalrinpuii kan han sawisak duh a; Anni minister te an din zen zen a rem si lova. Electric Veng field pawh saw a tling tawk lo deuh a, min lo hriatsak bawk se. Tin, Chanmari ah pawh NREGS sumin an lei tawh a, Ramthar Field te pawh hmalak a ni tawh a. Heng Pi Lalrinpuii biala hmalaknate pawh hi lo hriat tel sak ta se. (**Speaker:** Minute 4 in a pel ta e. I zo thei dawn tawh em?)

A tawpna ber atan chuan, heng - Pu C. Lalsawivunga leh Pu Lalnginglova Hmar, kan Minister zahawm tak takte demand hi he House zahawm tak hian pawmpui ngei turin ka'n ngen pui a ni e. Ka lawm e.

SPEAKER : Awle, Member zahawm tak Pu Lalrintluanga Sailo ilo sawm ang.

PU LALRINTLUANGA SAILO: Pu Speaker, Khawngaihni, kan ngen duh che a. Demand ka sawi hmian House information ah eng emaw sawi ka duh a, ka hunah khan min lo count sak lo turin ka ngen hmasa duh che a.

Hei, Sorkar a lo ding a, Sorkar angin function tam tak kan nei tawh thin a; vawihnih-vawithum keini te pawh kan tel venate a awm a. Nimin maiah Union Home Minister hovin sawlaih function kan nei a, hengah hian Pu Speaker, ka ngen duh chu, he ZPM Sorkar hnu hianin seat arrangement hi a fel lo hle mai a ni.

Tin, keini MLA zawng zawng kha DC lam atangin card minrawn pe vek a; kei phei chu vawi 4-5 minrawn remind a ni. "In card kha gate pass ang a nih avangin keng ang che u," an ti a, confirmation pawh kan thawn vek a. Kal turte min hre vek chungin a hmun kan luh dawnah mine detector-in min han check a. Hei kan member zahawm tak Pi Prova phei chu "I bag chhungah khan nail cutter te i ak lo maw?" te an ti a ni. Hetiang thil hi tun hnuah chuan awm tawh lo se ka duh khawp mai a.

Tin, kan member-puite seat tur pawh ushers ten an va kawhhmuh a, a hnuah Minister, nangmah ngei pawh i lo lut a, kan member-pui an lo kawhhmuh tawh te an han pawtsawn leh a, a zahthlak em em mai a ni. Chu bakah a arrangement kha tha lo ka tih chhan chu, stage ah kan CM zahawm tak te, Home Minister te leh Central lam atanga lo kalte kha chu lo thu se ka hrethiam a; State DGP leh Chief Secretary te, function-a pawimawh awm ve miah lo an thu vung ringawt te kha Pu Speaker, nangmah ngei pawh i thutna awm tak a ni.

Chuvang chuan, hemi chungchang hi sorkarin ennawn sela ka duh khawp mai a. Tin, Independence Day leh Republic Day tih te leh government function reng rengah hian, i dinglama mite khan an sawi hreh deuh a; khang victim person dang pawh ka hre teuh mai a. Khatiang kha awm tawhlo se ka duh a ni.

Chutihruah chuan, Major General (2-Star General) te pawh uniform famkim nen, Brig. General nen an inzui a, metal detector-a an han check te kha a lawm lo em em mai a ni. Force a ni a, duh leh arms pawh a keng ang chu maw le; thlawhnaa chuang tur em kan ni lo a. Khangah khan kan State hi dan leh thupek kenkawhnaah kan hniam zia a langin ka hria a, a paw ka ti khawp mai. (Tikhan ka hun man pangngai min count sak tran la, a paw lem lo turah ka ngai a ni, Pu Speaker.)

Demand No. 34 - Animal Husbandry & Veterinary Department:

He department demand ka sawi hmasak duhna chhan chu - helaia chawhma lama kan thut tlan khan kan recess-ah, kan Minister zahawm tak hian artui plate pawh a lo dah vek mai a. Tun Session leh nikum lam te ka'n thlir letin, thilpek ropui tak free gift kan dawn awmchhun a ni deuh em aw ka ti a, ka lawm hle mai a, kan lawm tlangin ka hria. Tin, a smart pawh ka ti a ni.

Tin, hemi chungchangah hian vawkpul hri ASF leng nasa em avanga tuartute chhawmdawlina tur niin ka hre lo a, DM & R Minister khan pawisa an neih thu te pawh kha a sawiin ka hria a. Ka bialah pawh mi tam tak tuar an awm a, vawk a thi nasa em em a ni; a then chu kah hlum te a ni a. Kuthnathawktute kan hmangaih anih chuan, khang sem zel kha kan mawhphurh na niin ka hria a ni.

Demand No. 27 - District Councils & Minority Affairs Department:

Nichinah member zahawm tak Mamit bialtu khan arawn sawi a, Bru House sak tur chungchang kha. Hei hi sorkar hmasaah khan SASCI atangin year-marked tawh a ni a, (ka hresual a nih loh chuan) chu chu eng emaw avang khan a lapse ta kha a ni a. Hei hi tun sorkar hian dah leh a tum em? Chutihrual chuan rawtna dang deuh hlek siam ka duh a. Pu Speaker, Bru chauh kha a kim lovin ka hria a. Chakma hian Autonomous District Council kan nei a. Kum 2011 census kha enlet ula, Chakma Autonomous Area chhunga mite aiin a pawna mite hi hmun thuma thena hmun hnihin an tam a ni. Chutiang chu, Thorang bialah te, Dampa bialah te, Mamit bialah te kan ni a. Chuvang chuan, Bru Rest House tih bik, hnam bil ang ni lo khan 'Minority Rest House' tiin emaw sorkar hian a enkawltu minister kaltlang hian min ensak sela ka duh khawp mai. Chutah chuan, Pang leh Bawm kan tih te pawh kha a tel ve thei turah ka ngai a. Chu chu rawtna kan siam tel duh a ni.

Chutihrual chuan, District Council & Minority Affairs-ah hian tlemin ka lung a hnur deuh hlek a. Vawiinah khan vanneihthlak kan ti dawn nge, vanduaithlak kan ti dawn; hei central atangin PMJVK minute a lo chhuak a. Nagaland leh Arunachal te chuan an hmu leh teuh mai a; Arunachal phei chuan crore 308 a hmu a ni. Chutihlai chuan kan State kan nil leh thak mai a. Minority Affairs Ministry enkawl thin kha tun kan sorkar hian Planning-ah, CM chanah a pawh luh tak avang hian em ni aw vawiin thleng a cheng khat mah PMJVK-ah hian fund kan la hmuh miah loh, tih te ka zawt tel duh a ni.

Tin, kan CM zahawm tak khan hmannah he House-ah ngei hian Pu Kiran Rijju nen an inbiak dan te a sawi a. Amaherawhchu, minute lo chhuakah kan nil leh tlat mai hi a vanduaithlak ka ti a. Chutih rual erawh chuan member zahawm tak Er. Lalzirliana sawi ang khan, MZU te ka congratulate duh a; crore 68.48, Mizoram State sorkar hmalakpuina tel lova an hmu hi ka lawmpui tak zet a.

Demand No. 19 - Local Administration Department:

Nichina member zahawm tak takte sawi ang khan, LAD hi amalgamate anih dawn avangin 'Rural Development & Administration Department' tiin a kal chho dawn ni te pawhin ka hria a. Hei hi a lawmawmin, a in relate hle ah ka ngai a. Chutih rual chuan, kan VC House te, ka bialah khaw 33 a awm a, VC House sak tur hi khaw 4 a ni a. Khatiangah khan min lo theihngihl lo se la ka duh khawp mai. Tin, keini bialah chuan mau hnah hnuai sitting te anni a In an sak pawhin silpaulin a chhunga an neih chuan an lawm hle a ni. Chutiang vela la khawsa chu kan ni a, min ngaihtuah hmasak ka beisei a ni.

tin, VC Bill kan pass takah khan VC-te mawhphurhna kan tilian riau mai a. VC-ah hian (kan tawng uanpui chang suh ila) hei, Pu Ramthanmawia leh Pu Zaithanzama nen kan pathum hian VC level-ah hian term 4 aia rei lo theuh kan lo tal tawh a ni. Pu Nguna te pawh a ni a, tiangin kan awm dih diah hlawm a. Tichuan, mawhphurhna kan pe teuh a, an hlawh lam kan tihpun sak hi a tul hle tawh awm mang e aw, ka ti a. Chu chu minister in-charge khan min lo ngaih pawimawh sak se ka duh hle mai.

Demand No. 7 - Excise & Narcotic Department:

A dawt lehah chuan kan Minister zahawm tak Pu Lalnghinglova Hmar hi a vanduai nge ka ti a. A department bill a put luh pahnih ngawt mai, i veilama mite House an chhuahsan ngai khawpin thalo kha an rawn introduce a ni a. Chuta ka sawiduh chu, hmannah khan hemi Mizoram Liquor Prohibition (Amendment) Bill in han pass ta kha a ni a; keini kan tel lo a. Amaherawhchu, khalai kha ka sawi hmain, chu aia ka ngaih pawimawh 'Mizoram Youth Commission Bill' hi ka sawi duh a ni. A chhan chu, khatih lai khan kan House Leader hian hetiang a kum tam tak lo kal tawh repeal lova, amendment ang zawnga kan opposition leader hriatna te min hnawlsak a.

Kha Dan, kum 16 lai lo kal tawh, amend awm silo, an duh dan taka an siam a ni a, audit tur chungchang pawh fumfe takin a awm lo ve tia he House-a sawi kha a ni a. Chutah chuan, an siam laia an thinlung ni awm tak tinzawn theihin a lang chiangin ka hria a. "He Dan hi siam ila, a thawktu tur lak kawngah erawh chuan dan leh hrai engmah behchhan awm lo se la; kan duh duha kan lak theih nan i siam ang" tiin a rawn sawi kha a ni a. Chuta a sawi zelnaah chuan, 'kan duh duh huna kan ban theih tur; engmahin min phuar lo turin he Dan hi siam ang u', tih te a sawi lang a. Tin, 'sum leh paiah pawh duh ang thala an sawhkawih theih turin audit pawh hi tilang lo ila' tih te sawi chho zelin; chutah Congress a lo sorkar a, 2015-ah, reife he dan kan hman hnuah an amend ve a. A pawl lai tak, a thalo lai kha an amend duh miah lo mai a, MNF thinlung tawmin. Tichuan, wawiin thlengin he dan tha lo hi siamthat a ni ta lo a ni.

Kan House Leader sawi kha Pu Speaker, ka ngaihtuah chhunzawm a. Amaherawhchu, kan thianpa, (a hming sawi lo ila) officer pakhatin ka zawt a, khalai chungchang kha felfai takin dan leh dun kan lo nei reng mai a. Wawiinah hian chu chu kei a saptawng thiam lo ber hian Pu Speaker, i remtih nain, hei hi The Mizoram Youth Commission Act, 2008, Act No. 8 of 2008 a ni a. Helai ah hi Government Gazette-ah pawh a lo chhuak ulh tawh mai a. Chuta chapter 4 section 12, 13, 14 leh 15-ah te a lo ziak duah mai a. Pu Speaker, i remtih nain helai section hnih-khat lek hi han tarlan ka duh a. A bik takin helai chapter 4, section 13-a Account & Audit chungchangah, 'The Commission shall maintain proper accounts and other relevant records and prepare annual statement of accounts in such form as may be prescribed', tih te; sub-no. 2-ah 'The account of the Commission shall be audited by such authority as may be prescribed' tih te; chapter 4, sub-section 12-ah 'The Government shall make available to the Commission by way of grants from the consolidated fund of the state such some us of money as it may think sufficient for carrying out the purpose of this Act' tih te a awm a ni. (**Speaker:** Minute hnihin a pel tawh a nia..)

Aw le, Pu Speaker, ka zo dawn e. Audit dan fel tak awm si hian hetiang a kan House Leader-in a han sawilang kha a mak ka ti a. Chuvang chuan, Pu Speaker, hei hi House property-ah wawiinah hian ka hlan a.

Ram kan kaihhruainaah hian ka ngaihtuahnaa lian em em chu, zu chungchangah a ni emaw, a eng chungchangah pawh ni sela, ‘thluak ti che hmasa lova, hmui tihchet fo hi a awm thei dawn a ni’ tih hi min ngaihtuah teltir a ni. Chuvang chuan, khatiang Dan tha lutuk kan lo neih, neih miah lo anga kan lo sawi pawp pawp mai te kha, thluak tiche lo hian kan hmui kan tiche chak deuh a ni lo maw tih te ka ngaihtuahnaah a awm a. He ram kan kai hruainaah hian kan mawl emaw, kan fing emaw, kan tlin emaw, kan tlin lo emaw lam aiin, thluak i tiche hmasa ang u.

Vawiinnia kan inbeihna lama hi ka ngaipawimawh a ni lo; a nihna dik tak, a reality hi kan ngaihtuaha kan sawi chhuah fo a tha mang e; ram mipuite hi bum tlak kan awm si lova, tih hi ka sawi duh a ni.

Pu Speaker, vawiinnia kan Minister pahnihte demand hi ka pawmpui a, pass te pawh ka’n dilpui ve a ni e. Ka lawm e.

SPEAKER : A lawmawm e. Member zahawm tak Dr. K. Beichhua ilo sawm ang.

DR. K. BEICHHUA: Pu Speaker, ka lawm e. Budget tha, huapzo budget kan sawiho reng reng hian, a bik takin treasury bench lam hian kan bial tin a rawn hawlh tlang dawna kan hriat avangin, lawmthu sawi leh fak hi kan tihdan a ni thin a ni. Mahse, mak takin vawiin kan budget discussion hi treasury bench lam atanga ‘sawi fo pawh a zahthlak’ tih tawngkam te, mahni biala kan tlakchham lampang deuh vek sawina a niin ka hria a. Chuvang chuan, he kan demand hi department tan budget tha nge aniha budget tha lo tih kha mipuiin an hriat ka ring a ni.

Demand No. 7 - Excise & Narcotic Department:

Object head of Account 22 - Arms and Ammunitions-ah hian, kum danga lang ngai miah lo a rawn lang hi a lawmawm ka ti a. Excise & Narcotics hi vawiinah District 11-ah hian kan enforcement te hi han dah diat diat ila, hmelmate tan hlauhawm an tling pha lo tih hi Pu Speaker, kan hriat theuh kha. Chutiang chuan, vawiinah enforcement tihchak hi kan ti ngawih ngawih tur a ni. Tlinglo taka he department kan enkawl ve lai khan, kum khatah enforcement 50 tal tipung ang tiin hma kan han la chho a. Mahse, lockdown avangin tum angin kan kal thei lo a ni. Chuvang chuan, kan Minister chak tak hian enforcement tihchak lamah hian theihtawpin hma la se kan ram tan a tha awm mang e, ka ti a ni.

Tin, Arms and Ammunitions hi thil tul tak a ni a. Tunlaia drugs cartel hote reng reng hi hmanraw leh motor nei tha tak tak vek an ni a; silai tha tak an nei bawk a. Chung ho combat tur chuan tuna kan dinhmun angah hi chuan a ngamawm lo tih a hriat a ni. Chuvang chuan, Arms & Ammunitions lamah hian beihpui thlakin hma la se, tih hi vawiina ka sawi duh a ni a.

Tin, vehicle hi kan nei chau a ni. Nichina ka sawi tawh, vawiina drug tawlhru ho hian motor tha tak tak an nei vek a; chung ho um tur chuan kan vehicle-te hi a fit lo a ni. Chuvangin, helam hi kan Minister hian chak takin hma la se, a tul chuan keini pawhin kan theihna kawng kawngah kan lo pui ve ang a, tih lai kha ka sawi duh bawk a. Tin, Object Heads of Account 22 leh 75 te hi ‘Arms and Ammunitions’ tih ve ve a ni a. Hei hi i double entry nge kan siam sual palh aw; ennge a tum tih lai te kha min han hrilh thei se.

Excise & Narcotic Department ah hian sawi tur tam tak a awm a. Vawiiinah development tam tak kan ramah hian lo lutin hma la mah ila, kan tu leh fate hi drug ngawl vei, zu ngawl veia kan chhuah vek si chuan awmzia a awm dawn lo a ni. Chuvang chuan, sorkar hi helaiah hian nasa taka a in concentrate a pawimawh hle in ka hria a ni.

Demand No. 19 - Local Administration Department:

He department hi thla leh April maia Rural Development nena amalgamate tur a ni a. He Demand for Grant buatsaih anih lai hian sorkar notification pawh lo awm tawh anih si chuan, engatinge a hranga kan la siam mai le ka ti deuh a. He kalphung-thar sorkar hian Govt. notification hi engahmah a va ngai awm lo ve tih hi ngaihtuahna min neih tir a ni, Pu Speaker. Engpawh ni se, sorkarin tha takin a kalpui zel turah ngai ila.

Object Heads of Accounts 31 ah khan 2024 – 2025 RE aia sang ruahmanna kan hmu a, hei pawh hi a lawmawm hlein ka hria a; thil thar dangte pawh hmu turah inngai ila. Tin, Object Head of Accounts 49 hnuaiah hian sum eng emawzat ruahman a ni a; a hmanna tur hi particular taka sawi theih anih chuan kan Minister zahawm tak hian min han hrilhfiah sela a tha ang a.

He Demand a thil lawmawm leh deuh chu, demand danga kan lo beisei thin capital, Cess siamna atana sum dah chungchang rawn tarlan a ni hi. Tin, VC dan thar kan nei a, Pu Speaker, VC te hamthatna tur leh power chak zawk an kal theih nana Dan siam a ni a, decentralization hi a pawimawh a. chuvang chuan, a pawimawhna anga LAD changtu hian kan VC te a enkawl chhonzawm zel hi thil pawimawh tak a ni.

Demand No. 23 - Art & Culture Department:

Pu Speaker, kan budget ngawr ngawr han en chuan activities tam tak kan nei thei dawn lo tih hi a langin ka hria a. Amaherawhchu, Finance Minister kan biak thiam leh thiam loh azir te pawh a niang chu. Tin helai Object Heads of Account 15-ah Royalty tih lo lang nawlh mai hi, hei hi engtia lo lang nge, kum dangah a awm ngai si lova. Helai hi kan Minister hian min hrilhfiah bawk se. Tin, Raja Ram Mohan Roy Library Foundation hi a tawp ta nge ni a; heta tang hian library tih hmasawna beisei tur a la awm em tih te pawh min react tel bawk se.

Demand No. 22 - Sports & Youth Services Department:

Kan hriat angin, vawiiinah chuan Sports & Youth Service hian thil tum tam tak a nei tlat mai a ni. Kan hriselna kawng te, thalai thil tha lo atanga thil thaa kan kaihhruai chhohna tur leh thil dang danga a lang a. Chutiang a nih lai chuan budget estimate hi kum hmasa lam RE nena khaikhin hian a hniamna hi a sang hle a, 50% laiin a hniam a ni. Chuvang chuan, a department thil tum leh a budget hi a inmil lo riau hian ka hria a, Pu Speaker. A pawimawh ta chu, kan minister hianin budget piah lamah hian theihpalingkawh chhuaha hma a lak a ngai dawn a ni. Demand han en vang vang hian chuan thalai infiam mite tan chuan han lawm viauna tur a awm lo a ni.

Tin, Pu Speaker, chhimlamah hian hidden talent nei thalai eng emaw zat kan awm a ni. Chirhdiak atanga football rawn khel chhuak national level-a lang pha te, buara punching bag atan hmanga boxing khel, international level thlengte kan awm bawk a ni. Chuvang chuan, in ban lo ti sei deuh ula, chhimlama hidden talent neite saw min rawn khawrh chhuah sak teh u tih hi vawiiina kan ngen duh chu a ni.

Demand No. 27 - District Council & Minority Affairs Department:

Vawi tam RE kan budget-ah hian kan hmu a. Chutiang anih lai chuan kan ADC pathum te hian RE (Revised Estimate) an rawn dil a, vawiin thleng hian chengkhat mah pek an ni lova. Pu Speaker, fel lohna tam tak chu an nei ang; an sum hman dan pawh nichina khan an rawn sawi tawh; member salary te pawh kan tipung ve a ni. Mahse, member salary kan tipung a, pawisa pek belh an ni si lo te hi mipuite hian hre ve se a thain ka hria.

Tin, Higher Education te hi Autonomous District Council hnuaia awm an ni lova. Nichina member pakhat intihre tak khan 'Higher Secondary te chu chutiang khatiang, District Council hamthatnaah an a rawn dah daih' tih deuh khan a sawi a; kha kha thu diklo a ni tih mipuite hriatah ka sawi duh a. District Council subject ah a tel lo a ni. Tin, thil tam tak, 'district council-ah hian sum leh paiah pawh lian tham tak tak; chutiang, khatiang' tih te a rawn sawi baw a. District Council area-ah hian thil lian tham tak sum lo lut hi lo zawng chhin se ka ti khawp mai. Pu Speaker, chu chu kan dinhmun a ni. Demand for Grants han en hian capital assets siamna tur engmah dah a ni lo a ni, Pu Speaker. Vawiina RE kan pe loh ringawt te hi; an thil tihdikloh lai sawi tur a awm ve; atua pawh hi inhnim inhnim ila, a eng emaw rimchhe lai sawi tur chu a awm hrim hrim. Chuvang chuan, District Councils ten RE an lo dilna hi, a vai vaia kan pe thei lo anih pawhin eng emaw zah tal, an harsat zualpui puhrukna tur hi kan sorkar hian engatinge a pek mai loh ka ti a ni, Pu Speaker.

Demand No. 28 - Labour, Employment, Skill Development & Entrepreneurship Department:

State dang tam tak hian skill development lamah hian nasa takin hma an la a, certificate level piah lam degree course tam tak neih theihna tur thlengin hma an la a ni. Chutiang anih lain, kan state-ah hi chuan hmalakna han sawi tur kan nei lutuk lova. Chuvang chuan, he department-ah hian nasa taka tan lak a ngai hlein ka hria, Pu Speaker. Kan demand atang phei hi chuan thalaite tana hmasawna a keng dawnin a lang lo a. BE ah eng ruai a ni lova; SASCI atangin ti dawn ila, SASCI atangin sum lo kal tur engmah BE-ah hian dah a ni baw si lova. Chutiang dinhmunah chuan a awm a ni, Pu Speaker.

Demand No. 34 - Animal Husbandry & Veterinary Department:

Pu Speaker, he department ah pawh hian infrastructure assets leh capital assets siamna tur engmah hmuh tur a awm lo a ni. 'Hmasawna tak tak hi a awm ang em' tih hi, kan budget han en chuan zawhna lian tak a awm a ni. Chutih lai chuan, he department hi tling lo taka kan enkawl ve chhung khan district zawng zawngah hospital sak loh kan nei lo. Siaha atanga Mamit, hetah Kolasib hospital thlengin kan hunlai khan kan sa a ni. Tuna kan mamawh em em chu, equipment hi a ni. Tunlai khawvelah chuan equipment changkang tak tak an hmang tawh a. Chuvang chuan, he sorkar hian eng pawh ni se, kan Veterinary hospital-te equipment lamah hian in concentrate se a that ka ring a ni.

Tin, Pu Speaker, ASF (African Swine Fever) hi kan ram atangin a bo kan lo ti palh ang e; vawiinah hian he hri hian min cham chilh reng a, engtik hunah emaw chuan a rawn flared up leh thei a ni. Chuvang chuan, hengah hian department te fimkhur leh zuala hma kan lak hi a tulin ka hria. Tin, feed and fodder lamah hian nasa taka hmalak a ngai baw a.

Ka hun a zo a, ka titawp tawh mai ang a. Pu Speaker, kan Minister pahnihte demand hi ka support e. Ka lawm e.

SPEAKER : Member zahawm tak Pu C Ngunlianchunga i sawm ang.

PU C. NGUNLIANCHUNGA: Pu Speaker, ka lawm e. Demand-ah lut nghal char char mai ang.

Demand No. 27 - District Council & Minority Affairs Department:

He department hi ka hma a mite'n an lo sawi nual tawh a. ADC-te chungchangah kuminah hian kan House Leader (kan Finance Minister ni bawk) hnen atanga kan hriat tawh angin, 2nd State Finance Commission recommendation angin pawisa pek a ni a; RE pek an ni lova. Nikum aain LADC-ah hian ₹1392.36, MADC-ah ₹1475.48, CADC-ah ₹1029.15 in a pung ve a, chu chu 2nd State Finance Commission recommendation ang a ni. State Govt. atangin RE pek a awm lova, an khawngaih thlak hle dawn a ni.

A bik takin CADC-ah pheih chuan hnathawktute'n thla 4 hlawh an la tawh lo an ti a. Tin, LADC ni se, RE an dil ₹4887.97 hi salary an indaihlohna te, pension salary an indaihlohna te, VC hlawh ₹14,50,000/- te a ni a. RE kan pe lova; kan House Leader-in, 'Kan pe belh thei lo ang, hei hi chu; kan pek tawh sa atanga an indaihloa, an in manage thei lo anih chuan, a nih nih a ni mai ang,' tih ang deuha a han sawi kha, han inpawt fan hram hram sela, fate an nih angin, khawngaih an ngai khawpin ka hria.

Ka hmaa mi Siaha bialtu khan a sawi tawh a. Autonomous Council-te hi kawng lehlamah chuan thuneihna lian te pek an lo ni a, department 18 - 20 chuang lai an enkawl ve a. Thawktute pawh a kokim chuan an la thei hauh lova, an hlawhah te pawh a kal tam em em a ni tih kan hriat rualin, an department enkawl te pawh a tam ve a ni. Autonomous Council area a Elementary School Education pheih chu eng emaw chenah provincialization Middle school 18 lai, Chakma-ah eng emaw zat, MADC-ah eng emaw zat tih loh chu, elementary zawng zawng hi Autonomous te kut a lo ni ve a. Chuvang chuan, sum indaihlohna a lian hle mai a. 16th Finance Commission lo kal lai te khan keini chu kan tel ve lem lo a. State Govt. atang pawh hian Union budget atanga an mahni ta tur earmark sak dan hi dil ila a kawngmang thovin ka hria a, state sum ei ve zel lo hian. A chhan chu, constitutionally-a ding annih vena ah an right tho niin a lang a ni.

Tin, ADC kan enkawlnaah hian tuna sorkar lai te hi chu a kal deuh chauh a ni a. Kei pawh District Council-ah rei tak ka lo awm ve tawh a. Congress sorkar lai kha chuan District Council hi a inthlak pawhin, a inthlak zeuh emaw chauh a ni a. Kan hnung term liam taah khan CADC-ah khan CEM 5, kum 5 chhungin an awm a; hei Pu RM Chakma ngei pawh a ni a. Tin, tunah hian LADC-ah pawh a ni a, tun kum 5 term-ah CEM 4 an han awm chho a. Kan party a nih loh avanga sawi ka ni lo a, Pu Speaker. Helai hi chu DC & MA lam atang hian kan enpuia, kan buaipui deuh chu a va tha ve aw. Inthlak inthlak zel anih mai chuan, hmasawna hna pawh a thawh theih loh a ni, dik tak chuan. Kan hotu pakhatin, 'hotu han nih hrehawm vena chu, Inrinni hi a ni deuh reng mai a', a ti a; khang kha a bo theih nan leh, stability government a awm loh chuan hmasawna hna a thawh theih loh a ni, chu chu thil Chiang tak a ni a. DC & MA lam atanga va control vek lam ni lovin, District Council & Minority Affairs hnuiaia awm anih ang hian hma han lak ve deuh hi chu a va tha em, tih kha ka sawi duh a.

Tin, hei hi kan minister hian min react ngei se ka duh a; zawhna ka zawt a, a chhuak thei mang tlat lo a. Dt.14.2.2025-ah khan Executive Secretary, Lai Autonomous District

Council hnenah, (Pu Speaker, a subject chauh hi ka'n chhiar ang a) i phalnain. "Transfer of construction of rural agriculture link road in LADC area, project to State-Public Works Department" tih a ni a. Hei hi autonomous district council-ten theihtawpin DPR te pawh an siam ve a, an buaipui a, NABARD leh sorkar lamah te pawh theihtawp an chhuah ve a; a pawisa hi a tam lo a, ₹218 lakh chauh a ni a. Tunah tak phei chuan ZPM sorkar a ding a, vawiinah te pawh a fu-ke kim nan hmalak a ni a. An lehkhah hian, power delegate-ah Works deptt. hna hi district council thawh phak loh ang zawngin a sawi a. CPWD work manual-ah SE thawh theih chin hian 2017-ah khan crore 10 a ni a; tunah hian SE leh CE te phei chuan full-power an nei tawh a ni.

Autonomous Councils te hian anmahni PWD ah SE te, EE leh AE te pawh an nei ve a, JE pawh eng emaw zat an awm a ni. Sorkar hmasa lamah khan kan inhnial vak tawh a, kan Finance Minister nen khan. MADC area-a project Chakhei-Siasi chu Mara Autonomous Council-in theih tawpa DPR an siam ve kha, 'an thawk theilo; an power-in a tlin lo alawm' tih avang khan state PWD hnuaiyah dah a ni a. Vawiinah chutiang tho chuan order a awm leh tlat mai a. Hei hi engpawh nise, kan hotute, kan House Leader te pawhin enpui leh deuh a tha em aw; anmahni buaipui ve leh anmahni thawh theih ngei mai han chhuh sak thin kha. A area mite an ni a, a tha lo anih pawhin, anmahniin a mawh an phur turah ngai ila. Chu chu Pu Speaker, kan Minister pawhin min react hram se, kan session chung hian.

Demand No. 34 - Animal Husbandry & Veterinary Department:

Mobile Veterinary Unit (MVU) hi central sorkar atanga Ambulance an dawn tein an thawk a. Mi 26 an ni a, thla 7 ngawt mai hlawh an la tawh lo hi engnge ni a chhan min react thei hram se. Thla 7 hlawh hi an lak loh chuan, nupui-fanau chawm, mi harsa te-tete an ni a.

Tin, Pu Speaker, sial tihpunna tur hi kan hun ve lai khan Thenzawl-ah sawn 2018-ah a bul kan tan a, a zo hman chiah lo a; ka bula thu Siaha bialtu hian a enkawl zui a. Zawhna ka zawt a; tunah hian a pui 1, a la 5, a pa 1 leh a note 1 chiah a awm a; kha project tum dan leh a achievement hi a va inanglo em em ve aw! A note pawh chu Ni 13.9.2024 khan a piang chauh nghe nghe a. Kei pawhin mimal angin sialte hi ka vulh ve a, thiante nen tang tlangin; sial puitling tawh phei chuan kum khatah note 1 hi a nei deuh zel a, a pung chak khawp mai a. Kan sorkar thar hian minister fel tak kan nei a, hma chak takin la sela.

Ka hmaa mite'n an sawi tawh ang khan, bawng vulh hi kan zo-zia nen hian a inmil chiah lo em aw, tih tur a ni a, bawngnhute lamah kan tlahniam a. Sial hnute hi a tha em em a, keimah ngei hi a taka tawngtu ka ni a, taksa chakna atan pawh min tanpui lutuk. Scrub typhus natnain ka damlo a, ka chau khawp mai a; sial-hnute Samthang ami ka in a, chu chuan nasa takin min tichak a ni. Tin, RAHC centre kan bialah dah a ni ve a, building te pawh a awm a. Mahse, chhunzawm a ni chiah lo a. Hei hi kan Minister hian min dah sak leh thei ang em le aw?

Tunlaia vawk vulhtute kan buaina em em, kan hunlai khan Pu Speaker, PRRS khan min luhchilh ve a, nasa takin kan ranvulh, kan vawk vulhtute a suat a. Tunah tak hian PRRS hi chu a kiam deuh, a ziam deuh tawh niin a lang a. ASF a lo lut leh a, vawk hi a sing tel tak zet zetin a thi a ni. Kan vawk, kan ran vulhtute an khawngaihthlak em em a. Heti ringawta sezawl chhuah lo deuh hian, Hrangturzo bialtu pawhin a lo sawi tawh ang khan, khawchhak lampang Vietnam te, Thailand ah te paw ASF vaccine hi an hlawkpui/an

tangkaipui niawm tak a ni a. Kha kha central sorkar hriatpui lemloh pawhin, India-in a nei bawk si lo a. Heti ringawt hi chuan kan kut hnathawktute tan a manganthlak lutuk a, a ruk a ral deuha han chawk luh dan te hi awm thei sela, Tunlai tak hian Lawngtlai-ah vawk a thi nasa leh tawh khawp mai a, Siaha bialtuin, ‘hri hi rehah inngai mai suh u’ a tih kha; a reh awzawnglo a ni.

Nikum lam khan kan bial heng - Vathuampui, Tuisentlang, Tuichawngtlang, Lunghautlang-ah te vawk a thi nasa a. A vulhtu rethei te te, ‘ka vawk hi a lo thang lian ang a, kum tawpah naupang masi thawmhaw lei nan, school fee clear nan’ tia an lo dreams kha mumangah a chang vek a, an khawngaihthlak tak zet a. Pu Speaker, hengah te hian hma la thei hram hram ila; kan minister hi a-ngaihna a hre turah pawh ngai ila. Dan lo deuh anih pawhin, Lalnu Estheri pawh dan lovin Lal inah khan a lut mai a. Kan ran-vultute an damna tur leh an himna tur anih chuan, sorkar hriatpui em em loh, tuar em em lo tur zawnga kalpui dan awm thei se tih kha Pu Speaker, ka sawi duh a ni e.

Demand No. 24 - Sports & Youth Services Department:

Kan Sports minister hi chu fakna kha a ni deuh mai a, sawi tam vak tur a awm lo a. Nikum lam budget session pawha ka lo sawi tawh, sorkar hmasaa lo tihfel hman chiah loh Sangau leh Chawnhu khua ten cheng nuai 10-a an lo thawh tawh vawiin thlenga pawisa pek loh kha an mang a ang khawp mai a. SASCI atang te pawh hian a tam thamlo deuh bawk a, kan Minister chak tak hian ruahmanna siam sakin tih fel sak thei hram sela. Mi khawl leh motor te an lo hmang a, leivung laih leh paih nan te; ba ringawtin an kal a. Engpawh nise, hnunglama thil awmte theihngihlin, hmalam pana kal kan Minister hian a mamawhin ka hria, hemi chungchangah hi chuan. a lo fel lo deuh a nih pawhin, mi harsatna sutkian sak hram hram dan kha zawng se tiin kan ngen nawn leh a ni e.

Pu Speaker, vawiina kan Minister te, Pu C. Lalsawivunga, Minister zahawm tak leh Pu Lalnghinglova Hmar te demand hi tha ka ti a, karawn thlawp e. ka lawm e.

SPEAKER : Tunah chuan, Opposition Leader kan sawm ang a. Minute 12 chhunga inkhung leng hram turah ngai ang aw. Leader of Opposition, Pu Lalchhandama Ralte ilo sawm ang.

PU LALCHHANDAMA RALTE, OPP. LEADER: Pu Speaker, ka lawm e. Vawiinah kan Minister pahnih, Pu C. Lalsawivunga leh Pu Lalnghinglova Hmar te demand kan han sawiho a ni a. Kan House Leader, nimin lama Guwahati kal, kan Budget Session ngaipawimawha helai arawn thleng leh hi ka lawm khawp mai a. A chhan chu, kan House Leader tel lova helai demand sawi hi a ke a bai deuh thin a. Budget session ngai pawimawh taka helai arawn thleng leh hman hi lawm thu a hmasain ka sawi a ni.

Demand No. 19 - Local Administration Department:

Hei, a changtu minister hi ka fak khawp mai a. Hmannia, Mizoram Village Council Bill arawn putlulh te leh, hun reilote a enkawl chhung hian a department chan a tulpui hle tih pawh kan hria a. Amaherawh chu, kan Cabinet thu ang leh sorkarin gazette a siam tawh ang khan, kar leh maiah hian he LAD hi Rural Development Deptt-ah a lut dawn ta a. Vawiina kan sawiho zawng zawng hi a ni chuan a chhinchhiah ang a, kan RD Minister khan a lo chhinchhiah ve ang em aw, ka ti a; Rural Development and Administration Deptt-ah a awm dawn a. Kan House Leader hian portfolio te pawh hi a siksawi hret dawn nge

kan hrelo nangin, eng le khaw le, vawiinah hian kan thusawi a khingbai deuh lo thei lova. Sorkar a insingsak tur vangah ka ngai a.

Chuta ka sawi duh chu, object head 18 - Rent and Others tih, hun danga awm ngai lo kha arawn lang a. Kha kha eng atana hman tur nge, tih lai te kha. Tin, major head, 2027 hnuai hian Urban Development lam hi a lo awm tel a. Village Council hi Rural Development-a awm tur anih avangin Urban Development te a lo lang a. Kha kha, thingtlang leh khawpui a kawpa enkawl na tur nge, ka hre thiam lova; UD & PA hnuai awm ni awm takin a head kha a la awm a. Kan head dah dan hi a fuh chiah lo deuh nge hriat thiam a har a. Chutihrual chuan, kan Village Council-te pawh thumchakin, an lawmman te pawh kan ennawn a tul hle mai.

Demand No. 23 - Art & Culture Department:

Tun tuma kan demand sawi department 41 zinga department 17-te hi nikuma an BE pha lote anni a; department 24-te hi chuan nikum an pel a. Vawiina kan sawi Pu C. Lalsawivunga chanvo deparment 4 zingah he department hi nikum BE pha lo awm chhun a ni. Hei hi sum leh pai tamna Tribal Affairs kha Art & Culture-ah a awm dawn avangin an titem a ni ang a, te ka'n ti a. Mahse, nimin piah lawk, Ni 13 ah khan kan House leader-in Tribal Affairs kha, 'ngaihtuahna thar kan hman a, CMO, Planning lamah a awm leh zawk dawn e; a pumpuia that zawkna kan beiseina avangin kan ti a ni e' a ti a. A hmaa cabinet pass leh gazette te kha kan lo hmu a, CMO Planning-a awm tura siamna order hi memberte min pek tur a awm em tih kha ka'n zawt tel bawk a.

Tin ka ngaih pawimawh em em, Mizo-tawng humhalh te, kan cultural dress leh dance tihmasawn te pawh kan han ti a; kan tawng - Mizo language develop kawngah hian engtinge Art & Culture hian hma a lak dawn; Art & Culture hian a purview ah a ngaih tawh loh vang te pawh a ni thei a. School Education Deptt. hnuai hian kan mizo tawng tihausu turin Mizo Language Development pawh din a ni a, Art & Culture nena kal kawp ngai tak niin ka hria a. Heng kawngah hian kan mizo-thalai rualte hi mahni tawng pawh zial dik hleithei lo leh chhiar hleithei lo kan tam ta viau mai a, chung kawngah chuan a department pawh a tan tul viauin ka hria a.

Tin, Art & Culture enkawl pawimawh tak leh asset ni bawk, Vanapa Hall hi nikum Session lai khan kan House leader khan a sakna tur ₹3,000/- lakh chuang kan hmuh tur thu kha a sawi a, helai hian pawh dawhkan kan beng dar dar a ni a. Kha kha engtikah nge sak that anih dawn; a hmin tawh em tih kha ka zawt nawn leh bawk a ni.

Demand No. 27 - District Council & Minority Affairs Department:

Nichin khan member zahawm tak pakhat khan arawn sawi tawh a. Kum 14 vel kal ta March Ni 24, 2011 ah khan kan tribe list siamthatna tur official resolution, khatih laia kan Home Minister khan he House-ah hian a pulut a. Chung siamthat tura ngaih pawimawh deuhah khan, Lushai tih hi Mizo' tih te, 'Pawi tih hi Lai' tih te, 'Lakher tih hi Mara' tih te, tin, 'Any Kuki tribes' tih (Sl. No. 6) a 'Gangte' awm te pawh hi 'Mizo tribe' tih hnuai hian dah ni se' tih a ni.

Ni 25, October 2011 khan he official resolution hi a concerned department - Tribal Affairs Ministry, central lamah theh thlak a ni tawh a. Vawiinniah hian hei hi Union Cabinet thlir tur emaw, President assent turin chhawp hnaih theih turin engtin nge hma kan lak ang tia,

he House hian resolution kan siam nawn te a tul em tih te ka ngaihtuahna ah a awm a. He thil hi hnam-khawih a nih avangin, kan House leader hian Delhi lama hotute a hmuh remchana sawipuih min lo note sak se.

Tin, kan House Leader sawi fo thin thil pawimawh tak, “tuna ADC pathum kan neihte bak tunhma undivided Aizawl leh Lunglei te hi 6th Schedule area-ah kan awm tawh lo; tribal kan nih avangin tribal facilities kan hmu mai a, 6th schedule area-a awm leh dan hi ngaihtuah a tha lo maw,” tih a sawi thin kha a dik khawpin ka hria a. Kan hnam himna tura a tul avang leh, hemi kawngah hi party zawng zawngte pawh kan inlungualna tur anih avangin, nichina kan tribal list kan tih te, 6th Schedule area chungchang te hi nasa zawkin kan sorkar hian hma a lak a thain ka hria. Income Tax chungchangah leh tribal quota kan neih tawh eng emaw avanga bo thei te pawh tunah hian min veh a, anrawn impose tan tawh a. Heng hi kan hnam himna turin a pawimawh em em a.

Tin, ADC pathum kan neihte ah hian anti-defection law hman hleih theih loha a awm avangin an sorkar, mipui duhthlan ni lova a inlumlet zing lutuk hi, hnam ang pawhin zahawmna a bova; hei hi an mahni Council rules siam mah nisela, Governor’s special power hnuai a awm a ni a. Kan State-a District Council Affairs lam hian lo zir changin, anti-defection law hi impose theih dan a awm em, tih hi ka zawt tel duh a. Tin, kan CCB rules te an pathuma a inang lo nuai mai te hi engtin nge rual khaia kal dan awm, tih te ngaihtuahna ah a lian a. Kan unauhte enkawlina tur chungchangah vawiinah mamawh an nei a, sum leh paia an indaihlo zia te sawiin, “RE-ah min pek belh hram teh u; salary pawh kan ba nasa” an tih te hi, kan House Leader hian hmanna a thusawi kha awm tawh tho mahse, tun bik atan hi chuan an sal tanna kawl ata chhuah an nih theihna turin kan House Leader, Finance enkawltu hian ngaihtuahna lo hmang nawnin, pe leh thei hram se, tiin ngenna ka han siampui a ni.

Demand No. 34 - Animal Husbandry & Veterinary Department:

Pu Speaker, ASF avanga vawk thite, tanpuina la pek kim loh leh second installment pek turah eng harsatna nge kan neih? Thingtlangah a ni emaw, khawpui chhungah a ni emaw, ran vulhtute tanpuina tur hi pek chhun zawm a nghahhlelawm hlein ka hria a ni. Tin, kan ranvulh sa-ah kan intodelh lo lutuk hi engtin nge kan tih zel ang? A bik takin, artui-ah te, bawngnhute-ah te pawh intodelh thei tura kan ngaih laiin, kan artui thar leh bawngnhute tharte a tlem chak riau hi Vety Department hian research an ti em aw, ka ti a. Aizawl khawpui chawmtu, Aizawl hnaivaia bawng vulh te pawhin an bawngte an ti ral ta zeuh zeuh reng a. Hetiang anih chuan bawngnhute hring ei tur pawh hi rei loteah tlakchhamna a awm telh telh dawn a, tan lak thar a tul hle mai.

Demand No. 7 - Excise & Narcotics Department:

Pu Speaker, kan BE han en hian, Excise-ah hian infrastructure development tur emaw, hmanraw thar leina tur emaw ang chi kha a lang lo khawp mai a. Vawiinah chuan ‘he department hi modernize/equip that a tul’ an ti a. Drugs cartel-ho han bei tur chuan keimahni pawh kan in-equip that a ngai hle tih kha a lang a. Hemi kawngah hian, Excise Deptt. hi kan ram harsatna hmachhawntu an nih avangin kan House Leader hian sum leh pai pawh, a bik takin Excise force thuamthatna lamah han thilphal deuh se kan ti a.

Tin, Object head of Account-a awm tel atana ka duh em em awm tel silo chu, kan thawhpui NGO - volunteer VDP te emaw, YMA te emaw tanpui theihna tur GIA ang hi awm tel ve

se a thain ka hria. Anni tel lo hi chuan vawiinniah hian excise force leh police force-te hi kan kal tak tak theilo a ni. Khang kha hun lo kal leh turah awm tel atan ka duh khawp mai.

Kha, kan member-te debate-a ka sawitel, hmanna kan amend tak MLP Act 2025 chungchangah khan Pu Speaker, i dinglana thute khan i veilama mite kan thusawi thin hi a nilo zawngin an lain ka hria a. Hmanni an thusawi, kan Minister khan fruit beer leh wine siam tur chungchangah kut--hnathawktute hamthatna tur tih a rawn sawi kha kan lo ngaithla tha a. Kan memberte'n an sawi bera kha chu – “engati nge a zu (alcohol) tam zawng kher ni lova a slice emaw, a dry-form emaw a juice emaw tein siam se a tha zawk lo em ni; zu kaihhnawih hi chu kan tlin lo a nilo maw” an tiha kha, member i veilama mite sawi dan a ni a.

Chumi piahlahmah chuan, presentation kan pek leh i dinglana miten an sawi duh reng reng loh chu – zu-zawrh chung chang a ni. ‘Zu inzuar’ kan tihna chu, kan amendment section insert tharah khan Excise Department zu dawr siamna tur a inbilh a, a lei theitu turte pawh dignitaries te, domestic tourist te leh medical case ang te; red card siama doctor leh medical practitioner ten tul an tihte pekna tur leh an leina turte department-in dawr a hawng dawn tih te kha a inziah kulh avangin, ‘zu in zuar’ tih kha thahnem ngaihnaah he sorkar hian pawm ve mai rawh u. Tin, kum 2019 amendment a siamah khan zu zawrh a awm tel lova. Hei hi a thar anih avangin laknat tur a awm lo kan ti a ni.

Demand No. 22 - Sports & Youth Services:

Pu Speaker, ‘Sports & Youth Services’ kan la tih fo hi a department changtu minister leh kan House Leader te hian han ngaihtuah sela. Central ministry chuan ‘Sports & Youth Affairs’ a ti a, ‘Services’ tih aiah hian ‘Affairs’ tih a ni a. Keini pawh hian ministry te rawnin ‘Affairs’ kan tih ve a tha lo maw? Tin, Vision Olympic, 2036 kan siam hi a lawmawm ka ti a. Medal kan lak ngei theihna turin eng emaw mizo te talent ina a tih theih tur item focus deuh bik 2-3 kan nei nge nei lo? Kan nei anih chuan kan Minister khan min hrilh se. Inbuatsaihna kal mek hmanna a sawi kha ngaihnaawm ka ti khawp mai.

Pu Speaker, ka bial chungchang tawitein; min lo en thap bawk a. Darlawn Field-ah phullem phah ve turin MNF sorkar khan SASCI atangin a bul tanna tur ₹200 lakh kan pe a, SASCI leh peka ₹400-500 lakh pe leh turin ruahmanna kan siam a. ₹200 lakh kan pek atangin tunah hian engzat percent nge an hman tawh? SASCI tharah hian phullem phah zawhna tur min pek belh thei ngei dawn em? SASCI control-tu chu kan Finance Minister a ni a. A hmaa pek tawh a chanve la awm kha min pek belh hram turin kan House Leader ka ngen a. Tin, Mini-Sports Complex Sakawrdai ah sak a ni bawk a, kan hunlaia sorkar hmasa zawk bultan kha kan chhonzawm a, hawnloh a ni a. (**Speaker:** Minute hnihin i pel ta a; i zo thei dawn tawh em?) Hei hi tihpuitlin tumna a awm em?

Tukin khan UD & PA Minister hian message min rawn thawn a. Chu chu Ni 25.3.25 (Thawhlejni) khiann Mizoram Badminton Centre, Zuangtui-a sak chu hawn a ni dawn ta a. Hei hi designated hall badminton association tana court paruk zet awm sorkar hmasa (mahni pawh han insawi ila; ka inti neitu ve a ni) Mizoram Badminton Association’ President ka nih laiin a ram kan zawng a, bul kan tan a. Khata kan Sports Minister leh kan CM kal ta tena min lo duhsak bakah sorkar tharin min han duhsak chhonzawm a, an han tipuitling chho hi lawmawm ka ti a, kan sorkar pawh kan congratulate a ni.

Demand No. 28 - Labour, Employment, Skill Development & Entrepreneurship Department:

Ministry hmasaah khan a hmingin lo enkawltu ka ni a. ITI kan neih chhun te thuamchak kawngah tun tuma kan budget han en hian building a ni emaw, equipment tih tharna tur emaw kha a tamlo riau mai a. Kha kha uluk zawkin kan House Leader hian SASCI lam atang pawhin min ngaihtuahpui se ka duh khawp mai a. ITI training chhuakte tana innovation fair kan neih ‘Pum’ kan tih te, ‘Kawtchhuah’ kan tih ang chi, a train chhuakte leh helam panga entrepreneur-te tihphurna ang chi kha tih leh kan tum dawn em tih kha kan hrechiang duh a.

Workers’ Welfare Board chungchanga dan pass thar kha kan Minister-in hmannah a sawi a, memberte sum leh pai dawn theih tur tihpunna a ni leh, education sector lama hawi an tum te hi lawmawm ka ti a; he sum hi tam zawka hman nise. Kan member thenkhat te khan kan hrechiang lova, cess hi tam tak lo kal mahse, a hmang thei tur bik hi danin a siam a ni; a nazawngah, a dangah a hman ngawt theih loh. Chuvang chuan, tangkai zawka an hman zel hi a tulin ka hria a ni.

A tawpna berah chuan, LESDE hi thalaite department dik tak a ni a. Thalai entrepreneur-te, skill lampang te leh workers welfare te, chutianga thalai focus-tu anih avangin, he department hi ngaihpawimawh a tul a. Hun lokal leh turah pheih chuan kan sorkar department hrang hrang zingah hian scope nei tha, la lian tur nia ka ngaih avangin, he department hi duat zawka kalpui zel hi a tul ka ti tak zet zet a ni.

Pu Speaker, heng kan Minister zahawm tak tak pahnihte demand hi House hian lungruat taka kan pass ka duhin, ka thlawp e. Ka lawm e.

SPEAKER : Tunah chuan kan House Leader-in sawi duh a neihte sawi turin ilo sawm ang.

PU LALDUHOMA, CHIEF MINISTER: Pu Speaker, ka lawm e. Hei, Session chhungin working day-ah vawihnih ka zin a, vawikhat Delhi-ah, vawi khat Guwahati-ah. Amaherawhchu, nikhat mah ka absent chuang lo a ni. Tin, tun tumah hian, nimin tlaiyah khan Guwahati-ah Criminal law 3 (pathum) kan neih thar tak implementation chungchangah Home Minister bawk khan chair a la a, Chief Minister an kal kim thap a. Kei kha kal tum lo ka ni a, Thuampui atanga Khatla kan pannaah pawh Pu Amit Shah-a nen motor ah kan sawi dun a. “Hei, kan Home Minister-in a zuk ho dawn a; kei chu hetah ka awm a ngai bawk si a. Ka kal lo mai dawn nia” ka ti a. “E...a tha lawm” a ti zet a. “I kal tluk chu a awmlo ang; ka rualin ka special aircraft-ah hian chhuk ve mai thei la; amarawhchu, ka tilui lo che a ni a” polite deuh khan a ti a. “A... chuti chu ka kal mai ang e” ka ti a, kan thlawk thla dun ta mai kha a ni a.

Kan zuk meeting-na subject-ah pawh kan Home Department leh Law Department te an tang a, a ti tha pawlah kan tang niin ka hria a; an chungah lawmthu ka sawi duh a. Tin, khatianga motor-ah te, thlawhna-ah te Home Minister nena rei tak hun thawl tak han awm dun theihna chance kan nei te kha a tha phian a. AAI chungchangah kan sorkarin AAI chairman hnena lehkha kan thawn hnun ber min chhan tak loh copy te kha kan inpe a. Tin, khawlaia kan chuan dunna ah rigid pavement kan tih awmchhun Bawngkawn lai kan paltlanga a tlo zia te kan inkawhmuh a, hei hi min phalsak turin hma min lo lakpui rawh

ka ti a. Kan Home Minister hi chu portfolio neih loh a nei lo a, eng portfolio pawh a khawih thei vek a ni. Prime Minister dawt chiah ang hian a awm a, a hnenah engkim a sawi theih a. Chung te pawh chu statistic duh a nei a; chu chu kan pe thla ang a, min enpui ang a. Tin, Territorial Army, Home & Hearth Mizo hliir nula leh tlangval battalion thar din dan chungchang te kan sawi dun bawk a, hei pawh hi active taka ngaihtuah mek a ni a. Kan din thei ngei dawn ni te pawhin kan hria a, kan lawm viau a ni.

Tin, Dampa bialtu zahawm takin Home Minister programme chungchanga ‘min check ngun lutuk’ a tih kha, Lie Detector chuan an check hauh lo mai a; a hriatsual a nih ka ring a. Metal Detector zawk an hmang a ni. Thil hi kan hre sual thin a. **(Pu Lalrintluanga Sailo:** Pu Speaker, lawkin. Ka lo sawi sual a; ‘lie’ ka ti lo a, ‘mine’ ka ti a. Kha kha ka sawi sual a ni e.) A la dik ta chuang lo tho mai a. Tihsual hi a awm a ni a, kan hrethiam a nia.

Home Minister security hi tunhmaa keini hunlai ang kha a ni lo tawh lova, SPG kutah a lut tawh a. Keini hunlai kha chuan uniform pawh kan ha thiang lo a, silai pawh kawrchung hnuaiyah emaw, safari hnuaiyah emaw kan thukru a. Charan Singh-a Prime Minister lai khan a PSO-ah ka tang hman a, reilo te. Lawn zau tak a nei a; chutah chuan exercise la duh lovin, tuktin hian park-ah kher walking a nei thin a. Chungah te chuan silai kha pai lan awih a ni lo a, sten gun ang chi, a bawm pawh guitar bawm ang chi te kha kan siam a, zipper neiin. Kha silai kha kan nau pakhat khan guitar angin a ak a, lungleng awm fa hrana kal ve hnak hnak kha a ngai a ni, a bul hnaiah khan.

Chutih lai hun chu tunah chuan a ral tawh a. Uniform nen Black Cats te nen tih a ni rup ta a. Chuvangin, ka PSO pawh ka bul hnaiah a awm a thiang lo reng reng, tun tumah khan. VVIP lo chu an check vek a ni. Chief Secretary, DGP khang zawng zawng pawh kha check vek tur an ni. Nangmahni security te kha advance in an rawn thleng a, khang khan an khawih vek tih kha ka sawi duh a. Chutiang khawp chuan an fimkhur a, an check hnuah an chhuah leh pawhin check nawn leh ngei ngei tur an ni.

Tin, heng official function reng rengah hian officer-te awiawh hian Chief Secretary leh DGP hi chu an tel a ngai thin a. Airport-a an lo tum kan hmuah pawhin Chief Minister leh Minister dang lo hmuaktu an awm pawhin a dawt chiahah Chief Secretary, a dawt lehah DGP a ni thin a. Helai seating arrangement-ah pawh khan chu chu a ni a. Tin, Central lama Home Secretary, IAS officer a ni a, kha kha a awm a. A bulah Director, IB, IPS officer kha a awm bawk a; khati zel kha a ni a. District-ah pawh DC, SP kha zel kha India ram kan kalphung hi a ni ve hrim hrim tih kan sawi duh a ni.

Vety-ah hian han kal zawk ta ila. Artui, arsa leh vawksaah te kan intodelh lo a; thil dang dangah sangha thlengin a ni a. Sangha chu kan sawi a rem lovanga vawiinah chuan. Hengte hi ramdang atangin a lo lut a, a frozen lamin a lo lut a. Chutah chuan, helaia a lo dekchhuak ve tute market kha pawn lam atanga kan lakluh hian a dip bawk si a, an dinchhuahna tur, an survive-na tur a dal bawk si a. Chu chu thawklekhkhatat ramdang atanga lakluhna khap thut dawn ila, a man a to phah vak dawn emaw, kan la intodelh lo emaw a ni dawn bawk si a. Chumi inkar balance-strike dana chu sorkar hian a ngaihtuah a ngai em em a.

Kei ngei pawh ar hi nasa taka vulh tawh ka ni. Kan nupain kan han zuar tak tak mai chu, kan agent ten an lo la fai vek mai a ni, hotel leh hetiang ho hian. Vai deuh vek kha an lo ni a. Vai ar zuar hoin thutna tha tak an chan laiin bazarah thutna kan chang bawk si lo a. Mizo ar

zuarin thutna kan chang lo; Vai sangha zuarin thutna tha an chang a, mahni thar Mizo-sangha zuarin thutna an chang lo; Vai thlai zuarin thutna tha an changa, Mizo thlai mahni thar zuartute'n thutna an chang lo a ni. Chutiang chuan, keini pawhin kan pam tul thak mai a ni. Keini ho zinga ar vulhah khan Major Thangkima chiah a survive a ni. Ani chuan a puahsa nen a zuar thei a, keiniin kan thei ve si lo a.

Chuvang chuan, nationalism kan tih fo, 'kan parda a chhiat pawhin Mizo siamin i thlak ang u' kan tih ang chiah khan, keimahni ram chhuak thila intodelh hram hram kan tum hi kan sorkar-in a tum a ni a. Chuvang chuan, a man sang tur ven a ngai a, a dan leh hraite pawh kan Minister ho hian an ngaihtuah nasa a; khap ngaite pawh an nei a ni. Medical ground avang te pawhin pawn lam atanga lo lut tur khap dan te pawh ngaihtuah ila kan ti a. Nikumah khan foreign atanga dawnfawh lo lut kha kan khap ringawt mai a, dan tlawhchhan awm lem lovin; a effective ve tho mai a. Chuvangin, dan lam te pawh chuti thuta nei nghal thei kan ni lo a, kan ngaihtuah zel a ngai a.

Tin, kan intodelh theihna turin kan Minister hian hma a la nasa em em a. Thenzawl-ah pawh Mega-egg farm-te NABARD hnuaiyah hian crore 20.60 in siam a ni a, Arpui nuai khat tui thei an nei dawn a. Khatiang khan intodelh hret hret kan tum ang a. Pawn lam atanga lo lut pawh a tah tawla dan dan kan ngaihtuah zel a ngai dawn a ni. Tin, Zemabawk-Tuirial kawnga vawksa sawngbawlina saw hmannah kan MIFCO Chairman hian, 'i kal pahin thlir teh, a fai vung tawh a nia' a ti a. Hei hi kum tam tak chhung tawl (abandon) tawh a ni a, MIFCO Chairman te hian an lo tifaik tawh a. Function tir leh an tum bawk a, a lawmawm hlein ka hria a. Vawk vulah hian Kawlkulh-Piggery Farm, Mualkhang, Lunglei Pukpui-ah te sorkar kal tawhah kan hlawhchhampui zar zar a, tam tak kan inseng a. Piggery Village te kan siam a, tam tak kan pem khawm tir a, a hlawhtling chhungkaw pakhat mah kan chhuah lo a. Mi kan ti beidawng a, a pawl em em a.

Tunah hian, keini ngaihdanah hi chuan sorkarin khati vak vaka hma la loin, 'hei hi chu enterpreneur-te hmalakna tur a ni; hand-holding hnuaiyah hian tihchhoh ni zawk se' tih hi kan ngaihdan a ni a. Chutiangin animal feed-ah pawh kan intodelh theihna turin hma lak mek a ni a. Tunah hian Vety doctor kan la mek a, result an nghak mek a ni a. Tin, Vety Department hi (ka sawi soal mai thei a) hand-holding hnuaiyah diltu tamna ber a ni a. Chuvang chuan, kan progress partner turte pawh kan pek hnem ber zinga mi an ni a. Hand-holding sum pawh a dawng hnem ber tur an ni. Kan rinrawl tur, kan ram economy kulpui tur takzet an ni, he department hi. Hand-holding atang pawhin a diltu an tam ang bawkin, sum pawh kan dah tam dawn a. Tunah hian 'CM-special package' kan tih te pawh hi tam tak hian an nunpui dawn a ni. Arte man nei lo, a baa arte laa vulh te hi tam tak an lo awm a ni. A ba-in an la a, an arte te an thih leh chuan an rul thei lo a; khatiang te kha an lo ni a. Cheng sing 2-3 lek pawha miin awlsam zawka bul an tan theih dan tur leh, khatiang mamawhte kha an lo tam hle mai a lo ni a. Chu chu kan hand-holding hian a take care chho turah te kan ngai a ni.

Tin, MYC chungchangah hian kan Minister hian hma lakna chi hrang hrang a nei a; Taiwan-ah te pawh an han zin kha a ni a. Hmanni lawkah pawh agreement an sign a, khangte kha min hrilh turah kan ngai a. Blue-collar jobs leh White-collar jobs eng emaw zat kan Mizo nula leh tlangval ten an neih theih dan tur an ngaihtuah niin ka hria a.

Excise-ah hian kan NGO te nen GIA dawng tura tanruah a tul thu kan Opposition Leader-

in a sawi kha ka pawm zawng tak a ni a. Kan tum reng; amaherawhchu, Excise Act atanga tih kan han tum a, a rem vak lo a ni. Police Act atangin special police officer dah theihna dan a awm a, chumi atang zawk chuan khangho kha a tul anga tih theihna te pein sorkar atanga sum te leh uniform te thleng pawhin pui ve in, 'Home Department atangin hei chu hma rawn la rawh u' kan ti a. Kan hmanhmawh a; ka hnenah a la rawn thleng let leh lova; vawiin ah hian kan in remind te pawh ni se. Home Department lamin hei hi a rang lamin han chhawp chho thuai sela; kan mamawh em em tawh a ni.

RLB hi kan village council ten sum an hmuh tur kha sorkar kal taa 2021- 2022 chhunga an hmuh tur pawh kha an lo la pe thei tlat lo mai a, an pe thei lo chho zel ta a. Keiniin a hremna pung nen kan rul teuh mai a, hetiang chu a diklo kan ti a. Finance Commission-in khaw tin chan tur a bu in an siam a, an keu a, an khaw chan tur an hmu ve kuau a; VC te hian dawn tih ni an nei thei si lova. Tih tak zetin Finance Officer-te pawh pek belhin kan bei chho a, thui tak kan kal tawh a. Tunah chuan pending a tam lutuk lova, update deuh veka an dawn tur an dawn theih kan beisei tawh a.

Kuminah khan RLB-a kan sum dawn hi a tlahniam ta tlat mai a, crore 2 ngawt maiin a tlahniam a, tha lo kan ti em em mai a, 16th Finance Commission-ah khan kan sawi nasa a. kan Village Council, kan traditional institution-te hetiang an mamawh pung ve zel kum hmasa aia hmu tam zel tura kan ngaih ve laia a tlahniam ta kha tha kan ti lova. Finance Commission-ah nasa takin kan sawi a, ngai a awl leh chhoh te pawh kan beisei a ni.

Youth Commission Act chungchang Dampa Bialtuin a sawi kha, Minister hian rawn hrilhfiah zawk se a thain ka ring a. Kei hi a nihna tak sawi chi, pehhel thiam lo ka ni a; ka sawifiah chuan a chiang leh lutuk ang tih ka hlau a; a minister ka'n khek a nge.

Tin, Tribal Affairs hi Planning-a a awmna tur copy kha kan opposition leader khan ka duh e a ti a, kha kha pek ni se langin. Tribal Affairs hnuaiia kan sum hnar lian tak chu PMJVK-hi a ni a, kha lai kha sawi deuh hlek a ngai a. Hei hi CSS zinga pakhat a ni a, a funding pattern hi 90:10 a ni a. ...(*interruption*)

DR. K. BEICHHUA: Pu Speaker, kan leader hian a hre soal a ni ang; PMJVK a ni lo, Article 275 clause-I ah khan a ni zawk. PMJVK kha Ministry of Tribal Affairs ah a awm lo, Minority Affairs ah khan a awm zawk.

PU LALDUHOMA, CHIEF MINISTER: Minority Affairs ah khan a awm a, kha kha Central-ah Rijeju-a chan vek a ni a, kan la kawp mai a ni a. PMJVK hnuaiiah hian project hrang hrang a lo lut ta a, State-in chu chu an thliar fel a, a approve ta a. State Level Committee-in a approve hnu ah hian Central-ah an lo approve lehchhawn a ngai a. An lo approve hnu ah chuan, a line-ministry theuhah a lut leh a. A line-ministry khan helai kan department theuh an concern-a kha zawhfiah ngaite an zawt fiah leh a. A kalchhung hi a rei fe mai a, tun sorkar thar hian PMJVK hi chengkhath mah kan la dawng lo tih kha a dik a ni.

Chhan a nei a. Sorkar hmasa ah khan DC & MA hnuaiiah hian project 65 an lo nei a ni. He projects 65-ah hian thil fel lo a tam deuh a niang, clarification an rawn zawt a, chhan ngai a ni a, a fel hleithei lo a ni. Sorkar hmasa lama pawisa dawn tawha kha thawh zawh hleih theih loh khan a awm a, DC&MA hnuaiiah project 65-a lo awm ta a, kan la chingfel vek thei lova. Sports-ah ringawt hian project 84 a awm a ni. Chutah chuan zawh tawh chu

project 38 a ni a, a bak zawng hi la zawh loh a ni a, January thla khan crore 13.4 an rawn release a, tunah hian sorkar hmasa huna mi lo release tawh thawh mek la thawh zawh loh, chuta tanga pawisa kan hmuh leh tur chu crore 119 la hmuh belh tur kan nei mek a ni. Tunah hetiang zat project pending hi a la awm tlat a, chu chu chinfel a la ni baw si loh avangin, keini sorkar thar hian PMJVK - Minority Affairs hnuai atanga han hmuh lehna tur kha a dal tlat mai a ni. Chuvang chuan, cheng khat mah in la dawng lo tih kha kan pawm a. Amaherawhchu, dawng thei dinhmunah kan dawng rih lo a ni. Tunah erawh hi chuan khang kha(*interruption*)

PU ROBERT ROMAWIA ROYTE: Pu Speaker, a sawi zawhah khan ka sawi ve dawn nge, tihian ka lo zawh belh ang?) (**Speaker:** Han sawi zel phawt sela.)

PU LALDUHOMA, CHIEF MINISTER: Pu Speaker, kan House-ah hian thusawituin kan sawi laia rawn sawifiah zel tum hi ka hre ngai lo a. House Leader a din tawh ngat phei hi chuan a hnuah midangin an sawi tawh ngai lo a ni. Chuvang chuan, engkim mai sawifiah nghal tum vek pawh hi a ni lo. Hei hi a dik lo a nih chuan kan la chai chho zel ang a.

Tichuan, tunah hian zawi zawia kha kha kan chinfel taka vang khan a thar i siam ve tawh ang u kan ti a. Amaherawhchu, Social Welfare Department emaw DC & MA emaw a bet ngawt lo khan, project kal dan han en hian department dang a huap lohzia chu a hmuh theih vek a. Hetiang tur a ni lo e, Minister zawng zawngin he sum hi an mamawh a, department zawng zawngin an mamawh avangin planning-ah hian awm se la intawm vek ang u, tichuan kan thawk teuh anga a thawktu pawh kan tam chuan kan thawk zo hma anga a lo let leh pawh kan lo hmu hma anga a rang zawk ang. Department pakhatin a pumbilh deuh anga a lan avang hian a hlawk tur ang pawhin kan hlawkpui lo a ni, kan tih avangin tunah hian planning-ah kan dah a ni. CMO-ah kan dah lo, planning-ah kan dah a ni. Chu chu thil kal dan a ni.

Tichuan, chutianga kan han tih tak hnuah chuan tunah hian department tin atang hian, “khai le, in ngaih pawimawh rawn theh lut rawh u le,” kan ti a. Kan department tin ten Minister theuh kaltlangin project pawimawh an tih an rawn lakhawm a, project 715 a rawn lut a ni. Chuta tang chuan SLC in an rawn thliar fel ve leh ta a, tunah hian project 258-ah final list kan siam a. Project 258 hi Delhi-ah kan theh lut a ni. A bak hi chu kan sumin a daih dawn chuang loa kan hriat avangin shelf-ah kan dah tha rih a. Tuna kan theh lut ho zawng hi cheng vaibelchhe 1813.95 a ni. Amaherawhchu, heng zat zat kan theh lut zawng zawng hi chu kan hmu vek dawn kan ti thei hauh lo a ni.

Tichuan, tunah kan project 258 hi naktukah Delhi-ah an final dawn a. Chumi avang chuan, vawiinah hian kan Principal Adviser leh kan Nodal Officer-te Delhi-ah kan tir thla nghal a ni. Chumi hnuah a Ministry concern-ah a kal leh ang. Vety Ministry-ah a luh chuan Vety Department nen baw k khan an indawr leh dawn ta a ni. Kan project siam danah te inzawhfiah ngai a awm chuan a Ministry concern nen direct-in an inzawtfiah ve leh ta ang. Khata thil a lo fel loh chuan kan hmu dawn emaw kan tih kha kan hmu lo leh mai thin a. Chuvang chuan project hi tih fimkhur a ngai em em a ni. Hman zana ka sawi tawh ang khan Minority Affairs changtu Pu Rijiju-a nen kan inhmu a. “Delhi-ah session question zawhah a chhukthla a dar chuti zatah chuan thleng ta se la tiin min han chhutsak a, heng zawng zawng hi a ti hman lovang,” min ti ta a mi then khat khan. Mahse, kan ti hmana kan thlalak te pawh kan neia a tul chuan Pu Speaker.

Tichuan, Rijiju-a nen hian kan inkawm a, chutah chuan PMJVK financial year lo tawp dawn hnaiah hian a hmang tha lo state ho chanai leh project an zawh hman loh kal zel tlaka an ngaih loh leh pek zel an tum loh te pawh a ni ang chu khatiang pawisa hman bang remchang kha awm thei dawn anga min sih hmuh tak avangin chumi a tan chuan project paruk kan thehluh ve nghal a. Tichuan pali chu kan Mara unauhte ta tur a ni a, pahnih dang chu he lampangin kan chan ve tur a ni a. Cheng vaibelchhe eng emaw zat hu kan thehluh a. Tichuan DPR a ngaih avangin 10 crore chin hi chu concept paper hian a tih theih mai a. Above 10 crore a nih chuan DPR puitling a ngaih tlat avangin a thenah khan DPR a lo awm lo a, kan project zingah khan. An tlaivar thak a ni kan official-te; lawmthu ka sawi tawh nghe nghe kha. Tichuan a tukah chuan kan peih ta vek a, Minister hnenah kan thehluh nghal a ni. Heihi kan hmu dawn nge dawn lo kan hre lo a, amaherawhchu, kan umzui tlang zel anga hmu turah chuan kan inbeisei a ni.

Tin, Chakma Hostel hi Hunthar-ah sak mek a ni a kan sa zo tep tawh a. NSEID OTR atangin crore 5.65 senga sak a ni. Bru House hi SASCI Part 5 hnuaiah kan sa dawn a part 5 hnuaiah hian hmanni lawkah crore 100 kan dawng thar a. Chuta tang chuan cheng crore 4.15 chu chu Tanhril-a Bru House sak nan kan hmang dawn a ni.

District Council chungchangah khan sum harsatna te kan sawi a. “In pawisa dawn zat tur inhria a, Finance Commission in sanction a phal zat chhungah hian in in-adjust a ngai a; hemi piah lamah chuan pek theihna kan nei lova kan ti a. Khang zawng zawnga damna chu direct funding hi a ni. Direct funding hi chu nei se, keini kan AMC leh kan LMC ten direct-a Finance Commission atanga an dawng ang hian; hei hian min chhawk ta em em a. Khami bakah khan keini state chuan tlema zawng chu kan pek belh ve tho a. Chuvang chuan, kan district council-te hian direct funding hi chu hmu thei sela chuan state hi min chhawk dawn a. Chuvang chuan, a changtu Minister-in helaia budget a pharh kep lutuk ngai lo hian; eng emaw zat chu kan pek belh tho dawn a, State-in. Tichuan, source hnih atangin an dawng ang a, an ni pawh an lo ziaawm ang a.

Tin, a state ang pawhin kan phurrit min lo chhawk ve ang a, kha kha a tha kan tih ang ber kha a ni a. Chuvangin, tun hma lamin kan Sorkar hmasa ten an lo dodal a, negative report-te an lo pe a; a thenin lem ang an lo der baw si a. Khang kha kan la hre theuhin ka ring. Vawiinnia a taka hmangaihtu ber anga han lan thar thut hi chu, an sulhnu, kan hniakhnu hi a la tharlam a, keini hi chu kan dinna ngaiyah kan la ding reng, ‘Central-in tih a tum phawt chuan, positive response kan pe ang’ tih kha kan dinna a ni a, kan dinna ngaiyah kan la ding reng a ni.

Tin, ‘link road nuai 218’ tih a ni em kha? Kha kha ‘in power-in a phak lo e; tiin min chhuhsak’ tih ang deuh hlek kha ka hriat dan a ni a, a dik em aw Pu Nguna kha? A dik maw? Kan lo en fel ang a. An power-in a phak chuan kan pe ang. An power-in a phak loh chuan, kan pe thei lo ang a. Chu chu a kal dan tur a ni ang ... (interruption)

PU C. NGUNLIANCHUNGA: Khawngaihtakin. ka sawi ang khan SE chin khan full-power an nei tawh a, LADC District Council khan SE an neih ve avangin, an power khan a tlin a ni.

PU LALDUHOMA, CHIEF MINISTER: Saw lamah full-power an nei anih chuan, ka hre lo. Amaherawhchu, helam State Sorkar hnuaiah chuan, SE chinin full-power an nei

lo a ni...(interruption)

PU K. HRAHMO : Pu Speaker, khawngaih. District Councils hi, khilai district level officer-te khi helai officer-te nena tehkhin chi anni lo; full power an nei ve; limit a awm tur a ni lo. Pawisa petu Central-ina ‘hei hi a theih e’ an tih ang chi ah te..)

PU LALDUHOMA, CHIEF MINISTER: A pawisa kha District Council sum nge State sum tih vel kha thliar hran ve deuh ngai ang a. (**Pu K. Hrahmo:** Pu Speaker, hei hi CPWD guideline a ni a.) Aw. nakinah a Minister hian a rawn chhang fiah leh dawn nia, ti mai ang.

Tin, ‘ambulance driver ten thla 7 hlawh la lo’ tih kha ka hriat vawikhatna a ni a. ka sawi zing a, in hre theuh ang a. Heng lawman, hlawh tlem te te la hovin hlawh an la har hi ka vei em em a ni. Engvangin nge chumi chen chen hlawh la si lo chu an hotute’n kan hnenah an rawn sawi loh, tih hi ka zawhna a ni. A department khan rawn sawi fiah vat rawh se. Mahni hnuaiah hnathawk hlawh la lo heti chen chen a an ngawihpui a nih chuan, an naute an hmangaih miah lo tihna a ni. Mizoram-ah staff welfare a chhiat zia hi ka hmu hnem tawh a, a hnuai lam hi kan ngaihsak lo, senior officer ho hian. Hna post vacancy hnawhkhah ah pawh hian a sanglam chu kan hnawh khat chak khawp mai a, hnuai lam erawh chu kan ngaihsak lova, collapse tep hi a tam tawh a ni. Chuvang chuan, hei hi awm tawh lo se ka duh a.

Ka sawi fo thin ang khan, Central atanga hlawh lo lut tur anih chuan, a lo lut tlai a ni thei a. Tin, a direct-in an account-ah a lo lut anih chuan, tih ngiahna kan hre lo. Direct-a an account a lut anih loh chuan, advance-in state sum kan lo pe lawk thei tih hi vawinah ka sawi leh duh a ni. Chuvang chuan, a department in advance-a kan lo pek tur kha lo chhawp ve mai sela, mi rualin hlawh kan lo lak tir ang a. Central atanga an ta tur a lo awm hunah an lo chhung khat vel eh mai ang. Chu chu a kal dan tur a ni. Hetiang hi thleng tawh lo se kan duh khawp a ni.

Tin, ‘urban head, rural hnuaiah a awm’ tih bawrvet kha, ‘head’ tih lampang hi chu ka ze i ve vak lo a. Amaherawhchu, thil hi mak tak tak hi a awm a. Tlangnuam RD Block hi Tlangnuam-ah a awm a ni; Aizawl khawpui chhungah RD Block a awm a ni ve tho mai. Champhai-ah te pawh khianin an veng hmingte khi a mak tawh khawp mai a, Vengthlang thlang lamah Venglai te awm daih tawh a ni a. Chuvang chuan, khalai head kha chu kan Minister-in a rawn sawifiah mai dawn nia.

Tin, Vanapa Hall kha, a tirah khan, ‘financial year liam mai turah hian engzah nge inmamawh kan lo bawksik ang che’ tiin khulama minister ten min duhsak a; chumi tur chuan hmanhmawh deuhin kan bei ta a ni. Fire station leh a dang dang tan pawh kan thehlut a. Tichuan, ‘Vanapa Hall i telh mai ang u’ kan ti a; hmanhmawh phe leng khan a tul kan tih em em vang pawh ni lo khan kan han telh a. Amaherawhchu, Assam Rifles hi kan sawn thei dawna a lang takah hian Vanapa Hall hi kan project atangin kan drop leh a ni. A la awm reng shelf-ah chuan; Vanapa Hall project hi. Amaherawhchu, ‘kan priority-ah i dah rih lo ang; a dang hi ngaipawimawh ang. Assam Rifles hi an chhuah chuan Vanapa Hall chep tak chung a lo tih thata sum tam tak lo sen hi a ngai lo thei mai ang em’ tih thilah hei chu keimahniin rilru kan thlak a ni.

Tin, tribal list kha, kum 14 lo liam tawhah khan 2021-ah khan helai House-ah Parliament-ah amend tir turin kan lo pass tawh a, vawiinah chuan engmah hmasawinna kan nei lova. Engnge a chhan kan tih dawn chuan, hemi kum 14 chhunga kan sorkarna chelh ho leh kan MP te kha kan zawh loh chuan, keinin a chhan kan hre ve lova. An nawr zui lo nge, a chhan kan zawh a ngai ang. Engnge an thlen chin kan zawt ang a, nawrzui dan te pawh kan ngaihtuah tlang ang chu. Central-a ruling, NDA member te kan nei hlawm a; Pu Speaker, BJP memberte pawh kan nei hlawm a. Hei hi chu thlaphanthlak lohah ngai phawt ang.

Tin, ‘tribal area-a awm leh’ tih kha, kan Opposition Leader in a rawn rawt kha a tha ka tikher mai. Tunhmain kan lo tlangaupui tawh a, intellectual tlemtein min co-opporate a, mipuiin an hrethiam tlat lo. Manifesto-ah zawrh kan tum a, a tla na dawn lo lutukin kan hria a, kan ti ta lo ringawt mai a ni. Lungrual taka keini hoin kan ngaihtuah tlang a nih chuan, a committee te pawh din ta ila, study group te pawh tha kan tih tlan chuan, hei hi chu re-introduce leh kha a ni mai a; a tha viau kan ti reng a ni. A administration hrim hrima kha a tha ka tihna ni lovin, hnam a him a ni, 6th Schedule hnuaiyah hian. Chu chu kan duh chhan ber a ni.

Tin, ‘Anti-Defection law sawlamah a awm ve lova’ an han tih kha, a ni viau mai a. Case te pawh a awm a, hei hi chu kan Speaker hian a hrechiang khawp a; a duh leh amahin rawn sawifiah se a tha ang e.

A tawpna atan kan sawi duh chu, lawmthu a ni a. Hmanni ah ‘wine’ tih kan sawilai khan kan MNF member zahawm tak takte, kum 17 chhung lai wine zawrhna dan lo siamtute khan an han duhlo der thut a. Mahse, vawiinah chuan an duh lo tak tak a nilo tih an rawn tilang leh hi, a lawmawm ka ti a. An wine zawrh kha kan zuar chhunzawm dawn a ni mai a, han huat tharna tur kha a awm lo reng a ni, Pu Speaker. (interruption)

PU LALRINTLUANGA SAILO: Pu Speaker, tuna wine zawrh hi kan duhlo kan ti a, kan duhna kan la tarlang lova, kan duh ngai dawn bawk lo a ni. MNF Party anga a rawn sawi anih chuan, kha kha chu ‘thu diklo a ni’ tih he House ah hian ka sawi duh a ni.

PU LALDUHOMA, CHIEF MINISTER: Pu Speaker, hmanni lawka sorkar kha an ni a, an zuar mek reng a. an zawrh lai kal mek zel nikhat pawh gap awm lovin kan chhunzawm dawn mai a ni zawk. An duh mek thil a ni e.

PU LALCHHANDAMA RALTE, OPP. LEADER: Pu Speaker Point of clarification: Kan sawilen deuh hi an pehhel len deuh laia chu - Zu Department kaltlanga an zawrh tura kha, kan chhuah chhana pawh kha department kaltlanga zawrh an tuma kha han sawifiah thei se.

PU LALDUHOMA, CHIEF MINISTER: Hei hi an rawn sawi nawn leh thin a, a buaithlak khawp mai. Tichuan, wine zawrh kan duhlo an tih chuan, an sorkar lai khan an titawp tur a ni. An ti tawp lova, a rules an siam a, an zuar a; ZPM an sorkar thlengin an zuar a. Tunah hian titawp lovin keiniin kan zuar chhunzawm dawn a ni. Kan danglam lo; inhnial tur kan awm lo. Engatinge kan inhnial tlat? Duh thuhmun, tih thuhmun inhnial tlat kha chu ka hrethiam tawh lo a ni, helai hi chu. Mipui hian mak an tih ngawt ka ring.

A dawt lehah chuan foreigner te, dignitary te, tourist Mizoram-a lo lut tan bakah Mizoram-ah damdawi atana mamawh doctor-in lei phalna a pekte tan; chu mite tan chuan; kum 1995

chho zu khap bur a nih lai pawh khan an lei leh an rawn ken luh chu phalsak an ni. Khati chen kha an sawisel si lova, i veilam a mite hian.

PU LALCHHANDAMA RALTE, OPP. LEADER: Pu Speaker, 2019 ah total prohibition awm kha paih vek a ni tawh a; tuna kan amend-ah khan, zu zawrhna tur dan thar telh a ni. A awmsa angin kan tiin, tuin emaw kohhran hruaitute pawh an hrilha dan a awm si lo kha; half-truth in thil kan sawi thin, thudik tluantling sawi hi a tul ka ti mang e, Pu Speaker.

PU LALDUHOMA, CHIEF MINISTER: Pu Speaker, zu zuarah min puha ‘zu an zuar’ an tih chuan, foreigner leh khatiang dignitary te, tourist lo kal hotel-a thleng, kha mite khan helaia excise man tawh sa an lo vuak keh mai mai ai chuan, lo dah tha sela, chuta mi chu an lei thei ang. Tin Doctor-in permit a pekte pawhin chuta mi chu an lei thei ang tih a ni a. Excise Department-in an zu man sa an hrallhna turte kha mihring tlemte chauh an ni; khawlaiah an zuar dawn lo; nang leh kei atan hian an zuar dawn lo, zu zuar a inpuh tehchiam tur chuan. Engatinge hmanah khan an lo puh tawh loh; 1995 ah khan kha Dan kha a awm reng a lawm? Kum tam tak zu khap chhung zawng zawng pawh khan kha dan kha a awm reng a, ‘zu an zuar’ an tih loh kha maw le. Engatinge keini kan nih avanga zu zuar a chhuah phet min tum tih kha a ni a.

Vawiinah hian ka lawmna em em chu, hmannah khan an han chhuak tau ngei a; mahse, a minister ngeiin khami atana pawisa hman tur kha tunah Demand-ah a rawn pulut a; tichuan inlamletin min vote pui dawn ta hi lawmawm ka ti a ni. Chhuah tauh a ngai dawn tawh lova, kan inlungual dawn ta a...*(interruption)*

PU LALCHHANDAMA RALTE, OPP. LEADER: Pu Speaker, kan House Leader hi a thu lak danah hian puitling deuhin kal se thain ka hria a. Demand-a sawi leh Bill Amendment-a a sawi hi a inanglo tih a hrechiantgu a niin ka ring a. Demand sawia in pass-pui loh ang hi chu ‘a fel lo e’, tiin puitling takin kan awm a. Tuna a sawi anga pass-pui loh in duh anih chuan, kan chhuak leh thei e. Khatianga sawi chi kha a ni lo. MYC Bill an sawi pass-pui kan duh lai khan, House Leader tawngkam uluk loh lutuk, kan hruaitu hmasate ‘rorelna dan siamtha duh lo’ tia, khati taka a hmusit avanga kan hruaitu hmasate thlavang hauha chhuak kan ni. House Leader hian a tawngkam hi uluk deuh se, tiin ka ngen nawn leh a, Pu Speaker nangmah kaltlangin.

PU LALDUHOMA, CHIEF MINISTER: Pu Speaker, an sawi nawn takah chuan; an dan siam hnuaia hnathawktu tur lak dawnin interview emaw, written emaw, DPC emaw kaltlang ngai hauh lova duh duh lak theih dan an siam kha chu, ‘ram hmelma a ni’ ka tih kha, ka la ti reng. Tin, pawisa duh duha hman theih dan an siama kha, eng rilru pui nge an siam ang? Khatiang dan sawimawi kha a zahthlak fe zawk lo maw? Kha kha, ‘a thalo kan siam tha’ ka ti mai a ni. Chuvang chuan, a diklo hi chu kan do mai a ni, keini chuan; thil diklo hi chu zuk sawimawi vak ngaihna pawha awm lova, tawngkam thlum tak zuk hmanna tur pawh a awm lova. Anmahni zawk hian ti hian min rawn cho phawk thin a, chu chu kan buaina a ni zawk a. Chuvang chuan, vawiinah pawh hian chhuak tau tawh lo sela, min vote pui tlang dial dial turin ka ngen duh a ni.

Amaherawhchu, Excise Amendment Act kha an duhlo tak zet a nih chuan, khami tihpuitlinna tura minister-in a demand a putluha pawh hi duhlo tlang mahse a inawm

khawp. Mahse, chu chu ‘duhlo tlang rawh u’ ka tihna a ni lo. Pu Speaker, vawiinah chuan kan inhrilhfiah tawh a; Mizo mipuiin kan thu inchuh pawh an hrechiang tawh a. Chuvang chuan, a mimal te te pawhin an sawi a, “tha ka ti; ka vote pui thei ang,” an ti vek tawh a. Chuvangin, vawiinah chuan min vote-pui thei dawn ta hi lawmthu ka sawi mai a ni...*(interruption)*

PU. C. NGUNLIANCHUNGA: Pu Speaker, Point of Order: Audit chun chang kha chu hetah, a minute ah Chiang takin a awm a ni. A hnalak chungchang te kha chu a lo awmlo a nih pawhin, kan sawisel lo; mahse, audit chung chang kha chu gazette ah Chiang takin a awm a ni. Kan House leader khan ‘ka sawisual a ni’ ti mai sela.

PU LALDUHOMA, CHIEF MINISTER: Kha lai kha chu lo nghak ve phawt ang hmiang maw le; a minister-in rawn sawifiah rawh se, phawtina. A rawn sawi dawn, a windup-na ah.

DR. K. BEICHHUA: Pu Speaker, i veilamah hian Congress an awm a MNF an awm a, BJP kan awm a; BJP ina kan chhuahsanna chhan chu, thil hi cheng khat man kan va lei pawhin, a zuartu hnenah cheng khat man tlem te kan lei a; kha kha a zuartu atang kan va lei a ni. Nuai khat man kan va lei pawhin a tam deuh a, a zuartu hnen atang a kan lei tho a ni. Chutiang chuan, Excise-in a zu an man confiscate tur an zawrh kha kan duh lova, kha kha kan chhuah chhan a ni.

PU LALNGHINGLOVA HMAR, MINISTER: Pu Speaker, MYC chungchangah khan insawifiahna hun hi min la pe lo hrim hrim a, Pu Speaker, rem i tih chuan, ka la rawn sawi ang e.

PU LALDUHOMA, CHIEF MINISTER: Aw le. Pu Speaker, buhfai ka zuar ta a, dawr pawh ual au takin ka hawng lova; ka in kil khatah ka dah ta mai a. Chu chu a duh duh lei a thiang lova, kan vengam mirethei zual YMA ten chhawmdawl ngai an tih mi-tlemte tan chauh lo zuar ta ila, chu chu mi zawng zawng tana buhfai zuar ka ni lo; mi tlemte tan a zuar ka ni. Chutiang chiah chuan, Excise Department ina an zu lo kawh lei thei turte hi chu mi tlem te an ni; mipuiah an zuar lo tih hi chu kan hre theuh a. Chuvang chuan, vawiinah hian zu zuar tur pawhin min nawr ta vak lovin ka hria a, a lawmawm ka ti hrim hrim a. Lungrual takin i pass tlang mai tawh ang u. Ka lawm e.

SPEAKER : Aw le. Helai hian tlem han comment ve ka duh a. House record ah mi rawn pe a; hei a copy pawh ka hmaah a awm a. MYC chungchangah khan, “The Commission shall maintain proper accounts and other relevant records and prepare annual statement of accounts in such form as maybe prescribed” tih a awm a. 1) Hetah hian eng angin nge; accounts leh records te chu vawn a ni ta em; eng angin nge vawn a nih, tih chu kan minister-in a rawn sawi Chiang thei turah ngai ila.

2) “The accounts of the commission shall be audited by such authority as may be prescribed” a ti a. Kha kha audit a ni ta em; engnge prescribed a nih, tih pawh kan minister-in a rawn sawifiah turah ngai ila; kha lai kha kan lo inhnial chiam kha a tul lem rih lova. Helai hian, ‘record fel tak maintain a ni e’ tih kha, hetah tih fiahna a la awm lova.

3) Tin, audit a ni ta em; tum engzat nge audit anih; prescribed a ni em, tih kte pawh ha nakinah kan minister-in a rawn sawi turah ngai ila.

PU LALCHHANDAMA RALTE, OPP. LEADER: Pu Speaker, tawite khawngaihin. Kan House boruak nuamlo tep awm a awm a. Min hrethiam la. Kan House leader thu han sawi, “hmannia in pass duh loh kha, tunah pass-pui in duh leh ang a ni a” a tih lai khan kan member-te rilru hi a tina em em a; hei kan inkhap hram hram a. ‘E khai, puitling takin demand hi chu in passpui a tha e’ kan tih laiin, a then hi chuan kan chhuak mai ang e te pawh an ti tawh a. Amaherawhchu, he House mawina, convention kal ve thin a awm a. Khawngaih takin khalai kha chu kan House Leader hian expunge turin emaw dil se a tha lo maw?. He House zahawmna hi i vawng hram hram teh ang u a, ka’n ti a ni.

SPEAKER : A kha lai kha chu hriatthiam loh tur awmin ka hre lo deuh hlek a. Nia, kan opposition lam pawh kha in thiamawm tho rualin. A sawi nia ka lo hriatthiam dan chuan, “hmanniah khati khan kan inhnial a, he dan hi pass tlak a ni lo e tiin min chhuahsan ta kha a ni a. Tichuan, wawiinah he Bill tihpuitlinna tura sum mamawhte hi min pass-pui leh dawn a, a lawmawm khawp mai; thu-khat vuanin kan kal ta a ni mai lo maw aw” a tihna ang deuhah kan ngai a, khalai kha. (**Pu Lalrintluanga Sailo:** Pu Speaker, Bill leh Demand hi a inang ngai lo reng reng. *(interruption)*)

PU ROBERT ROMAWIA ROYTE: Pu Speaker, Ni e, kan House Leader a zahawm a, experience nei tak pawh a ni a. A tawpa a rawn tih vel dan kha chu a sim ve hi a ngaiin ka hria. (**Pu Lalmunapuia Punte:** Pu Speaker, i veilama mite pawh hian an tih dan hi an sim ve chu a ngai a ni. PMJVK a rawn sawi dan te pawh kha a dik lo lutuk. Kan House leader hi a zaizapa House uaptu pa ber tur hi, buaina siamtu ah a tang thin a ni.)

SPEAKER : Aw le, aw le; khawngaihin. (**Pu Lalmunapuia Punte:** Zu zuar, public a zu zuar angin. Chuvang chuan, a zaizap zawnga tih theih pawh a ni lova; buaina siamtu chu i veilama mite hi an ni.)

PU LALDUHOMA, CHIEF MINISTER: Pu Speaker, hetiang, tun tum kan Session chhunga helaia kan han rik laih-laihna chi reng reng hi helam atanga a bul kan tan hi a awm miah lo a ni; sawlam atangin a bul an rawn tan zel a. Tichuan, tunah pawh khan hmannia an tawngkam hman ngai te te tho khan helam hi min rawn charge leh a, kan ngawi reng thei bik loving; khang kha chu kan sawifiah ve a ngai alawm. “Wine hi a rules siam tu an ni e; kum 17 chhung, hmannia an tlak thleng khan an lo zuar a ni,” tih thu dik kha ka withdraw thei lo. Thudik a ni kha kha. Tin, ‘in zuar’ an tih pawhin, mipuiah kan zuar lo. Mipuiah chuan zuar dawn ila, dan tam tak siam a ngai ang. Mi tlemte foreigner lo lut leh khangte tan chauh khan a ni. Hei hi ‘zu zuar kan ni lo e’ tih kha ka sawi leh mai a ni a. Kan sawilai lo huat em em tur a awm em ni?

PU LALCHHANDAMA RALTE, OPP. LEADER: Pu Speaker, kan sawilai lo a ni a sawi ni. Kan House Leader kha, point-a kha chu, a point ni se langin; “Min pass-pui a nih chuan, hmanni ami kha inpawm tihna ani” a tihlai zawka kha a ni a. Khalai tawngkam zawka kha he House ah hian a mawi lova. Thu chu kan inchuh ang; ruling leh opposition kan awm a, thu chu kan inchuh tur a ni. Amaherawhchu, kan thu zawka kha a hre reng a. Amaherawhchu, “he House-ah in pass-pui anih chuan, hmanni Bill kha in pawmpui a ni” tih lai zawka kha; kha lai thu kha a ni e. Khatiang zawng khan ngaihtuahna helaiah hian;

kan House Leader hian a tlang kir sawi hi a hrat riau mai a, ka han ti a nih chu.

DR. K. BEICHHUA: Pu Speaker, kan House Leader hi hetah chuan pa ber ani a, nau te ina kha deuh hlek a kanhan tawng pawh hian zaizap tu ti nep tu, tha tak a minlo chhang tu ni se chuan hetiang buaina hi a awm lo vang. Chuvang chuan patling takin pa ber nih hi min hriat sak se a tha hle in ka hria.

PU LALMUANPUIA PUNTE: Pu Speaker, kan House Leader an puh dana kha a dik chuang lo. Hmanni ah bill an against a, an pass duh lovin an chhuak a. Vawiinah hei min pawmpuiin min pass-pui thei dawn avanga lawmthu sawina a ni mai a.

PU T. LALHLIMPUIA: Pu Speaker, kan House Leader hi chu tia duh duha tih theih a ni dawn em ni?

PU B. LALCHHANZOVA, MINISTER: Pu Speaker, i veilama mite hi an huat thu a chhe khawpin ka hria; keini kan thu a, kan ngawi a; helaiah hian an inti-senior viau a. An kan Chief Minister, kan House Leader an han tih vel danah hi pawnlama lo entu mipuite pawh hian lutuk an tih ka ring.

PU LALDUHOMA, CHIEF MINISTER: Pu Speaker, he House chhunga zah hlawh lo ber chu House Leader hi ka niin ka hria a, beih ber leh beih rawn ber pawh ka ni. Tawngkam mawi lo pawh ka chungah hian sen a tam ber; khang kha chu ka tuar thei. Amaherawhchu, point inchuh kan nei a, chu kan point inchuhah chuan ka hre sual palha, ka tisual palh a nih chuan, ka in withdraw duh a; a dik anih chuan ka in withdraw ngai lovang. Chu chu a ni. Vawiinah pawh kha ti khan kan inhnial bap bap na a; kan han sawi a, a mal te tein. “E a tha e, i pass tlang ang u,” kan ti theuh a. ‘A lawmawm e; i pass dial ang u’ ka ti mai a ni. Chuvang chuan, tunah pawh tha taka pass tlang dial turin ka insawm nawn leh a ni.

PU LALCHHANDAMA RALTE, OPP. LEADER: Pu Speaker, kan tih lai tak chu; kan House Leader khan khawngaih takin min hriat sak sela. Hmannia “Bill in chhuahsan kha in pawmah ka ngai” i tih lai tawngkama kha a ni kan tih ni. Kha lai tak kha chu a dik lo deuh hlek a. A chhan chu helamh opposition group zawng zawngin, patlingin ‘kan ram tan’ tiin House kan chhuahsan a; kha kha chu a kal tawh a ni a. Chuvang chuan, kha lai thil te kha chu han sawi nawn loh kha a va tha ve tiin, ka’n sawi nawn leh a ni e.

SPEAKER : Awle awle, a chiang e, ti khan.

PU C. LALSAWIVUNGA, MINISTER: Pu Speaker, ni e. Kan thu inchuh kha a tawn tawn khan ngun takin han ngaithla ila. Kan Leader-in a rawn sawi kha in man fuh lo deuh em ni ang tih ka nei a. “Hmanniah bill pass ve duh lovin House atangin Pu Speaker, i veilama mite an chhuak a. Vawiinah erawh chuan hlim tlang takin Demand kan sawi ho a, kan pass tlang thei dawn a, a lawmawm e” tih kha a rawn sawi tawngkam kha a ni mai a. Chu chu kan hriatthiam kha a thain ka hria a. Tin, a ngaih dan a rawn sawi pawh kha, Leader a ni a, a ngaih dan a sawi kha a zalenna pawh a ni e.

SPEAKER : Aw le, i duhtawk ang aw. Engpawh nise, kan thu-ah kan chiang tlang a. Kan ngaih dan te, tha kan tih dan te, kan hmel inan loh ang ang hian

ngaihtuahna pawh a inang vek seng lova. Chuvangin, kan thu inchuh kha chu, hmannah opposition lamte pawhin in duh loh thu insawi kan hria a, ram pumin. Tichuan, tunah khan House Leader-in a rawn sawi i ngaihmagh lai kha kei ka lo ngaihthlak dan chuan, nichina ka sawi ang khan leh tuna kan Minister zahawm takin a sawi ang deuh hlek khan, “Hmanni ah khati khawp khan kan indo a, thu kan inchuh a ni a; tunah kan pass ho tur hi a lawmawm hle mai” a ti ah ka ngai deuh mai a. (**Pu Robert Romawia Royte**: Pu Speaker, chuti chuan ti sela chuan pass pawh kan phur khawp ang. Chuti chuan a ti lo alawm).

DR. VANLALTHLANA, MINISTER: Pu Speaker, hei House-ah hian term hmasa-ah te kan han awm ve a Pathian leh mipui zarah keini pawh kan fel bik lo mai thei a, i ding lampanga mite pawh. Midang an din laiin lehlamah keini pawh kan lo ding tawh thin tho a, mike hi kan on ngai lo a ni. Speaker kan ngaichang a, ‘Pu Speaker’ kan ti a, kan au lauh lauh a. Speaker-in min rawn ena min khap zui loh chuan, a control room atangin an rawn on thin a ni. Tun tumah hi chuan a remchang apiangin kan hmet ta mai niin ka hria a. Tin, hetia kan din tawha microphone on anih chuan, House recording-ah te a lo lut ta a; hei hi chu tih chhonzawm loh ni sela a tha khawpin ka hria a. Kan on a, kan tawng nghal mai zel a; keini pawh kan fel bik lo ka tih kha. Sawi duh kan neih chuan Speaker address ila. Tin, Speaker-in “E, thu rawh, a tawk e” tia thu tura min tih anih chuan, kan thu mai tur a ni a. Speaker-in min ngaichanga, min lo en vang vang anih chuan, control room atangin a ti thang tawh te an awm a, microphone an lo on mai thin a. Hei chu tih chhonzawm loh a tha khawpin ka hria a, chu chu rawtna ka rawn siam a ni e.

PU VANLALHLANA, MINISTER: Ruling leh Opposition kan ni a, kan ngaihdan hi a inang tak tak dawn chuang lova, chuvangin, a chapter hi close mai la, hmabak kan la nei si a.

SPEAKER : Aw le; A dik e. Hei hi, House-ah reng reng chuan ka hriat chinah chuan, Speaker-in ‘A tawk e’ an tih hi chuan, an ngaipawimawh ve thin hi chuan ka hria a. Ka rawn ti thin a, amaherawhchu, kan zalen tlang a member-te; kan zalen tur a nih tho rualin, tuna kan member sawi pawh kha hun hmasa lama tih dan phei chu a ni.

Amaherawhchu an han ding a, ‘Pu Speaker, i phalnain’ kan han ti a, kan duh thleng thleng chhiara kan han ti mai hi chu; Speaker remtihna kha a ngai ve a nia aw, hengte pawh hi. Han sawi zel takah chuan, chutiang dan chu a awm ve a nia. Engpawh nise, sawi leh sawi hnu, ruling leh Opposition awm kan ni a, kan ngaihdan te a inang vek lova, tikhan duhtawk ta ila. Kan Opposition lamte pawh inhriatthiam loh kha khati zawng kha ni lo hram sela. Tunah thukhat vuanin kan pass thei dawn a a lawmawm hle mai, tih lai kha ka rawn sawi nawn leh ni teh se.

Tunah chuan, Minister zahawm tak Pu C. Lalsawivunga khan kan sawihona te windup-a, sawifiah ngai a tihte sawifiahin, a demand te House-a pass rawn dil nghal turin ilo sawm ang u.

PU C. LALSAWIVUNGA, MINISTER: Pu Speaker, ka lawm e. Hei waviina ka demand sawihonaah hian mi 25, kan House Leader nen mi 26 velin kan sawi niin ka hria a. Demand No. 34 - AH & Vety hi member 22-in sawi a, Demand No. 19 - LAD hi member 16-in an sawi a, Demand No. 23 - Art & Culture hi member 17-in an sawi a. Tin, Demand No. 27 - District Council & Minority Affairs hi member 12-in an sawi bawk a. Chutiang chuan, waviinah ka demand te phur tak leh hlim tlang takin member zahawm tak takte’n min sawipui a, thurawn te, fuihna te an rawn sawi chhuak a. Tin, thil tul leh pawimawh

chi hrang hrang kan tih tur leh kan tih loh turte an rawn sawi tel bawk a, a lawmawm hlein ka hria a ni.

Tichuan, Pu Speaker, kan member zahawm tak tak ten'a an rawn sawi a kha ti hian kan lo chhinchhiah vek a; a tam angreng khawp mai a. Ziaka inpek kha rem kan tih tlan chuan kan tum mai a ni ang chu.

SPEAKER : Minister zahawm tak kha, a hmasa lamah khan kan sawi tawh a. Ziaka inpek mai kha memberte'n tha an titlang deuh a. Amaherawhchu, department-in chanah khan han sawi awm ngawih ngawiha inngaih, in achievement ang chite erawh kha chu a leng vek tho a. Tin, chhiar theih loh pawh a ni chuang lova, thil a awlsam zawkna tura sem kha a inthlahrunawm chuang lo e kan ti anih chu.

PU C. LALSAWIVUNGA, MINISTER: Aw le. Pu Speaker, kan memberte'n an rawn ngaimawh deuh erawh chu han react hmasa ta ila.

Demand No. 27 - District Council & Minority Affairs Department:

Engvangin nge LAD demand kan la lay tih lai kha han sawifiah tulin ka hria a. Ni 20.12.2024 khan Council of Ministers' meeting-ah rel a ni a. Rural Development Department leh Local Administration Department hi amalgamate tha tih a ni. A chhan pawh LAD leh RD hnathawh dan hi a inang a, kan inthen hrang hleithei lo a ni. Entirman: Ni 100-inhlawhna a lo awm chuan VC-te tel lovin RD ten an thawk thei si lova; keiniin Finance Commission Grant kan han khawih khan hetah BDO tel lovin kan ti leh thei bawk si lova. Chuvang chuan, heng department pahnihte hi chu hmunkhata awm chi an ni e ti khan kan rel ta a ni.

Amaherawhchu, tun tumah hian zawhna lo awm chu, 'budget-ah engatinge LAD demand hi lay a nih' tih a ni a. Hetah hian tawite ka sawi thiam dan chuan, Budget Head of Accounts hi keimahni Mizoram Finance Department-in an duh duh dana an lo khawih danglam theih a ni lova. Chuvang chuan, budget head zawng zawng kha Comptroller & Auditor General Office lam nena in negotiate tur a ni a. Chu chu la tihfel hman loh anih avangin LAD Demand hi lay a tul a. A chhan chu, a thawktute'n hlawh an lak a ngai a, VC-te pawhin hlawh an lak a ngai a, office expense leh medical bill-te a lo ngai a; thil chi hrang hrang siamrem ngai kha a awm a. Chung zawng zawng chu la peih loh deuh anih avangin he demand hi lay a ngai a ni.

Tin, ADC anti-defection law chungchanga kan House Leader-in a rawn sawifiahna kha a ngaih pawimawh awm khawp mai a. 6th Schedule hnuaiah ADC-te hi chu govern an nih avangin, anti-defection law kha 6th Schedule hnuaiah siam theih a ni lo a ni. Amaherawhchu, 125th Indian Constitution Amendment bill buatsaih mekah hian anti-defection law hi recommend a ni tih erawh chu ka chhan theih dan tawh a ni hrih mai e. Tin, MVU chungchang kha Pu Speaker, nuai 406 central atangin sanction kan hmu tawh a, amaherawhchu kan inpe thei tlat hrih lo. A chhan chu, SNA SPARSH-ah min luhpui a, MVU hlawh lakna tur account hi RBI-ah a la fel loh avangin, sanction siam theih a la ni rih lo. Chuvang chuan, pawisa awm sa reng tawh si khan kan pe thei lo a ni. Hei hi a fel thuai dawn a. A fel ve leh an zavai hian an hlawh hi an hmu dawn a ni tih kha ka han chhan thiam dan chu a ni e. A bak chu ziakin kan i pe dawn tho a. Tin, eng emaw hriatfiah duh kan neih chuan sawi te pawh kan la sawi ho zel turah ngai ila... (*interruption*)

PU C. NGUNLIANCHUNGA: Pu Speaker, khawngaih takin. Anti-defection law chungchanga recommendation 125th tih kha nichina kan House Leader-in a sawi ang khan, Mizoram Sorkarah khan comment pe turin an ti ta a. Mahse, comment kha a awm ta lo a ni.

PU C. LALSAWIVUNGA, MINISTER: Kha lai taka kha sawi tawh ang khan, 6th Schedule hnuai a nih avangin District Council-ah khan kan siam ve a, Governor pawhin a assent a, Law pawhin a vet vek a; hman mai tura kan ngaih laiin High Court-ah miin an va challenge ta a. An challenge khan, 6th Schedule hnuai-ah Anti-Defection amendment a awm loh chuan a tih theih loh a ni e, tih kha a ni a. Kha lai kha chu, keini chuan kan tih tur kan ti a. A bak chu keini tih tur a ni lo a, kan va hriatpui pha tawh lo a ni.

Demand No. 19 - Local Administration Department:

LAD chungchang hetiang hian tawite in sawi ka'n tum anga. Local Administration Department enkawlina tur hian sum ruahman hi a vaiin ₹2,25,15,82,000.00 a ni a. Kum kal ta 2024-25 sum ruahman BE-a kum thar 2025-26 a sum ruahman BE punna hi 1684.42 lakhs lai a ni. State sum bawm atanga hman tur chu ₹12,485.82 lakhs a ni a. Central Sorkar atanga hmuh beisei chu ₹10,030 lakhs a ni. Local Administration Department hi department pawimawh tak, Mizoram a (ADC area huam lovin) tualchung in awpna (Local Governance) buaipuitu, Village Council-te enkawltu kan nih avangin department lian ni tawh lo mah ila a pawimawhna hi engtik lai mah in a nep thei lo a ni.

Tunah hian LAD hnuai ah Village Council 544 kan nei mek a. Heng kan VC hlawh tur hi 2nd Mizoram Finance Commission recommendation angin Finance Department chuan min pe thin a. Kumin budget-ah pawh kan VC te hlawh tur 285.50 lakhs hi dah a ni a. Member zahawm tak tak ten an sawi, hlawh chungchangah khan engmah sawi theih la nei lo mah ila, 16th Finance Commission-ah kan Chief Minister zahawm tak kaihhraina hnuai ah VC te hlawh tihpun kan dil mek a ni.

Tin, 2nd Mizoram Finance Commission hian GIA General ₹2,470.42 lakhs kumin chhunga hman turin recommend a ni bawk a. Kan budget-ah pawh tarlan a ni. Hei hi thingtlang khaw hrang hranga street light kan chhit man bill pekna atana hman a ni tlangpui a. Tin, hemi bak ah hian hmasawna hna thawhna atan a tul anga hman a ni bawk a ni.

Kan budget-a pawimawh em em dang leh chu, 15th Finance Commission 'Grant for Rural Local Bodies' kan tih, kan VC ten an khua theuh a hmasawna hna thawhna atana an hman tur 74 crores hi a ni a. Ministry of Finance instruction angin he grant 60% (₹4,440 lakhs) hi tied grant a ni a. Chu chu Sanitation leh Supply of Drinking Water atan chauha hman tur a ni a.

Heng hnathawh turte hi Gram Sabha ah mipuiin an thlangin an pawm thin tur a ni. Tin, untied grant, VC ten an khua theuha mipuiin Gram Sabha hmanga hnathawh tur an thlan chhuah te thawh nan ₹2,960 lakhs dah bawk a ni. Hei pawh hi Gram Sabha thuneihna a dah lal hle a ni.

Heng Finance Commission grant te hi state Sorkarin a dawn ve leh VC-te account-a chhung lut turin department-in a buaipui nghal thin a. Pawisa dawn atanga ni 10 chhunga release a nih hian penal interest Sorkarin a chawi thin avangin, engmah chawi lo turin Finance Department-te nen theihbtawp chhuah ho thin a ni a. Tichuan, department

account-ah pawh lut kawh tawh loin Treasury atang hian VC-te account-ah direct-in transfer thin a ni. 15th Finance Commission Grant hi 2021-22 atan 1st installment, kum 2021-a hmuh bak chu chhan hrang hrang avangin January, 2024 thleng khan hmuh theih lohvin a khaih lak a ni.

Tichuan LAD-a thawktu ten theihtawp chhuahin hma an la a, Chief Minister leh Finance Department-a officer-te'n tihtur tul ang ang min tihsak zung zung a. Hetianga kan tanhona avang hian 15th Finance Commission Grant chu kum khat emaw lek chhungin wawi thum lai (installment thum) hmuh a lo ni ta a. Hei hi thil lawmawm leh chhinchhiah tlak tak a ni.

LAD hian Ministry of Panchayati Raj hnuai ah Rashtriya Gram Swaraj Abhiyan (RGSA) atangin CSS kan dawng thin a. He sum hmang hian District Headquarters hrang hrang a District Panchayat Research Centre Building-te kan sa a. tunah pawh hian District thar - Hnahthial, Khawzawl leh Saitual bakah Lawngtlai ah DPRC sak mek a ni a. Tin, VC House (Panchayat Bhavan) sak nan te, VC-te training nan te, VC-te state chhung leh pawn a Panchayat hnathawk tha tlawhpui nan te, VC-te computer set pek nan te leh hna dang eng emaw zat thawh nan heng sum hi kan hmang thin a ni. Tun Financial year chhung hian Panchayat Bhavan hi Village Council 48 sak thar a ni a. Tin, Village Council 5-ah Common Service Centre dah a ni bawk a ni.

Tin, VC 88-te hnenah e-governance an kalpui theihna tur leh tangkai zawka mipui rawng an bawl theih nan computer set pek an ni a. Kum kal mekah crore 103 lai Ministry of Panchayati Raj hnuai Central Executive Committee (CEC) -in min approved a, chu chu budget-ah dah a ni a. Amaherawhchu, crore 10 chauh tun thleng hian min la release rih a, kumthar 2025-26 chhung hian kan budget-ah crore 103 dah leh a ni. A tam thei ang ber haichhuah tumin tan kan la chho mek a, kan ke chheh pawh a dik chho dawnin kan hria a ni.

Pu Speaker, RGSA 2nd installment, crore 2 hmanni mai Ni 13.3.2025 khan a vawikhatna atan kan state hian kan dawng a. A amount hi tam lo mahse, kan state-in RGSA 2nd installment a tumkhatna atan kan dawng hi kan lawm ve hle a ni. LAD-in hmuh hrang hrang 11-a park kan neih te hi mimal hnenah outsource an ni hlawm a. Tunah hian Sorkar-ah sum eng emaw zat kan chhung lut ve a ni.

Tin, hmachhawp tawite a point chauhin han tarlang leh ila –

1. Village Council zinga Panchayat Bhavan (VC House) la nei lo zawng zawngte Panchayat Bhavan/VC House pek vek tum a ni a. Hetah hian nikum lama kan dilna atangin VC House 313 sakna tur hi min rawn pawmsak tawh a.
2. Tin, Village Council computer set la neilo zawng zawng computer set pek vek tum a ni bawk a. RGSA Scheme hnuai a mi vek kha an ni. Tin, Aizawl, Lunglei, Kolasib-ah te District Panchayat Resource Center sak turin ruahmanna siam a ni.
3. Village Council-te Own-source revenue leh sum dehchhuah tihpunna turin leh Self Help Group Innovative Projects leh Economic Development Income Enhancement Project hmanga nasa zawka tan lak tum a ni a, ke pawh eng emaw che kan pen tawh a ni.
4. Tin, VC dan thar te a lo awm a, waviinah pawh kan ngaithla a, tun laiah chuan kan hnathawh leh thil tih reng reng hi internet kaltlanga tih te a lo ngai tawh avangin, training-na tha hi an mamawh a. Chuvangin, Village Council te training pek te pawh tum a ni a.

5. Tin, Mizoram thingtlanga chengte street light tha an neih theih nan project te pawh siamin, thehluh a ni tawh a ni.
6. Tichuan, thawktu indaihlohna chungchangah staff indaihlohna avangin department chuan hna thar lak hi DP&AR leh Finance ah kan dil a, kan thehluh a; kan dilna ngaipawimawhin JE, UDC, LDC, Section Assistant leh Group D te lak min phalsak a, an chungah kan lawm em em a. Hun reilote ah thawktu thar kan neih thuai kan beisei a ni.

Demand No. 23 - Art & Culture Department:

Department enkawlna tura sum ruahman hi a vaiin ₹14,83,89,000 a ni a, kum kal ta 2024-25 sum ruahman BE aia kum thar 2025-26 a sum ruahman BE punna hi nuai 24.69 a ni. Art & Culture department din chhan bulpui ber chu kan pi-pute nun dan tha leh chin dan mawi te a ral mai loh nan leh thangtharte hnena hlanhhawnga, kan hnam tihdan tha leh culture a boral lohna tura theih tawpa hnathawh hi a ni a. Kan department hian Tribal Research Institute, Museum, Library, Archive, Institute of Music and Fine Arts leh Archaeology Wing te kan enkawl a. Heng te hi an pawimawh em avangin thumchaka tihchangtlun tumin hma lak zel a ni.

Tichuan, kum kal ta a kan hmalakna a tlangpui chauh tlem han tarlan kha thain ka hria, Pu Speaker -

Kan Mizo nun dan tha leh ze-mawi kan pi-pute zai leh lam hrang hrangte thangtharte'n kan theihngihl mai loh nan leh kan chawinun zel theih nan program hrang hrang – Chapchar Kut, CM's Running Trophy on Mizo Cultural Dance Competition, MUP Zai Intihiak leh Cultural Meet khaw hrang hrangah te buatsaih a ni a. Kumin Chapchar Kut 2025 pheih kha chu kum dang zawng aia ropuia hman niin, Mizo mipuite mai bakah hnam dangte pawhin min hlut pui hle a. Kan Kut-pa thuchah kha a hmuna kal te leh tv leh internet atanga lo thlirtute pawhin an hlawkpui a, kan za vaiin kan hlawkpui niin kan hria a, kan lawm hle a ni.

Hei bakah hian Institute of Music and Fine Arts ah thalaite tan mizo-zai leh lam bakah modern music zirna course kan kalpui a, mi tam tak zir chhuak kan nei tawh a ni. Tin, Cultural Club hrang hrang an awm a, College ah te pawh an awm a, chung mite chu kan department Art & Culture ah hian affiliate an rawn dil a. Chung kan affiliate hote chu Mizoram pawnah NEZCC Program hrang hrangah tirhchhuah an ni thin a ni.

Pu Speaker, sum lama harsa lehkhabu ziaktute tanpui nan an lehkhabu ziah chhut man 75% chu kan department-in Mizoram Publication Board kaltlangin kan tanpui thin a ni. Hei bakah hian NGO, MUP, MHIP leh YMA te hnenah Mizo thum leh bungruate 75% tum sakin kan pe thin bawk. Ministry of Culture atanga tanpuina kan dawn atangin District Museum Lunglei, tha taka sak chu July Ni 19, 2024 khan hawn a ni a. Mipuiin an hlutin tlawhtu pawh an thahnem thin hle. Tin, hei bakah hian, Siaha ah kumin chhung hian Regional Museum thar sak tura ruahmanna chak taka kalpui mek a ni bawk.

Mipui nawlpuiin awlsam zawka lehkhabu thate kan chhiar theih nan khaw hrang hrangah YMA te nen tang hovin recognized Library 511 lai kan nei a. Heng Library building te hi Art & Culture Department kal tlangin Raja Ram Mohan Roy Foundation, Kolkata atangin a sakna, siamthatna leh lehkhabu leina atan fund dawn thin a ni a,

mipuite'n kan tangkaipui hle a ni.

Pu Speaker, Mizoram Public Records Act leh Rules mumal tak kan nei a, nikum lamah te amendment tih a lo ni tawh a. Kan hnam rohlu leh kan documents hlui pawimawh tak takte kan State Archive-ah kan vawn thata, nakina kan tu leh fa, thangtharten an rawn chhawr tangkai tur thil kan hnutchhiah theih nan, Sorkar-department zawng zawnga official te thawhpuih kan sawm a. Hei hi ngai pawimawh ila. A pawimawhna - record leh thil hlu vawnthat hi uar leh zuala kan kalpui a ngai tak meuh meuh a ni.

Tin, kan pipu te chanchin chhuina kawngah hian kan la thleng thui lo hle a. Kan history leh thlang kan tlak dan te mumal zawka kan hriat theih nan Art & Culture chuan NEC, Shillong atanga sum kan dawn hmangin tun thal liam ta (nikum) ah khan Dungleh leh a chheh vel ramah Archeological Exploration & Excavation neih a ni a. Hmanlai bungrua hlui leh ruhro laihchhuahte hi laboratory hrang hrang Beta Lab., Florida, USA, Birbal Sahni Institute of Palaeosciences Lab, Lucknow-ah leh hmundangah te thawn a ni a. Carbon Dating, DNA sequencing, X-ray, diffraction leh a dang te test tura thawn niin result mumal tak hriat thuai pawh kan beisei a ni.

Pu Speaker, Mizoram chhunga tribal hrang hrangte chanchin zirchian leh an hmasawna turin Tribal Research Institute chuan hma nasa taka la. Mizoram chhunga tribal te chanchin - an history, an sakhua, an zai leh lam, an hnam tih dan phung hrang hrangte zir chiangin, Seminar Workshop/Symposium te buatsaih a ni a, research paper leh lehkhahu thahnem tak tih chhuah a ni. Tin, colonial period hunlaia lehkhahu leh document hlu te dah thain mipui tana tul dan angin kan re-print thei bawk a. Mizote'n kan chhawr em em Pu Buanga Dictionary te pawh mipui tan min chhawpchhuah sak bawk a ni. Heng hna hrang hrang kan thawhnaah hian sum indaih lohna kan neih nasat thin avangin, kan beisei leh duhthusam angin hma kan la chak thei lo a. Planning Department kaltlangin Ministry of Tribal Affairs-ah TRI tihhmasawna tur fund te kan dil ang a, kan harsatna zualpui chu min phuhruk sak ngei kan beisei a ni.

Pu Speaker, kum kalta chung khan Central sorkarah project proposal DPR eng emaw zat Ministry of Culture leh NEC-ah te thehluh a ni a. Chumi bakah Vanapa Hall sak thatna tur te, PMJVK scheme hnuaiah library building sakna tur project proposal eng emaw zat Ministry of Minority Affairs leh Ministry dangah te kan theh lut a ni. Tin, RRRLF, Kolkata in sum min pek dan azirin sorkarah fund dil belh te pawh kan la ngai dawn a. Tin, thildangah te pawh a ni ang a. Hengte pawh hi Pu Speaker, sawina remchangah ka'n hmang a, kan sawi lang bawk a ni.

Demand No. 27 - District Council & Minority Affairs Department:

DC & MA enkawl na tura sum ruahman hi a vaiin ₹6,51,14,13,000.00 (cheng nuai sing 6 sang 5 za sawm pali point pakhat pathum) a ni a. kum kalta 2024-25 sum ruahman BE aia kum thar 2025-26 sum ruahman punna hi ₹3,896.99/- (cheng nuai sangthum zariat sawmkua paruk point pakua pakua) lai a ni. Kan hriat theuh angin Mizoram-ah Autonomous District Council pathum: Lai, Mara leh Chakma Autonomous District Council te kan nei a. Anni hi India danpui Constitution of India Sixth Schedule hnuaia enkawl anni a. An thuneihna chin turte, an tih tur chinte leh an inrelbawl na atana dan siam chin turte siam sak vek an ni a. A tlangpuiin an thuneihna bil hi hnam zia leh tih dan phung, culture lam khawih te, inrochun thil leh elementary education lamah te a ni deuh ber a.

Kumthar 2025-26 chhung a LADC tana sum ruahman chu ₹25,934.07(cheng nuai singhnih sangnga zakua sawmthum pali point bial pasarih) a ni a. Kum hmasa budget estimate aia a punna hi ₹1392.36 (cheng nuai sangkhat zathum sawmkua pahnih point pathum paruk) a ni. MADC atana sum ruahman hi ₹22,975.49 (cheng nuai singhnih sanghnih zakua sawmsarih panga point pali pakua) a ni a. Nikum BE aia a punna hi ₹14075.48 (cheng nuai sangkhat zali sawmsarih panga point pali pariat) lai a ni. Tin, CADC atana sum ruahman hi ₹16,204.57 (cheng nuai sangkhat sangruk zahnih pali point panga pasarih) a ni a. kum hmasa BE aia hi ₹1029.14 (cheng nuai sangkhat sawmhnih pakua point pakhat panga) in a tam a ni. Thenkhatin kan duhthawhna lamah ADC te independent ang thaw thanga kan sawi hi a dik lo va. Kawng thenkhat, danin a phal chinah autonomy nei an ni tih hriatchian a tha awm e.

ADC te chungchang hi tlem te han tarlan duh ka nei a:

1. ADC-te sum hman tur hi State budget atangin Grant-in-aid ang a pekchhuah a ni a. Anmahniin budget an insiam ve atanga an mamawh ang zel District Council & Minority Affairs Department-ah thlenin, Finance Department sanction ang zela pekchhuah thin a ni a. An sum hmandan chipchiarah State Sorkar a inrawlh ngai lo va, anmahni thuneihna leh mawhphurhnaa a dah a ni. Helaiiah hian 2nd Mizoram Finance Commission in a bithliah sa anga kal a ni tih kan hriat kha.

2. ADC-te inenkawlina dan siam reng reng hi DC&MA kaltlangin uluk taka enfiah a nih hnuah Governor pawmpuina lak thin a ni a. Hei bakah hian ADC huamchhunga dan hman ve tur leh dan hman loh tur siam kawngah Governor hian thuneihna a nei bawk. Tun tumah pawh hian ADC pathumte atangin Service Rules leh Recruitment Rules hrang hrang an House theuha an pass tawh chu Governor approve turin District Council & Minorities Affairs Department-ah an rawn thehluat a, heng Rules te hi Governor-in DP & AR te, Finance Department leh Law & Judicial te nen zirchian tha a ti a, study group, cadre review committee din nise a tih angin study group hi December Ni 10, 2024 khan din a ni a, an report hi thlaruk chhunga thehluat tura tih an ni a. Heng Service Rules leh RR tifel tur hian study group report nghah mek a ni. He hmalakna hian ADC pathumte'n felfai leh mumal zawka hna an lak theih nan te, thawktu tur lak te, kaisan zel dan leh inkhuahkhirhna dan tur thlengin bung thar min kai pui dawn a ni.

3. ADC inawpna leh inrelbawlina hrang hrangte hi Governor kuta awm leh thuneihna a ni a; chutih laiin Governor hi Council of Ministers thurawn anga kal a ni tih kan hriat tlan vek kha.

4. Tichuan, District Council & Minority Affairs Department hian Autonomous District Councils te thuneihna chin leh anmahni chanvo leh an thatna tur hre rengin uluk takin a vil reng a. An kal thui lutuk palh tur te, dan bawhchhiatna awm thei palh te, fimkhur taka ven puiin a vil reng a; a tul anga Governor-in thu a tihtluk theih nan a pui thin a ni.

Demand No. 34 - Animal Husbandry & Veterinary Department:

Pu Speaker, AH & Vety Department enkawlina tura sum ruahman hi avaiin ₹86,31,13,000.00 a ni a. Kum kalta 2024-25 a sum ruahman BE aia kum thar 2025-26 sum ruahman BE punna hi ₹1620.35 lakh lai a ni. State sumbawm atanga sum hman tum chu ₹5711.93 lakh a ni a, Central sorkar atanga hmuh beisei chu ₹2919.20 lakh a ni.

AH & Vety Department chuan Mizote - sa, artui, bawnghnute leh ranchaw tea kan intodelh theih nan chak takin hma a la zel a. Ramdang atanga heng kan mamawhte lakluh nan hian kum tinin State pawnah sum tam tak hman thin anih hrerengin kawng hrang hrangin hma a la a. Tichuan, department hmalakna tlangpui tiang hian han tarlang ila - (**Speaker:** Anih leh tlaivar kan inhuam chuan aw)

1. Piggery Sector:

Vawksaa kan intodelhna turin hma lak ani a, hei pawh hi a chipchiar, a detail chuan a sawi theih tho va mahse, a point pawimawh a lian zual pathum chauh karawn sawi lang dawn a ni. A dang pawh tam tak a awm a. Integrated Piggery Farming, Lengpui tih a ni a, he project hi Vawkpui 36 leh talh tur chi Fattener 288 te a vulh theihna tura duan a ni a. Thawh zawh a nih chuan kum tin Vawksa matric ton 28.8 thar theihna tur a ni a. Hei bakah hian Vawk vulhtute tanah Vawkte 900 kumtin heta tang hian hralh chhuah beisei a ni.

2. Integrated Piggery & Poultry Farming, Ailawng:

He project hmang hian Vawksa kumtin matric ton 10 leh Vawk note 1055 thar chhuah tum a ni a, hma lakna thui tak a kal tawh a ni.

3. Boar Semen Station:

Saitual, Lawngtlai, Hnahthial leh Darlawn project, NABARD IRDF 28 na hnuaiah Vawk chi tha leh thar tam zawk vulh pun alo nih theih nan Saitual, Khawzawl, Lawngtlai, Hnahthial, Lawngtlai leh Darlawn-ah te hian Board Selling Station din a ni a. Hengte hi kei pawhin a hmunah ka tlawh tawh a, thui tak hmalak ngai a la awm a, chung atan te chuan Department pawh a inbuatsaih chho zel a ni.

4. Mithun (Zo Sial) Sector:

Mizo ran vulh pawimawh tak mai Mizo Sial vulhna lama hmasawna turin heng hmalakna te hi kal pui a ni. Mithun Multiplication Centre, Lungkawlh NEC hnuaiah he project hi kalpui niin Sial chi tha 180 a bul tanna tur project a ni a, hei chu Pu Speaker, i vei lama mi te pawhin anrawn sawi tawh kha. Tun March thla chung hian zawh tum a ni a. Lungkawlh: Sial vulh Co-operative Society member 62 awmna ten an enkawl chhun zawm tura project hi duan a ni. Kum tin Sial sa metric ton 159.35 thar thei tura beisei a ni bawk a ni.

Tin, 'Establishment of Breed Development and Conservation Center for Mithun Thenzawl, Serchhip District' tih a ni a. Rastrya Gokul Mission (RGM) hnuaiah project hi kalpui tur a ni a. Hei hi a danglam deuhhlekk a, hung bik chungga tlat tir, (semi-intensive system) hmanga Sial vulh dan scientific leh hlawk zawk entirna tur Demonstration Farm leh Zo Sial Mizoram Strange Mithun humhalhna tura duan a ni a. Sial 100 thlenga vulh theihna tura ruahman a ni. Tunah sawn Sialpui saw ka hriat sual loh chuan 5 vel emawni aw an rai mek a ni.

5. Poultry Sector:

Artui leh Arsaa kan intodelh theih nan nasa taka hmalak mek zel a ni. Zoram Poultry Development Society INDBRO Poultry Hatchery Farm, Tanhril khu tha taka kalpui zel a la ni a. Ar chi thlahtu Parental Stock chi hnih IDNBRO, Rainbow Rooster leh INDBRO Brown Layer te vulhin ar note thar chhuah nan hman an ni. He farm thil tum ber chu sa leh artuia Mizoram intodelh theih nan, mipui mamawh arte chi tha leh man tlawm mipuite hnena pek chhuah a ni a. He thil tum hlen thei tur hian thuam changkang bera thuam that

zel a ni. Kum 2024 chung khan artui 6,39058 thar chhuah a ni a. Arte 1,62,724 lai thar chhuah a ni baw a. Tichuan, he farm atanga thawhchhuah net profit atanga 25% hi sorkarah revenue atan chhunluh a ni.

Hma thar lakna -

Mega Egg Production Farm, Thenzawl:

He project hi arpui nuai 1 thlenga vulh theihna tura duan a ni a. He project hian nitin artui 89,000 leh arsa kumtin 170.54 matric ton thar theihna tura duan a ni. Hei hi a hmun hma te kan en fel vek tawh a. Pathianin rem a tih chuan hun reiloteah hian a project hi tan nghal theih, kalpui nghal theih kan beisei a ni.

Integrated Piggery and Poultry Farming, Ailawng:

He Project hman hian kum tin arsa 17.4 metric tonn thar theih beisei a ni.

Diary Sector:

Pi Baryl-i bial lam pawh ka sawi dawn ta lo a ni, min lo hrethiam se la. Bawngnhute-a kan intodelh theihna turin bawng vulhtute harsatna lian ber ran chaw fodder duh khawp loh thin sut kian nan AH&Vety Farm Complex, Thenzawlah ran chaw chinna hmun acre 57 ni thin kha ni kum 2024 khan acre 127 ah tih len a ni tawh a. Hemi bakah hian NABARD RIDF 30-na hnuaiyah ₹83.33 lakh sengin fodder farm chhunga thliarkar Riparian area thenkhat te Bailey Bridge dawhkaiin fodder chinna hmun acre 150 siam belh leh tura ruahman a ni. Hei hi kan vat zo vek tawh a ni. Kan fodder hmun atang hian kuminah ran chaw hring qtl 7042 thar chhuah a ni a. Ranchaw ro (hay) pawh qtl 1408 a bale 7041 tharchhuah a ni baw a. Kum 2025-26 ah hian ranchaw chinna hmun-a tin zawng hian tin 20 hmunah siam belh tum mek a ni baw a ni.

Pu Speaker, kan sawi belh duh chu kan Bawng Population hi kan ngaihlak tak ang khan a tla hniam hle a. A chhan chu a chaw vang a ni a. Thal a lo nihin mimal bawng vulhtuten chaw an phur a, mimal ram a lo ni a, ram neituten an lo phal lova, harsatna an taw a. Chuvang chuan, bawng vulhtute hian an bawng te an hralh a. Kum 2022-ah khan Bawngpui polulation hi Aizawl chheh velah hian 2600/2700 vel a awm a, 2023-ah khan 1700 velah a tla thla a, nikumah chuan 1200 velah a tla thla hman a ni. Chutiang chu kan dinhmun anih avangin bawng vulhtute an bawng inah kan kal chill a, kan luh chill a, an harsatna te hmaichhanah kan hria a, kan ngaithla a. Chuvang chuan kan bawng hi tanpui kan duh a, Bawng vulh hi an tui em em a, bul tan pui tha tih a ni a. Kumin Session kan tan hma ni khan fodder, a hay hi Durtlang leh Sihphir vela bawng vulhtute a thlawnin kan han pe a, chutiang chuan bul kan tan pui nghe nghe a ni.

Feed Sector:

Ran chaw concentrate feed man sang lutukin ranvulhna lamah harsatna nasa tak a thlen a. Sa, artui leh bawngnhute thlenga a rate sangin a nghawng thin chu sutkian nan hetiang hian Lengpui-ah hmalakna kalpui a ni.

Sustainable Animal Feed Distribution Centre System, Lengpui:

He project hi Sairang Rel Station tur behchhan a ranchaw siam sa leh Ingredients te rel hmanga man tlawm zawk a phurh luh a, a hlawma chhek khawlina Feed Godown tur a duan a ni.

Animal Feed Plant:

He project hmang hian nitin Concentrate Compound Feed 16 metric ton siam chhuah theihna tur a ni. Tunah hian Animal Feed Plant Ramrikawnah kan nei a. Mobilisation and Development of Animal Feed and Fodder Resources in Mizoram tih a ni a, Ran chaw tha man tlawm zawka siamna atan a din a ni. He Feed Plant hi kum 2024-25 chhunga ranchaw siam chhuah zat chu hetiang hi a ni. Ar chaw qtl 2231, vawk chaw qtl 3058, bawng chaw qtl 4015. Hetih lai hian kan feed plant te tun aia hlawk zawk leh tha leh zuala kalpui turin ngaihtuahna sen mek a ni a. Ran chawa kan in todelh theih nan kan feed plant te pawh a kalphung te her danglam a la tul mai thei a, sorkar chuan hma a la zel dawn a ni. Hei hi han sawi tlang ta law law ila, outsource rilru te pawh kan pu a, chumi tur chuan hmalakna te pawh bul kan tan a ni tih kha kan sawi ang a.

Tin, District Veterinary Hospital te, Veterinary Dispensary hmun hrang hrangah, tin, Rural Animal Health Centre hmun 5-ah, Doctor quarter leh VFA quarter te pawh hmun engmaw zatah tun kum kaltaah khan sak a ni a. Hmun thenkhatte phe chu hawn theih tura peihfel te an ni tawh a ni.

Pu Speaker, African Swine Fever (ASF) chungchanga hmalakna te tiang hian han sawi leh ila. Kum 2021 atanga ASF-in Mizorama kan vawk vulh te nasa takin a suat a, vawk vulhtuten harsatna nasa tak an tawh phah a, sorkar pawhin hemi kawngah hian hma lain theihtawp a chhuah zel a. Assistance to State for Control of Animal Disease (ASCAD) scheme hnuai National Action Plan on African Swine Fever Guidelines angin vawk suatte chauh compensation a pek theih a. Chuvangin, Mizorama ASF vanga vawk thi tam tak chu Government of India Scheme hnuai chuh (claim) theih a ni lo a ni.

Helaiah hian kan sawibelh duh chu vawiina kan ngaihtlak ang khan khawchhak lam Vietnam lamah te hemi atan hian vaccine tha tak hmuhchhuah a awm tih a ni a, sawi a paw em lo ang chu maw, keiniaw pawh hian vawk vulhtute hian an la lut a ni. Kan department chuan kan hriatpui lo, mahse mimalin an la lut a, a hman te pawh an hmang a. Mahse, kan han in zawh hian hetia an sawi ang hi a ni hran lemlo a niang, a pul kha a kal ngaiin a kal reng tho a ni tihte kha a hmangtute pawhin min hrilh dan a ni a. Government of India-ah hian vaccine hi a rang thei ang bera siam chhuak turin ngenna te kan nei a, kan thlen a, Bhubaneswar-ah leh Shillong-ah, conclave meeting-ah keimah ngeiin ka thlen a. ASCAD compensation hi central leh state hi 50:50 a ni a, chungte pawh chu kan state tan phurrit anih avangin CSS dang anga 90:10 a min siamsak turte pawhin Ministry of Finance-ah te hial kan thlen tawh a ni.

Hemi bakah hian kalphung-thar, mipui sorkar-ina kut hnathawktute a hmangaih zia leh a ngaihsak zia helaiah hian kan hmu thei a. State Disaster Management Authority thutlukna in African Swine Fever chu State Specific Disaster-a puan a ni a, State Disaster Response Fund norms angin ASF avanga vawk thite tanpuinan vawk 6 chinah, vawk 1 zelah ₹4,000/- a pek chhuah theih tawh dawn a, chhungkaw 4927 te tan pek tura ruahman a ni. Hei hi norms a ni a, norms pelin kan kal thei si lo a, chhungkaw khatin vawk eng emaw zat ti thi mahse, 6 aia tam ti thi mahse, 6 bak kha a pek theih lova, a puitling chinah ₹4000/- aia tam kha norms-in min phalsak lo a, chu chu min hriatpui atan ka duh a ni.

Tin, National Livestock Mission (NLM) Entrepreneurship Development-ah hian Mizoram hi National Livestock hnuai, Entrepreneurship Development-ah North East-ah ti tha ber

kan ni a, entrepreneurship Conclave, Hyderabad-a January ni 13, kumin 2025-a neihah tarlan a ni. He programme-ah hian scheme hrang hrang - vawkpui vulh, kel vulh, ar awp keu/hatchery leh ran chaw (Hay & Silage) siamte a awm a, he scheme hi thalai hna neilo, ran vulh leh ran chaw siam lama tuimi te tana siam a ni. India ram pumpuiaiah hian 9-na kan ni bawk a, he scheme kaltlang hian Commercial Farms 76 lai Mizoram hmun hrang hrangah entrepreneur-ten an din mek a. Heng Commercial Farm 76 te hi government of India atangin subsidy nuai 810 entrepreneur account-ah thun tawh a ni nghe nghe a ni.

He program hi Mizoram Sorkar Flagship Programme, Mizoram Handholding Scheme nen converge/ suihezawm a ni bawk. Hetianga convergence kan tih hian entrepreneur te, farmer te tan malsawmna nasa tak a thlen dawn a ni. Mi tam tak he scheme kalphung duhtuten harsatna an tawh thin chu bank loan lak ngai hi a ni a, bank lamah harsatna an tawh thin a ni. NLM-in subsidy a tumsak bakah sorkarin a ti thate hnenah loan interest a rulh sak bawk dawn avangin he an harsatna tawh thin hi nasa taka sut kian a ni dawn ta a ni.

Hand-holding chungchang:

Handholding scheme hnuaiiah loan dilna thahnem tak kan dawng a. February ni 25 thlenga dilna kan dawn dan chu hetiang hi a ni –

Loan package dilna hmuh zawng zawng - 3642,

CM's Special Package dilna hmuh tawh zat -10319;

Loan package Apex Body-a enfiah tura deptt-a thawn tawh zat - 133

Helaiah hian Pu Speaker, kan sawibelh duh chu, MNF, Congress, ZPM, PC tih a awm ve lo a, a ti hlawhtling turte ngei department Official-ten a hmunah kal chilhin an enfiah a, chuta tanga pek tlak ni a an hriat, an recommend ang apiang pek an ni dawn a ni. BJP phei chu a pawimawh ber an ni dawn.

Livestock Census lama hmalakna:

Pu Speaker, India rampumah ran chhiarpui wawi 21-na, 21st Livestock Census neih mek a ni a, he ran chhiarpui hi Ni 25, October 2024 khan Union Minister Pu Ranjit Singh-an a hawng a, February Ni 25-a zawh hman tura ruahman a ni a, technical lama harsatna neuh neuh avangin March Ni 31, 2025 thleng pawhsei a ni. Ran chhiarpui neih mekah hian Mizorama ran vulh chi hrang hrang Bawng, Lawi, Sial, Kel, Beram, Vawk, Sazupui, Sakawr, Ui leh Ar-va lamte chhiar a ni a. Tun dinhmunah hian Mizoram-in 50% zo tawhin, India rama a titha zual 10 zingah kan tel mek a ni.

Hnathawktute dinhmun:

Veterinary Doctor - Sanction post 115 anih laiin a thawk mek hi 70 an awm a, hetah hian hnaruk hi 45 a awm a. Tunkum kal mekah hian sorkarin kan mamawhna hriain post 10 lak min phalsak a, recruitment buaipui mek niin, written test pawh tih zawh tawh a ni nghe nghe a ni.

VFA - Sanction post hi 260 a ni a, thawk mek mi 118 kan nei a. Post ruak hi 142 a awm a, hetah pawh hian sorkarin VFA 10 lak min phalsak angin, tunah pawh hian VFA post 10 lak hna kalpui mek a ni bawk a ni.

Khangte kha a tlangpui ka han tarlan theih ni ta sela, Pu Speaker, heng Demand –

<i>Demand No.</i>	<i>Department</i>	<i>Amount in ₹</i>
19	Local Administration	2,25,15,82,000.00
23	Art and Culture	14,83,89,000.00
27	Council & Minority Affairs	6,51,14,13,000.00
34	AH & Veterinary	86,31,13,000.00
TOTAL		9,77,44,97,000.00

te hi he House zahawm tak hian min pass-pui turin ka rawn ngen e. Pu Speaker, ka lawm e.

SPEAKER: Aw le, tunah chuan kan Minister zahawm tak Pu C. Lalsawivunga'n a demand te –

<i>Demand No.</i>	<i>Department</i>	<i>Amount in ₹</i>
19	Local Administration	2,25,15,82,000.00
23	Art and Culture	14,83,89,000.00
27	Council & Minority Affairs	6,51,14,13,000.00
34	AH & Veterinary	86,31,13,000.00
TOTAL		9,77,44,97,000.00

A vaiin ₹9,77,44,97,000/- chu House-ah pass a rawn dil ta a. Remti apiangin 'remti', ti ula. Remti lo kan awm chuan 'remti lo', ti ula. (House-in a remti a) Awle, a lawm awm e.

Minister zahawm tak Pu C. Lalsawivunga demand chu House-in lungrual takin a pass ta a ni. (**Pu C. Lalsawivunga, Minister:** Pu Speaker, ka lawm e.)

SPEAKER : Tunah chuan kan Minister zahawm tak Pu Lalnghinglova Hmar-in kan sawihona te windup sela; sawifiah ngai a tihte rawn sawifiah in, a demand te House-ah pass rawn dil nghal bawk turin ilo sawm ang u.

PU LALNGHINGLOVA HMAR, MINISTER: Pu Speaker, ka lawm e. Kan Department enkawl pathuma kan demand te mi 25-in kan sawi a, a zavaiin ka lo chhinchhiah a, zaninah hian hun a rei deuh tawh a, a rang lama tih ka han tum ang a.

Demand No. 22 - Sports & Youth Services Department:

Sawitu hmasa ber Pu Jeje Lalpekhlua khan ruihhlo do chungchanga kan seminar neih kha a fak a, a lawmawm hle mai a. Ruihhlo do hi a taka kan kalpui mai ni lovin, inzirtirna te pawhin kan kalpui a. Khawtlang nena kan tanrualna te a fak a, kha kha nakinah kimchangin ka rawn la sawi dawn a ni. Pu Jeje Lalpekhlua khan Empowering Mizoram Sports - Vision 2036, Olympic kan neih chungchang ama tawn hriat atanga a rawn sawi chhuak kha a ngaihnaawm ka ti a. A bikin thingtlang naupangte'n sports coaching an mamawh a, chu chu pek kan tum tak pawh a ni.

Tin, Hockey Ground kha a rawn dil a, Pu Speaker, kan term chhung hian Hnahthial-ah hian hockey ground hi pek ngei kan tum a ni. Pu Speaker, thil hi ka tiam ngai lova, amaherawh chu, Hnanthial hian an phu a, kan tiam tawh chu tih hlawhtlin ngei pawh kan duh dawn a; kockey player tha an chher chhuak a.

Pu Speaker, he sorkar hian kum 2036-ah India-in olympic a thleng anih chuan 'Mizo

infiam mite tel ve ngei rawh se' kan tihnaah hockey hi a hnai deuh ber zinga mi, nichina zawhna awmah pawh khan kan thlan zinga mi a ni a. India ramah hockey thiam ber nih a ngai lova, a thiam 16 zinga kan tel chuan kan tel pha tlat a ni. Boxing-ah te, westling-ah te Judo-ah te chuan a ber nih a ngai a. Chuvang chuan, hockey ah hian a hmun hma kan la nei tlem chungin, kan hockey academy neih chhun hmeichhe tan bik Thenzawl (kan House Leader bial) ah chuta tang chuan India team-ah hian an tel thei reng a ni, hmeichhia-ah. Chuvang chuan, Mipa zirna lam hi tih changtlun tum ta ila, chung zingah chuan Hnahthial hi kan hmathlirah a tel a ni.

A dawt lehah chuan, Pu R. Rohmingliana, Thorang bialtu thusawi kha ka'n chhunzawm leh duh chu, 'Sports-ah kan duai vak lo' tih laia hi. Mizo hi kan infuihpawrh nasa a, football hi kan tha pangngai fu a; a bakah hi chuanin kan ropui lutuk lo a. National medal chu sawiloh, National Games-a qualify pawh hi kan la tlem hle a ni. Asia Games te, Olympic te chu thuhra a ni a. Sports-a kan investment ngaihtuah hian kan thlen chin hi a la hniam hle a ni. Chuvang chuan, a ni a, Pu Speaker, a hniam lama bul tan leh kan tum. Chutih lai chuan, Pu Rohmingliana te association, MATA (Mizoram Amateur Taekwondo Association) hi an fakawm a. Anni avangin kan mualpho lo a ni. Pu Speaker, tun tumah khanin MATA-in gold medal 2 National games-ah an han la hlauh a; kan investment tam tehluul nen a return hi a la chhe hle a. Chuvang chuan, Sports-ah hian a mihring tihhmasawn lamah hian kan tan nasat a ngai a. Taekwondo hi Vision Olympic, 2036 atana kan thlan zinga mi a ni.

Pu Speaker, Pu T. Lalhlipuaia, Lunglei West bialtu rawn sawi - VDP thuam chak chungchanga kha, kan House Leader sawi nen khan a inzulah ngai ta ila. Hemi special police officer lak theihna kha police manual-ah khan a awm a. Chumi kaltlang chuan Home Deptt. lam chan deuh a ni a. Thuamluaia Mual lighting chungchang chu a hmam Zawhna & Chhanna-ah ka sawi tawh a.

Tichuan, Pu Speaker, Pu K. Hrahmo, Tipa bialtu khanin LESDE-ah pawisa kan chan tlem thu kha a sawi a. Amaerawhchu, Pu Speaker, LESDE atang hian thil ropui tih kan tum a, chu chu nakinah kan department kan sawi hunah a lo ngaithla thei dawn a ni.

Tichuan, Pu Lalramliana Papua khan Pu Speaker, Lunglei-ah Excise department thuamchak an ngai e; lirthei thar an mamawh e a ti a. Lunglei ah hian lirthei thar 3 kan pe dawn a, Bolera 1, Bolero Camper 1 leh motor cycle kan pe dawn a, kan lei vek tawh nghe nghe a ni. Tun atanga hun reilo te ah Leitlangpui ah heng lirthei 3-te hi a thleng pheih ang.

Tichuan, Pu Speaker, Pu RM Chakma, Tuichawng bialtu kha nakinah kan la sawi ang a. Kan MLP amendment-a kha 'morally wrong' a ti a; a hma pawh khan khathiang deuh khan a sawi tawh a. A ngaihnan kha va thlak theih pawh a ni lo a. Amaherawhchu, 'rukru pawh an hlawk ve tho alawm' te kha a ti a. Kut-hnathawk tute kha rukru-ah a puh dawn dawn maiin ka hria a. Kha chu Tuichawng lamin an haw dawn a nia; sawi lo se a tha zawk awm mang e aw, ka lo ti deuh a, Pu Speaker.

Engpawh nise, a dawt lehah Pu VL Zaithanzama, Aizawl West-III bialtu ina a sawi Sport Authority of India hmunpui kha a bial chung, Mission Vengthlang chuan hnuai deuhah khuan a awm a. Discipline 7 atangin 4-ah a ni ta a, min pek belh turin kan ziak a, chhanna pawh kan hmu a. Tun dinhmunah chuan a la tih theih chiah lo a. Amaherawhchu, hun remchangah an ti a. Tichuan, Pu Speaker, kan sawi duh chu, SAI hi Manipur hnuai hian

kan awm a, inkalpawhna leh thildang a buai avangin Guwahati hnuai a awm hi kan dil a, an remti lo a; kan zu dil nawn leh a, hei a chhanna kan nghak mek a. Engpawh nise, a tihchangtlun theih dan hi kan ngaihtuah reng a ni.

Pu Robert Romawia Royte, Hachhek bialtu khan Sports pawimawhna te kha a sawi a, sorkar hmasain sports policy a siam 5% reservation, sorkar hnaah a tihchhuah chungchang a sawia kha, tuna kan police lak runpuiah hian kalpui a ni a. Pu Speaker, ka zawhna zawka chu, ‘term hmasaah khan an kalpui em aw’ tih kha a ni a. An kalpui hman lo niin ka hria. In kalpui em; kalpui chiah lo tiraw? Kalpui tha an ti a, ZPM-in kan kalpui dawn ni zawk awm tak a ni a. An la ti hman lo nge ni?

PU ROBERT ROMAWIA ROYTE: Pu Speaker, ni e; min rawn zawh let takah chuan, term hmasaah khan permanent recruitment ang chi hi a awm mang lo a ni, covid avang khan. Hna laka khatiang tihna chance a awm lo a ni e. An hnalak chinah chuan an kalpui ang.

PU LALNGHINGLOVA HMAR, MINISTER: Kha Sports policy kha an kalpui lo a ni, Pu Speaker. Tunah hian kalpui turin ruahmanna siam a ni a. Tichuan, an sports policy-a an duana kha tha takin sorkar tharin a chhonzawm a ni.

Helaiah hianin thil chi 2-3 inkawkalh deuh kha a awm a. MLTP Act chungchang kha an han sawi nawn leh a, Pu Robert Romawia pawhin. A tawpah heng ho hi chu a rualin ka rawn khaikhawm mai dawn nia.

Pu H. Ginzalala, Champhai North bialtu ina a sawi kha, Skill Training Centre LESDE hnuai a kan kalpui danah hi chuan Aizawl a inbawkkhawm vek hi a ni hranpa lo a. A training provider te hian anmahniin an han vah chhuahpui a, mihring awmna, a trainee-te awmna lamah an kalpui thin avangin, population tamna deuhah a bit deuh a. Champhai-ah mai pawh nilo, a aia khaw te deuhah te pawh skill training hi PMKVY hnuai a hi chuan kalpui mek a ni.

Pu Speaker, Pu Lalrinsanga Ralte, Serlui Bialtu khanin MLP Act chungchang bawk kha a rawn sawi a; ‘zu zawrh phalna bill tih te zu, kan zawrh dawn tak avangin’, tih te khan sawi nasa ang reng a. Nakinah kha pawh kha ka rawn chhang dawn a ni.

Pu Speaker, Pu Ramthanmawia, East Tuipui bialtu khani Tuipuiral Games avang te khan lawmthu a sawi a. He term chhung hian Tuipuiral Games leh Tuichangral Games te hi chu, he sorkar term tawp thleng hian an banah kan kai dawn a ni, Pu Speaker; kan chhonzawm zel ang kan puihna hi. Tin, tih changtlun zel pawh kan tum tih kha House kaltlangin, Tuipuiral leh Tuichangral mipuite ka han hrilh nghal ni rawh se. Pu Speaker, Pu Ramthanmawia thahnemngaihna kha football leh volleyball coach rawihna sum kha ni a, a buaithlak thin khawp mai a. Tunah hian Mizoram State Sports Council hianin kan coach nghet sa bakah hian mi 18 rawih belh a nei mek a. Chung zingah chuan football coach 4 an awm a, volleyball coach 3 an awm a. Chuti chung pawh chuan an indaih hlei thei lo a, thingtlangah hian an chhuak ve reng a. Engpawh nise, anni, sorkar-mi rawihthe hi chu pawisa chawi loa rawih theih a ni a. Amaherawhchu, an kal kual ve reng avang hian khua leh veng a tam si a, khua/veng pakhatin a han chan reng theih kha a ni chiah lo a ni.

PMKVY chungchang Session hmasaa ka sawi kha min han zawt a; a chhanna chu -

enrollment hi 4143 tih tawh a ni. Tichuan, jail chhungah, hemi jail leh correction center kan tih, deaddiction center-a inmate kan tih ho hi mi 257 leh tih an inziaklut a. Pu Speaker har deuh chu, Adhaar based te a ngai a, jail lamah hian khatiang kha a lo buaithlak ang reng a; phone number te ngai; thenkhatah chuan a tih theih ang ang chu tih a ni a. Tichuan, khami tana approved cost hi crore 31.06 a ni a.

Chutihrualin, PMKVY-ah hian thil buaithlak deuh a awm a, biometric attendance te a ni a. Zing leh tlai ah attendance pek ngai te anih thin avangin, tun hmaa awlsam taka Adhaar-a ziah luh ngawt ang kha a nih loh avangin, a mihring ziah luh tur zawka hi Pu Speaker, kan training provider te hian an vai ang reng a, an duh ang zat kan hmu zo lo deuh zawk a ni.

Tichuan, Pu Speaker Pi Prova Chakma, West Tuipui bialtu khanin Tlabung-ah khan khelmual kha min pe har tawh a tih deuh a. Tunah hian khel mual chei that tur 20 kan tih zingah khan Thangliana Mual, Tlabung hi a tel a, ₹10 lakh a ni a. a tender amount erawh chu ₹9 lakh leh tlem a ni ang a; chu chu a tel a. Tuanah hian contractor pawh open tender-a tih a ni a, SASCI hnuaiah a ni a; ground 20, nuai 10 tetein an then hrang a. Chutah chuanin AIE a niin ka hria, (ka hriat sual loh chuan) chu mite hnuaiah awm chu an ni a; ‘tih fel tawh a ni e’ tih kha ka han sawi a.

Tichuan, EMS khan Tlabung te a rawn thleng pha ang em, a ti a. EMS hian Pu Speaker, thlen phak lohna a nei lova, min koh a ngai ve thung a ni; Public-Private Partnership a ni. A khuain an koh chuan, a kal man erawh chu an tum ve ang kan ti a. A chhan chu, khua kha tang ve se kan duh a ni. Tichuan, maxi cab rate-in an ko phei ve ang a, tichuan sawlaiah training an pe thei dawn a. EMS kan han kalpui tak tak ang a, an duh phawt chuan an ko phei thei dawn a ni, Pu Speaker.

Tichuan, hemi Mizoram Building and Other Construction Workers Welfare Board hnuaia in ziahluhna chungchang Tlabung lamah kan lo hre ngai reng reng lova an han ti kha; ZPM sorkar hnua an han hre thar kha a lawmawm ang reng a, a lungchhiatthlak ang reng ve bawk a. Kan Sorkar har deuh a ni, Tlabung tan chuan, ka han ti deuh a Pu Speaker. Tichuan, September, 26th a registration tihura tih kha Pu Speaker, department lam khanin MLA an hrilh a. Amaherawhchu, a hun an sawn thu kha a lo dawng lo palh a ni a, kan thiam loh pawh a ni mai thei a. Kawng a chhiat avangin leh, ruah te a la tla si a, an kal thei lova.

Tichuan, a hun kha an sawn a, Novmeber-ah an va kal ta a. Pu Speaker, sawlai Tuichawng bialah registration thar 88 an awm a, chung zingah chuan - Tlabung Bazar atangin 24, Tuichawng atangin 62, Chawilung South atangin 2 a ni a. Tichuan, DLEO, Lunglei atanga va pheiin registration kha an va ti a. Pu Speaker, remchangah la ta ila; Bial 40-ah kal tur kan ti a, he worker welfare-a inziak lut tur ngawih ngawih labour te inziak lut lo an awm thin a; Mizoram pumin chhawr rawh se, kan ti a. Tun tuma membership drive kan neihah hian mi 5623 ngawt mai Pu Speaker, inziak lut thar an awm a. Mirethei leh harsa zawk, a chhawrtu 5623 a an pung hi kan lawm ve hle a ni.

Pu Speaker Pu Lalchhuanthanga Aizawl South II hi a zahawm ka ti a; a bial a vei em em mai a, khulaiah Industrial Training Institute (ITI) awmna hmun ITI Veng khu a bial a ni a. Ani pawhin vawi tam min hrilh a. Pu Speaker ka hriat sual loh chuan, ka han chhut a, ITI hmun, campus leh a chheh vela khu hei kum khat kan han Sorkar a ni a, vawi 9 anih loh chuan, vawi 10 ka tlawh tawhin ka hria a, official leh unofficial-in ka kal nasa a, hma lak

kan tum ve hle a ni. Nakinah kan sawi ang a, kan Sorkarin ITI building sak thatna atan crore 25 min pek mai bakah ITI chei that tumin sorkar laipui nen tang kawpin, Upgradation of ITI Scheme hnuaiiah hianin hma lak tak tak kan tum a, kan tang hle a ni, Pu Speaker.

Tichuan, Rajiv Gandhi Stadium panna kawng, sawlai R. Dengthuama Hall nen a ti kha a ni a. Congress hunlai khan eng emaw chen an zauh tawh a, a chhakah a zim zual lai buaithlak deuh a la awm a; helai hi PWD lam tur nge UD&PA tih kha department ten lo hriat sak thei se. Thil tih awm tak, a bial tan Pu Chhuana kha a lo auchhuak a ni. Pu Speaker, ITI kha hmun hrang hrang, Siaha leh Lunglei-ah kan nei bawk a. Tin, a building sak zawh tawh, a taka run chiah loh kan nei a. Chung chu Champhai leh West Phaileng-ah te, Thingdawl-ah leh Serchhip, (Chhiahtlang a ni mah mah zawk e) Serchhip daiah a ni a, chungte chu a ni a. ITI kalphungah hianin private entity te pawhin ITI hi an kalpui thin a, Sorkarin a kalpui vek lem lo a ni.

Pu H. Lalzirliana, Mamit bialtu khan thahnem min ngaihpuoi khawp mai a, sum leh pai kan neih tlem deuh thu te kha a ni a. Kan budget kha a pumpuiah 0.83% a ni a ti a. Amaherawhchu, tangkai taka hman kan han tum ang a, kan hman chhun chhun hi a that chuan a rawn lang dawn a. A visibility atang khan Pu Speaker, lo teh se, term tawp lamah heng department atang te hian engzat nge an achieve chiah tiha kha a hmuh theih dawn a. A sum tam hi sorkar-hnathawk hlawah te a kal tam ve bawk a. A sum khan lang tam chiah lo mahse, hmasawna chu a thawh theih tho turah kan han ngai a. Tunah department-a ka thawhpui kan staff-te thahnem ngaihnaian hma pawh kan sawn ve hle niin kan hria a ni.

Coaching Centre a rawn sawia kha MYC tih a ni chiah lo a, Mamit Officers' Club ten an thahnemngaihnaa an koh kha a ni a. Amah bawk khan, 'Sorkar inrawlh lohnaah hian a tha duh mah mah e,' a ti deuh a. Chuvangchuan, Sorkar inrawlh chiah lo khan kha kha han kalpui theih a ni a. Pu Speaker, MYC lamin sum leh pai a remchan hunah Mamit lam hi lo ngaipawimawh se a tha awm e.

Pu W. Chhuanawma, Tuichang Bialtu khan thil hrang hrang a sawi a, a sawi pakhat chauh kha kan chhang ang a. Football Academy Khawzawl-ah khan an dil deuh thup mai a, academy zawng hi chuan Pu Speaker, sum leh pai a hautak vangin kan ti thei lova. Assurance hi ka pe zen zen lova, amaherawhchu, Pu W. Chhuanawma bik hi assurance kan pe ang a, thla khat chhung football training nei turin Mizoram State Sports Council anih loh pawhin, Sports & Youth Services Department atangin Khawzawl-ah Football Coach kan lo pe ang e.

Pu K. Laldawngliana, Tuirial Bialtu khanin faknain thu a han tan a, a tawp lam kha chu min hau deuh a. Pu Speaker, engpawh nise, Kawnpui Hockey Academy kha tum hnih ka tlawh tawh a, kan sorkar chhung hian; kumkhat a la ni chauh a, tv. te pawh ka zuk pe a. Naupangho ka zu en a, an khawharin ka hria a, tih hmasawn zel kan tum dawn a. Tlawh zen zen a lo ni lova khu academy khu, an lo khawhar khawp mai a; amaherawhchu, hmasawn te kan tum a. Kan member Pu Jeje Lalpekhlua'n vawi khat chu min tawiamw nghe nghe a. Hockey pawh a lo ti thei phian mai a, ka khel thin e a ti a, khel ngai lo nen khan kan intluk vel a ni.

Tichuan, Pu Speaker, incentive cash award kha a rawn sawi a, pek loh tam tak te pawh an awm a hriat thu a sawi a. Tunah erawh chuan kan pe tawh dawn a. Incentive cash award

chungchang hi inthlan hmaa kan au-hla; ‘non-Olympic Sports Association zawng zawng pawhin an dawng ang’ tih, ka hriatsual loh chuan Ni 24th October, 2023-a Aizawl Press Club-a kan au-hla kha a ni a. Khatih lai kan leader, tuna kan Chief Minister ni ta Pu Lalduhoma kan va rawn a, ‘hei hi au-hlaah kan hmang duh e; pressure a awm a, heng association 10 hian an duh thu an rawn thlen e’ ka ti a. ‘E, lo puang rawh u’ a ti a, ka puang a. Chuvang chuan, a scheme thar pawh kan han duang nghal ta a ni.

Labour cess chungchanga a zawhna kha, Labour Cess hi Pu Speaker, crore ₹57,26,55,722/- 1st April, 2024 leh 10th Feb, 2025 chhung khan kan dawng a, a hmanna kimchang chu helai ah hian ziakin ka nei a, Pu Speaker remchangah kan la inpe dawn nia. A ni pawh khan, ‘beer leh wine hi zu a ni; zu hmanga kalpui kan tum’ te kha min han ti leh deuh a. Chuvang chuan, a tawpah hei pawh hi khaikhawm tur zingah a tel ve leh dawn a ni. A ni pheichuan wine rules an lawmnaa a thusawi mai bakah a thlalak an neih thu te pawh a sawi a.

Pu Speaker, Pu Lalmuanpuia Punte khan a thahnem ngaihna te kha a rawn sawi a, caromboard bak hi ka hre vak lo a ti nangin, Tuichangral Volleyball Club inkhel enturin LPS Arena lamah a pheive vang vang a; chuvang chuan a bial chu a ngaihsak hle a, a tui lohnaah pawh a bial chu ava tawiawm a ni.

Pu TBC Lalvenchhunga rawn sawi Private Placement Regulation Bill kha tunah hian Imigration Act, 1983 hnuaiiah inziahlul tumin Mizoram-a private placement agency-te LESDE kaltlanga an inziahlul theihna turin khulaiiah External Affairs Ministry kan zuk dawr a; tichuan, kan tifel lek lek tawh a. Tin, GST Registration te pawh kan tifel tawh a, tun atanga ni reilo teah hian kan pe ang tih hmanna ka sawi ang khan, anmahni lam kan nghak tawh a, a hmawr kan bawh thei hnai tawh an ti a ni.

Pu V. Malsawmtluanga, Lunglei North Bialtu khan Lunglei-a ground hrang hrangte, a then chu siam that hleitheih tawh lo a ni a ti a. Lena stadium te chu kum rei tak chhung lo awm tawh a ni a, a measurement leh thil dangte chu sawi vek tawh lo mai ila. In harsatna tawh kha tun leh tuna siamthat chu a har deuh ang a. Electric Veng field kha siamthat tumin kan han bei a, a hmumin a zo ngang lova. Contractor leh a department te pawh an inhawng viau a, ‘a tih ngaihna a awm lo e’ tih kha kan thutlukna a ni a. Electric Veng YMA te leh Lunglei District Football Association te an lo leng a, kan sawiho tawh a. Tichuan, Pu Speaker, Pu Lalrintluanga Sailo in Mizoram Youth Commission chungchang a sawia kha, nakin a tawp lamah kha pawh kha kan sawi mai ang a.

Dr. K. Beichhua, Siaha Bialtu in Excise a Lirthei mamawh a tiha kha tunhnaiah lirthei 18 thar kan nei a. ‘Excise Department hian kan din tirh ata a hlawma lirthei thar neih hi kan la nei ngai lo e’, an ti a, department pawh kan lawm ve hle a ni.

Tichuan, Dr. K. Beichhua khan hmasawanna a sawi thin hoa kha concrete leh iron rod khan a teh deuh tlat mai khan kan hria a, thahnem kha min ngaihpuia viau mai a. Hemi construction ringawt piah lamah hian hmasawanna hi a thleng thei a ni tih laia hi a hnam ang pawhin kan pawm a ngaiin ka hria a. He hmasawanna kan tih hi material hmuh theih leh lang thei ringawt piah lamah hian thil tam tak hi sorkar hnuaiiah hian a thleng thei a, chung lam te pawh chu kan rilru hian tin zawn se a tha awm mang e kan ti a. A fing ka ti a; thil sawichhuah awm tak hi a rawn sawi chhuak thin a. Arms & Ammunition hnuaiiah hian head pahnih a awm a tiha kha, pakhat kha Capital Head, pakhat Revenue Head a ni a,

a pawisa zat a inang chiah a. A sawi ang khan thuhmun, duplicacy emaw, repetition emaw a ni palh em a ti a, a ni chiah lova. Pakhat kha a leina a ni a, a head Capital kha. Arms hi chu revenue kha siamthat a ngai thin a, chumi tan chuan 1 lakh ve ve dah phawt a ni a, tihchangtlun chhoh zel tum a ni, Pu Speaker.

Tichuan, Pu C. Ngunlianchunga, Lawngtlai West Bialtu-ina ‘Sangau leh Chawnhu a pawisa ba cheng nuai 10’ a tih hi a buaithlak khawp mai a, Pu Speaker Administrative approval awm bawk si lo, expenditure sanction awm bawk si lova pawisa lo thawk ba an awm thin a ni. Hei chauh hi a ni lo a, a list hi kan nei dul mai a. Khangho kha khawi atangin nge pawisa kan pek leh tawh chuan ang tih lai kha, a harsa em em mai a; nuai 10 lai a ni an ti a. Hei khawdang pawh a awm ta teuh mai a, chungho chu keini tan khawi head atangin nge kan pek tawh chuan ang? Sawi ang khan, dil belh leh mamawh kha an tam bawk si a, chulai chu thil har deuh a ni a. Engpawh nise, Pu Speaker, hengho hi an lainatawm hle a ni.

Pu Lalchhandama Ralte, Opp. leader khan NGO tanpui theihna tur tia a sawi pakhat kha chu ‘Grant-in-Aid’ tih kha, Core Committee on Ruihlo Do atang hian pawisa kan dawng a. Heta a tam zawk hi chu Central YMA-ah te, Central YLA-ah leh MTP-ah te kan pe a, tlawmngai pawlte nen tha takin kan thawk ho chungin kan kalpui mek a ni, tih kha ka’n sawi thiam dan a ni mai ang a.

Tichuan, Pu Speaker, tikhan an zawhnate leh an sawi duhte chu kan chhangin kan sawi zui zo tawhah ka’n ngai a. Kan department kalphungho hi a tawi zawngin ka’n sawi ang a. *(interruption)*

PU ROBERT ROMAWIA ROYTE: Pu Speaker, khawngaihin; C. Thuamluaia Mual tih lai kha a react thei em aw?

PU LALNGHINGLOVA HMAR, MINISTER: C. Thuamluaia Mual kha Pu Speaker, nimin piah lamah emaw ni khan ka sawi tawh a zawhnaah khan. SASCI atanga lo kal a ni a. Chutah chuan, expenditure sanction-ah khan a zavaia a daih lo, a chanve chiah a daih avangin C. Thuamluaia Mual atan chauh a ni lo a, Chhangphut Field tan nena dah a ni a. Chuvangin, light a ni a; a zatve tiha helama a zatve tih chi a nih loh avangin ground pakhtatah ti phawt a ngai a, Chhangphut Field kan thlang ta a ni. Remchang hmasaah C. Thuamluaia Mual chu kan la ti ve leh ang. A zawhna kha ka chhang tawh niin ka hria a, chuvang a nia, ka’n chhan chhunzawm tak loh ni.

Tichuan, Pu Speaker, Empowering Mizoram Sports hi January Ni 14-ah kan Chief Minister-in a hawng a. Hemi hnuaiah hian ‘Vision Olympic, 2036’ tiin kan kalpui dawn kan ti a, ₹2.5 crore sum leh pai pek kan ni a. Hei bakah hian kan tipung chho zel ang kan ti a, SBI in cheng nuai 25 min pe leh tawh a; hmun dang atangte pawhin kan khawn chho zel dawn a. A kalphung chu kan sawi tawh a kan duhtawk mai ang a. Demand No. 22-na chhung a mi kha a ni a. Mizoram Sports Conclave, 2024, nikum June Ni 14-a kan neihah khan Vision-2036 theme neia India’in official taka Olympic a bid hmaa kan neih a ni a. Chuvang chuan, a nei hmasa berah kan inchhal a, hmannah pawh India ram pum huap Sports Minister meeting-ah ka sawichhuak nghe nghe a ni.

Khami tum khan Reliance te, TATA te, JSW te, sports journalist tha leh federation liana mi hrang hrang kha an awm a. Khata tang khan tuna kan vision a hi kan kalpui ta zel a,

kan hmang tangkai hle a ni tih kha ka'n sawi duh a. Chhangphut Field-ah lighting kha kan zo tawh a, tichuan incentive cash award (nichina ka sawi tawh) kha February Ni 13 khan Council of Ministers meeting chuan he scheme thar hi a pawm tawh a. Hemi hnuaiah hian Non-Olympic discipline atang pawhin hamthatna hi an dawng vek tawh dawn a. Mizoram State Sports Council hnuaia inziak lut sport association zawng zawng chuan an dawng thei tawh dawn a ni.

Tuipuiral leh Tuichangral Games chungchang kha ka sawi tawh avangin ka sawi nawn tawh lo ang a. Tuichangral Games hi an tan tep tawh a, chutah pawh chuan support hi kan pe zel dawn a. He sorkar hi a din chhung chuan Tuipuiral leh Tuichangral mipui sports ngainatute hian in games-ah hian ZPM sorkar a din chhung chuan support in hmu zel dawn tih hi kan han puang nawn leh duh a ni.

Tichuan, Arm-wrestling boruak te kha an ri deuh laih a. India rama armwrestling boruak lian ber Pro-Panja Mega-match kha Mizoram-ah December Ni 17 khan kan han buatsaih a, foreign atangtein an rawn lut a, tichuan hlawhling takin buatsaih a ni a. Tin, he bana-kaih sports kan kalpuinaah hian Samagra Siksha te nen Mizoram State Sports Council-in inremna kan siam a. Hemi hnuaiah hian Samagra Siksha in grassroot sports development programme an kalpui chu Mizoram State Sports Council nena tang kawpin tha taka kalpui kan tum a. Tunah hian hmasawna kan hmu chho dawn a.

Pu Speaker, sports infrastructure kha kan sawi nasa a kan sawi ang a. Sorkar hmasa kha a chak a, theihtawp an chhuah a. Tichuan, PMJVK hnuaiah te crore ₹420 chuang sports infrastructure atan sum leh pai an hmu a. Chutah chuan state share crore ₹42 kha pek ve a ngai thin a. Central share crore ₹227 dawn tawhah hian crore ₹21 pekchhuah tawh a ni a. Tunah hian crore ₹20 hi keini pawhin kan la pe chhuak leh dawn a, an kalpui infrastructure hi kan kalpui chhonzawm zel a ni, Pu Speaker.

Chuvangin, a hran a hraia 'an la ti lo, an la ti lo' tih chi pawh a ni lo a. An la tih loh kan tih dawna hei hi kan tawp hmak chuan a pawh dawn si a. Tunah pawh state-matching share ringawt pawh crore ₹20 pek tur kan la nei dawn a. Hei lo pawh hi thildangah pawh kalpui mek a awm a, chungte chu kan han sawi a. Tichuan, heng ho sorkar hmasaa tan kha, a tawp thlenpui kan tum a ni, Pu Speaker. A hmawr bawh ngei tumin theihtawp chhuahin kan vil ang a.

Amaherawhchu, kan hun lai chu ni se, 'heng hi chu helai lo deuha dah tur chu a ni maw le' tih chu a tam ve khawp mai a. Basketball la ben ngai reng reng lohna khuaah crore ₹1 hmangin basketball court kha kan sa thluah mai a, hmun hrang hrangah. Khulai constituency pakhat chhungah khuan a thahnem deuh a; a list pawh ka nei a, heta hi a awm dul mai a; Helai - Lallen, Phuldungsei, Saithah, Darlak chho vel kha a awm nasa khawp mai a. Eng pawh nise, heng sorkar hmasa bul tan ho hi a ZPM sorkar hian tihhlawhtlin kan duh a. Project kal lai 84-ah hian 38 chiah an la zo a, 40 dang PMJVK hnuaia mite hi kumin chhungin zawh hman kan han tum ang a. Amaherawhchu, 6 dang erawh chu kumin chhung pawh hian kan zo hman lo mai thei a. Pu Speaker, a la kal zel a ni. Chuvang chuan, hei hi kan chhonzawm zel a ni, tih lai kha sawi chian a thain ka hria a.

Tichuan, kan hma lakna turah hian April thlaah Aizawl - International Half Marathon hi kan ti dawn a, Athletic Federation of India atangin pawmpuina pawh kan dawng tawh a.

A ni tak hi kan rawn tichiang thuai dawn a. Pu Speaker, i hoin International Half Marathon-ah hian kan tlan dial dial ang chu. Annual event anga neih kan tum a, Indian runners mai ni lo, foreign runners thate pawh sawm tumin hma kan la a ni. Kan sum neih tam lo mah se puntir kan tum a, partnership in lian taka tih kan tum a. Half marathon km 21.21 tlan a ni ang a. Tin, open race km 10 tlan a ni ang a, tin, fun race km 5 te chu kan tlin ve hlawm ang chu maw; khatah khan tel ila; fit nation, fit state nih kha kan duh bawk a, chutiang tur chuan bul kan tan dawn a ni.

Pu Speaker, inchhuanna tur chu a la awm lova, kan zo thei a nih chuan kan inchhuang ve khawp ang a. Chu chu ‘integrating sports as skill’ tih hi a ni a, India rama la awm ngai lo hi a ni a. Kan hotute duhsaknain sport min chantir a, skill min chantir bawk a. Tichuan, kan zir kan zira ‘Sports hi skill a ni tlat a ni’ tiin, Skill Minister kan hmu tawh a; Union Sports Minister ka hmu tawh a; Secretary-te ve ve ka dawr tawh bawk a. Sports hi skill a ni. Skill Development ah sum tam tak a awm a, Sports-ah a awm si lova. Chuvangin ‘sports-a skilling kan tih hi skill angin min pawmpui rawh u’ tiin ka zuk sawi tawh a. Tin, a concept note kan zu thelut tawh bawk a.

Tichuan, a tirah chuan a remchang lo min tihpui a, amaherawhchu, kan nawr zel a. Tichuan, skill ministry chuan tunah hian ‘Sports, Physical Education Fitness & Leisure Skill Council’ an ti a, chuta an CEO chu an rawn tir tawh a ni. Taseen Zahid a ni a, Feb Ni 17-18 khan thil hrang hrang kan zir hova, ani pawh a hmin hle a. A haw thla a, Ministry a sawipui ang a; pilot project-in Skill hnuaiyah hian Sports kan kalpui ang a, a sum leh pai skill-in tum se tiin, chu chu India rama a wawi khatna atan a kalpui ngei tumin kan innawr a. Kan pangchang hle a, Sports Minister pawh vawihnih ka hmu tawh a; Tin, Skills minister tum 3 ka hmu tawh baawk a. Kan beisei asang hle a ni tih china kha kan sawi ang a.

Tin, academy chungchangah khan, Kolasib Saidan leh Lunglei Zotlang football zirnite hi player 30 ah kan tilian a. Training awlsam zawk tur leh hma an sawn theihna turin tunah hian kalpui mek a ni, Pu Speaker.

Demand No. 7 - Excise & Narcotics Department:

Demand No. 7 - Excise & Narcotic Department-ah khan kan hotu thenkhatte thil sawi loh dan zawngin kan sawi ve thung ang a. Thawktu indaih lohna hi kan sawi vek mai a, chu chu Excise-ah pawh hian a thleng ve a ni. Amaherawh chu, Excise a kan inzirtir danah chuan, indaih loh sawi kan phal tawh lo a ni. A chhan chu, a indaihloate kha an awm thut dawn si lova, a awmchhun ten theih tawp i chhuah ang kan ti a.

Amaherawhchu, Pu Speaker, zep thu a cheng lo; kan mi leh sate kan han inen a, puhi ngai ve tak takte an ni; fitness leh thil dangah pawh duhthu kan sam lo a ni. Chuti chung chuan theih tawp i chhuah ang u kan ti a. Sanction post 646 awmah hian post fill up chu 460 a ni a, vacant hi 186 a awm. Amaherawhchu, ‘vacant awm inngaihtuah reng chung chuan engtikah mah hna kan thawk lovang, a filled-up te hian i thawk ang u’, tiin kan infuih a, chuti zawng chuan kan kal a. Kan sawi chhan kher chu, Pu Speaker, NDPS Act hnuaiyah te, MLTP act hnua ah te (ME Act hnuaiyah) te hian thubuai kum 2024 chhung khan 7279 kan nei a, chu chu kan officer ten an han chingfel a. Kum 2024 khan excise officer ah hian chawhrualin case 234.81 zel chingfel ang an ni. ‘Kan neih chhun te hi i hmang tangkai ang u’, tih kha kan sawi duh lai a ni a. Chu chu deptt. dangah pawh a tih ve theihin ka ring a. A chhan chu, sorkar sum leh pai indaih lohna kan hria a; a vacant lai zel kan en hi chuan,

economy-ina a tawrh dan te kan hria a; kan sorkar sum sorkar-hnathawk hlawha a kal nasat zia kan hria a. A awmate hi en ila, ‘chu mite chu hna i thawhtir ang u’ tih laia kha, Pu Speaker, ka’n han sawi duh a.

Excise-te hian an thei tlat a ni. Officer pakhatina kum khata chawh ruala case 234 chin fel chu a hautak a ni. Mahse, Mizoram sorkar hnuiaia mi tho an ni a, an thei a ni. Thil dangah chuan kan entawntlak loh ang. Amaherawhchu he thilah hi chuan Pu Speaker, Excise Department-a ka thawhpuite hi ka chhuang tak zet a ni. Chuti chung chuan, kan zu mante hi kan sawi hian, kan ti tha nge kan ti tha lo tih hi a inchawkchhe tawh velin ka hria a. A khaptu kan ni a, kan mana hi country liquor rak zu hi 59694 ltr. 2024 chhungin a ni a. Zu bilh lai tin 108411 a ni. Chu chu kan dinhmun a ni.

Pu Speaker, kan mante hi a senchi (IMFL) um puitling 13578; a half (375 ml) um 6101; heroin kg 46.60 a ni. Pu Speaker, tun laia kan buaipui pakhat chu, he House kaltlang hian nu leh pate pawh an lo fimkhur theih nan, ganja, ‘marijuana’ kan tih kha a ni. A bikin, khawpui thalaiah hian hetiang hi ‘a zu thar an tam’ tih hi kan officer-te observation a ni a, a manganthlak thin khawp mai. Kan man ringawt pawh hi kg 578.92 a ni a, methamphetamine hi kg 140.839 a ni bawh. Pu Speaker, nichina ka sawi tawh ang khan, heng zawng zawng hi Excise & Narcotics Department bik mal ni lovin, tlawmngai pawl Central YMA te, MTP-te, CYLA-te leh midang thahnemngaite nen kan thawhhona a ni.

Tichuan, Excise hi sorkarin min duat a, hnathawk turin min duh avangin station pathum – Saitual, Khawzawl leh Hnahthial-ah kan hawng a, thawktute pawh dah an ni. Tin, post creation pawh min duhsak a, kan nei a. Tin, thawktu mi 33 lak thar tur an awm a, direct recruitment 16 kan nei bawh a. Nichinah ka sawi a, motor 18 thar kan nei a. Tichuan, khawtlang thenfai hnate kan thawk a.

Tin, Pu Speaker, Tourism Department-in Winter Fest an buatsaiha kha kan hman-tangkai a, he sorkar hian convergence hi a duh em em a; zan khat Ruihhlo-do Zan-ah kan dil a. Tin, Pu Speaker, Tourism Minister pawh lawmthu ka hrilh a, House kaltlang hian. A theme-ah kha zan khat mai ni lo khan ruihhlo do hi an kalpui a, an aupui zel anih kha, Winter Fest chhung khanin. Thalai sang chuang ruih hlo laka fihlim tura intiamin, pledge an zia k a.

Tin, Pu Speaker sawi tawh ang khan, kan hmalakna chu zu sample kan thawna lab-ah an la enchiang mek a, chumi chhuah hnu ah chuan mipui hriatin kan rawn publicize dawn a. Awareness campaign hi kil tinah kan kalpui a kan theih ang angin kan ti ve a. Department lam pawh an tang hle a ni.

Tichuan Pu Speaker, Excise chungchanga MLP Act hi; MLP Amendment Act kha kan chai ho a min pass-pui duh tawh lo a ni. Tichuan, an rawn ding a Pu Speaker, kan la inpuh chhe em em; ‘morally wrong’ tih te, ‘Isua duh loh zawng’ tih te leh thil hrang hrangin. Insawithiam kan tum a ni hran lo a Amaherawhchu, Pu Speaker, min puhtute khan kum 1998-2008 khan Mizoram-ah hian MLTP Act, 1995 kha an kalpui a, chumi chhunga mi chu a ni tuna kan tih thar tura hi. Keini hian he wine thil leh confiscated liquor kha Pu Speaker foreign dignitaries te leh tourist-te tan a an hman theihna tur leh medical prescription neite’n a an consume theihna tur phalna kha kan pe a, chu chu kum 1998 leh 2008 inkar khan an kalpui ngar ngar a ni.

Chu mai chu ni lovin, Pu Speaker, Muslim rama dan khauh ber an siamna hnuaiyah pawh heng hi pek thin a ni a. Tin India ram hmun danga zu khapna dan an kalnaah pawh heng hi kalpui thin a, zu khapna state ah khan zu an zuar kan ti chuang lo. Chuvangin, kan tih ngai reng midangin an tih tak avanga kha ti zawnga inpuh loh kha a tha zawk awm mang e aw ka ti a. Tin Pu Speaker chu mai chu ni lovin wine ah ngat phei chuan kum 2008-a wine rules introduce hmasa bertu leh, kum 2023 March thlaa ro an rel pawha wine rules-a bilh tel ngam lo, amaherawhchu public pressure a nat em avang te, Hnahlan leh Champhai lam an rawn thinrim tak avang leh Aizawl mipui leh social media a pressure a tam tak avanga 30th August 2023 a wine rules chawpchilh taka siam chawptute kha an ni a. 31st August 2023-a political party general headquarters (a hming chu ka sawi tawh lo mai ang) ina press release a lawmthu sawina leh an council of ministers an chhuan thu chhuahtute tho kha an ni.

Kha wine kha, grape a ni a; keini chuan dragon fruit te, sunhlu te, kawlthei te kan belh ang kan ti mai a ni a. Chuvangin, chhe lutuk bika inchhuah tur em ni aw? Kan lo chhe deuh anih pawhin, an that bikna awm chuang em ni, kan han ti ve deuh a. Engpawh nise, Pu Speaker, a chapter kha kan close tawh avangin ka duh tawh ang a. Min pass-pui duh tawh loh avang khanin han sawi chhuah kher kha tul kan ti tawh lo deuh a; mahse a boruaka kha an rawn chhuah leh takah khan ka'n rawn sawi leh a ni e. Pu Speaker, kan han tih dan zawng zawng en kha chuan a aia na deuha han chhan pawh kha ka rilru-ah chuan a awm a; ka ziah ang tak phei hi chuan a na angreng khawp mai a. Amaherawhchu, ka duhtawh mai ang a, a ziakah hian tawp mai se a thain ka hria.

Demand No. 28 - Labour, Employment, Skill Development & Entrepreneurship Department:

Tichuan, Pu Speaker, Demand No. 28 - Labour, Employment, Skill Development & Entrepreneurship chungchangah skill development kan kalpui dan te ka sawi tawh a. Tin Pu Chhuana zawhna chhan pahin, ITI-ah khuan Toyota Kirloskar leh Schneider Electric Foundation te nen ruahmanna kan siam a. Tin Pu Speaker, Union Skill Development Minister bula ka sawi chu, ITI hi tun hma chuan ropui thin a. Amaherawhchu, 'IIT' tia in rawn thlak hnu hi chuan 'T' hi a ding lamah a insawn tak avang hian kan hmuhnam ta lutuk a; chuang chuan, 'T' awmna hi sawn leh kan duh a ni ka ti a; a nuh kha a za khawp mai a. Hmasawn tir kan tum hle a. Sorkarin min duhsak a, a building sak tharna mai ni lo thil dangah pawh thuan chak kan tum a.

Tichuan 'Mizoram Building and Other Construction Workers' Welfare Board' kha Pu Speaker, awareness campaign kha nichina sawi ang khan, October Ni 14 leh November Ni 18 chhung khan Mizoram pumpuiaah kalpui a ni. Tichuan, hemi hnuaiyah hian Scheme on Skill Development kal tlangin training kan kalpui mek a, welfare board memberte hamthatna hi kan tipung nasa hle mai a Pu Speaker. Zirna chungchangah te, thihna chungchangah te, nau neih inlawmpuina chungchangah te, kawng hrang hrangah an hamthatna hi kan tipung a. Chuvang chuan, Mizoram construction workers leh thil dang, building leh construction workers zawng zawng kha chu rawn tel vek rawh u, inziak lut vek rawh u; in tan hamthatna sorkar laipui ruahmanna a ni a. Mizoram-ah sorkar laipui ruahmanna aia thaa kalpui turin tunah hian kan duang mek a ni. Chutah chuan skill development training kan nei dawn a, tunah hian pilot project atan Aizawl West I, II leh III ah te sample survey kan la mek a. Hemi kan tih zawh hnu-ah heng bialah te hian bul kan han tan ang a. Mi-rethei zawk te tana skill development kalpuina tur, chu chu hmun

dangah pawh copy paste theihna turin pilot project-in ruahmanna kan siam a. Chu mai chu ni lovin, Zirna Run Chawikan Uplifting schools kan ti a. Sawi ang khan zirna-in te hi heng kan labour fate luhna tur, anni chauh khan an luah khat zo lo a, midang miharsate lo chu sorkar sikulah kan lut mang si lova; chu mite tan chuan sorkar sikul building te, a tul chuan zirtirtu rawih belh te in a hmunhma kan chei ang a; infiamna hmunhma te, laboratory te, computer lam a ni emaw, skill upgradation lam emaw te kan dah ang a. A mihring pawh kan pe ang; a sum leh pai pawn kan vur ang, chu sikula chu. Chu chu a tlem berah pilot project pali angin kalpui tur kan ti a, nikum lamah khan kan pass tawh angin ruahmanna kan kalpui mek a.

Tichuan, Building & Other Constructions hnuaih hian Bana-kaih policy kan kalpui dawn bawk a, sum leh pai hmanga bul an tan ve theihna tur kha kalpui kan tum a ni. Ruahmanna kan nei chho mek a, tunah hianin kan welfare board meeting hnunung berin kan pass tawh a. A chhan chu, training kan han pe a, an rawn chhuak ta a ni. Pu Speaker, entirnan hmai siamte emaw, puanthui zir emaw, mistiri te emaw an han ni ta a, an han chhuak chiah a, bultanna tur pawisa an nei leh si lova, an buai der a ni. Chung mite banah chuan kan kal dawn, welfare board member-te chu. Ruahmanna la awm ngai lo a ni a, thil thar tih kan tum a. He welfare board-a hi Pu Speaker, a tak tak a nih theihna tur leh mi zawng zawngin an chhawr theihna turin a hnuaih inziaklut te'n an chhawr theihna tura siam len hi kan tum a, chutiang tur chuan ruahmanna kan nei a ni. A dang pawh hi kan la nei nual a, nimahsela Pu Speaker, ka duh tawh tawh dawn ang a.

Mizoram Youth Commission hi a tawpna atan hman ka duh a. Kan sawi tawh ang khan kum 2008-a din kha a ni a. Tuna Hotel Management & Food Beverages training kan neih mekah hian mi 124 an training a. Kan train chhuahte hi an duh ve khawp mai a; Pu Speaker, hemi ITC Grand ah te, Lemon Tree ah te, Sarovar Hotel Chain-ah te an lut a, an thleng sang khawp mai a. Kan train chhuahte chu an hmu zel a, 100% job placement kan hmu e an ti a ni. Tichuan MYC hnuaih hianin he coaching centre-ah hian mi 588 tun financial year-ah hian an train mek a. He sorkar a din hnu hian a hnuaih training zinga mi 33-te hian sorkar hna an hmu tawh nghe nghe a ni. Pu Speaker kan tih that ve chu (kan inchhuanna te pawh ti ila) British Army lak chungchangah hian a ni a. Hei kan Chief Minister hian hei hi a vei a, Youth Commission lamin an han bawhzui zel a. Commonwealth Nations tan inzhiah luhna hun an hawn nikum August thla khan man chawi miah lovin MYC-in tihsak rawh se tih a ni ta a.

Tichuan an han buaipui ta a. Khami hnuaih khan mi 247 dilna form kha an thehluk sak hman a; a thahnem tham hle a ni. Tichuan, heng zingah hianin tunah hianin Visa te engkim tifelin pali an chhuk tawh a. Tichuan, a bak hi calling letter te beisei mek a ni a; pasarih hi chhuk thei turah kan beisei a, a bak hi a tahtawlin zawi zawiin. Pu Speaker, hna pakhat pawh hmuh a harsat laia heti zat zawi zawia MYC kaltlanga an lut zel hi kan lawm hle a. Lalit Group, New Delhi te nen thawk hoin tunah hian mi pasarih lak an ni a, Lalit Hotel Five Star Hotel-ah an thawk chho mek a. Online Mentorship Programme kan sorkar officer thawk mek MPS, MCS, MF&AS rualte hianin a thlawnin online-in mentorship programme zirlaite leh kan hna zawng mekte tan an kalpui bawk a.

Tichuan tun hnai Inrinni khan Top International Human Resources Management Consulting te nen thawh hona Letter of Intent kha kan ziak a. Kan Chief Minister Delhi zuk zin zawk kha anni lam hian an rawn zui chho nghal a. Tichuan, 'LESDE lam nen lo inbia ula, MYC te nen inthlunzawm dan zawn ni rawh se' tih a ni a. Kan han indawr nghal

a; kan han sawi a, an hmin nghal mai a. Tichuan, Pu Speaker, tunah hian MYC-ah hian Chinese tawng, Mandarin Learning Training Centre kha din a ni dawn a, a vaiin kum khatah nuai 25 vel emaw chawi a ngai turah kan ngai a; nuai 50 atan 100% in min tum dawn a, agreement kan zia fel nghal a ni.

Tin, chumi hnuai chuanin hna sang deuh leh hniam deuh te a awm dawn a, electronics, software, civil works leh language translation te, a hrang hrang zir theihna a ni dawn a. Nakinah Taiwan-ah Pu Speaker kan inrem danah chuan (a thuphung a la ni a) kum 2 chhung hian engzat nge kan tih theih ang aw kan ti a, anni chuan 1000 pawh in thei mai ang a min ti a. (a number hi chu sawi sual a awl a, House-ah hi chuanin). Engpawhnise, a tam thei ang ber tih chhuah kan tum a, Mizoram Youth Commission kaltlangin tunah hian chu chu hmachhawp a awm a. Kan Sorkar pawisa hek miah lo hian nichina sawi ang khan hna pakhat siam pawh a har laiin, MYC kaltlangin hna eng emaw zat kan hmuhsak chho ve mek a, kan lawm ve hle a ni.

Tichuan, MYC finance leh audit chungchang kha a hmawr bawh nan han hmang ta ila. Thil hi kan thlirdan a inang lo thin deuh bawh ve a. Engpawh nise, MYC hi kan official ten an han zawng thin a, a dinna kha gazette-ah hian an la haichhuak zo lo nghe nghe a. Printing & Stationery-ah te an va dil a, an hmu zo lo a, tum hnih-thum ngawt an va kal a. Engpawh nise, kha lai kha kan hmuh theih mai loh kha a lo awm a. Tichuan, MYC Act tuna kan kalpui mek ah hian General Financial Rules kha zawm a ni lova; a engah mah khan zawm a ni ta lo a ni.

Nichina kan han chhiar chhuah MYC Act chapter 4-ah khan, Finance Account Report-ah pawh khan Pu Speaker, i phalnain, 13(1) ah khan, “The Commission shall maintain proper account and other relevant records and prepare annual statement of accounts in such form as may be prescribed”, tih kha a ni a. Rules-a umzui a nih tak loh avangin, kha kha engnge a nih kha an hre ta lo a ni ang chu, a audit kha kum 16 chhung khan anmahni pangngai chuan tum hnih audit a ni a, a bak chu Officer-te request-in tum thum kalpui a ni. A bak zawnga chu khang kum tam takah khan audit pawh a kal lo; kum tawpaw pawh an close chuang lo a nih chu audit-in. Chuvang chuan, chu chu a fel lo a ni. Pawisa duh duh huna chin leh theih, pawisa transparent lo lutuk tute emawina duh ang leh free taka a hman theih, General Financial Rules pawh paltlang lo hi chu a tha lo e tiin, keini chuan hei hi ‘in line with GFR’-in kalpui ila kan ti a.

Tunah phei chuan khami kan han neih hma hauh khan Pu Speaker, tuna kan Finance department chuan 3rd quarters leh 4th quarters-a GIA atana MYC-ina pawisa an dil pawh khan, “rawn dil tawp tawh suh u; in rawn dil tawp chuan, a fel lo ang; estimate te pawh rawn nei ve rawh u”, an ti a. A hma kha chuan dil tawp, pek tawp, hman tawp a ni; a hnuah a remchan huna ziah leh kha a ni mai. Chu chu a awm loh avangin, “awm tawh rawh se”, tiin kan han bilh ta a ni a. Tichuan, thawktu lak dan ah te mumal zawk, sum leh pai vawn dan te mumal zawk; tu pawh chairman niin tu pawh officer ni se, General Financial Rules kha an zawm tawh dawn a.

Chuvang chuan, he MYC Bill 2025 kan han put luh kha Pu Speaker, a tha hlein kan hria. Transparency anih piah lamah Sorkar dan zawm kawngah pawh dik zawk. Tin, Dân kha a lo upa ve tawh a, kum 16 lai a lo kal tawh avangin, siamthat ngai leh belh that ngai eng emaw zah a awm a. Chu chu a ni Pu Speaker, kan rawn put luh kha. A pass chu kan pass

ta a. A pass tu kha kan tlem ta deuh e tih mai a ni a. Amaherawhchu, Pu Speaker, kha kha a kaltlang zel dawn a. Mizothalaite'n Youth Commission tha zawk leh changlung zawk, a enkawl danah pawh langtlang zawk an nei thei tur hi kan lawm hle a ni.

Pu Speaker, ka duhtawh dawn ang a. Thahnemngai taka min sawipuitu an awm a, min han khak deuh tute, min han sawisel tute, min han puhmawh deuh tute pawh an awm a. Amaherawhchu, kan thahnemngaih dan a inang lo a, thahnemngai tak vek kan ni e.

Tichuan Pu Speaker, heng ka heng demand-te –

Demand No.	Department	Amount in ₹
7	Excise & Narcotics	57,08,65,000.00
22	Sports & Youth Services	27,38,35,000.00
28	Labour, Employment, Skill Development & Entrepreneurship	29,48,75,000.00
TOTAL		1,13,95,75,000.00

he House zahawm takah hian min pass-pui turin ka rawn dil e.

SPEAKER: Aw le, tunah chuan Minister zahawm tak Pu Lalnghinglova Hmar in a demand-te:

Demand No.	Department	Amount in ₹
7	Excise & Narcotics	57,08,65,000.00
22	Sports & Youth Services	27,38,35,000.00
28	Labour, Employment, Skill Development & Entrepreneurship	29,48,75,000.00
TOTAL		1,13,95,75,000.00

Chu House-ah pass a rawn dil ta a. Remti apiangin, “remti” ti ula; remti lo kan awm chuan “remti lo” ti ula. (House-in pass a remti a). A lawmawm e.

Aw le, Minister zahawm tak Pu Lalnghinglova Hmar demand chu House-in lungual takin a pass ta a ni. (**Pu Lalnghinglova Hmar, Minister:** Pu Speaker, ka lawm e.)

SPEAKER : Report kan ngaithla duh leh em? Aw le. A hnuai atangin aw; hun hmang thiam atangin -

Vawiin chu Pu K. Hrahmo a champion tlat mai. Minute 10 tling lo, minute 9:38 a hmang. A dawtah Pu Lalrinsanga Ralte, hma a sawn khawp mai a ni hi. Minute 10:16 a hmang a ni. Pathumna ah chuan, Pu VL Zaithanzama, Minute 10:22 a hmang a ni.

A chung lampang, a top lampang kan sawi ve leh dawn em? Sawi ang aw, A top -

Pakhatnaah chuan, Pu TBC Lalvenchhunga, minute 14:22;

Pahnihna, minute 14: 22 tho hmangtu, Lt. Col. Clement Lalhmingthanga;

Pathumna hi hmannah kan infak a, ‘top 3 ah i lang lo tlat mai’ a kan inti a, mahse hei a lang leh tlat mai a; Pu Lalrintluanga Sailo, minute 13:49 a hmang a ni.

Kan demand sawiho kha kan minister-te nen kan zavaiin mi 28 in kan sawi a ni. A lawmawm hle mai.

Hei kan House Leader reng reng pawh hi thil a timak ka ti a; Delhi-ah te hian a kal fo a, khu tah khuan 'ji' khu an uar khawp a, 'Modiji' te an ti a, 'Amit Shahji' te an ti a, 'Jaishankarji' te an ti a. Hmanni Delhi atanga a lo kal haw kha Pu Rijiju nen an inhmuh thu kha a sawi a. Khatah khan 'ji' tih kha a hmang thang deuh nge ni, 'Pu Rijijuji' a rawn ti ringawt mai bawk a, a zia lo khawp mai a. Diar khim ho zinga a khawsak fo chuan an bual a mai ang tih te pawh a hlauhawm viauin ka hre mai a.

Kan Opposition Leader pawh hi 'nichin' tih turah 'nachin' tih a ching an ti a nia aw. Ka hre lo mi sawi a nih chu.

Aw le; vawiin atana kan business chu kan zo ta a. Naktuk March Ni 16, (Thawhlejni) 10:30 AM ah kan thukhawm leh dawn nia.

Sitting is adjourned. (9:56 PM)